

# NA SEPNGI SHA MIHNGI

I.A THOH BAD PYNMIH  
DA U PASTOR LANGSTARLEY DKHAR B.A., B.D.



Gospel - Revival Literature

Acc. No. 103/Ek.1.

Class No. \_\_\_\_\_ Book No. \_\_\_\_\_

Author Dkhar, Langstanley (Pastor)

Title Na Sepngi Sha Mihagi

---

Acc. No.

## DISTRICT LIBRARY

GOVERNMENT OF MEGHALAYA

EAST KHASI HILLS

1. Books may be retained for a period not exceeding **15 days** by members.
2. Books may be renewed on request at the discretion of the Librarian.
3. Dog-eared the pages of a book, marking or writing therein with ink or pencil, tearing or taking out its pages or otherwise damaging it, will constitute an injury to a book.
4. *Any such injury to a book is a serious offence; Unless a borrower points out the injury at the time of borrowing the book, he/she shall be required to replace the book or pay its price.*

**Help to keep this book fresh & clean**

## NA U NONGTHOH

Kane ka kot : **“Na Sepngi sha Mihngi”**  
ka long ka kot kaba U Nongthoh u ai ha ki  
nongpule halor kata ka jingithuhpaw shaphang  
ialade, kaba u la ioh ha ka jingphohsniew ha  
ka jingthiah pang jong u ha **Khasi-Jaiñtia Pres-  
byterian Synod Hospital, Jaiaw (kamra 26).  
Private ward, mynba u la leit thiah pang arbnai  
tam arsnji, naduh ka 22.6.1987 haduh 24.8.-1987.**

Nga ainguh eh ia U Blei uba la pyrsad  
mysiem ha kaba **thoh** bad kyrshanbor ruh ha  
kaba **pynmih** ia kane ka kot. Na ka byrita ia  
lade bad kito kiba la **‘ia kyrshan lem ia nga’** ha  
ki jingduwai jong ki, ngam lah khlem da ong  
kum U Syiem Dabid haba u duwai : **“Naba kiei  
kiei baroh ki wan na me, bad na ka jong  
me hi nga la ai ia me” (1 Khro 29 : 14).**

Ka jingmut kaba rieh kaba don ha kane ka kot,  
kat kum ka jingithuhpaw kaba u nongthoh u la ioh,  
ka long ka **‘jingsympat’** U Blei ia uno uno u ba-  
ngeit jong u uba u leit, kumba ka ktien U Blei ka  
ong : **“Kat ia kiba nga leit, nga sneng bad nga  
sympat” (Jingpyn 3 : 19).** Pynban kata ka jing-  
sneng sympat jong u kam kut tang katta hi,  
kumba ong **‘ka ktien ki riewmynhyndai’** ha  
ka ri jong ngi : **“U Blei u sympat ia u briew  
da ka kti kadiang, bad u lum pat da ka  
kti kamon”.**

Haba U Blei u la plie ia ka jingithuhpaw,  
u plie da u **‘shabi’** jong u. Une u shabi jong

u u long 'uba phylla'. Shislen haba u la plie ym lah ban khang, bad haba u la khang pat ym lah shuh ban plie. "Uta U Bashisha, uta uba don u shabi jong U Dabid, uta uba plie, te uno uno ruh um khang, bad u khang te uno uno ruh um plie" (Jingpyn 3 : 7).

la ka jingbatal la ka jingithuhpaw, dei ban ai ha ki 'nongpule' ba kin pule; Kumba U Blei u la kren ha U Habakkuk u nongiathuh-lypa : "To thoh ia kane ka jingithuhpaw, bad to pynshai bha ia ka halor ki lyng-kniap, ba uta uba phet u lah ban pule ia ka. Naba kane ka jingithuhpaw ka long pynban ia ka por ba la buh, bad ka pyn-kloi sha kaba kut, bad kan ym lamler : la ka pynslem ruh, to ap ia ka, naba kan poi shisha, kan ym pyntud" (Hab 2 : 2, 3).

Ka jingkhraw jong ka jingithuhpaw ka long ka 'jingjia' kaba 'la jia' bad ka 'ban sajia'. Namar kata u nongthoh u donhok ban kyslew lalade bad ha kito ha kiba la ialap.

"Kumno'n iaid ki Um ba jylliew,  
 Hikai, Trai, te ngan sngewkhlañ,  
 Ha ki jingat phyllung jong ki,  
 Ngan ym shem ka jinglehraiñ ;  
 Ai ngan khymied sha ki lum bah,  
 Kiba don sha shiliang wah  
 Ai ngan bat ka kti ka jong Me,  
 Ha ki um, Ko Trai babha".



### III

Kaba loh ia ka jinglthuhpaw ka long ka kam phylla. U nongthoh u donkam ban 'phia' bad 'sakhi' shaphang kane. U Blei u dang leh ia ki kam phylla ym tang ha nga, hynrei ha kiwei ruh.

**'Ai burom ia U b'u ia leh kam phylla'.**

Ka burom jong ka kot ka dei tang ka jong U Blei. Wat ka burom jong U Nongthoh ruh kan sa dam noh ha ka dewmet, khnang ba kan mih lung sha ka jingim bymjukut.

**'Ah Diengphna kaba shan ia nga !**

Ban phet na Me lei lei ngam nud ;

Ka burom ha khyndew nga bret,

Bad ka mihlung napoh dewmet,

Ka jingim ban ym kut".

**Tarik**

**9.10.1989**

**Lum Batemon,**

**Jaiaw Leitdom,**

**Jaiaw, Shillong. 793002.**

**Pastor Langstarley**

**Dkhar.**

# KA JINGKDEW IA KI LYNNONG

## Lynnong

1. Ka kyrteng jong ka kot	...	...	1
2. Ka sepngi ka dei ban wan	...	...	7
3. "Ka sngi ruh ka mih, bad ka sngi ka sep" (Eklestias 1 : 5).	...	...	17
4. Ka sngi ka la mih	...	...	21
5. Ka sngi ka la dang klew shajrong	...	...	32
6. "Bad haba la ieng ka sngi"	...	...	60
7. "Hapoh ka sngi"	...	...	88
8. "Halor ka kali kaba mareh stet"	...	...	190
9. Ka jingduwai la janmiet.	...	...	195
10. "La pynlyngkot noh ia ka por" (1 Kor 7:29)			203
11. Ka sngi ka la noh	...	...	222
12. Ka miet ka wan	...	...	233
13. Ka step ruh ka wan	...	...	246
14. "Namar kata phi to pyndonburom ia U Trai ha mihngi". (Isa 24 : 16).	...	...	252
15. Ka jingpynkut	...	...	258

## KI KYNTIEN LAMPHRANG

Ha ki nongpule baieit eh jcng nga : *Ka kirteng jong ka kot ka lah ban pynlyngngoh shipor ia phi ki nongpule, wat haba phim pat peit shapoh, namar ba kam iahap bad ka jing-sngewthuh ba solonsar jong phi. Lehse phi tang shu iohi ia ka, phi lah ban ong halade, balei ba une u nongthoh um buh da ka kirteng, 'Na mihngi sha sepngi' ka ban iadei bad iahap kum haba ka sngi ka mih na ka jaka kaba thikna jong ka, ka tawiar bad ka leit sep sha ka jaka ba la buh jong ka. Lehse phi lah ruh ban buh jingkylli ia u nongthoh, namar ba ym ju iohi 'mynmiet' ba ka sngi kan mih na sepngi da kaba iaid tawiar bad wan biang sha mihngi. Shuh shuh kiba kwah ban thied bad pule ia kane ka kot, ki lah ban shu shim beit halade ba kane ka kot ka iadei bad ka jingwan ka gospel sha kane ka ri baieit jong ngi, namar ba dei ki nongsepngi kiba la wan ban ialap bad ai ia U Jisu khrist ha ngi kiba shong sha mihngi, khamtam namar ba ma nga uba thoh ia ka kot, nga long u Pastor jong ka balang Presbyterian.*

**Kam pher lada ki jing-ngew jong phi** ki nongpule ki long kiba kumno kumno ruh, ha kane ka kot **'Na sepngi sha mihngi'**, ki don katto katne ki **'jingshisha ba khraw'** kiba ia-thuh ha ngi baroh shaphang kaba ladep, kaba mynta bad ka ban sawan, kam pher lada ki kren ia ka jingim jong nga ne ia ka jingim jong phi ruh. Khlem da pynsngewsarong shaphang ialade, ki **'jingshisha ba khraw'** ki long kum ki **'khnam'** kiba siat ha ka dohnud jong nga bad jong phi, kat kumba nga la kdew harum ter ter:-

(i). Ka kot ka **iadei** bad ka jingim jong u briew uba ngeit bad shaniah lut ha ka jingpyn-iaid ba stad bad ka mon bakhuid jong U Blei.

(ii). ka kot ka **kren** ia ka jingkylla jong ki por kiba wan ha ka jingim jong u briew u ba la jied jong U Blei, ha uba U Blei u imon ruh ban pynshet ia ka jingkit khlieh kaba thym-mai.

(iii). Ka kot ka **thew** ia ka jingiathuh-lypa da ka jingjia kum ka **'dak'** ban kdew ba uba ngeit U Trai, haba u la lah pyndep ia kawei ka jingiaphet, un hap ban pyndep sa ia

*kawei pat ka jingiaphet jong ka jingim bad leh hok ruh ia ka.*

(iv). *Ka kot ka batai ia ka jingbuhrieh ka jingmaian Blei kaba U Blei tang ma u hi bad ha ka bor jong u, u leh ia ki kambah ki-ba ngim lah tip, iohi bad shemphang ; syriem kumba ngim kot sngewthuh kumno ba ka sngi haba ka la dep sep, ka iaid ha ka jingbuhrieh bad wan mih pat mynstep sha la ka jaka na kaba ka la mih. Tang U Blei uba tip.*

(v). *Ka kot ka phawer shaphang ka jingkyrmen kaba im kaba uba ngeit u buh beit ha U Blei, khamtam ha kaba u dei ban wad ia ka bor mynsiem bad ka jingiarap kaba na jrong, lynda kumta un ym lah da lei lei ban iaid ia kane ka jingiaid lynti kaba shitom.*

(vi). *Ka kot ka buh ia ka 'hynrei' jong ka jingim khristan jong ngi shimet shimet marwei marwei. Kata ka 'hynrei' ka dawa ia ki artylli kiei kiei ba ngi dei ban leh: hynrei ngi dei ruh ban nang san ha ka jinglong jingim khristan, hynrei ngi dei ruh ban trei dep ia ka kam U Blei.*

*Nga la duwai ha U Blei ba un ai ia ki khubor ha ngi ki nongpule lyngba jong nga uba long tang u 'khiew khyndew' uban sa pra noh, bad ba un thoh ha ki 'maw-lyngkniap' ka dohnud jong ngi da u 'diamond' bad u 'khulom ksiar' jong u hi; bad ba un 'pynslah' ha ki 'sla' ka jingim jong ngi ia ka 'kot pule' kaba iadei bad ka 'diengphna' ha ka jingim jong ngi.*

*Khublei ia phi.*

*Tarik .*

*Pastor Langstarley Dkhar.*

*9. 10. 1989.*

*Lum Batemon,*

*Jaiaw Laitdom,*

*Jaiaw, Shillong.*

## KA KYRTENG JONG KA KOT

---

**‘Na Sepngi sha mihngi’, ka long ka kyr-teng jong kane ka kot, kaba mih na ki jing-sngew mynsiem bad jingphla shemmynsiem kiba iadei bad kawei ka jingjia kaba la jia, bad ka ban sah jingkyngmaw ha ka jingim jong nga. Kane ka jingjia ka la long ha ka jingithuh paw shaphang ialade ha ka jingphohsniew ka ba la long ha ka por dangstep phyrngap, hapdeng 4. 30 a. m bad 5. 30 a. m jong ka 23 tarik, u Naitung, 1987, mynba nga la thiah pang ha ka kamra arphewhynriew (Room No 26, Private Ward) ha Khasi—Jaintia Presbyterian Synod Hospital, Jaiaw.**

**La ktik bad pynsmiet ia nga da U Myn-siem jong U Blei, ba nga dei ban ai ia ka khubor jong ka ktien U Blei, lyngba katei ka jingjia, kaba ngam artatien wat lada ka long ka jingithuhpaw ha ka jingphohsniew, hynrei ioh ba kan sa jia sbisha ruh ha kawei ka sngi, kumba nga la shem ha ka jingpasiaw ka ktien U Blei na kawei ka dkhot kaba pher bad ka baphylla bad kaba ong: “Kata kaba la lah long long kata ka ban sa long; bad kata kaba la lah leh long kata ka ban sa leh : te ym don ei ei kaba thymmai hapoh ka sngi (Ekl 1: 9).**

“Nga la leit poi marwei sha kawei ka ja-  
 ka nongkyndong kaba i thiang ban peit ha-  
 poh la ka jong ka ri. Ka jaka ka dap da  
 ki madan phlang, ki them bad ki hali. Ka la  
 long ha ka por mynsngi bad ka sngi kaba shit,  
 hynrei ka bheng kaba rang bad ym shem don  
 slap ei ei. Katba nga dang mih na shaphang  
 shatei ban iaid kai sngewbha, nga la wan poi  
 ha kawei ka wah kaba wan mih na shaphang  
 Sepngi, bad kaba leit tuid sha mihngi. Ka la  
 long ka wah kaba itynnad ban peit bad ka  
 jingtuid jong ka ka sdang na ka wah duid.  
 Namar ba shit ka sngi, nga shem ba don ka  
 jingsngew pyngngad haba bud ia kata ka wah.  
 Nga la ngam ha um ban bud ia kane ka wah  
 duid kaba leit tuid shaphang mihngi. Ym shym  
 don mano mano bad nga.

Katba nga la nang jam shaphrang ha ka  
 jingsnpewtynnad ban ialehkai bad ka mariang  
 da kaba bud sak sak ia ka wah, ki kjat jong  
 nga ruh artat ki la nang hiar sha bajylliew.  
 Khlem da sngewthuh ia kata ka jingjylliew,  
 nga pyneh triang ialade ban bud kum u nong-  
 iaid lynti uba shu nang tur ban beh shaphrang.  
 Mar kumta kynsan kyrsan ka um ka la rong  
 ia nga bad ka la kit ia nga, bad nga la poi  
 sha kawei ka thwei kaba jylliew. Hapdeng ka  
 jingsheptieng bad jingma ba ngan iap jyllop  
 noh syndon, nga la pyrshang ban ioh ksaid  
 ialade na ka bynta ban ioh bat ia uno uno u  
 phlang uba don sharud, hynrei ngam lah. Ka  
 lat lat kaba shad pyllun, ka la lynsher bad  
 kyntiag biang shapdeng ka um kaba jylliew.



Hangta nga la pyrta ban don mano mano ban iarap ia nga. Ka kti kadiang ka la ngam sha noh bad ka paw sa tang ka kti kamon. Nga la sei sha jrong ia ka kti kamon ban don ma no mano ban wan ring bad patan ia nga kat ba ngam pat ngam jyilop.

Hynrei kaba phylla hangta ka long ba ka la wan lap pynban ka jingsngew long ba jai jai, khlem tip shuh ia ka tieng, wat la nga sngew kum ban duh mynsiem noh, namar ba ka um ka la tap ia ka khmut bad shyntur, ba ngam lah pynhiar mynsiem stuh. Hangta hangta hi nga shu iohsngew malu mala ba don mano re mano na ki kynthai arngut kiba ia shong shaphang ka liang kadiang jong ka wah, kiba iohi ia nga ba nga la jan iap jyilop, ba ki shu ia kren kham pajih iwei na iwei. Hynrei kaba phylla ka long ba nga iohsngew kyndiang ia ka sur ktien jong kawei ka briew kaba shong sha ka liang bamih ka sngi, kaba ong, "Rap! Iarap kloi!" Mar iohsngew ia ka ne ka ktien "Rap! Iarap kloi!" nga iohsngew pat sa ia kawei ka sur kaba shu sawa mian mian, kaba mih na ka liang kaba shatei jong ka wah kaba lam kum ka sur jubab ban ia rap. Mar ia sangeh kata ka sur ktien, ka jing phohsniew ka la kut noh, bad nga la kyn-dit thiah, da kaba iohi ei ei pynban shaphang ia lade, katba ka khlieh jong nga pat ka dem ha ka syngkhlieh bad ki khmat jong nga ki phai shaphang shathie hapoh ka kamra thiah pang.

Ka wah kaba wan mih na sepngi bad ka ba leit tuid sha mihngi, ka long ka nongrim jong

**ka kot : 'Na sepngi sha mibngi.'** Hynrei ki khubor  
 kiba ka ktien U Blei ka ai ia ngi ha kane  
 ka kot ki long kiba pher, ba pher kat ha la  
 ki rukom, ki sur bad ki dur.

Kane ka jingithubpaw kaba nga la ioh ha  
 ka jingphohsniew shaphang ialade ka ai ka  
 jingmaham kaba khraw shibun eh ia nga. Ka  
 kren nyngkong eh ia nga bad ka dei ban kren  
 shaphang jong phi ruh ki nongpule, ioh ba  
 ngin **ngam jyllop** ha **ki um kiba jylliew**, kumba  
 u nongrwai shemmynsiem u rwai ka jingia-  
 lap ban kyrshiew pynkyndit thiah ia ngi ki  
 ba lajot bad kiba la rem.

“Kiwei ban kyrshan bor kim lah,  
 Ban kiew ka thiep, ban lait jingma;  
 Ban ryngkang ia ki wah ba dap,  
 Ha kita hajar ki la iap.

Ah Trai, nang kyrshan pat ia nga,  
 Ba ngan laitim sha shiliang wah!  
 Sha Salem khuid, ba ngan ioh kiew,  
 U nonglait na ka pop, ka sniew!”

Kine ki sngi kiba ngi im ki long ki sngi  
 jingaiei kiba khadduh ia ki riewngeit kiba shi-  
 sha jong U Trai. Ki long ka ‘**Samoi**’ jong ka  
 jingtrei U Mynsiem ba khuid kaba dap ryngeng  
 ha kito kiba la aiti lut sha ka jingim ban  
 shakri ia u, bad ba U Blei um shym tyngkai  
 ban pyni ia ka jingieit jong u ha ‘**ki khiew**  
**ka jingisnei**’. Namar kata ka jingthmu jong nga  
 haba nga pynmih ia kane ka kot ka long ban

iaibteng ia ka jingialap kaba ngi la dep leh  
bad ngin dang iai leh mynta ruh, da kaba  
ai jingmaham ia ki briew baroh.

“Nang beh shaphrang, la bun ba bein,  
Dang lait, dang lait, ka khyrdop ;  
I’U Jisu nguh, bad U iakhein,  
Ioh shisien lap ba jyllop.

Jingisnei jylliew katno ’n ong !  
Ia nga ka khyrdop lait ka long !”

Kum ki khristan, la ngi long baroh ki  
‘pilgr’m’ ha kane ka pyrtnei, hynrei ngim dei  
ban klet ruh ba ngi long ki ‘nongap’, kiba  
dei ban ap baroh arphewsaw kynta, kumba u  
**Habakkuk** u nongiathuhlypa haba u ap ia ka  
jingphai ktien, ba ka dei ia u ban iai ap da  
ka jingngeit, kumba u la kren shaphang ia lade.  
“Ngan ieng ha la ka jingap phira, bad ngan shong  
halor ka kut, bad ngan ap khmih ban iohi  
un kren aiu ha nga, bad iaei ngan phai ktien  
shaphang ka jingud jcng nga” (**Hab 2 : 1**).

Kum ki nongap, ngi hap ban peit pyrman  
ia ka ‘mihsngi’ bad ka ‘sepsngi’. Hadien ba  
ngi la ap ia ka sngi ba ka mih bad kiew sha  
jr’ong, ngi la dei ban ap sa ia ka sepsngi. Haba  
ka sepsngi ka la wan, ka miet ruh ka dei  
ban wan. Ka sepsngi bad ka Miet kim  
ja jngai. Ki iadon mar ha syndah. Kumta ka  
ktien U Blei ka bui ka jingkylli ha u nong-  
ap, bad ka iathuh de ia ka jubab kaba u nong-  
ap u dei ban ai. “Ko nongap, kumino shaphang

ka miet ? ko nongap, kumno shaphang ka miet ?  
 U nongap u la ong, ka step ka wan, bad ka  
 miet ruh : lada phin kylli, to kylli phi : to phai  
 phi, ale" (Isa 21 : 11-12).

Haba ka miet ka wan lap ha ka jingim  
 jong ngi, ka dei ruh ban wallam ia ka jing-  
 dum. Kane ka jingdum kam ju pep ban tap  
 lup ia ngi da ka diengphna. Pynban dei hang-  
 ta ba ka jingshai ka wan mih bad ka miet  
 ba kynsha iong ka jah noh, namar ba U Trai  
 Jisu u shong hapoh ka dohnud jong ngi. Ng  
 dei, namar kata ban iohi ia ka diengphna,  
 khnang ba ka miet ba dum kan jah.

"Ba ngan iohi ha um ka jordan bah,  
 Kan kdew ka diengphna beit shaneng ia nga ;  
 Kan mih jingshai, ka miet ba dum kan jah,  
 La im la iap, Ah Trai, to shong bad nga."

Ka miet kam ju sah slem ha ka jingim uba  
 ngeit, namar ba ka jingshai bneng ka beh  
 noh ia ka jingdum ban wallam kloi ia ka step.  
 Ka ktien U Blei ka la dep kren shai kdar  
 shaphang kane : "Ka jingiam ka lah ban sah  
 shimiet, hvnrei ka jingkmn ka wan mynstep"  
 (Salm 30 : 5).

Haba ngi la shem bad mad ia ka jingpyn-  
 tngen na U Blei, bad pdiang ia ka jingpyllait ba  
 donbor jong u, kaba sah ia ka jingim jong  
 ngi ka long tang ban shakri bad iaroh ia ka  
 kyrteng ba khuid jong u. Dei U Blei uba

pyniakynduh ia ka sepsngi ha ka jingim jong  
 ngi, bad dei U Blei ruh uba wallam kloi kloi  
 ia ngi shaba mih ka sngi. U nongrwai Salm  
 kumta u pynkynmaw ia ngi shaphang ba ngim  
 dei ban klet ban iaroh ia ka kyrteng U Trai.  
 “Naduh ka bamih ka sngi haduh ka basep  
 jong ka, ka kyrteng U Trai ka long kaba dei  
 ban iaroh” (Salm 113 : 3).

---

## 2

### **KA SEPSNGI KA DEI BAN WAN.**

---

Ka jingim u briew ha kane ka pyrtnei ka  
 don ka jingsdang bad ka jingkut, ia kaba ka  
 ktien U Blei ka la dep ong ; “Ka por ban  
 kha, bad ka por ban iap “(Ekl 3: 2). Baroh  
 ngim lah lait na kane ka aiñ ba la buh da  
 U Blei. Pynban la kane ka long ka jingshi-  
 sha ruh, ka jingim briew kaba shisha ka dei  
 tang haba ngi la shim ia ka jinglong rangbah  
 bad don la ka ling ka sem. Namar kata ki  
 khunlung bad ki khynnah ki dang don hapoh ka  
 pyrtnei jong ka jingbymtip ia kine kiei kiei. Ym  
 lah ban ñiew kumta da lei lei ia ki khunlung ki  
 khynnah kum ki nongiaphet bad ki nongia-  
 beh. Ia ki U Blei u don la ka jingiakhein  
 da kiwei pat ki rukom, khnang ba ngin ym

ibein ruh ia kiba rit, bad ba ngi dei ban shim jinghikai na ki shaphang ka jinglong khuid bad ka jingsngewrit, kumba U Jisu Khrist u la dep buh ki jingsneng na ka bynta jong ngi kiba long kumne harum—

“Ynda kumta ki la wallam ia ki khunlung ha u, ba un ioh ktah ia ki, ki synran te ki la sneng ia kita kiba ia wallam. Hynrei haba U Jisu u la iohi ia kata, u la sngewsih eh, bad u la ong ha ki, To shah ia ki khunlung ban wan ha nga, to wat khang ruh ia ki naba ia kiba kum kita long ka hima U Blei” (Mark 10: 13, 14).

“Haba u la shim te ia u khynnah, u la pynieng ia u hapdeng jong ki; bad haba u la shim kynthup ia u, u la ong ha ki, uno uno ruh u ban pdiang ia uwei na kum kine ki khynnah ha ka kyrteng jong nga, u pdiang ia nga: bad uno uno ruh uba pdiang ia nga, um pdiang ia nga hi, hynrei ia uta kein uba la phah ia nga” (Mark 9: 36, 37).

### Kaei ka Sepsngi ?

Ka ktien sepsngi' ka long ka ktien rangbah ba ngi ki ju kren barabor ha kine ki ti lum baieit jong ngi. Ka long ka ktien kaba sngewthiang, hynrei kaba ia khleh ruh bad ka iam ka sngewsih. Ka Sepsngi ka thew barabor ia ka 'lanot' bad ka 'shipa' ba ngi iashem ha kane ka pyrthei, kiba pynlong ia ngi ban jaw

ki ummat. Ka mut ka jingduh noh ia kiba ha  
 ling ha sem, kiba ieit kiba thoin kiba U Blei  
 u shim noh na kane ka pyrthei. Baroh ngim  
 lah lait ban iakynduh ia ka. U briew ne ka  
 briew kiba la shim ia ka jinglong rangbah bad  
 sngewthuh ia ka jingkordor jong ka jingim ha  
 kane ka bynta, kim don jingiapher na kata ka  
 jingiaid lynti kaba la sdang na mihngi bad ka  
 ban sa kut ha sepngi. Haba ka sngi ka mih  
 ha ka jingim jong ngi, ka mih ryngkat bad  
 ka jingkyrmen ban pyndep da ka jingsngewbha,  
 hynrei pynban kan sa poi sha kaba sep jong  
 ka. Ia kane ngim dei ban sngewphylla namar  
 la dep thoh da ka Aifñ Blei ba ka dei ban  
 long kumta. Kumta ka kñien U Blei ka ong:-  
 "Ka sngi ruh ka mih, bad ka sngi ka sep, bad  
 ka leit kyrkieh sha la ka jaka na kaba ka mih"  
 (Ekl 1 : 5).

Ka Sepsngi ka dei kaba kut jong ka jing-  
 im briew ha kane ka pyrthei. Ka long syriem  
 kumba haba u nongpule u pule ia ki lynnong  
 kiba bun ha ka kot pule, bad haba u la dep  
 pule ha ka lynnong kaba khadduh, dei ban  
 khylliap noh ia ka pat. Ha ka jingim briew  
 jong ngi ha kane ka pyrthei, ngi ju ia kren  
 bad ialap tang ia ka jingim briew kaba dang  
 iakhein hapoh ka por iaid lynti kaba sdang  
 na mihngi bad kut ha sepngi. Sha lyndet jong  
 ka sepsngi, ngim don ei ei shub ban ia kren. Kum  
 ta ha ka akor ba ngi ju iashong ia kren ia  
 thuhkhana, ngim ju kham ialap ia kiba la  
 leit noh na ka pyrthei, khamtam haba don  
 kiba ieit kiba thoin bad kiba ia marjan, na

mar ba ngi burom ia kiba leit noh. Ka jing burom ia kiba la iap, ka long hi kajuh ka jingburom ia kiba la dangim. Namar ba ngi ñiewkor ia kiba la leit noh, ngi shait pyn-donkam da ka ktien ñiew akor ia ki da kaba ong barobor, "*kumba ialap iap noh.*"

Ka sepsngi jong ka jingim briew ka dei ban wan namar ba ka jingim briew ka long kaba lyngkot. Lada kam wan 'mynta,' kan wan 'lashai'. Lada kam wan pat 'lashai,' kan wan 'lashisngi'. Ka ktien U Blei ka la dep iathuh shai shaphang kane ka jingshisha bakhrav "U briew. uba la kha na ka briew u long u bakhyn-diat ki sngi, bad u badap da ka jynjar. U wan mih kum u syntiew, te la ot noh ia u; u phet noh kum ka syrngiew ruh, bad um neh" (Job 14 : 12).

U Blei u la buh thik ia kawei ka sepsngi ba kan jia ha kaba u briew u dei ban iap, "La buh ha ki briew ban iap tang shisien" (Heb 9 : 27).

Ia ka sepsngi jong ka jingim briew, la kheifñ ba kan long tang hapoh ki 'snem'. Kum-ta ka ktien U Blei ka ong: "ki sngi ki snem jong ngi ki long hynñiew phew snem, lane namar ba khlaiñ eh phraphew snem; pynban ka jingsarong jong ki, ka long tang ka jingshi-tom bad ka jingsngewsih ; naba ka la duh shen shen, bad ngi her noh" (Salm 90 : 10).



Ka don pat ka por ha kaba ka sepsngi kan long tang da ki 'bnai, kumba ka ktien U Blei ka la dep pynbna: "Namar ba la pynthikna ia ki sngi jong u, ka jingkhein ki bnai jong u ki don ha me, bad me la buh ia ki pud jong u ba um lah ban ryngkang" (Job 14 : 5).

Haba dei U Blei u buh ia ka sepsngi jong ngi pat tang da ki 'Sngi' kumba u Moses u la dep hikai ia ki khun Israel kumno ba kin duwai namar ba ka jingim briew ka long kaba lyngkot bad kaba lah ban wai noh ha kano kano ka sngi. "To hikai ia ngi ban n̄iew ia ki sngi jong ngi kumta, ba ngin pynioh ha ngi ia ka dohnud ka jingstad" (Salm 90 : 12).

Ngim lah ruh ban pyntud ia ka por Sep-sngi da kaba iathuhkhana ia ka ha ki snem, ki bnai bad ki sngi. Ka don ka jingma ban pyn-pynlyngiar ia ka por namar ba U Blei u lah ban pynlyngkot noh ia ka. Namar kata ka sepsngi ka lah ban jia tang hapoh ki 'kynta', khlem ap haduh shimiet shisngi. U Jisu Khrist hi u la dep ai ka jingmaham ia ki nongkheĩn por kiba lah ban pynjlan ia ka por, kaba U Blei pat u la mut ben pynlyngkot: "Ym don khadar kynta shisngi ?" (Ioan 11 : 9).

Ka sepsngi ka dei ban wan. Ngim ym lah kiar na ka. La ngi mon ne ngim mon, ngi dei ban iakynduh ia ka. Ka ktien U Blei ka iathuh shai ia ngi ba ka sepsngi ka lah ban jia tang ha ki 'khyllipmat'. Kumta ngi shait ong ba ka jingiap ka wan kum u nongtuh. Ym

donkam ba U Blei un pyni shuwa da ka dak jong ka jingpang. U Blei u lah ban shim noh iano iano napdeng jong ngi khlem da iaid lyngba ka jingpang kaba slem. Kumta ka ktien U Blei ka la kdew shai bad batai ba ka jingim briew ka long tang kum u syntiew, ka syrngiew, u phlang bad u lyoh.

“U wan mih kum ka syntiew, te la ot noh ia u” (Job 14 : 2).

“U phet noh kum ka syrngiew ruh, bad um neh” (Job 14 : 2).

“Ki sngi u briew ki long kum u phlang” (Salm 103 : 15).

“Ka doh baroh ka long u phlang” (Isa 40: 6).

“Kumno kata ka jingim jong phi ? Namar ka long u lyoh uba mihpaw ia tang shibit, ynda kumta te u da jah noh jar” (Jak 4 : 14).

Ka sngi haba ka mih, hadien ba ka la tawiar ka dei ban leit sha la ka jong ka ja ka sep jong ka. Ym lah ban pynkylla ia ka jingsep jong ka sngi. Ki ~~Sa~~antis bad ki ~~R~~iew-khraw jong ka pyrthei ki lah ban tip ne ia thuh ia ngi shaphang ka rukom jingiaid tawiar jong ka sngi, hynrei kim lah da lei lei ban pynkylla ‘ne-khang ia ka jingsep jong ka sngi. Wat ki doktor bad ki riewstad ka jingkoit jing khiah kim lah ban pynkylla ia ka sepngi jongno jongno. Namar kata ka sepngi ka dei ban

wan. Ka sngi ka dei ban leit sha la ka jong ka jaka. Ka lah ban mih kloï ha ka por lyiur ne ka lah ban mih slem ha ka por tlang, hynrei kaba la thikna ka long ba ka dei ban sep.

Kumta ka ktien U Blei ka la ai lypa ia ki dur kumno ba wat ka lyer bad ki wah ruh ki leit phai pat sha ki jaka na kiba ki la mih.

“Ka lyer ka leit shaphang shatei; ka tawiar sawdong barobor ha la ka lynti, bad ka lyer ka phai pat ha la ki lynti” (Ekl 1 : 6).

“Ki wah baroh ki tuid sha ka duriaw, pyn ban ka duriaw kam dap; ha kata ka jaka sha kaba ki wah ki tuid, shata ki tuid pat” (Ekl 1 : 7).

Ka long kumjuh ruh bad ka jingim briew. U briew baroh um lah ban shongneh ha ka pyrthei. Ka ktien U Blei ka la pynskhem da kiba bun ki jingong shaphang ka dewmet na kaba la thaw ia u briew.

“Naba ka dewmet me long, bad sha ka dewmet men leit phai pat” (Jen 3 : 19).

“Ka doh baroh kan iap lang, bad u briew un phai pat sha ka dewmet” (Job 34 : 15).

“Baroh ki leit sha kajuh ka jaka; baroh ki long na ka dewmet bad baroh kin phai pat sha ka dewmet” (Ekl 3 : 20).

Ka sepsngi ym tang ba ka dei ban wan hynrei ka lah ban jia kyndit kyndit ha kano kano ka por ka bym poi pyrkhat. La ha ka ktien U Blei, la thoh 'ki sngi ki snem jong ngi ki long hynñiew phew snem lane namar ba khlain eh phraphew snem' (Salm 90: 10), pynban ym baroh ki ban poi sha kane ka karta. U Blei u lah ban khot kloï kloï noh iano iano napdeng jong ngi. Ka ktien U Blei ruh ka la dep iathuhlypa shai da kaba buh kum ka jingmaham ia ngi baroh, ba U Blei u lah ban leh ia kane kat kum ka bor bad ka mon bakhuid jong u.

“Ngan pynsep ia ka sngi ha kaba shi'teng sngi bad ngan pyndum ia ka khyndew haba dang shai ka sngi” (Amos 8:9).

Ioh ba ngi klet ia kane ka jingshisha ba khraw, u nongrwai shemmynsiem u phawar da kaba ai ka jingmaham ia ngi.

“La buh ka por ia nga ban iap,  
 Leh kyndit eh ia nga kan lap;  
 Ki samla bad ki khynnah ruh,  
 Ki iap, ban khreh ngan ym tud shuh”.

Ka sepsngi jong ka jingim briew, ka don tang ha ka jingtip jong U Blei badonbor baroh. U briew um lah ban tip ia ka jinmaian kaba don sha lyndet, kaba long tang ka jong u Blei hi. U Blei u don ha mihngi bad ha sepsngi ruh. U peit na jrong iano ba un shim

noh bad iano pat ba un dang buh shipor  
 ha pyrthei. Namar kata ha kawei ka bynta  
 ka ju hap ka syrngiew jong ka jingdum, bad  
 ha kawei pat, ka jingthaba jong ka jingshai.  
 Kumta U Blei ruh u la kren pynskhem da ka  
 ba ong:- “Nga nga long U Trai, te ym don  
 uwei pat: nalar jong nga ym don U Blei: ngan  
 panpoh ia me, la mem shem la ithuh ia nga :  
**ba kin tip na mihngi bad na sepngi, ba nalar**  
**jong nga, ym don shuh : nga nga long U Trai**  
 bad ym don uwei pat. Nga pynlong ia ka  
**jingshai**, bad nga thaw ia ka **jingdum.....** ma  
 nga U Trai, uba leh ia kine kiei kiei baroh  
 (Isa 45: 5- 7).

Ka jingleh U Blei da kaba u pynsep noh  
 ia ka sngi jongno jongno, hateng i kumba ka  
 long ka jinglehbein kaba sngew kumba U Blei  
 u la leh shiliang khmat. Bun ki bym ju sngew-  
 thuh ia ka mon bakhuid U Blei, ki pyrkhat  
 katta. Hynrei haba ngi pule bha ia ka ktien  
 U Blei, kam long satia kumta. Ha lyndet  
 jong ka jingpynjia ia ka jingjia, ka don ka  
 jingstad Blei kaba ngim lah shuh ban iatai  
 nia pyrshah, namar U Blei u la dep ai ka  
 jingpynshai kaba pynhun ia baroh, “Ma nga  
 uba pyniap, bad ma nga uba pynim ruh, ma  
 nga uba pynmong, bad ma nga uba pynkhiah  
 ruh: lymne ym don uba lah ban pyllait noh  
 na ka kti jong nga. Naba nga rah ia la ka  
 kti sha bneng, bad nga ong, Nga im ha la  
 ka rta” (Deut 32 : 39, 40).

**Ka sngi ba la buh ba kan sep, ka dei ban jia long shisien ia baroh. Namar ba ka dei ban jia long, ka donkam ia ngi barabor ban pyrkhat shaphang ki kam jong ka jingisnei bad jingmapei U Blei ia ngi ki nongpop baroh, syriem kumba u la pynjngai ia ka mihngi na ka sepngi, khnang ba un ioh kynmaw ia la ka jingisynei, khlem da thew ia ki jingpalat ba bun byllien jong ngi. Namar kane ka daw u nongrwai Salm u kyntu ia ngi ba ngin kyrkhu ia U Blei katba ngi dang im.**

**“Katba ka mihngi ka jngai na ka sepngi, katta u la pynjngai na ngi ia ki jingpalat jong ngi. Kumjuh kumba u kpa u isynei ia la ki khun, kumta u isynei U Trai ia kita kiba sheptieng ia u. Naba u tip ia ka jinglong jong ngi, u kynmaw ba ngi long ka khyndew” (Salm 103: 12- 14).**

---

### 3

#### **"KA SNGI RUH KA MIH, BAD KA SNGI KA SEP" (EKLESIASTIS 1 : 5).**

---

Ha kane ka kot: Na sepngi sha mihngi', ngam lah khlem da shim ia ki ktien u *Eklestiasis* u nongiatuhkhana haba u ong: 'ka sngi ruh ka mih, bad ka sngi ka sep'.

(i). U briew u im ha kane ka pyrtnei hynrei tang shipor. Katba ka sngi ka sep da shisha man ka janmjet, pynban ka wani mih biang ha ka sngi kaba bud ha ka por mynstep. Hynrei bad ka jingim briew pat kam long kumta. Shisien haba u briew u la iap, um lah khie shuh. U Job u shakri ba shemjynjar jong U Blei ruh u la kubur ia kane ka jinglong ba lanot jong ka jingim briew. "Hynrei u briew u iap, bad u duh ei noh: Shisha keifi, u briew u dkut mynsiem, te u haei? Kumba ki um ki jah noh na ka duriaw, bad ba ka wah um ka duh bad ka rngad noh; kumta u briew u thiah bad um khie shuh. haduh ba ym don shuh ki bneng, kin ym kyndit thiah, lymne yn ym kysiew ia ki na la kaba iohthiah" (Job 14 : 10—12).

(ii). Tang kawei ka sngi ka don ha ka pateng bynriew, hynrei ka 'por mih' bad 'por

sep' kim ju iakynduh lang. Ka 'por mih' bad ka 'por sep' ki ia jingai kawei na kawei. Ha ka jingim jong u khun bynriew ruh ha kane ka pyrthei. U Blei u la dep leh lypa ia ka jingbuh ryntih, ba haba kawei ka jingim briew ka la nang mih, kawei pat ka la nangsep. U Blei um ju buh mynno mynno ruh ba ka dei ban don tang kaba mih, hynrei u la buh ruh ba ka dei ban don kaba sep. Teng teng 'kaba sep' ka lah ban shuwa ia 'kaba mih', ne 'kaba mih' ka lah ban shuwa ia 'kaba sep'. Ka jing-iapher jong kano kaba 'shuwa' bad kano kaba 'hadien', ka long tang da ka jingleh U Blei hi. Kumta u Eklesiastis u la ai ka jingpyn-shai ia kaba U Blei u la dep buh ryntih, "Kawei ka pateng bynriew ka leit noh, bad ka wei pat ka wan; te ka khyndew ka neh ha la ka rta" (Ekl 1 : 4).

(iii). U briew uba la kha na ka briew bad uba im bad par ha ka khyndew, u dei mad ia ki 'aiom' ba iapher ha ka jingim jong u. Kine ki 'aiom' ki long ki sngi jong ka 'jingkmen' bad ka 'jingsngewsih' ba u dei ban iakynduh, kat kumba U Trai nongbuh nongthaw u la buh bynta ia u. Kumta U Eklesiastis u nongiathuhkhana u la iathuh da kaba kren shai shaphang kane: "Don ka aiom ia kiei kiei baroh, bad ka por ia ka jingthmu baroh hapoh ka bneng: Ka por ban kha, bad ka por ban iap, ka por ban thung, bad ka por ban rat noh ia kata kaba la thung" (Ekl. 3 : 1 - 2).



U briew um lah ban mad sah tang ia ka jingkmén, hynrei u dei ban mad ruh ia ka jingsngewsih. Um lah ruh tang ban shu sngewsih sah, hynrei u dei ban ioh ia ka jingkmén. La ka mihngi bad ka sepngi kim ju iashem, hynrei ka jingkmén bad ka jingsngewsih ki kloi ban iashem. Uwei u dang shait dang khlain, bad uwei pat u la nang tlor noh. Ha kano kano ka iing, ha kano kano kur, ha kano kano ka jaid, ka ju jia barabor kumta.

(iv). Ka jinghikai ba janai ba ngi ioh na ka ktien U Blei shaphang ka jingkylla jong ki por kiba wan jia ha ka jingim briew ka long kane kein ba la kren da U Eklesiastis u nongiathuhkhana: "ka sngi ruh ka mih, bad ka sngi ka sep". Ka mihngi bad ka sepngi kim ju ia shem, hynrei ka long pat ka jingw pyniaid ba stad bad ba phylla jong U Blei ba u briew ne ka briew kiba la kha bhabok ha ka pyrthei ki dei ban pdiang ia baroh ar, kaba mut "ka jingsngewsih kaba ialam sha ka jingkmén". La u briew u dei ban ud ban iam bad jaw ki ummat, pynban ha kaba khadduh, U Blei u wan ban pyllait noh ia u namar ka jingthmu bakhuid jong U Blei ka long ba um mon ban pynshitom sah ia u briew. U Blei u tip ban pynbiang ia kaba duna bad khate ia kaba tam. U la ai jingmaham ruh ia ngi ban pdiang da kaba puson bha ia kaba dei ban leh. "Ha ka por ba manbha, leh kmen, ha ka por ba jynjar to pyrkhata. U Blei u la pynlong ia kawei ban iaryngkat bad ia kata kawei pat, khang ba

u briew un ym shem ia kaei kaei ka ban sa long hadjen jong u" (Ekl 7 : 14).

(v). Ka jingmih jong ka sngi ka long da ka jingtip jong U Blei. Haba ka la mih, ka dei ban iaaid tawiar bad leit phai sha la ka jaka sep. Ka long kumjuh ruh bad ka jingim briew ha kane ka pyrthei. Lada u briew u im katno katno snem hangne, hynrei ha kawei ka sngi u dei ban leit noh na ka pyrthei. Ka jingim jong uwei pa uwei u briew bad kawei pa kawei ka briew ki long hapoh ka jingpyniaid bad ka mon bakhuid jong U Blei. Tang U Blei uba tip ia ka jingmih bad ka jingleit noh jong ki mynsiem briew. Ym ju don manno mano uba lah ban ia kylli na U Blei ia ka jingmih jong ka jingim bad ka jingleit noh jong ka. Kaba donkam ia u briew ka long tang ba un shaniah ha U Blei bad shah ha ka jingpyniaid bastad jong u. Ngim dei ban klet ba U Blei u bud dien ia kawei pa kawei ka jingiaid lynti jong ngi. Kumta lada ka jingmih jong ka sngi ka long hapoh ka jingtip U Blei, ka jingsep jong ka ruh ka dei kaba la pynthikna da U Blei hi. Ka ktien U Blei ka la kren shai da kaba ong, "Ka sngi ka tip ia la ka jingsep" (Salm 104 : 19).

(vi). Ka sngi ka tip ia la ka jorg ka bynta ba kan leh. Haba ka la mih shajrong mynstep, ka don la ka prokram kaba U Blei u la pynkhreh ba kan pyndep ia ka jingiaid tawiar jong ka. Khadduh kan wan sha la ka

jong ka jaka sep. Ka jingim briew ha kane ka pyrtnei ruh ka dei ban pyndep ia la ka jong ka kamram, kat kumba U Blei u la pynlong bad sam bynta ha ka. Na kajuh ka lynti, ka dei ban iaid. Ka sngi kam ju lah ban pynkylla ia ka jingiaid lynti shawei. Kam-lah ban mih na mihngi bad kiew shaneng ne hiar sharum. Ka dei ban iaid beit na kajuh ka lynti ba U Blei u la pruid dak. Kumta u Job u shakri jong U Blei ha kaba ai jinghikai ia ngi shaphang kane kajuh ka lynti, kaba ngi iaiaid lynti baroh, u la kren kum ka jingsneng ia ngi, "Naba ynda la iaid khyndiat snem, ngan leit ha kata ka lynti na kaba rgan ym wan phai shuh" (Job 16 : 22).

---

## 4

### KA SNGI KA LA MIH !

---

Ka jaka na kaba ka sngi ka mih man la ka step, ngi khot ia ka ka mihngi. Ka sngi kaba sdang ia ka jingiaid lynti jong ka na mihngi, ka pynlong ia kawei ka sngi ha ka Por ba ka sep, U Blei u la thaw phylla ia ka 'Sngi' na ka bynta jong ngi. Ka ktien U Blei ka pynkynmaw ia ngi shaphang ka jingphylla kaba khraw kaba don ha kane ka

**Met Bneng.** Ha ka Jenesis ngi iohi ia "ka kam ki shynriahti U Blei", kumno ba u la pynlong bad thaw ia ka.

"Bad U Blei u la ong, To long ka jingshai, bad ka jingshai ka la long. Bad U Blei u la iohi ia kata ka jingshai, ba ka la long ka babha; bad U Blei u la pyniakhlad ia kata ka jingshai na kata ka jingdum. Te U Blei u la khot ka Sngi ia kata ka jingshai, bad ia kata ka jingdum u la khot ka Mlet. Bad kaba lajan miet ka la long bad ka step ruh ka la long, kawei ka Sngi" (Jen 1 : 3 - 5).

U Blei ym tang ba u la pynlong ia ka Sngi ba kan ai ia ka jingshai mynsngi, hynrei u la pynlong ruh ia U bnai bad ki khlur ba kin pynshai mynmiet. Ka jingitynnad jong ka Sngi kam don jingmut ei ei, lada ngi klet pat ban iaroh shaphang u bnai bad ki khlur. Ka long ka jingshisha ruh ba U Blei u la pynkup ha ka Sngi ia ka burom kaba kham khraw. U bnai bad ki khlur la ki pynshai mynmiet, hynrei kim lah ban iaryngkat ha ka jingshai kat ka sngi. Kumta ha ka Jenesis, la dep kdew bad iathuh ia ka jing-iapher kaba U Blei u la buh hapdeng ka jingshai kaba ai mynsngi bad ka jingshai kaba ai mynmiet. Kumba haba ngi iakren shaphang ka jingshai, ngi dei ruh ban iakren shaphang ka jingdum; kumba haba ngi iakren shaphang ka sngi, ngim lah khlem da iakren shaphang

ka miet; kumta haba ngi ialap shaphang ka Sngi, ngi dei ban ialap ruh shaphang u bnai bad ki khlur. Ka Sngi ka long nyngkong, hadien kata, wan sa U bnai bad ki khlur.

“U Blei U la ong ruh. To long ki jingshai ha ka sahit bneng ban pyniakhlad hapdeng ka sngi bad ka miet, bad to ai ba kin long ia ki dak, bad ia ki aiom, bad ia ki sngi, bad ia ki snem de. Bad to ai ba kin long ki jingshai ha kata ka sahit ki bneng ia ka ban pynshai ha ka pyrthei: te ka la long kumta ruh. Bad U Blei u la pynlong ia ki artylli ki jingshai kiba khraw; ia kata kaba kham khraw ia ka ban synshar ia kaba mynsngi, bad ia kata kaba kham rit ia ka ban synshar ia kaba mynmiet: bad u la thaw ia ki khlur ruh. Bad U Blei u la buh ia ki ha kata ka sahit bneng ia ka ban pynshai ha ka pyrthei, bad ia ka ban synshar ia kaba mynsngi bad ia kaba mynmiet, bad ia ka ban pyniakhlad ia ka jingshai na ka jingdum: te U Blei u la iohi ba ka long ka babha” (Jen 1: 14 18).

Haba ka sngi ka mih, ka wallam ruh ia ngi kiba shong ha pyrthei sha ka jingiaid lynti ban ia kynduh pat ia ka por miet ha kaba ngi lah pat ban iohi sa ia ki bnai bad ki khlur. Dei haba ngi khmied ia la ki khmat sha bneng ba ngi iohi ia ka burom U Blei suda ba la pynkbraw ha ki kam jong u, bad ha ka jingieit jong u kaba khraw katta katta ia ngi ki briew. Kumta u nongrwai Salm u

phawer ia kane ka jingshisha. "Haba nga pyr khat ia ki breng jong me ka kam ki shynriah ti jong me, u bnai bad ki khlur kiba me la buh ; U briew u long aju, ba me kynmaw ia u ? bad u khun u briew, ba me wan khmit ia u ?" (Salm 8 : 3).

Ka Sngi, u bnai bad ki khlur ki don la ka jong ka jong ka burom. U Apostol Paul, u shakri jong U Trai Jisu u la iathuh da kaba ong "Don kawei ka burom ka sngi, don ruh kawei pat ka burom u bnai, bad kawei pat ka burom ki khlur, namar u khlur u pher na u khlur ha la ka burom" (1 Kor 15 : 41). Hyurei kaba sngewphylla pat ban pyrkhat ka long ba ha ngi ki briew, kiba long ki jingthaw kiba kham kyrpang jong u, U Blei u la pynkup pynban ha ngi ia ka burom kaba kham khraw.

U Blei u la pynlong khnang ia ka sngi na ka bynta u briew, bad u la buh kyrpang ruh ia u bnai bad ia ki khlur na ka bynta jong u. Ka burom Blei kaba tyngshain ha ka dohnud u briew, ka kham khraw ban ia ka burom jong ka sngi. U Blei u la thaw ia u briew ha ka dur jong u, bad kane ka burom Blei ka don ha ka parmat jong uwei pa uwei u briew. Ka jingiapher khyndiat ka long tang ba U Blei u la pynlong ia u briew kham poh ban ia u. Kumta u nongrwai Salm u lam biang ban sam ia ka khubor ha ngi ki briew da kaba duwai iaroh ha U Blei kumne : "Naba me la pynlong ia u tang khyndiat khampoh bad ia U Blei, bad me la pynphong pansngiat

ia u da ka burom bad ka jingpyndon burom. Me la pynlong ia u ban ioh ka jingsynshar halor ki jingleh ki kti jong me ; me la buh ia kiei kiei baroh hapoh ki kjat jong u" (Salm 8 : 5-6).

**Ka Sngi ka la Mih ! Ka Sngi ka la Mih !**  
**Ka Sngi ka la Mih !**

Ym lah mano mano ba lah ban khang ia ka jingmih jong ka sngi. U Blei u la buh khnang ia ka sngi ba ka dei ban mih. Lada ka jingim jong nga bad jong phi, kan kut noh ha pyrthei ha kawei ka sngi, pynban kiwei ki-ba bun bah kin dang iohi ia ka sngi ba ka mih. Hynrei ka jingphylla kaba pynsngewmaian ia ngi ka long ba haba ngim pat don jingsngewthuh ei ei ba ngin ia kynduh ia ka sepsngi ha ka jingim jong ngi, ka sngi ka la nang mih ban buddien ia ngi. Ym tang ba ka bud ia ngi nadien, hynrei ka da shat ha ka ingdong jong ngi, da ka jingtyngshain kaba mih na ki kjat sngi ba phyrnai jong ka. Ka sngi kaba la nang mih ban kiew sha jrong, ka stat ia ngi da ki nam ding kiba mih na ka, khnang ban iathuh bad pynkyndit ia u briew uba iaid lynti ban nang iaphet, ba don ka 'jingma' bad ka 'shipa' kiba la ap lypa ia u ha khmat. Ka-ba kum kane ka jingiakynduh ka lah ban wan ha ka jingim jong uno uno u briew jong U Blei, ia uba U Blei pat u la dep pynkhreh ia ka jingthmu kaba kyrpang na ka bynta jong u, kumba ka ktien U Blei ka la dep batai lypa Hynrei to tip ba U Trai u la buh kyrpang ia uba riewblei na ka bynta ialade (Salm 4 : 3).

(i) **Ka jingmih jong ka Sngi ha mihngi ka long tang da ka jingleh jong U Blei.** Kum ki briew ngim lah ban tip bad shemphang ia ka jingthmu kaba don ha kane ka jingpynlong ka jong U Blei. Ka long sha lyndet ka bor jong ngi ban kylli jingkylli ia U Blei, **balei ba ka Sngi ka mih na mihngi ?** Ngim lah ruh ban shu sugap ne kan hapoh lade khlem da wad ha ki jingduwai ba sngewrit ia ka mon bakhuid jong U Blei namar ba ka sngi ka la mih. 'Kaei ka mon jong me, Ko Trai ia ka jingim jong rga naba ka sngi ka la mih ?' Don jingkren ne jingpyrpaw ei ei shuh ba men ktah ia nga haba ka sngi ka la mih ?

Ngim lah mo ban kylli khyndiat ia U Blei, **balei ba ka sngi ka la mih ?** Ka jubab ka long em ! Ka sngi ka mih ha la ka jong ka prokram jong ka kat kumba U Blei u la pyniaid ia ka. Ka sngi ka la kiew napoh meiramew ka da paw shajrong ha ka por mynstep bad shong kynjai halor ki ranab lum ka ri baieit jong ngi. Ym don ka jingiphuh iphieng kaba kat kata ba ngi shem kein ha ka por mynstep, ba ka sngi ka ieng kynthoit ban khublei step ia phi bad ia nga.

**Ka sngi ka long ka jingpynlong U Blei nongbuh nongthaw.** Ka dei ka kam ki shynriahti ba phylla U Blei. Namar kata ha ka jingim Khristan j. ng ngi, ka sngi kaba mih mynstep ka don la ka jong ka khubor mynsiem kaba kyrpang ban ai ia ngi. Ka sngi kaba la mih ka kren ia ka **Bor Blei** kaba pyniaid ia ka jing-



im jong uwei pa uwei uba ngeit. Ka kren ia ka jingim jong nga shimet, ñiuma. Ka dei ban kren ia ka jingim jong phi ruh ñiuma. Ka sngi haba ka la mih, ka phalang ha u Nong-iōhi ia ka burom jong ka. Ka long kumta ruh bad ka jingmih jong U Blei ha ka jingim jong ngi, ha ka por ba ngim pat lap sngewthuh ba ka 'jynjar' bad ka 'shipa' ki ap ia ngi. Shu-wa ba ngin ia kynduh ia ka jingjynjar ha kane ka pyrthei shongbasa, U Blei u la dep mih shu-wa ma u ban iarap ia ngi ban pynbiang ban pynbeit ia kata kaba donkam na ka bynta jong ngi. Ha ka por mih jong ka sngi mynstep, U Blei u mih lem ryngkat bad ka ban pynthaba ia ka bynta jong ka syrngiew iōng kaba la sdang shat lypa ha ngi.

Ka sngi ka la mih ban ai jingmaham lypa ia u briew jong U Blei uba la nang jam sha khmat.

'Jingdum ka sah, iōh don ruh ki jingma'  
Ko Trai! tyngshain, tyngshain ma Me ia nga.

Haba ka Siknal bneng ka la wan paw da ka jingjia kaba shai, uno uno uba ngeit jong U Trai, um lah khlem da iōhi ia lade ba u long tang u 'nongiaidwir' uba dei tang ban shu shong thait noh ha lynti khlem da sngew jing myntoi ban kyrkieh ki kjat ha kaba jam sha phrang, kumba u nongrwai u sngew ialade kum u 'Jakob ba lywait' ha ka lynti na Padan aram sha Bethel.

“La kum U nongiaid wir,  
     La sep ka sngi;  
 Jingdum ia nga ka lap,  
     Nga dem ka khlieh;  
 Ha ka jingphohsniew de,  
 Kham jan, Ah Blei, ia me.”

Ka sngi ka la mih ban pynshaiong ia u  
 Pilgrim ba swai uba dang dei ban iaaid kham  
 jngai.

‘Lam jingshai hun, hapdeng jinglyngngoh bun,  
     Ah ! lam ia nga’.

Ka sngi ka la mih ban saham ia u ‘nong-  
 iaaid lynti’ ba ka miet ba dum ka ap ia u ha  
 khmat.

‘Ka miet ka dum, nga ruh nga khlem jinghun,  
     Ialam ia nga.’

Ka sngi ka la mih ban pynkyndit thred ia  
 u Khristan ba un phikir bha ialade katba u  
 nangiaid shakhmat.

‘Khristan, iaaid da sumar,  
     Jingma ka jan’

Ka sngi ka la mih, ka da pynthaba ia ka  
 ri khlaw ba shitom kaba u nongialap Ktien Blei  
 u dang dei ban iaaid lyngba.

Bor bah jong Me ia nga kan pyniai neh,  
     Ah ! lam ia nga’

Nga iaaid lyngba khlaw bah ka ri kynjah;  
     Ah ! lam ia nga.’

**Ka sngi ka la mih** ban beh nadien u 'ordained minister' da kaba pynkynmaw ia u ba un sa ia tyngkbuh ia ka diengphna, syriem kum U Saul jong ka Tarsus uba la iatyngkhuh kumba la dep iathuh ha ka Ktien U Blei, "Te katba u dang leit ka la jia ba... kyndit kyndit la tyngshain lep sawdong ia u ka jingshai na bneng" (Ki Kam 9 : 3).

**Ka sngi ka la mih** ban tba ia ka jingshai bneng ha ka lynti dum ba u nongialap ktien Blei u la dang dei iaid. "Naba U Blei uba la hukum ia ka jingshai ban shai noh ha kaba dum" (2 Kor 4: 6).

**Ka sngi ka la mih** ban pynkyndit thiah ia ka mariang bad ka meiramew kiba dang shoh samthiah ha ka jingslem jong ka miet. **Ka sngi ka la mih** ban pynkyndit ia ki khun ka mariang, khnang ba kin kynmaw ba U Blei u la khreh iaid lynti bad ba ki dei ban wad ia ka khmat jong u. **Ka sngi ka la mih** ban kysiew thiah ia ka mariang ba kan shim ia ka bor na ki kjat sngi, da kaba sdang noh ia la ka jong ka jingtrei, kumba u Myllung Soso Tham u Phawer.

'Ka sngi ka la syaid,  
Ki duid ki la im;  
Ki wah ki ia risa,  
La pah ruh ki sim.'

**Ka sngi ka la mih** ban pynkup ha ka mariang ia ka 'bor Ialap' khnang ba ki briew bad ki kynja bynriew kin iohi ia ka kam ki shyn-riahti U Trai Nongbuh Nongthaw bad kylla kaba mut da kaba iaroh ia u.

**Ka sngi ka la mih ban shondur ia ka jing-**  
**pynlong ka jong U Blei kaba paw ym tang ha**  
**ka por mynsngi, hynrei ha ka por mynmiet ruh,**  
**kumba ong u nongrwai shem myrsiem.**

“**Ka sahit byneng u la tei,**  
**Kaba sydien ha neng pyrthei;**  
**Ka sngi, u bnai, ki khlur jingshai,**  
**Ba iaide ha neng ki nguh I’U Trai”**

**Ka sngi ka la mih ban kyrsiew ia ki khri-**  
**tan kiba ju duwai step ba kin dem khohsiew**  
**ha ka duwan:—**

“**Katba umjer, ha syntiew sah,**  
**To hiar umjer mynsiem;**  
**Bad katba ka sngi kam pat shit,**  
**Aibor ba ngin ioh im.”**

**Ka sngi ka la mih ban ai ka jingpynsngew-**  
**thuh hapoh ka mynsiem u ‘Nongiaphet dak’ ba**  
**ka diengphna kan pakhang lynti sa tang shipor**  
**ia u bad ban phnieng ia ka ‘jynjar’ ba u dei**  
**ban kit.**

**Ka sngi ka la mih ban ai khubor ia u**  
**‘Nongiashem ia U Blei’ ba u dei ban jam suki da**  
**kaba pdiang ia ka jingialam jong U Mynsiem.**

“**Ri Me ia nga, ban i sha jynjai bah,**  
**Ngam don jingkwah, shijam ka biang**  
**ia nga.’**

**Ka sngi ka la mih shalor ka khyndew ban**  
**ai ka ‘dak’ bad pyni ha kiba ngeit ba neh ia**  
**ka kular khuid ba U Blei u dang kwah ban**  
**pyllait im na ka pyrthei jong ka pop. Ka sngi**

ka la mih shalor ka khyndew ban iathuh ia nga  
bad ia phi ba dang don ka por ba ngin phet  
iap na ka 'Sodom' kaba ialeh ban teh bad  
khum ia ngi ha ka 'dujok'.

"Ka sngi ka la dang mih shalor ka khyndew  
hamar ba U Lot u la leit bsut ha Soar. Ynda  
kumta U Trai u la pynhap slap halor ka So-  
dom bad Gomorra da u kyndok bad da ka  
ding na U Trai na bneng" (Jen 19: 23 - 24).

"Ka sngi jong nga hangne lyngkot,  
Ka maham ia nga ban khreh;  
Ding sa lap ka shnong ka jingjot,  
Sha shnong Soar ngan sa beh'.

"Shatei sha ki lum sha jerong,  
Ngan sa phet ban lait ka ding;  
Ai la ka kti Syiem ka jingim,  
Mynsiem jong nga shato ring".

"Ka sngi ka la mih da ka jingpyniaid jong  
ka Bor uba na jrong, ka da shondur ha ka jing-  
mut jingpyrkhat jong nga, bad ka da ktah jur  
kum ka Nongpynkynmaw ba shoh mynsiem ha  
ka dohnud bad ka mynsiem la jong shimet, ba  
kawei ka mynsiem briew kaba kordor, ka la mih  
ha sla pyrthei ba kan pyndep ia la ka jingia-  
phet, ka da bam hynroh lut ia ka jingsngew-  
mynsiem jong u nongiohi ba kynja mynsiem kat-  
ba u dang peit shin ha ka."

---

## 5

# KA SNGI KA LA DANG KIEW SHA JRONG

---

Ka jingbuh jong U Blei na ka bynta ka jingiaid lynti jong ka sngi, ka long ba haba ka la mih, ka dei ban kiew sha jrong; Ka sngi kam lah ban ieng sah hajuh. Ka dei ban pyn-dep ia ka jingiaid lynti jong ka. Ym don ka-wei pat ka jingiphuh iphieng kaba palat eh, kaba ngi iohi tam, lait na ka burom ba U Blei u la pynkup ha kane ka 'met bneng.' Haden ba ngi la iaiaid lyngba ka miet kaba dum baroh shimiet, katno ka jingshai ha ka mynsiem ka jingpyngngad ha ka dohnud bad ka jingtngen ha ka jingmut jingpyrkhat ba ngi ju mad man ka step, tang shu mar iohi iaka sngi ba ka la mih bad kiew sha jrong. Ngim dei ban klet ba ha ka 'sngi' ka don ka burom jong U Blei. Ka sngi ka long ka jingpynlong ka jong U Blei hi. Ka sngi ka kren ia nga bad ia phi tang ia ka burom ba tyngshain jong U Blei. U Blei u don ha lyndet jong ka. U pyniaid ia ka. U pynlong ma u. U leh ma u.

Ka sngi haba ka la mih, ka dei ban kiew sha jrong. Ka sngi ka don ar rukom ki jingbatai ba ka kren ha ngi. Ka iathuh ia ngi shaphang ka 'Matti' jong ka burom U Blei

ha kawei ka rukom. Ka ai khubor ia ngi pat kum ka 'baje' da kaba pynphalang ha ngi baroh ia ka jingkordor jong ka jingim briew kaba U Blei u la buh shipor ha kane ka pyrthei, ha kawei pat ka rukom. Namar kata, ka long kaba donkam katta katta ia ngi ban wad jing-shai mynsiem na ka ktien U Blei shaphang kane ka 'jingiaid lynti jong ka sngi.'

Ngi iohi barabor ia ka burom jong ka sngi tang haba ka bneng ka shai kdar. Ka sngi kaba mih bad kiew sha jrong kam don jingmut ban kren ia ngi, katba ki lyoh kiba sdien ha bneng ki kah ia ki khmat jong ngi. Kum-no ngin 'peit' bad 'iohi' ia ka sngi haba ka suin bneng ka dum bad tap da ki lyoh? Namarkata, haba ngi peit ia ka sngi haba ka la mih bad kiew sha jrong, ngi peit ia ka tang haba ka suinbneng ka shai kdar. Ym don mano mano napdeng jong ngi kiba sngow tynnad ban peit ia ka sngi ha ka por ba dum slap bad kah lyoh. U Blei u la ai ka lad, ka kabu bad ka bor ban peit ha ka sngi, tang haba ym don jingpynwit ba kah ha ki khmat jong ngi.

Haba ka sngi ka la mih bad dang kiew shajrong, to ai ba ngin tip ba U Blei ruh u la khreh ban laid lynti ha ka jingim jong nga bad jong phi. Ka jingiaid lynti jong ka sngi kam dei kaei kaei ruh, hynrei ka dei tang ka jingiaid lynti jong U Blei. Man ba ka sngi ka la mih bad dang kiew sha jrong, ngi dei ban kynmaw ba U Blei u la khreh keiñ ban laid

lynti. Ka jingiaid lynti jong u ka mut ka jingiaid lynti jong u ha ka jingim jong nga bad jong phi. Ha ka jingim kaba shisha jong uwei pa uwei, kawei pa kawei, kata, kiba la jied jong U Blei, ka sngi kaba shisha jong U Blei ka dei ban mih ha ka jingim jong ki. Kine ki sngi kiba ngi im mynta, ki long ki sngi kiba U Blei u kwah ban sdang ia ka jingim kaba thymmai ha ki dohnud jong ngi. Kan bha, namar kata, lada ngin duwai ha U Blei ba ka Sngi kaba tap lup da ka burom ba tyngshain ber jong ka, kan mih noh ha ka step jong ka jingim ba thymmai jong ngi. Ngin ym lah ban sngewthuh ia ka sngi haba ka kiew shajrong, lymda ngi ailad ia U Blei ba un mih bad tyngshain hapoh ka jingim jong ngi. Ngin ym lah ban sngewthuh ia ka jingpyniaid U Blei ia ka jingim jong ngi, lymda ngi khot kyrpad ia u ba un iatrei da la U Mynsiem bakhuid jong u bad pynsdang ruh ia ka jingim ba thymmai ha ngi.

Ka ktien U Blei ka don lai tylli ki khubor ba phylla ban ai ia nga bad ia phi, kumno ba U Blei u kwah ban ia id lynti ha ka jingim jong nga bad jong phi.

(i). "Ha khmih, mynta keiñ kata ka ia ba diang hun, ha khmih, mynta keiñ kata ka sngi ka jingpynim" (2 Kor 6 : 2).

(ii). Lymda kha ia u briew na ka um bad na U Mynsiem, um lah ban leit hapoh ka hima U Blei" (Ioan 3 : 5).





(iii). "Kumta lada uai uei ruh u don ha U Khrist, u long u jingthaw ba thymmai. Kiei kiei ruh ki ba rim ki la duh non, ha khmih kiei kiei baroh ki la jia long kiba thymmai" (2 Kor 5 : 17).

U Blei u don la ka jingthmu kaba khuid ha kaba pyniaid ia ka jingim jong kito baroh kiba donkam ia ka jingialam jong u. Haba ngi sngewdonkam bad wad ia U Blei ba un pyniaid ia ngi, u kloi ban leh kumta. U Blei um ju iehnoh mynno mynno ruh ia kito kiba kwah ban ithuh ia ka lynti jong u. U Moses shisien uba long u briew jong U Blei, u la sdang ban jah lynti haba u la iakynduh ia ka jingialeh pyrshah u paidlang Israel ia U Blei mynba ki la phaidien na u, da kaba mane ia ka dur Blei u Khun Masi Ksiar'. Kumta u la duwai kyrpad ha U Blei jong u kumne : "Mynta namarkata, nga kyrpad ia me, lada nga la shem ia ka jingsngewbha hakhmat jong me, to pyni ha nga ia ka lynti jong me, ba ngan joh ithuh ia me, bad ba ngan loh shem ia ka jingsngewbha ha khmat jong me : to khmih ruh ba kane ka jaid bynriew ka long u paidlang jong me" (Ekso 33 : 12).

U Blei um shym la pynslem ban jubab ia ka jingkwah jong u Moses. "U te u la ong ka khmat jong nga kan leit lem bad me, bad ngan aj jingshongthait ruh ia me" (Ekso 33 : 14). Ynda kumta u Moses u la ong pat ha U Blei, Lynda leit ka khmat jong me lem bad ngi te

wat ialam shuh ia ngi. Naba da kumno yn tip hangne ba ma nga bad u paidlang jong me, ngi la shem ia ka jingsngewbha ha khmat jong me? Ym dei da kaba leit ma me ryngkat bad ngi, ba kumta ma nga bad u paidlang jong me ngin sa long kiba la kyrpang na ki briew baroh kiba ha ka khmat ka pyrthei (Ekso 33:15—16). Te U Trai u la ong ha u Moses. Ngan leh ia kane ruh ia kaba me la kren naba me la ioh shem ka jingsngewbha ha khmat jong nga, bad nga ithuh ia me da ka kyrteŋg” (Ekso 33:17).

Ka sngi la ka long tang ka met bneng, hynrei namar ba ka long ka kam ki shynriahti jong U Blei, ka don ka khubor ba kyrpang ban iathuh ia ka jingiaid lynti jong ngi ruh kum ki Khristan kiba long tang ki Pilgrim ha kane ka pyrthei kaba thait, kaba lywait bad kaba jaw ummat. Ka sngi ka long kum ka ‘khmat’ ka jong U Blei nongbuh nongthaw kaba peit ia nga bad ia phi. U Blei u iohi ia ngi. Ki khmat U Blei ki donbor ban sam lyngba ia ki dohnud jong ngi. U Blei um ju ap iano iano ruh. Shis'ia haba u la iaiaid lynti, u dei ban pyndep ia ka. Lada ngim sngewdonkam ia u, u ruh un ym donkam ia ngi. Lada ngi ong ba U Blei um pyniaid ia ka jingim jong ngi, hynrei ma u te u la dang pyniaid ia ka jingim jong kiwei pat. Lada ngi ong ba ka jingim jong ngi kam don hapoh ka Plan ne ka jingthmu jong u, hynrei ma u u dang thmu ban pyniaid bad pyndep ia ka jingthmu bad ka plan jong u ia ka jingim

**jong kiwei pat kiba u la dep jied na ka bynta ia lade hi.**

**U Jisu khrist u la dep iathuhlypa da kaba kren shaphang jong ki kumba u la dep jied, "Nga, nga ithuh ia kiba nga la jied" (Ioan 13 : 18).**

**Ka ktien U Blei ka ai kawei ka jingbatai kaba shai shaphang kumno ba U Blei ha U Khrist Jisu u la dep jied lypa. Kiei sha kita kiba la jied ki jong U Blei? Nga shait sngew-phylla ban pyrkhat shaphang kane, namar ka ktien U Blei ka la iathuhlypa kumne :— "Bad ngi iatip ruh ba kiei kiei baroh ki iatrei lem ia ka ban pynbha ia kita kiba leit ia U Blei, ia kita keiñ ia kiba la khot katba kum ka jingthumu jong u. Namar ia kiba u la ithuhlypa, u la thmu lypa ruh ban long kiba shi dur keiñ bad ka dur ka jong u khun jong u, ba un ioh long uba la kha nyngkong hapdeng ki babun ki para. Bad ia kiba u la thmu lypa ia kita u la khot, ruh ; bad ia kiba u la khot, ia kita u la pynksan ruh ; te ia kiba u la pynksan, ia kita u la pyndonburom ruh" (Rom 8 : 28-30).**

**Ka Sngi haba ka la mih, ka dei ban kiew joit joit sha jrong : Kam sngew kwah ban ieng sah hajuh. Kam don jingbabe ban leit phai pat da kaba hiar biang shapoh ka mei ramew. Ka shu kiew sha jrong khlem pyrkhat ei ei ia ka tieng ka ma. Ka jingkiew jong ka sha jrong ka long kaba skhem, kaba don**

ka jingmut nar. Kam salia ia ki jingeh kiba lah ban don ha ka lynti ia id jong ka. Kam sheptieng ia u slap, ia u pyrthat, ia ka lyer langthari. Kam khein ia ki lyoh iong kiba sdien ha ka lynti ia id jong ka. Ka long kum u Samla uba eh, uba khlain bad uba shynrang mynsiem ban pyndep ia la ka thong.

Ka Sngi kaba la dang kiew sha jrong, ka ai ki jingmut kiba kordor ia 'u briew' ne 'ka briew' kiba angnud bad thrang ia ka lynti jong ka burom. U Dabid uba long "U nong-rwai ba bang jong U Israel," u nud kat haduh ban pynsyriem ia ka jingkieu jong ka sha jrong bad "U nongleit-kurim uba wan mih noh na la ka kamra, bad kaba shad kmen kum u radbah ban phet ia la ka jingphet" (Salm 19 : 19).

Ka sngi kaba la dang kiew sha jrong ka ai ka jingpyrsad mynsiem kaba khraw ia 'u khynraw' ne ka khynraw', ba ki dei ban pyndep hok ia la ka lynti jingphet jong ki bad leh hok ruh ia ka. Ka ai ka jingshlur ia ki 'sam-la khristan' ba kin wad barabor ia ka lynti jong ka burom ha ka jingim jong ki. Haba ka sngi ka kiew sha jrong ha ka por ba rang bad shai kdar, ka pyndap ia ka burom jong ka bneng bad ka pyrthei tang da ka jingtyngshain ba phyrnai jong ka. Ym don shuh ha pyrthei kaba kham kor ba U Blei u nnewkor eh lait na ka 'burom' jong u Samla bad ka Samla kiba don ruh ryngkat bad ka 'bor', kumba ka Proverb ka ong. "Ka burom ki samla long ka jingkhlain jong ki" (Prob. 20 : 29).

Ka sngi ka la dang kiew sha jrong ban pynkynmaw ia ngi ki khristan kiba dang leh lyngngai ha pyrthei, ba ka jingiebeh ba kynja mynsiem ka long kaba rem dor katta katta, bad ba ngi dei ban ialeh kat lah kat iai ban nangsán nangklew ha ka jinglong mynsiem, rynpkat bad kata, ban trei dep katba ngi lah ia ka kami ka jong U Blei, namar sa tang shi-por, ka sngi kan sa kynriah bad noh phai. Haba ngi peit ha ka sngi mynstep bad iohi ia ka ba ka la nang kiew sha jrong, ngim lah khlem da sngap bad pynshah shkor ia U Mynsiem jong. U Blei uba kren pasiaw ha ngi, kumba U Blei u la phah ia u angel jong u ban kysiew bad pyntngen ia U Elijah uba la btai ia la ka jingim : "Khie joit bad to bam ; namar ka jingleit ka jngai eh ia me' (1 Syiem 19 : 7)

Ka sngi ka la dang kiew sha jrong ban ai ka jingkyntu kynpham ia ki khristan kiba la pynkha arsien, ba kin kynjoh shuh shuh sha neng, ban nang ia wad, ban nang iabeh, ban nang iai mut brai ia kiei kiei kiba dei bad ka pyrthei ka ban sa wan. Kumta ka ktien U Blei ka la buh ka jingsneng kaba kyrpang ia ki khristan ba kynja mynsiem kumne :—"Na-markata, lada la pynmih lem ia phi bad U Khrist, to wad ia kiei kiei ruh kiba haneng ha kaba U Khrist u don, uba shong sha ka kti kamon U Blei. To phin mut brai ia kita kiei kiei ruh kiba ha neng, ym ia kita kiei kiei ruh kiba ha ka khyndew. Namar phi la iap noh, bad ia ka jingim jong phi la buhrieh

lem bad U Khrist ha U Blei. Ynda la paw U Khrist, uba ka jingim jong ngi, ynda kum-ta phi ruh phin paw lem bad u ha ka burom" (Kol 3 : 1-4).

'Ia kiei kiei ba haneng,  
Ia kita ki iai wad ;  
Ia ka jingkwah pyrthei ki weng,  
ki iai bud l'U kynrad.'

Ka sngi ka la nangkiew sha jrong, ka da pynphalang ha ngi ia ki rong ba phyrnai jong ka. Ka Sngi kam ju bat ia ka burom tang halade, hynrei ka ai ha nga bad ha phi ia ka jingtyngshain ka burom kaba mih na ki kjat sngi kiba phalang jong ka. Ka sngi kaba tyngshain lep ha ka por mynstep, ka ai ia ki jingkyrkhu khlem tyngkai ha ki briew baroh. Kam ju pep ban pynphalang ia ki rong ba phyrnai jong ka. Lada u 'Simpyl-lieng' u pyni ia ki hynñiew tylli ki rong ha ka pyrthei, hynrei u pyni ia-lade ha ki por ki-por. Ka jing- ih jong u simpyl-lieng ka long tang tengkhat eh. U Simpyllieng u mih tang ha ki aiom ba hap slap, hynrei ka sngi pat ka mih khlem jingkheñ por. Ka mih la ha kano kano ka aiom. Ha kine ki ti lum baieit jong ngi, ka sngi ka dei ban 'mih man ka sngi. Haba ka la mih, ka dei ban kiew sha jrong, ka da pyn-tyngshain ha ngi ki jing-thaw kiba kyrpang jong U Blei ia ka burom jong ka, khlem pyniapher la ia uba hok ne uba pop, la ia uba bha ne uba sniew.

Kane ka 'juk' kaba ngi im, ka long ka 'juk' jong ka jingbymman ba kynja mynsiem.

Lada u bymman bad uba bha ki ia im lang ha ka pyrthei, kan sa pher aiu? namar ba wat hapoh ka balang, u ñlut bad u kew kin iasan lang. Hynrei pynban kumba u don 'lap shilliang' hangno hangno, kumba ka don ka jingdum ha ka jaka ba shong ki Ijipt bad ka jingshai ha ka dara ki Israel; kumta ruh ka jingkyrkhu kaba kyrpang jong U Blei ia ki Khristan kiba sheptieng ia U Blei, kan ym pep ban wan na U Jisu Khrist U Khun ba la kha marwei jong u, kumba u Malakhi u nongia-thuhlypa jong U Blei u la saham ba ka don, ka sngi ka hok, kaba la dep tyngshain bad, kaba khreh ban tyngshain mynta ha kito baroh kiba dei ki jong u. Hynrei ha phi kiba sheptieng ia ka kyrteng jong nga, kan mih ka sngi ka hok bad ka jingpynkhiah ha ki thapniang jong ka ; bad phin ioh mih shabar, bad phin rynsied kum ki khun masi ba bsa ha iing" (Mal 4 : 2).

Ka Jingtyngshain lep jong ka sngi ha ka por mynstep ba ka kiew sha jrong ka pynkynmaw ia ngi shaphang ka jingtyngshain jong ka jingshai. bneng kaba la wan shat ha ka diengphna halor u Lum Kalbari kaba long ka khyrdop bneng ia nga bad ia phi.

'Ka khyrdop don ba rynghang sah,  
Na kata i ka jingshai;  
Ba tyngshain eh na diengphyna,  
Jingieit U Blei ba janai.'

Lada U Blei ha U Jisu Khrist u la pyn-tyngshain da ka diengphna ha ngi ki nong-

pop kiba la duh jingkyrmen, bad shong ha ka syrngiew iong jong ka jingiap, ngi dei pat ruh ban tyngshain ha kiwei da kata ka jing-tyngshain kaba la shat ha ngi na 'u sngi jong ka hok'. Ha kane ka jingleh ba phylla jong U Blei ia ngi, nga sngew kumba U Blei u kren jur ha ka sur kaba sawa jam ia u briew bad ka briew shimet marwei marwei :- 'Tyngshain Ko bangeit! Tyngshain Ko bangeit! Tyngshain Ko bangeit!

Ha ka pyrtnei kaba sniew kat kane kaba ngi im mynta bad iohi da la ki khmat pyllew ia ka jingjot ki iing ki sem, ka shnong ka thaw, ka ri bad ka jaidbynriew, hato kam la dei ka por ba ngin kham rwai bunsien ia kato ka jingrwai kaba khot ia ki riwngait ba kin kham tyngshain katba nang mih ki sngi bad katba nang roi ki jingsniew?

'Tyngshain, ong Jisu tyngshain tyngshain ber,  
Kum sharak rit mynmiet jingshai ka la her ;  
Ka pyrtnei ka la dum, te to tyngshain,  
Ha ka ing ka jong phi khlem sngewlehrain.

Tyngshain, ong Jisu tyngshain ki jong nga,  
Lada phi man jyngut, kata ngam sngewbha ;  
Na byneng Ngan khymih la phin tyngshain,  
Ha ki shnong ki jong phi khlem sngewlehrain.

Tyngshain, ong Jisu ha ki shnong kyndong,  
Bun jait ki jingsniew shisha ki ker sawdong ;  
Pop, kyrduh, bad sngewsih, te to tyngshain,  
Ha ka ri ka jong phi khlem sngewlehrain.'



Ka Sngi kaba la dangkiew shajrong ka long ka nongbatai ia ka jingkhein por jong ngi. Ka kdew kum ka 'baje' na ka bynta ki nongiaphet ba kynja mynsiem. Ka sngi hamar ba ka la mih, kam ap bad sah hajuh, hynrei ka kiew roit roit sha jrong. Ia ka jingkiew stet jong ka sha jrong ngim ju lap ba iohi. Namarkata, ka sngi ka ai ha nga bad ha phi ia ka jingkhein por kaba shisha. Ka sngi kaba la mih bad kiew shajrong, ka kren ha ngi baroh shaphang ka jingiaid stet jong ka 'por'. Ka sngi ka long ka nongbatai ia ka 'Por' ba la buh da U Blei. Ka por kam ju ap iano iano ruh. Lada ma nga bad ma phi ngi khein sting ia ka jingiaid jong ka por, ka don ka jingma ba ngi lah ban ym kot sha ka jingalei ba dap biang ba U Blei u la kular ban wallam ia ngi hapoh ka por kaba u hi u la ai ia ngi.

Ka long kaba donkam kumta ia ngi ki nongiaphet, ban shim ia ka 'kabu kstar' ba U Blei u la ai ha ngi da kaba ia phet bad nang ia phet, ryngkat bad kaba shaniah ha ka jingialam ba stad jong u. Kane ka pynkynmaw ia ka jingshisha ba khraw kaba u. Apostol Paul u la kren haba u ioh bat bad ioh pdiang ia ka 'jingalei' ba la pynioh da U Jisu Khrist ha u, mynba u la phla haba u. ong: "Ngam pynlehnohel ia ka jingalei U Blei" (Gal 2.: 21).

Katba ngi nang peit ha ka sngi kaba la dang kiew shajrong, to ai ba ngin tip ba

ngi peit ha ka baje jong U Blei kaba u la pynkiew bad ~~sdien~~ sha bneng. Kane ka baje jong U Blei ka maham ia ngi ba ngi dei ban iabeh ia ka por jong U, da kaba leh bad pyn-dep ia kano kano ka kam kyntang kaba u kyntu ia ngi da U Mynsiem bakhuid jong U. Ka sngi kaba nang kiew shajrong kam tip ia kano kano ka jingeh kaba lah ban khang lynti ia ka. Ka kiew shajrong, ka da tyngshain bad iai tyngshain khlem jingsheptieng ia ka jingdum. Ka long syriem kum ki 'Khristan Hebru' kiba u Apostol Paul um lah khlem da ai ka Sartipheket ia ka 'jingshlur ba riewblei' jong ki haba u kyntu kynpham ia ki da kine ki ktien. "Namar kata wat bret noh phi ia kata ka jingshlur jong phi, kaba don ka nong kaba khraw. Namar phi donkam ia ka jingiai shah, ba haba phi la ioh leh ia ka mon U Blei, phin ioh pdiang ia kata ka jingkular" (Heb 10 : 35, 36).

Ka sngi kaba la dang kiew sha jrong, ka hikai ia ngi ruh ki khun U Blei ba ngim dei ban sah hajub, hynrei ban nang san ha ka jingtip ia U Blei, bad ha ka jingaiei jong u. Kine ki sngi kiba ngi im mynta ki long ki sngi kiba dap biang jong ka jingtrei U Mynsiem bakhuid. Kumba ka baje ka tied bad ka riew man ka kynta, kumta ruh U Mynsiem bakhuid u tied kum u klongsnam ha ka myn-siem jong uba ngeit ban ai ia ka 'Siknal kaba kynja bneng' ba ki nongiaphet ki dei ban pyn-dep stet ia ka kam kyntang namar ba ka por ka la nang iaid. Ki 'Khristan iaid wir' kin

kham sngewthuh bha ia ka jingmut jong ka sngi kaba la nang kiew sha jrong, namar u Apostol Petros u la kren kyrpang tang shaphang jong ki da kaba ai ka jingkyrkhu kyrdoh ia ki ha kine ki ktien ba shon mynsiem : “Hynrei to phin nang roi ha ka jingalei bad ka jingtip ia U Trai bad U Nongpynim jong ngi U Jisu Khrist” (2 Pet 3 : 18).

Ka sngi haba ka kiew sha jrong, ka bud beit ia la ka jong ka lynti. Kam ju kynriah wat tang khyndiat ruh na la ka lynti ba ka dei iaid. Kam tip ban phai sha kadiang ne sha kamon. Kam nang ruh ban kynran da dien. Ka jingiaid lynti kaba beit jong ka sngi, ka pynkynmaw shaphang ka jingiaid sakma jong ki bymman ki bym ju ithuh ia ka lynti jong U Trai. Ka jingiaid lynti kaba beit jong ka sngi ka ai ka jingmaham ruh shaphang ka jinghap noh jong kiba ngeit, ki bym ju neh ha ki lynti ba U Trai u la hikai ia ki. Kumta ka ktien U Blei ka don ban kren ia baroh ar : “Namar kata ma phi, ko hep baieit, haba phi tip lypa ia kine kiei kiei ruh, to da sumar noh, ioh ba haba la rong noh lem ia phi bad kata ka jingiaid sakma jong kita ki bymman, phin da hap noh na la ka jong ka jingneh skhem hi” (2 Pet 3 : 17).

Ka Sngi haba ka kiew sha jrong, ka wad ia la ka lynti kaba U Trai Nongbuh Nongthaw u la pynkhreh ia ka ha ka suiñ bueng. Ka wad ia la ka lynti, ka da kiew shajrong bad sngewskhem ha la ka lynti iaid ba ka la

shem. Ka long syriem kum u Khristan nong-  
leit jingleit uba thmu ban poi sha tneng, bad  
uba iawer bad khot iejt ia ki paralok baieit  
jong u ban peit sha u kum ka 'Nuksa'

**'Peit sha nga u nongleit jingleit'**

Uba thew ban poi byncng ;

Trai, nga sheptieng ia ki umbah,

Ba nga dei ban ryngkang teng ;

Nga la swai, kyrshan Trai,

Me ngan iaroh khlem da wai'.

Ka Sngi kaba kiew sha jrong ka iapher  
na ka jingim jong ngi ki khun bynriew kaba  
sah hajuh bad ka ban kut noh ha kawei  
ka sngi. Hynrei na ka jingshai bad ka jing-  
tyngshain jong ka sngi, ngi lah ban ring ia  
ka "khuber mynsiem" kat kum na ka ktien U  
Blei kaba beh noh ia ka jingklusai, jingartatien  
bad jingduh jingkyrmen. Ka sngi kaba tyng-  
shain bad iaityngshain katba ka nang kiew  
sha jrong, ka rah ia ki 'jingmut jingpyrkhat,  
jong ngi kiba ngeit sha U lum ka jingkylla  
dur ha kaba la pynkylla dur ia U Jisu Khrist  
baroh shirynieng ha khmat ki synran jong u  
laingut.

"Ynda la hynriew sngi ruh U Jisu u la  
shim lem ia u Petros, bad ia u Jakob, bad  
ia u Ioannis u para jong u, bad u la leit  
lam ia ki kyrpang sha u lum bajrong, bad  
la pynkylla dur ia u ha khmat jong ki; Ka  
khmat jong u te ka la tyngshain kum ka sngi,  
bad ki jaiñ jong u ki la long lieh kum ka

jingshai. Ha khmih ruh, U Moses bad U Elias ki la paw ha ki, ki da iakren bad u" (Math 17 : 1-3).

Ka jingwanmihpaw jong ki riewkhuid arngut ha u Lum ka jingkylla dur, ka la nang kham pynphylla ia ka jingjia barch kawei. Khlem pep ki synran lai ngut kin ym lah khlem da leit pynbna kylleng kylleng ia kane ka jingjia, hynrei U Jisu Khrist u la dep maham lypa ia ki ba kim dei da lei lei ban iathuh briew hano hano ia kane ka jingjia. Haba ki dang iahiar te na uta u lum, U Jisu u la hukum ia ki, u da ong, wat iathuh hano hano ruh ia kata ka jingithuhpaw. tad yrda U khun u briew u la mihpat na ki baiap" (Math 17: 9).

Ka Sngi ka long ka met bneng. Ka don ka 'bor ding' ha ka. Hadien ba ngi la ia id lyngba ia ka miet kaba lam khriat, (namar ba ngi hap ban 'tap' bad 'kup' ialade da ka jainkup haba ngi thiah mynmiet), ka Sngi kaba wan rah ia ka step ka al pat ha ngi ia ka jingsyaid. Ka jingwan jong ka por mynstep ryngkat bad ka jingmih jong ka Sngi ki dei ban pynkyndit thiah ia ngi, kumta ba ngi lah ban khot kyrpad ia ka kyr teng U Jisu Khrist. Kumba ka Sngi ka mih man ka step, kumta ruh U Jisu Khrist un wan mih ha ka dohnud jong nga bad jong phi, lada ngin peit slem sha u ha ki jingduwai ba aiti thymmai jong ngi. Shisien haba U Jisu Khrist u la shong skhem da ka jingngeit ha ngi, da U Myn-

siem bakhuid ka bor jong u, u weng noh ia ka jingkhriat ba kynja mynsiem jong nga bad jong phi. Katba ngi nang duwai bad bret ti lut ialade ha u, U Jisu Khrist khlem pep, un tyngshain kat ka Sngi hapoh ka dohnud kaba kah dum da ka pop.

Ki riewkhuid kiba kwah ia ka 'Bor' na U Jisu Khrist, kin ym duh ia ka, lada ki wad ka jingpynkhuid kaba khlem sangeh ialade. U Jisu Khrist u bym ju pynraiñ bukhkoh ia kiba ngeit ha u, un ym pep ban pynpaw ialade ha ki, kumba u la leh ha u synran baieit eh jong u ha ka dewlynnong Patmos. Ka long-rynieng (Person) U Jisu Khrist ka thaba da ka burom Blei ha Patmos. U Ioannis u nong-iohipaw mynba u la don ha Patmos, u la phla da kaba iathuh ia ngi: "Ka khmat jong u ka la long kum haba ka Sngi ka tyngshain ha ka bor bah jong ka" (Jingpyn 1 : 17).

Lada U Jisu Khrist u la shong skhem hapoh jong nga bad jong phi, u dei ban pynlong ia ki met ruh ka 'templ' bad ka "Ing shong U Mynsiem Bakhuid". U Apostol Paul u kylli kiba kumno ki met jong ngi ki dei ban long: "Hato phim tip ba kata ka met jong phi ka long ka Ingshong U Mynsiem Bakhuid uba hapoh jong phi, ia uba phi la ioh na U Blei, bad ba phim long la ki jong hi? Namar la thied noh ia phi da ka dor bah: te namarkata to pyndonburom ia U Blei ha ka met, bad ha ka mynsiem jong phi kiba long ki jong U Blei" (1 Kor 6 : 19, 20).

Ka 'burom' jong U Blei kaba don ha bneng ka long kajuh ka burom kaba don ha u khun baieit eh jong u, U Jisu Khrist, bad kaba tyng-shain hapoh ki 'khiew khyndew' jong ngi. Ia kane ka burom ia ai ha ngi ha ka por ba ngi iohpdiang ia ka 'jingbaptis kaba da U Mynsiem Bakhuid'. Ngi ionpdiang tylli ia kane ka burom kaba da kat ka burom. Ka ktien U Blei ka pynkynmaw ia ngi ba ki riewkhuid jong U Trai, ki dei ban sumar ia kane ka burom ha pyrthei, khnang ba kin ioh pyn donburom, ia U Jisu Khrist kham khraw ha bneng. Ia kane ka 'jingmaian bneng', ngi shem ia ka kum ka 'jingkynrei spah ka burom' bad ia kaba u Apostol Paul u kren shaphang jong ka, "Kaba long keñ U Khrist ha phi, ka jing kyrmen ka burom" (Kol 1 : 27).

Lada ngi dei ban nang kiew ha ka jing im ba kynja mynsiem, ngi dei ban mad ruh ia ka 'jingjynjar' bad ka 'shipa'. Ki 'jingjynjar' bad 'shipa' ki pynthiang bad pynbang ia ka jingim Khristan jong ngi. 'La jer kyrteng ia ki tang ha ka jingmut jong ka 'diengphna'. Namarkata ka jingiatyngkhuh ia ka 'diengphna' ka dei ban wan rah ia ka 'jingkylla dur' ha ka jingim baroh kawei. Dei da ka 'jingjynjar' ba uba ngeit u ioh ia ka 'jingpynkylla dur' kaba kham stet bad kham janai. Ha ka dieng phna ka don ka 'Burom U Trai'. La pynlong-kam ia ka burom U Trai kaba tap ha ka 'longrynieng' jong u, da ka bor jong ka jing trei U Mynsiem Bakhuid kaba mih na u bad kaba phalang ha ngi. U Apostol Paul u la

iathuh ia kane ka 'bor' kaba don ha U Trai, bad kaba trei kam phylla katta katta, kat ha duh ba ka donbor ban pynkylla ia ngi na kawei ka burom sha kawei ka burom.

“Hynrei ma ngi baroh da ka khmat khlem da kah noh, da kaba ngi khmih shai kumba ha ka it ia ka burom U Trai, la nang pynkylla nangpynkylla dur ia ngi sha kata kajuh hi ka dur na ka burom sha ka burom kumba na U Trai uba U Mynsiem” (2 Kor 3 : 18).

Bun napdeng jong ngi ki briew kiju klet barabor ban peit ia ka burom jong ka sngi katba ka nang kiew sha jrong man ka step. Ka long kumta ruh bad ka jingim khristan jong ngi. Ngi la long khristan la slem, ngi la don kyrteng ha ka balang la slem ; hynrei ngi ju klet ban peit ha ka burom U Trai uba pyn paw ia lade ha ngi. Ka pop kaba shong ha ka dohnud bad ka jingbun than eh ki kam ba ngi iabeh mynstep, ki long kum ka 'jingkah' kaba 'kah' ia ki khmatjong ngi ban iohi ia ka burom U Trai ba ka khreh ban iaaid lait na ka jingim jong ngi man ka step. Lada ngim lah ban 'peit', ngim lah ruh ban 'iohi'. Lymda ngi peit slem pat, ngin ym lah ban ithuh. Lada ka long ka bym lah ban peit, sa katno tam lei lei kat haduh ba ngin da iohi bad ithuh. Syriem kumba ka sngi ka pyntyngshain ia ka burom jong ka ha ngi man ka step, kumta ruh U Jisu Khrist u pyni lut ia ka burom jong ngi. Ngin iohi ia ka burom U Trai tang haba ngi phai sha ka ktien U Blei



bad pule ia ka da ka jingshemphang, ryngkat  
 bad kaba shong slem ha trai ki kjat U Nong-  
 pynim jong ngi, lem bad kaba bret lut ia ki jing  
 kit bakhia jong ngi ha u. U nongrwai shem  
 mynsiem uba la mad ia ka burom U Trai ha  
 la ka jingim lajong, u la sngewthuh shai  
 ba ka burom U Trai ka tyngshaiñ napoh ka  
 ka 'Baibl' katba ngi dang pule ia ka ryngkat  
 bad ka mynsiem kaba pyntyntang lut ia lade.

"Ah peit ki 'mat jong nga ban iohi,  
 Ka burom ka ktien jong Me phar;  
 Kham myntoi ia nga ban shem kane,  
 Ia kaba ioh rupa bad ksiar;  
 Ka pyrthei kan ing bad ki paila;  
 Ka ktien U Blei jong nga kan neh;  
 Ka jingim bymjukut long ithuh,  
 I'U Jisu, u briew bad U Blei".

'Ka jingshong slem jong ngi baroh shimiet  
 ban peit ha ka telibishon da kaba peit ia kiei  
 kiei ki jong ka pyrthei, ka lah ban pynmynsaw  
 ia ki khmat ba kynja mynsiem jong ngi. Shi-  
 sien haba ngi la peit baroh shimiet ha kiei kiei  
 ki jong ka pyrthei, kumno ngin nang ban  
 khie step? Ki khmat kiba la 'byrie' kim lah  
 shuh ban nang ban peit ia kiei kiei kiba shong  
 Blei, kiba kynja mynsiem bad kiba kynja bneng.  
 Ki briew kiba la shong baroh shimiet ha ka  
 'jingdum', kumno kin ioh lad ban iohi ia ka  
 'jingshai' mynstep? Khnang ba ngin peit ha  
 ka jingshai jong U Khrist kaba dang iaid  
 lait ha ka por mynstep, ka donkam lypa ia  
 ka jingpynkhreh ba ngin ioh baroh shimiet.

Dei namar kane ka daw, ba u Dabid u shakri jong U Blei ruh u la pynlong ka jingkular ban iaiaid ha ka jingriewblei haba u dou ha ling naduh mynmiei, u da kren ha U Blei ia ki ktien kiba sngewthiang.

“Ngan iaiaid ha la ling bad ka dohnud ka bajanai. Ngan ym buh ei ei kaba thala ha khmat ki khmat jong nga, nga isih ia ka jing leh jong kita kiba kynriang; kan ym ioh snoh ha nga. Ka dohnud kaba mutlop kan kynriah noh na nga: ngan ym tip ia kaei kaei kaba sniew” (Salm 101 : 2-4).

Ki Sngi, ki taiew, ki bnai bad ki snem ki nangiaiaid stet ha ka jingim jong ngi. Shen shen ngin sa leit noh na kane ka pyrthei. Sa katno pat ba ngin dang pynslem ban peit kloi ha ka burom U Trai kaba dang tyng-shaiñ khlem sangeh haduh mynta? Lada ngi la mon ban iohi noh ia ka burom U Trai, ngi dei ban loit kloi bran bran ia ka ‘jingkah’ kaba kah ia ki ‘khmat ba kynja mynsiem’ jong nga bad jong phi. U Blei ruh haba u da iohi shisha ia ka jingkwah jong ka mynsiem jong ngi, u kloi ban iarap ban pynkynriah noh ia kane ka ‘jingkah’ da ka bor bah jong U Mynsiem Bakhuid. Ka jingartatien, ka jingbryngeit, ki jingkluslai pyrthei, ki nang-pynrben shuh shuh ia ka jingkah. “Hynrei ynda kan da phai khmat ha U Trai, yn loit noh ia kata ka jingkah khmat” (2 Kor 3 : 16).

Shisien haba la loit noh ia ka ‘jingkah-khmat’, U Mynsiem jong U Trai ruh un sa

wan 'snoh' ha ngi. Shisien pat haba ngi la ioh pdiang ia U Mynsiem jong u, un ai ruh ha ngi ia ka Jinglailtuid. Ia kane ka jingmaian ba kynja Blei, U Apostol Paul u la dep iathuh kumne: "Te U Trai u long uta U Mynsiem, bad ha kaba don U Mynsiem U Trai hangta don ka jinglailtuid" (2 Kor 3 : 17).

Ka jinglailtuid ba kynja mynsiem ka long ka jinglailtuid kaba U Blei ha U Khrist u ai ha ngi da U Mynsiem Bakhuid jong u. Baroh na ngi ngim pat ju ioh mad ia ka jinglailtuid kaba kum kane. Hynrei don bun pat kiba la iohpdiang ia kane, namar ba ka jingiap U Khrist halor ka diengphna ka la pyllait ia ki khnang ba kin ym long mraw shuh ha ka Pop. Kumta U Jisu Khrist ha ka por ba u dang don ha pyrthei, u la dep pynbna ia kata ka bor Blei ba la pyntrei da ka jingaiei kaba na neng. "Namar kata lada U khun un pyllait noh ia phi, phin long kiba la lait noh da shisha" (Ioan 8 : 36).

Shisien ba ngi la ioh pdiang kynti na U Trai ia kane ka jinglailtuid kaba da U Mynsiem Bakhuid, ngi la lait na ka jingteh jingkhum jong ka aiñ briew. Kiba haing hasem lymne ki kur ki jaid kin ym lah shuh ban teh ia ngi. Da kane ngi pynlong ka "atiar" ban rung sha ka pyrthei kaba kynja mynsiem, ban iai wad marwei hangno U Blei u don, hooid ban kynjoh ia ka ban wad ia ka mon bakhuid U Blei halor ka jingim kaba dang sah shipor ha kane ka pyrthei. Da kane ka

jinglailuid U Mynsiem U Trai, ngi sngew-thrang hir hir ban ia kylli na U Trai shaphang ka plan bad ka jingthmu jong u ia ngi shipor. Da kane ka jinglailuid, uba ngeit jong U Trai uba iohpdiang ia ka shimet marwei, un hap ban mih marwei ban iaid ia ka 'lynti pilgrim' kaba thait bad kaba lywait. U long syriem kum uta u nongleit jingleit uba sngew ka jingkyntu mynsiem ha lade ba u dei ban mih marwei na ling sa khyndiat por bad ban leit kum u Abraham sha ka ri ka bymtip : "Da ka jingngeit u Abraham, haba la khot ia u, u la kohnguh ban leit noh sha kata ka jaka ia kaba un sa pdiang ia ka ban long ka bynta : te u la leit noh, um da tip shaei u leit" (Heb 11 : 8).

Ka sngi ka la dangkiew sha jrong. Uba ngeit jong U Trai um dei shuh ban pynslem ialade da kaba shong ha ling. U Mynsiem bakhuid um ju pep ban pynkyrkieh ia ki kjat jong u riwngait ba u dei ban sdang noh kloia ka jingleit. Ia ka sngi, ka por bad ka jingleit U Mynsiem Bakhuid u la dep shna ia ka Prokram. Ka jingleit u 'Pilgrim' ka lah ban long sha bneng, namar ba un iakynduh ia kaba kut jong ka jingim, ne ba un dangsdang ia kawei pat ka jingiaid lynti kaba thymmai shipor ha pyrthei.

"Na ling ngan mih sa khyndiat,  
Ba mynta nga dang shong ;  
Kin pra jingkyrshan jong ka  
Ban kyllon la jan long.

**"Kan her ka jingpang baroh,  
 U nongpop nga la mih ;  
 Nga rwai haba kynmaw,  
 Ia ka sngi, ngan sa long".**

Haba ngi iaaid marwei ia ka lynti da ka jing-  
 ialam jong U Mynsiem Bakhuid, ngim lah tip  
 ia ka jingthmu jong U Blei ; hynrei ngi shu  
 kohnguh ba dei ban leh kloï kloï. Ym ju  
 don uno uno u briew ne ka briew kiba la  
 tip lypa ia ka 'plan' jong U Blei. U Blei u  
 lah tang ban shu ai ha ngi ia ka 'dak'. Ka  
 'dak' ka long barabor ka 'jingpynpaw' bad ka  
 'jingpyndep' ka long ka jong U Blei. Kaba  
 rieh ka dei ka jong U Blei, hynrei kaba la  
 pynpaw ka long ka jong ngi. Kumta ka Ktien  
 U Blei ka la dep batai kumne :—"Kita kiei kiei  
 ruh ki barieh ki dei ki jong U Trai nba U  
 Blei jong ngi : hynrei kita kiei kiei ruh ia kiba  
 la pynpaw ki dei ki jong ngi bad jong ki khun  
 jong ngi" (Deut 29 : 29).

Ha kane ka jingiaid lynti marwei jong ngi  
 ngin hap sumar bha ialade, namar ba U Myn-  
 siem bymman u lah ban wan iaaid lang bad  
 ngi hamar ka por ba U Blei u dang khreh  
 ban pyndep ia ka mon bakhuid jong u na  
 ka bynta jong ngi. "Ngin lyngngoh lei ia kata ?  
 Namar u soitan hi u pynsyriem ialade ia u  
 angel ka jingshai" (2 Kor 11 : 14).

Namar kata, ka jingphikir baroh ialade ban  
 ym shah ring ha kawei pat ka bor kaba na  
 dujok, ka long kaba donkam eh katta katta. Ka

ktien U Blei ka pyokynmaw ia ki khristan ba kynja mynsiem, ba don ka jingma ba kaba kynja bneng ka lah ban kylla mulot ha ka shi khyllipmat, ha ka jingphon jingpah ba bun buit jong u soitan. "Hato phi long kiba bieit katta katta? haba phi la sdang ha U Mynsiem, la pyndep mynta ia phi ha ka doh?" (Gal 3 : 3).

Katba ngi dang ialeh ban kiew ha ka jinglong mynsiem, ka don ka jingshyrkhei ba ngi lah ban hap bad syntuid noh. Ka jinghap noh hamar ka por ba ngi la poi sha jrong, ka long kaba la thikna bha, lada ngim iai duwai bad sharai. Ym don ruh ka jingjah burom kaba palat ban ia kane ba uno uno ne kano kano kiba la kiew sha jrong kin syntuid bad hiar arsut sha tbian. Ki nongkiew lum ha ri Switzerland haduh mynta mynne, ki la ju iathuh ba haba kiew ia ki lum Alps katba ki dang kiew na trai, ki lah ban kiew joit joit khlem jingsheptieng, hynrei ynda haba ki la sdang poi sha kliar lum, ka jingjur ka ior bad u thah ryngkat bad ka lyer kaba paswut jur katta katta, ka pynlong ia ki ba ki lah ban ur ne tyllun khuit lykhuit sha trai lum.

Ban iaid marwei ha ka lynti pilgrim kaba dap da ki jingialeh bad jingpynshoi kam long ka kam kaba jem, khamtam ban jied ia ka lynti khim. Dei ha ka lynti kaba khim keiñ ba ngi dei iaid, ba u soitan ruh u nud ban kham iaid synrop synrop hajan eh jong ngi: Ka ktien U Blei ka la ju ai ki jingmaham

ba bun jaid ia ngi shaphang ka jingdonkam ban iaineh skhem. U Jisu Khrist ha ka por ba u dang don ha pyrthei, u pait ka dohnud haba u la shem ba don bun kiba la bud ia u, hynrei kiba la phaidien noh. U iai maham ia ngi shaphang ka jingwan jong ka 'kordit bah' ha ki sngi kiba khadduh, ba ynda haba la lang shibun ki synran, la seng shibun ki balang, la ialap khambun ia ka gospel, ba ha kaba kum kata ka por ba kiba icit jong u kin ym lah ieng hapdeng ka bor jong u soitan, uba ap tang ban pynkyllon noh wat ia kiba la j'ed ruh. **Ka jingiaineh ! ka jingiaineh ! ka jingiaineh !** ki long ki ktien jingmaham ba ngi shem ha ki kyntien kiba la mih na ka rmiang shyntur U Trai jong ngi haba u ong : "Hynrei jar uba da iaineh haduh ka bakut, uta keiñ u ban ioh lait im" (Math 24 : 12).

Ka sngi kaba la dang kiew sha jrong ka tip biang biang ia la ka lynti ba U Blei hi na jrong u la buh ia ka ba kan iaid. Lada ka sngi kaba long tang ka met bneng, ka shah ha ka jingpyniaid jong u 'komputar' jong U Blei, kaba katno tam lei lei ia ngi ki khristan ba ngin shah ha ka jingpyniaid bad ka jingialam jong u 'komputar bneng' uba long u 'Mynsiem bakhuid'. "Namar kat kiba la ialam da U Mynsiem U Blei, kita keiñ ki long ki khun U Blei (Rom 3 : 14). "To iaid da U Mynsiem, te kumta phin ym pyndep ia ka jing kwah ka doh" (Gal 5 : 16). "Lada ngi im da U Mynsiem, to ai ba ngin iaid ruh da U Mynsiem" (Gal 5 : 25).

Katba ngi nang kiew ha ka jingtip ia U Trai, ngin ym pep ban kiew ruh ha ka **jingsheptieng ia U Trai**, kumba la sneng ia ngi ha ka kien bakhuid jong u. "Ha khmih ka khmat U Trai ka don ha kita kiba sheptieng ia u, ha kita keiñ kiba kyrmen ha ka jingisynei jong u" (Salm 33 : 18).

"Ka jingmut barieh jong U Trai ka don bad kita kiba sheptieng ia u, bad un pynbna ha ki ia la ka jutang" (Salm 25 : 14).

"Uei uta u briew uba sheptien<sup>o</sup> ia U Trai ? Ia uta un hikai keiñ ha ka lynti kaba un jied" (Salm 25 : 12).

Katba ngi nang iaid ha ka lynti ka hok, ka **jingkhuid bad ka jingshisha**, katta ngi dang kham phyrnai ha ka **jingbhabriew ba shapoh ba la pyntrei da ki "kjat sngi"** jong u syiem ka jingsuk. Ki briew jong ka pyrtnei haba ki peit ha ka khmat ba dap da ka **jingbhabriew bariewblei** jong ngi, kin ym pep ban kynud hapoh la ka mynsiem ia ka jingrwai khristan:-

"Ai jingbhabriew U Jisu yn i ha nga,  
Dur ieit ba sngewrit, ba tlem bad bashisha;  
Ah ! Me Mynsiem U Blei, jinglong jong nga  
to trei,  
Haduh jingbhabriew Jisu yn i ha nga"

*Nga ju pyrkhath barabor, 'la U Blei un ieh-noh ia nga ha shiteng lynti' jong ka jingim ?  
Nga tip skhem ha la ka mynsiem la jong ba*



*kawei pat ka shiteng lynti ka ap ia nga ba ngan iaid, lada ka wan urlong ka jingiaid lynti ba ngu la dep ioh ha ka jingithuhpaw, kaba la long ha ka jingphohsniew ha ka wah kabu wan mih na sepngi bad kaba leit tuid sha mihngi.*

**Ka lynti iaid jong ngi ki nongbud U Jisu Khrist kham bun ka long kaba "dum". Hynrei haba U Jisu Khrist u iaid na khmat bad ialam ia ngi, ka lynti iaid kaba dum kan kylla long ka jingshai. Ka jingsngewskhem kaba nga ioh halade, ka long ka jingkren kaba wan na ka rmiang shyntur U Jisu kaba u dang kren haduh mynta. "Nga long U Jingshai jong ka pyrtnei : uta uba wan bud ia rga un ym iaid ha kaba dum, hynrei un ioh ka jingshai jong ka jingim" (Ioan 8 : 12).**

1 "Nga sngew ka ktien U Trai ba ong,  
 Nga long jingshai pyrtnei ;  
 To peit sha Nga men shem sngewbha,  
 Ka jingkmen ruh kan shlei".  
 Nga peit sh'U Jisu bad nga shem,  
 U Khlur, U Sngi, jong nga ;  
 Ngan iaid ha ka jingshai jong U,  
 Haduh ki yrta bah."

---

## 6

### **"BAD HABA LA IENG KA SNGI"**

*(Jonah 8 : 4).*

---

Ha ka jingiadei bad kane ka kot : "Na sepngi sha mihngi" ngam lah khlem da shini ia ki kytien na ka jingiathuhkhana kaba iadei bad u Jonah u nongiathuhlypa jong U Blei. "Bad haba la ieng ka sngi", U Blei u la khreh ia ka lyer mihngi kaba pynlhiep ; bad ka sngi ka la shoh ia ka khlieh u Jonah haduh ba u la iapler, bad u la kyrpad ialade ba un iap noh, bad la ong, "kham bha ba ngan iap ban ia ka ban im" (Jonah 4 : 8).

Ka sngi haba ka la mih, ka dei ban kiew sha jrong. Ha kaba khadduh, ynda ka la nang-kiew, kan poi ba kan hap ban ieng beit thik hapteng jong ka bneng. Dei ha katei ka por ba ka sngi ka la sangeh ban kiew shajrong, ba ka khreh ban kdat noh sha kawei pat ka jingiaid lynti jong ka.

Ka por ha kaba ka sngi ka ieng beit thik, ngi khot ia ka ka "Shiteng sngi". Ka long ka por ha kaba ka sngi ka ai ia ka jingshit kaba jur jong ka. Ka la long kumta bad ka jingiathuhkhana shaphang u Jonah. "Ka

sngi ka la shoh ia ka khlich u Jonah, haduh ba u la iapler" (Jonah 4 : 8).

Ka por shiteng sngi ka long ka por kaba shitom. Ka long ka por ha kaba ki 'nongrep' bad ki 'nongpuh lyngkha" ki rieh tngen ha ka syrngiew jong ki dieng na ka jingshit jong ka sngi. Kumjuh ruh u 'nongiaid lynti' u ialeh katba lah ban wad ia ka lynti iaid kaba ia lam sha ka jaka kaba tngen. Lada u nongiaid lynti u wan mih na shaphang shatei, kham bun sien u ju kwah ban leit hiar shaphang shathie.

Ha ka jingim khristan ka por shiteng sngi ka don ki khubor ba kynja mynsiem ban ai ia rga bad ia phi ruh.

(i). Ka por shiteng sngi ka thew ia ka por kaba U Blei u kwah ruh ban pyniaid ia ka jingim kaba kyrpang jong ki briew kiba kyrpang jong u. Kumba ka sngi ynda haba ka la dep kiew shajrong, kan hap ban ieng beit, khnang ba kan kynriah noh shawei pat, kumta ruh U Blei u don la ka jong ka 'baje' kaba u pyniaid ia ka jingim jong ki briew kiba la jied jong u. Dei ha ka por ba ka sngi ka ieng beit thik ha bneng, ba U Blei na jrong u 'peit sha tbian' u da 'wad' bniah ia uno uno u shakri jong u uba 'ishankhmat' khnang ba un ioh 'pyinkylla' noh ia ka jingim jong u.

Uno uno u briew uba beit ka dohnud bad U Blei, un ym pep ban shah pyinkylla ia la ka jingim ha kawei pat ka jingpyniaid jong ka bor

kaba na sha lyndet ka jong U Blei. Namar-kata kumba ka sngi haba ka ieng beik thik halor ka khlieh jong u briew, kumta ruh ki khmat U Blei ki dem jngoh ha u briew uba ieng beik thik bad U Blei. **Oh ! ka dei ka por shiteng sngi jong U Blei.** U la leh ia kane ha u Syiem Hesekaiah uba la pang la jan iap da kaba pynkha ha ki sngi jong u sa khadsan snem. Kumta u Isaiah u nongiathuhlypa u la wan ban kren ha u syiem kumne :

“Te kane kan long ka dak ha me na U Trai, ba U Trai un leh ia kane ba u la ong : Ha khmih, ngan pynphai ia ka syrngiew ha ki kyrdan, kaba la leit hiar arsut ha ka **baje sngi** u Ahas, shiphew kyrdan shadien. Kumta ka sngi ka la phai shiphew kyrdan shadien ha ka **baje sngi** ha kaba ka la hiar arsut” (Isa 38 : 7-8).

Kumta u syiem Hesekajah mynba u la koit na kata ka jingpang, u la rwai ka jing-ainguh ha U Blei. “Nga la ong, ha kaba shiteng ki sngi jong nga ngan leit sha ki khyrdop ka jingtep, la knieh noh na nga ia kaba sah na ki snem jong nga.....Hynrei me da kaba iet ia ka mynsiem jong nga me la pyl-lait ia ka...namar me la bred bak ia ki pop jong nga baroh shadien jong, me.....uba im, uba im keiñ, un iaroh ia me, kumba nga leh ha kane ka sngi : **u kpa un pyntip ia ka jing-shisha jong me ha ki khun**” (Isa 38 : 7-19).

(ii). Ka Por shiteng sngi ka long ka por kaba pyniakhlad ia ka por mynstep na ka por janmiet. Dei ha kaba kum kane por ba U Blei u ju sngew ia ka jingduwai shiteng sngi jong ki briew jong u. Kumba ka sngi ha ka por ba ka la ieng bha ka ai ia ka jingtyngshain kaba shit na ka khlieh, kumta ruh ka khmat U Blei ka ap bad ka 'neh den' ha u briew ba la slah jong u katba u nang duwai Ka ktien U Blei hi ka pynshisha ia kane ka jingleh jong U Blei. "Uta uba la thung ia ka shkor, un ym iohsngew? Uta uba la thaw dur ia ka khmat na ym iohi?" (Salm 94 : 9).

(iii). Ka Por shiteng sngi ka long ka Por ha kaba ka sngi ka sei lut ia ka jingtyngshaiñ ka burom jong ka. U Blei ruh u donbor ban leh kumjuh ia ngi ha ka rukom jong ka sngi bad kham palat ruh. U Apostol Paul uba la iohi ia kata ka burom U Khrisť kaba tyngshaiñ lep, um lah khlem da iathuh ha u syiem Agrippa kumne; "Hamar shiteng sngi, ko syiem, nga la iohi ha kata ka lynti ka jingshai na bneng, tam ia ka jingtyngshaiñ ka sngi, ka da tyngshaiñ sawdong ia nga bad ia kita kiba leit jingleit lem bad nga" (Ki Kam 26 : 13).

(iv). Ka por shiteng sngi ka long ka por ha kaba uno uno u briew u ju sngewtynnad ban shong thait khyndiat shipor, shuwa ba u khreh ban sdang ia kawei pat ka kam ba dei ban leh. Ngı ju kh. t ia ka por shiteng sngi. Kaba wallam ia ka jingkylla ha ka jingim, ka jingtreikam ne ka jingizidlynti. Ka

long ka por kaba wallam ia ka jingkylla ha mar ba u briew u Jang pyrkhat pyrdain bad dangtrei dang ktah. Ha ka jingim Khristan jong ngi ruh, ngim ju dei ban klet ia ka jingpynkylla por ba la leh da U Blei najrong Kaba kum kane ka jingpynkylla por ka ju wan jia ha ka jingim jong ki briew kiba kyrpang jong U Blei. Ka jingpynkylla por ka mut ruh ka jingpynkylla ia ka jingim kaba dang sah jong u riewngeit, kaba thew syndon ia ka shueng 'ita jong u. U briew um lah ban pynkylla dalade ia kaba kat kane ka kam. Don tang uwei u 'rongpynkylla' bad u'a u dei U Blei tang marwei hi. Oh! Ka jingpynkylla kaba U Blei u leh hi ka long kaba phylla katta katta. U Daniel hi u la iathuh ia kane ka jingmaian bneng kaba don ha U Blei jong u katba u dang batai ia ka jingphohsniew ha u Syiem Nebukhadnessar.

"Long ba la kyrkhu ia kane ka kyiteng jong U Blei ha la ka rta namar ka jingstad bad ka bor ki long ki jong u: bad u pynkylla ma u ia ki por bad ia ki aiom: u pyn-duh ia ki syiem, bad u thung ia ki syiem. U ai ka jingstad ia ki bastad, bad ka jingtip ia ki badon jingshemphang. U pynpaw ia kiei kiei ki baiylliew bad ki barieh: u tip aiu don ha ka jingdum, bad ka jingshai ka shongsah lem bad u" (Dan 2: 20-22).

"Shaphang jong me, ko Syiem, ki jingpyrkhat jong me ki la mih bad ka jingmut jong me, ha ka jingthiah jong me, kaei ka ban sa

**jia hadien kane : bad uta uba pynpaw ia ki jingbuurieh u la pyntip ia me kaei ka ban sa jia. (Dan 2 : 29).**

(v). **Ka por shiteng sngi ka long ka por kaba iathuh ia ka jingjrong jong ka sngi. Ka long ka por ha kaba ka sngi ka poi sha ka tduh kaba hajrong tam jong ka jingiaid lynti jong ka. Ka long ka por ha kaba ka sngi ka sam sha ka bynta kaba jrong tam jong ka bneng. Ha ka jingim khristan jong ngi ruh, ngin ym lah klet ia kaei kaba U Jisu Khrist kum U ksiang jong ka jutang bathymmai u la leh na ka bynta jong ngi ki briew kiba pop, ia kaba ka ktien U Bei ka la dep kdew : "Mynba u la kiew sha jrong, u la ialam mraw ia ka jinglong mraw, bad u la ai ki jingai ha ki briew, Te kane ba u la kiew, ka long aiu tang ba u la wan hiar ruh shuwa sha kita ki jaka kiba kham poh jong ka khyndew?" (Eph 4 : 8 9).**

(vi). **Ka por shiteng sngi ka long ka por ha kaba ka met bneng bakhraw ka ieng beit thik hapdeng ka bneng, ka da khmih shaiñ najrong kumba kan hap noh sha khyndew Kane ka por ka pynkynmaw ia ngi kiba ngeit ruh shaphang kawei ka jingjia kaba khraw tam kaba U Blei u la pynlong na ka bynta ban siewspah ia ka pop jong ka pyrthei. Ka long ka por kaba iadei bad ka jinglap U Jisu Khrist U Khun jong U Blei uba im halor ka diengphna. Na ka jing-kheñ por ba la shim na ka jingthoh jong ka**

**ktien U Blei, U Jisu Khrist u la iap shuwa  
ka shiteng sngi ne shuwa ka por khadar baje  
mynsngi.**

**Ia kane ka jingkheĩn por ia ka jingiap  
jong u, ngi lah ban sngewthuh na kaei kaba  
la kdew ha ka jingiadei bad ka jingdum kaba  
la wan tap ia ka khyndew ha ka por ba U  
Trai jong ngi u la dkut mynsiem.**

**“Bad ka la long hamar kaba hynriew ba-  
je, te ka jingdum ka la wan tap ia ka khyndew  
baroh haduh kaba khyndai baje. Te la  
pyndum ia ka sngi bad la pyngkad ia ka jing-  
kah jong ka templ napdeng. U Jisu te haba  
u la pyrta da ka ktien bajam u la ong, ko kpa,  
ha ki kti jong me nga aiti ia la ka mynsiem  
te haba u la ong ia kane, u la ai noh ia ka  
mynsiem (Louk 23 : 44-46).**

**Ka jingkheĩn por jong ki Jiw ka iapher  
na ka jingkheĩn por jong ngi. Ka por hyn-  
riew baje, ka long ka por 12 baje mynsngi.  
Dei hamar kane ka por ne khyndiat shuwa  
jong ka, ha U Trai jong ngi u la iap. La ka myn-  
siem U Trai kam sah shuh, hynrei ka met  
kaba la tuid da ka snam te ka dang sah bad  
ka dang sdien halor jong ka diengphna hamar  
ka por khadar baje mynsngi.**

**“Ka khmat jong nga ruh dei ban tap,  
Ha khmat ka diengphyna ;  
Ban um ka dohnud bad ban hap,  
Ki ummat sat na nga.”**



**Ki ummat sngewsih kiba lah ban mih na  
ngi, kim pynsngewbha ei ei ia U Trai. U  
Blei u la phah khuang ia u sha ka pyrthei,  
khnang ba un shah ia ka jingiap na ka byn-  
ta ki pop jong ngi, bad ban pynioh ha ngi  
ki nongpop ia ka jingim bymjukut. U Trai  
um kwah ia ngi ba ngin sngewsih na ka byn-  
ta jong u. U kwah tang ba ngin kylla kaba  
mut, phai sha u bad iateh kular da kaba at  
noh ialade ban shakri ia u bad ban im na ka  
bynta jong u.**

**“Ki ummat sngewsih kim lah siew,  
Ka ieit ba u la shah ;  
Ngan ai ialade, wat kyntait,  
Tang kata ba nga lah.”**

**(vii). Ka por shiteng sngi ka long ka por  
ha kaba ka mynsiem ka jong U Trai ka la  
mih noh na ka met kaba tyrkhong bad kaba  
la shroiñ. Shuwa ba U Jisu Khrist un dkut  
mynsiem, u la kren nador ka diengphna ia  
ki hynñiew tylli ki jingkren kawei hadieh  
kawei, ryngkat bad kaba sngap jar lai kynta**

**‘Hynñiew tien ieit khadduh u kren,  
Bad da jingsngap jar lai kynta;  
U saifi jingmap ei ia u briew,  
I’U Trai jong nga la sahnarphna.’**

**Tang mar iadkut mynsiem U Trai, ki la  
jia pat ki jingjia kiba phylla kiba dei ban  
pynpyrkhat jur ia ngi.**

“Ha khmih ruh, ka jingkah ha ka templ ka la kad ar bynta, naduh na jrong baduh ka tbian, bad ka khyndew ka la khyndiuh, bad ki mawsiang ki la pdang, bad ki jingtep ki la ang, bad shibun ki met jong ki riew-khuid kita la iohthiah ki la mih pat, bad haba ki la mih noh te na kita ki jingtep, hadien ka jingmihpat jong u, ki la leit shapoh kata ka nongbah ka bakhuid, bad ki la paw ha ki babun” (Math 27: 51- 53).

(viii). Ka por shiteng sngi ka long ka por ha kaba U Trai jong ngi ynda haba ym sah shuh ka mynsiem ha ka met, u la leit on lynti ia ka mysiem kaba la pynim jong u dakaid sha Paradais. Ym tang katta, ka ktien U Blei ka iathuh ia ngi ba hadien ba u la dep leit on lynti ia u dakaid bad sah shipor hangta, u la leit hiar sha Hades kaba long kata ka jaka shong ba shitom jong ki nongiap ki bym pat ioh ia ka jingkylla kabamut ha ka por ka jingbishar U Blei da ka jingpynshlei um kaba la long ha ki sngi u Noah.

“Haba la pyniap ia u ha ka doh, hynrei ba la pynlong im ia u ha U Mynsiem; ha uba u la leit ruh bad u la ialap ha kita ki mynsiem ha ka byndi; ki bym shym la kohnguh mynhyndai, mynba ka jingaisbahslem, ka jong U Blei ka la ap khmih ha ki sngi u Noah, haba u la dang thaw ia ka linglieng, ha kaba khyndiat ki mynsiem kata ka long phra ngut, ki al ioh lait im na ka um” (1 Pet 3 : 18-20).

(ix). Ka por shiteng sngi ka long ka por jong ka siewspah dep U Trai ia ka mynsiem kaba jot bad kaba rem jong ngi. Ka long ka por ha kaba U Khrist u la leit rung ym sha ka jaka kyntang ba la thaw da ki kti, kaba syriem ia kata ka ba shisha; hynrei sha kata ka bneng hi, mynta ban paw ha khmat U Blei na ka bynta jong ngi" (Heb 9: 24).

Hamar kane ka por, U Blei ha U Khrist Jisu u la plie noh ia ka jingkhong jong ka bneng, khnang ba un ioh ialam lynti ia ngi kiba ngeit sha ka jingpynim kaba da ka jing-iap jong u. U Jisu khrist u la pyni ruh ha ngi baroh ia ka lynti ba ngin leit sha bneng tang lyngba jong u hi kumba u la dep ialap ha ka por ba u dang im. "Nga long kata ka jingmihpat bad kata ka jingim: uta uba ngeit ha nga, la u iap un ioh in." (ioan 11: 25)

"Da ka snam ia ka lynti la thaw,  
Ba ngin poi sha ri hun da jingmap;  
Riew Hosanna i'u kpa ba sybun,  
B'u la ai la u khun ban shah iap".

(x). Ka por shiteng sngi jong ka jingshah U Trai halor Lum Kalbari, ka long ka por ba U Blei u la pynieng ia ka diengphna, khnang ban ioh shon dur ia ka jingiap U Trai ha ka jingim jong nga bad jong phi ruh. Ka long ka por ha kaba u la pynpaw ia ka jingmut kaba shisha jong ka ktien 'testament'. "Namar ha kaba don ka testament, ka la dei hi ba u la iap uta uba thaw ia ka. Namar ka

testament ka don bor haba la jia ka jingiap: namar mynno ka la don bor haba dang im uta uba la thaw ia ka ? (Heb 9: 16 17). “Ka jutang ba thymmai, u la pynlong rim ia kata kaba nyngkong te kata kaba nang rim bad tu nang tymmen ka la jan duh noh” (Heb 3: 13).

(xi). Ka por shiteng sngi ka long ka por kaba jrong tam kaba kdew ia ka jingiaid lynti jong ka sha ka sahit bneng kaba jrong tam'. Dei ha ka jingmut jong ka por shiteng sngi, ba ngi iohi ia ka jingieit kaba khraw tam ka jong U Blei ia ngi ki nongpop ha ka jingiap. u khun ba la kha marwei bad baiet eh jong u, ia kaba u Apostol Paul u dep batai kumne:-

“Hynrei U Blei, ba u long uba kynrei ka jingisynei, namar ka jingieit kaba khraw jong u da kaba u la ieit ia ngi, wat mynba ngi la long kiba iap da ki jingryngkang jong ngi, u la pynim ia ngi lem bad U Khrist (da ka jingaiei la pynim ia phi) bad u la pynshong ia ngi lem bad u ha ki jaka Bneng, ha U Khrist Jisu: ba un ioh pyni ha ki rta ki ban sa wan ia kata ka jingkynei eh ka jingaiei jong u, ha ka jinglehsbun sha ngi ha U Khrist Jisu” (Eph 2: 4 - 7).

“Long ba la kyrkhu ia U Blei bad u kpa U Jisu Khrist uba U Trai jong ngi, uba la kyrkhu ia ngi da ki jingkyrkhu ba kynja mynsiem baroh ha ki jaka bneng ha U Khrist (Eph 1: 3)

(Xii). **Ka por shiteng sngi ka long ka por ha kaba U Blei u ring ia ka sngi sha ka byn-ta kaba ha khlieh eh.** Kane ka pynkynmaw ruh ia ngi shaphang ka jinglehsbun kaba palat U Blei ia ngi, ba u da tan ia ngi sha ka jingkyntu kaba bymjukut jong u, khlem da thew ia ka jingbun ki jingryngkang jong ngi. Kumta ka ktien U Blei ka la kren shai na ka jingialap u Apostol Paul haba u ong : **Hynrei ha kaba ka pop ka la roi byllien, ka jingaiei ka la roi kyrhai khamtam eh; ba kat kumba kata ka pop ka la synshar sha ka ban pyniap, kumta ruh kata ka jingaiei kan da synshar noh da ka jingpynksan sha ka ban pyn-im bymiukut da U Jisu Khrist uba U Trai jong ngi**" (Rom 5 : 20 - 21).

(Xiii). **Ka por khadar baje mynsngi ka long ka por ha kaba ka sngi ka ieng hapteng ka suiñbneng bad ka tyngshaiñ ha ka borbah jong ka.** Ym don kawei pat ka burom kaba kham khraw palat kat ha ka por bad ka kynta ba ka sngi ka kup kum ha ka khadarbaje mynsngi. Ka long ka por ha kaba ka sngi ka rung sha ka jingjanai jong ka 'burom ksiar'. Kane ka 'burom ksiar' ba ka sngi ka phong ha ka por khadarbaje mynsngi, ka kren kum ka pharshi ruh ia ka jingshai kaba mih na ka 'burom ksiar' jong 'U khunlangbrot jong U Blei' ha ka Templ kaba ha bneng. Katba ngi dang ia im ha pyrthei, ngi donkam te ia ka sngi. Hynrei hangta ha bneng ha kaba ngi ioh ban phong ia ka jingim bymjukut, ym ju donkam

shuh ia ka sngi. U Blei u la dep kular skhem  
ia kane ha ka Balang bakhuid.

“Ka sngi kan ym long shuh ka jingshai  
jong pha mynsngi, hynrei U Trai un long ha  
pha ka jingshai bymjukut, bad U Blei jong pha  
ka burom jong pha” (Isa 60 : 19).

“Bad kata ka nongbah kam donkam ia ka  
sngi ban pynshai ha ka namar ka burom U  
Blei ka la pynshai ia ka bad ka jingshai jong  
ka long uta u khunlangbrot” (Jingpyn 21 : 23).

## KA BOR JONG KA SNGI

Ka Por shiteng sngi ka long ka por ha  
kaba ka sngi ka ‘pyneh triang’ ia la ka jong ka  
‘bor’, ka da pyni ia ka jingkolain tam ka ‘bor’.  
U slap bad ka lyer kim lah ban iatynjuh  
bor bad ka jingkolain jong ka sngi kum ha  
katei ka por. Ka khana puriskam ka ju ia-  
thuh ia ngi ba u slap bad ka lyer kim long  
ei ei haba ki iakop ia ka ‘bor’ bad ka sngi.  
Ka sngi ka donbor ban pynlaw jaiñ ia u nong-  
iaidlynti bad ban ialam ia u sha wah.

Ha ka jingim ba kynja mynsiem jong ngi  
ruh, ka por shiteng sngi ka kren shaphang ka  
‘jingialeh’ bakhraw ba u khristan u hap ban  
‘pyneh triang’ ialade ha ki ‘jingduwai bajur’. Ka  
long ka por ha kaba u khristan u hap ban  
pynlong ka jingduwai, kaba ‘donbor’ ka ban  
sam shaduh ki jaka bneng ha kaba U Khrist  
u don. Ka long ka por ha kaba u khristan

un hap ban lum ia ka bor mynsiem, katha ka  
jingaiei ka nang hiar jur na bneng, da kaba  
'duwai hun'.

'Ban duwai hun ! ban duwai hun!  
Ba lam ia nga na khuslai bun ;  
Lam hajan ia i Pa ban nguh,  
Ba la ki jingkwah ngan ioh buh'.

'Ha pydeng ki jingjynjar bah,  
Ka mynsiem hangne jop ruh lah ;  
La riam eh, jinglait la bun,  
Haba ioh leit ban duwai hun'.

Ka por shiteng sngi ka long ka Por ha  
kaba ngi donkam ban theh lut ia ka dohnud  
ha U Jisu. Ka long ka por ha kaba ngi dei  
ban ai ia ka 'Por' sha U Blei ha ki jingdu-  
wai pynkyntang ialade. Ka long ka por ha  
kaba u Daniel. "u la leit sha la iing ; te ki  
jingkhang it jong u ki la plie rynghang ha  
ka pulit jong u shaphang Jerusalem ; bad u  
la dem la ki khohsiew" (Dan 6 : 10).

'Phi iohi i'u mraw Hebru ba u dem,  
Mynstep, myngsngi bad miet b'u duwai ?  
H'la pulit u kynmaw ia ka Seion,  
La ha ri shong mraw bajngai.

La jingkhang it phi plie shaphang ka Salem,  
La hangne kum ki mraw ngi sah khyndiat  
sngi ?

Ia ka jingwan jong U Syiem ha ka burom,  
Phi ap ne em man ka sngi ?

**Ka por shiterg sngi ka long ka por ha kaba U Mynsiem Bakhuid u tied jam kum ka baje kaba riew ha ka por khadar baje ban pynjam ia ka jingduwai ba kan kyang napoh ka dohnud kaba la pait jong u 'riewduwai'. Ha kaba kum kane ka por, u riewduwai u kyan naduh u klonesnam da ka jingsliang kaba palat namar ha U Blei u la theh buk buk da U Mynsiem jong u ia ka jingaiei bashlei, kumba ha ki riewkhuid baroh.**

**"Naba ia ka jingieit U Blei la theh iar noh buk buk ha ki dohnud jong ngi da U Mynsiem Bakhuid, ia uba la ai noh ha ngi" (Rom 5 : 5).**

**"Namar phim shym la pdiang ia ka mynsiem ka jinglong mraw pat ia ka ban sheptieng, hynrei phi la pdiang ia U Mynsiem ka jingting khun, da uba ngi iaiam kyrpad, Abba ! Ko Pa " ! (Rom 8 : 15).**

**Ka For shiterg sngi ka long ka por ha kaba u 'riewwad Blei' u dei ban kren ia ki ktien jong u Dabid. "Ka mynsiem jong nga ka beh eh hadien jong me : Ka kti kamon jong me ka kyrshan ia nga" (Salm 63 : 8).**

**"Namar kane to ai ba uwei uwei baroh uba riewblei un duwai ha me ha ka ia ba lah ban shem ia me : shisha haba ki um bakhraw ki iashlei kin ym ioh kot sha u" (Salm 32 : 6).**



**Ka Por shiteng sngi ka long ka Por ha kaba ka Deborah bad u Barak ki dei ban ia rwai ha kata ka sngi jong ka jingjop bakhraw :-**  
**'Ka wah Kishon ka la rong noh ia ki, kata ka wah barim, ka wah Kishon keiñ. Ko mynsiem jong nga to nang iaid da ka bor' (Nongbi 5 : 21).**

**Ka por shiteng sngi ka long ka Por ha kaba u 'Riewiasaid' u hap ban sei lut ia ka bor mynsiem ha ka jingdawai kumne :-**

**To pynlong ka dohnud kaba thymmai ha poh jong nga.**

**To pynthymmai ia ka mynsiem ka babeit hapoh jong nga.**

**To sait ia nga ba ngan kham lieh ban ia ka ior.**

**To peh ba ki stait kin her noh na ka jingim jong nga.**

**To ai ba ka mon bakhuid jong Me kan ioh jaka ha ka jingim jong nga.**

**To pynlong ia ki jingjam jong Me ki jingjam ha ka lynti iaid jong nga.**

**To ai ba ka khmat jong Me kan leit sha shuwa jong nga.**

**To pynpra noh ia ki lyoh barben kiba sdien ha ki khmat jong nga.**

**To plie ia ka jingkhang jong ka bneng ba ngan iohi ia ki kanbah jong Me ha ka jingim jong nga.**

To plie ia ki shkor jong nga ba ngan  
dup iohsngew ia ki ktien jong Me bad leh  
ia ki.

✓To pyndem ia ka dohnud jong nga ba  
ngan ioh kohnguh ia Me.

✓To pynpeit ia ki khmat jong nga ba ngan  
iohi ia ki hukum bakhuid jong Me.

✓Aiu me mon ko Trai ba ngan leh ha ka  
jingim jong nga ?

To pynhiar ia ka synjat U Mynsiem ba  
khuid ha nga.

To pyndep ha nga ia ka jingthmu kaba  
kyrpang jong Me Ah Trai !

✓To pynwai noh ia ka hima u soitan kaba  
shong khet ha nga.

To pynlong ia nga u khiew uba khuid  
uba bit ban ioh diang ia ka umphñiang U Myn-  
siem bakhuid.

✓To pynkynriah noh ia nga sha ka pyrthei  
ba kynja mynsiem bad Me.

✓To pynwan kloi ia ka hima ki bneng ha  
poh ka jingim jong nga.

✓Wat shah ia nga da lei lei ko Trai ba  
ngan hap ha ki pop jong ka jingphaidien.

✓To ai ha nga ia ka jingngeit kaba khlain  
kat ka jnigiap.

✓To pynduh noh ia ka bor jong u soitan  
bad ka pop kiba trei ha ka dohnud jong nga

✓To pynlong ia ka met jong nga ka kar-khana jong U Mynsiem Bakhuid.

To ai ba ngan iohi ia ka mon jong Me halor ki nongshun jong nga.

Ah Trai ! to pynthymmai ia ka ordineshon hapoh ka dohnud jong nga.

✓To pynngam ia ka jingshemphang jong nga sha ki jingjylliew jong ka ktien bakhuid jong Me.

To rah ia nga ha U Mynsiem sha ki jaka ba jrong jong Me.

To sumar ia ki kjat jong nga ba kin ym tyrsiang ha ka lynti ba nga dei iaaid.

To pynlong ia ka jingim jong nga ka jing-phla ba kordor na ka bynta ka burom jong Me.

To pynkynriah sha jngai na nga ia ka jingbymman bakynja mynsiem.

Wat bret noh ia nga na khmat jong Me bad wat shim noh ia la U Mynsiem Bakhuid na nga.

To pynsleh ia ka long-rynieng jong nga da ka jingpynsleh kaba da U Mynsiem Bakhuid.

To pynlong ia ka jingim jong nga ka shithi U Khrist kaba paw shynna ba la thoh ym da ka sia, hynrei da U Mynsiem jong Me.

To ai ba ngan ngeit bad sumar kyndong ia ki kular jong Me ha ka dohuud jong nga.

Wat pynpep Ah Trai! ia ka jingbaptis ka ba da U Mynsiem Bakhuid man ka por ha ka jingim jong nga.

To pynjngi ia nga ha ka duriaw bah jong U Mynsiem Bakhuid.

Wat ai Ah Trai! ba ka jingpang iap shiliang kan snoh ha ka jingim ba kynja mynsiem jong nga.

To sumar ia nga kum ia i briew khmat jong Me.

To wiang ding ia ki shalyntem ka dohnud jong nga.

To pyrsad jur Ko Trai! ia U Mynsiem Bakhuid ha nga.

To ai ba ngan ring mynsiem ia ka lyer jong U Mynsiem Bakhuid.

Wat ai Ah Blei! ba ka kti kadiang jong nga kan tip ia kaei ba ka kti kamon jong nga ka leh.

To pynkoit noh ia nga Ah Trai! na ki jingpang jong ka doh bad ka mynsiem.

Wat shah ba ngan duh ia ka jinglehisynai jong Me man ka sngi ha ka jingim jong nga.

To pyllait noh ia nga na ka jar bad ka jingriam ba u sotian u phriang ha ka lynti iaiaid jong nga.

To ai ba ka jingduwai kaba mih na ka dohnud bapait jong nga kan wan kiew sha ka jaka shong ka ting jong Me ha bneng.

To ai ba U Mynsiem Bakhuid jong Me un ia kyang lem ha ki jingduwai ba man ka sngi jong nga.

Wat ai ba ki paralok baieit jong nga kin shet kylla ia nga khiem daw.

Ai ba ka khmat jong Me kan leit sha shuwa jong nga man ka sngi.

Wat iehnoh ia ka mynsiem jong nga ha ka jaka baryngkhiang, bashitom bad bym don um.

To pynlong ia ka met jong nga ka templ bad ka lingshong jong U Mynsiem Bakhuid.

To ai ba ngan iohi ia kawei pat ka shi-teng lynti jong ka jingim kaba knen bad ka-basuk bad Me.

To rah ia nga ha U Mynsiem jong Me ha ka shiteng lynti ba nga dang dei ban iaid ha pyrthei.

To pynduh noh ia ki jinglong barim bad ki jingmlien ba sniew ha ka jingim jong nga.

To ai Ah Blei! ba ngan pdiang ia, U Mynsiem Bakhuid ka ribaibal hapoh jong nga.

To long ma Me u nongbahkhlieh jong nga ha ki jingeh bad ki jingjynjar ba nga ia kyn-duh man ka sngi.

To phrang ia nga ha ki jingtynjuh bameh ding jong Me.

To pynmih noh ia nga na ka lawarding jingtynjuh, u briew uba janai ha khmat jong Me.

To bah jamin kloi ia nga ha khmat ki nongshun jong nga.

Wat pat shim ia ka mynsiem jong nga katba ngam pat lah ban trei dep ia ka kam jong Me.

Wat ai ba ngan leit noh na pyrthei khlem da ioh pynlong ia nga u riewkhuid jong Me.

Wat shah ba ka sngi kan sep na ka jing-im jong nga khlem da pyntip lypa ia ka mon bakhuid jong Me halor jong nga.

To pynmadan noh ia ki lum bah kiba sha shuwa jong nga.

To pyndap noh ia ki them kiba don ha khmat jong nga.

To ai ba ngan ia shem ia Me man ka sngi ha ki jaka bajrong tam jong Me lyngba ki jingduwai ba sngewrit jong nga.

To ai ba yn sumar kyndong ia ka met, ka mynsiem bad ka jingmut jingpyrkhat jong nga shitylli khlem jingrem ha khmat jong Me.

To ai ba ngan ioh ki paralok ba riewblei ha ka jingim jong nga.

To pynsdang noh kloi kloi ia ka lynti bathymmai ba nga dang dei ban iaid bad Me.

To pynlong ia ka jingim jong nga ka pliang kaba bit nam ia ki jingainguh thang jong Me.

To pynkha arsien ia nga man ka por ha ka jingim bakhuid bad Me.

To pynlong ia ka jingshakri jong nga Ah Blei ! ka Ministry jong U Mynsiem Bakhuid.

To pynlong kam ia ka prokram U Mynsiem Bakhuid jong Me ha ka jingim ba man ka sngi jong nga.

To ai ba U Mynsiem jong Me un pyn-trei kam ia ki jingai U Mynsiem Bakhuid ha ka jingim kaba phla ia ka kyrteng bakhuid jong Me.

Ai ba ka bneng bad ka khyndew kin ia shem ha ka mynsiem kaba la siewspah jong nga.

To pynpaw noh kloi ia ka diengphna ha ka shiteng lynti jong ka jingim jong nga.

To dem jingoh na bneng halor u shakri jong Me uba iai pyrkhat bad iai im sngi na ka bynta ka kam jong Me.

To pynshong kulai barabor ia nga Ah Trai ! ha ki jaka bneng ha U Khrist Jisu,

Wat shah ia ki jingartatien, jingkhustai bad jingduh jingkyrmen ba kin wan tyllap ia ka jingim jong nga.

To khang ia u shakri jong Me na ki pep ba leh meng.

To pyngkut noh ia ki jingjynjar mynsiem kiba wan lynsher ha ka lynti jingiaid jong nga.

To thoh ha ki mawlyngkniap ka dohnud jong nga ia ki shiphew hukum jong Me.

To mut dak da u diamond bad u khulem ksiar jong me ia ki khubor kiba wan ha ka jingim jong nga na Me.

Ah Blei ! haba me la khang ia kawei ka jingkhang, to plie noh ia kawei pat ka jingkhang.

To shon jur ha ki sla ka jingim jong nga ia ka kot pulc kaba dei shaphang ka burom jong ka diengphna.

To ai noh ha nga ia ka jingshongthait na ki nongshun jong nga.

Nga sngewkordit eh ban duh ia U Mynsiem jong Me.

Hangno ka don ka plan jong Me ia ka jingim jong nga nangne sha khmat ?

Balei ba Me pynslem ko Trai ! ia ka ban pyndep ia ka kular khuid jong Me ha ka jingkwah hir hir jong ka mynsiem jong nga.

Nga ngeit ko kynrad ba men sa jubab ia ki jingduwai ba sliang jong nga.

Ah Trai ! to ai ha nga arshah laishah ia ka bor jong U Mynsiem Bakhuid.



Ah Trai, to pynjrong ha ka jingim jong nga  
ia u tyllai ka jingaiei jong Me.

To pynneh slem hapoh ka mynsiem jong nga  
ia ka jingtrei badonbor jong Myn-  
siem Bakhuid.

Wat khang noh ia ka jingkhong jong ka  
khang ba men loh leh isynei ia la mijong  
u shakri jong Me.

To pyndem lin ia ka jingim jong nga hapoh  
ki kjat Bakhuid jong Me.

Ai ba ngan nang iai iabeh sha ka jingim  
bakhuid man ka sngi.

To thung skhem hapoh jong nga la ki tynrai  
ka jinglong jingim.

Ring ia nga man la ka sngi sha trai ka dieng-  
phna Kalbari.

Wat shah ba ngan sha ka por janmict lynda Me kyrkhu dap shuwa  
ia nga ha ka por sheng.

Ka mon bakhuid jong Me ko Trai ka  
ba nga dei ban bah ia ka diengphna la ka  
khia.

To pynkloi ban la nga namar ba nga  
shaniah skhem ha Me.

Nga sngewsheptieng ban rung sha ka por  
janmict, lada Mem jaid, ryingkat ma Me  
lem bad nga.

Ki kular jong Me Ah Trai ! ki don ha la ka sngi halor jong nga.

Ka kham bha ia nga ban iaïd shijam lem bad Me ha kaba dum, ban ia kaba iaïd bunphew jam ha kaba shai khlem ma Me.

To pynshemphang ia nga ba ki sngi ka jingim jong nga ki long kiba shroin katta katta.

To law noh ia ki jaiñ jingtep ba nga phong, hynrei to pynphong ha nga da ki jaiñ linen bani.

To ai ba ngan ioh bat ia ki rmiang ka jaiñ kup jong Me.

Nga ñiewkor ia ka barandi jong Me ban ia ki jaiñ phong ba itynnad jong ka pyrthei

Ka syrngiew jong ka diengphna ka kham kor-dor ia nga ban ia ka syrngiew jong ki dieng ha ka por ba ieng ka sngi.

To ai ba ngan ngeit bad pdiang ia ki kular khuid jong ka ktien jong Me, kumba ki long ha ka jingim jong nga.

Kaei ka jingthmu jong Me ba men ai ka 'dak' ia nga da ka jingjia, na ka bynta ka histori kaba sah jong ka jingim jong nga ha kane ka pyrthei ?

Nga sngewskuin da ka jingsngewskuin ba khraw ban ioh pyndonburom ia ka kyr-teng Bakhuid jong Me.

Na ka jingjrong jong ka bneng, to pynhiar  
ia ka jingkieng jong U Jakob bakynja  
mynsiem hapoh ka dohnud jong nga.

Ha kane ka shiteng sngi wat klet Ah Blei !  
ban map ia ki pop babun byllien jong  
nga.

To pynkylla noh ia ka jingiaid lynti jong  
ka jingim jong nga, khnang ba ngan ioh  
ithuh ia ka jingkhraw bor jong Me bad  
ioh sheptieng ia Me.

Ah Blei ! nga duwai ba U Mynsiem jong Me  
un iasaid lem ha ka jingduwai jong nga,  
katba U Khun baieit jong Me ha bneng  
u dang pynlong ruh ka jingiasaid ba jur  
na ka bynta jong nga.

Ah Trai ! wat ai ba ka mynsiem jong nga  
kan poi sha Hades, ynda nga leit noh na  
ka pyrthei.

Me donbor Ah Blei ! ban wallam ia ka jing-  
kylla ha ka jingim uba ngeit kumba me  
donbor ban wallam ia ka jingkylla ha  
ki saw aiom jong ka snem.

To pynlong ba ka jingim jong nga kan ia  
dei dur bad ka Gospel U Nongpynim  
jong nga U Jisu Khrist.

Ki kambah jong Me ki dei ban jia long,  
khnang ba u briew jong Me un ioh buh  
la ka dohnud tang ha Me.

Ah Blei ! to ai ba ha ka kyrteng U Jisu Khrist, ka khohsiew baroh kan ioh dem khrup ha Me.

To pynshong ia nga ha ka kali jong Me, khnang ba Men niah ia nga sha ka jingthmu ka mon bakhuid jong Me ha ka lynti ba nga dang dei ban leit.

To ai ba ngan dih ia ka khuri kaba kthang jong ka jingshah shitom lem bad Me.

Balei ba Mem pyni noh kloi ia ka jingshai hapdeng ka jingdum ?

To ai ba ki jingduwai barieh ba jar jar jong, nga kin wan kiew kum ka jingkniah ainguh thang ba iwbiha ha ka khet jong Me, bad to ai ba Men pdiang hun da kaba jubab noh kloi kloi ia ki ha la u shakri jong Me.

Nga tip ba Me wad ia nga ha ki por bad ki jaka baroh, namar ba Me kwah ba ngan aiti lut ia lade sha Me.

Lada ngam pyndonburom ia Me, mano pat ban pyndonburom ia Me ?

Wat ai ba ngan shaniah shuh ha la ka jong ka bor, ioh ba Men ym niew ei ei shuh ia nga.

Nga la pynsyrrwa kai ia ki por ka jingim jong nga kiba la leit noh bad namar kata Mem shym la sngewbha ia nga.

La ka khet jong Me ha bneng ka jngai katta  
katta na nga, pynban ngan iashem ia Me ha  
ka por ba nga dem khohsiew ha khmat  
ka jaka kyntang jong Me.

Ka jingduwai shiteng sngi jong nga ha khmat  
jong Me ka dei ban wallam ia ka jing-  
kylla ha ka shiteng lynti jong ka jing-  
im jong nga baroh kawei.

Ko sngi jong ka hok! to tyngshaiñ slem ha  
nga katba ka sngi ka nang ieng halor  
ka khlieh jong nga.

To ai ba ngan bat ia u tyllai bajrong jong  
ka jingaiei bneng jong Me, shuwa ba ngan  
pynkut noh ia ka jingduwai shiteng sngi  
jong nga.

Uei uba kat ma Me uba kynrei ka jingisnei,  
uba jynsur ban bitar, uba kloi ban map  
ei bad uba dap da ka jingaiei.

To ai ba ngan iai puson bad pyrkhat tang sha-  
phang ka jingjrang bad ka jingjylliew jong  
ka jingieit jong Me ia nga.

# 7

## “HAPOH KA SNGI”

---

Ha ka jingiadei bad kane ka kot : ‘Na se-  
ngi s’ha Mihngi’, ka don ka jingkyntu hapoh  
la ka mynsiem jong nga ban ‘tai’ ruh ia ka  
kyntien ‘Hapoh ka Sngi’ ba la kren bunsien  
ha ka kitab u Eklesiastis u nongiathuhkhana  
jong ka ktien U Blei.

Ka kyntien ‘Hapoh ka Sngi’ ka long ka  
kyntien kaba shoh jingmut shibun, katba ngi  
nang jam shaphrang ban pule ia kane ka kot.  
Ha ka jingmut paitbah kaba ngi sngewthuh  
solansar, ‘hapoh ka sngi’ ka thew ia ka ‘kynian’  
jong ka ‘por’ baroh kawei kaba kynthup naduh  
ka ‘por’ ba mih sngi haduh ka ‘por’ ba sep-  
sngi. Ka thew ia ka por trei kam trei jam  
kaba u briew baroh u dei ban pyndep ia ka  
jingtrei jingtah jong u, kaba u Eklesiastis,  
u buh ia ka jingkylli kumne ‘ka jingmyntoi  
aiu u briew u don na ka jingtrei jong u  
baroh kaba u trei hapoh ka sngi’ ? (Ekle 1 :  
3). Namar ba u briew u dei ban pdiang ia  
kaei kaei baroh kaba U Blei u la buh na  
ka bynta jong u, la ka long ia ki kam ki  
jam, ka jingtrei jingtah ne wat ia kano kano

ka jingjia kaba shong pher; kam pher la u da dei ban 'iam' ne ban 'rkhe', ban 'sngewsih' ne ban 'kmen', kumta ong u Eklesiastis u nong-iathuhkhana : 'te ym don ei ei ka bathymmai hapoh ka sngi' (Ekle 1 : 9).

'Hapoh ka sngi' ka thew kyrpang ia kano kano ka jingleh kaba kyrpang kaba u briew u dei ban leh bad kohnguh kaba long na U Blei da kaba pyndep ia ki kam baroh. U dei ban leh haba shai ka sngi, u dei ban leh da ka dohnud kaba khuid, u dei ban leh ha ka jingiatiplem kaba sngur, bad u dei ban pyndep stet bad kloi kloi ioh lap ba dier ka por. Kumta u Eklesiastis u ong. 'Nga la ichi ia ki kam baroh ba ju leh hapoh ka sngi' (Ekle 1 : 14). U briew da kaba u leh bad pyndep ia ki kam hapoh ka sngi, um dei ban iasaid nia pyrshah ia ka mon bakhuid U Blei, wat la ki long kiba pynsngewsih ia ka jingiatiplem lajong, namar u Eklesiastis u la dep kynthoh lypa : 'Ia kata kaba la dor ym lah ban pynbeit : bad ia kata kaba duna ym lah ban khein' (Ekle 1 : 15).

Ka jingmaian ba phylla ba ngi shem ha ka kyntien, 'Hapoh ka sngi' ka long ba teng teng pat u briew haba u la dep trei lut ia ki kam ki jam bad u dang khreh ban seibor ia ka ban nang trei kham bha, pynban u hap ban sangeh tden na kano kano ka jingiatyngkhuh ia kano kano ka lanot bad ka shipa. Haba ka por kaba kum kata ka poi, u sngew kumba la sep ei bad bijai ei lut nadong

shadong, kaba buh ia u ha ka jinglyngngoh kaba khraw, ia kaba u Eklesiastis u pynsvriem da kaba iathuh: "Ynda kumta nga la jngoh ia ka kam baroh ba ki kti jong nga ki la leh, bad ia ka jingtrei ba nga la trei shitom: te ha khmih, baroh ka la long kaba thala bad ka babeh ia ka lyer, bad ym shym la don ka jingmyntoi hapoh ka sngi" (Ekle 2:11).

U briew haba u im ha pyrthei u dei ban mad ia ka jingsngewsih bad ka jynjar, namar ba u hap ban iatyngkhuh ia ka jingiap ha iing ha sem. Ym don uwei ruh uba la kha na ka briew u ban ym khlem iakynduh ia kane ka jingjia. U ba stad bad u babieit ruh ki dei ban ia kynduh ia ka jingiap, kumba u Eklesiastis u la dep maham lypa:

"Ki khmat uba stad ki don ha ka khlieh jong u, bad uba bieit u iaid ha ka badum: la kumta ruh nga la shem ba kawei ka jingjia ka jia ia ki baroh" (Ekle 2:14). Ka jingjia kaba kum kane ka dei ban pynstad ia u briew: "Ka long ka jingshitom sat kaba U Blei u la ai ia ki khun bynriew ba kin dup mlien da kata" (Ekle 1:13).

Namar ba u briew u dei ban iap, U Eklesiastis u sngew ba wat ka ban im ha pyrthei ruh kam don jingmyntoi. "Kumta nga la isih ia ka jingim: namar ba ka kam ia kaba ju leh hapoh ka sngi ka la long kaba shitom ia nga: namar baroh ka long kaba thala bad ka babeh ia ka lyer" (Ekle 2:17).



Lada ka jingiap ka wan, hangno u briew un iehnoh ia ka kam jong u? Mano pat ban bteng ia kata ka jingtnei kaba bad u? Teng teng u briew um tip hangno u iehnoh ia ka kam. "Bad nga la isih ia ka kam jong nga baroh ia kaba nga la trei hapoh ka sngi: **haba iohi ba nga dei ban iehnoh noh ia ka ha uta u briew u ban bud ia nga. Bad uci ba tip la un long uba stad ne uba bieit? Pynban un ioh synshar halor ka kam jong nga baroh ia kaba nga la trei, bad ha kaba nga la pyni ka jingstad hapoh ka sngi**" (Ekl 2: 18 - 19) "Namar don u briew uba ka jingtnei jong u ka long bad ka jingstad, bad ka jingtip ruh, bad ka jingtbit de; pynban dei ha u briew u bymshym la trei ha kaba un ai noh ia ka kum ka bynta jong u. Kane ruh ka long ka ba thala bad ka hasniew eh" (Ekle 2: 21). U Eklesiast's u sheptieng haba u pyrkhat ba ka jingtnei kaba u la trei kan shu hijai ei lynda don u nongmih bteng uba stad u ban mih buili ha ka jaka uba iap. "Namar kata nga la phai noh ban pynduh jingkyrmen ia la ka dohnud shaphang kata ka kam baroh kaba nga la trei hapoh ka sngi" (Ekle 2: 20). Pynban hadien ba u nongiathuhkhna u la nang ban bret da kaba shanish lut ha U Blei uba bishar hok, u la kut jingmut skhem lada ka long kumno kumno ruh, ba kaba sah ia u ka long ba un pynsngewbha tang ia U Blei uba sumar ieit ia ka jingim jong u. Hangne u shem ka jingpyntngen ha la ka jong ka mynsiem: "Namar ia u briew uba pynsngewbha ia U Blei, u ai ka jingstad bad ka jing-

**tip, bad ka jingkmén hynrei ha u nongpop u ai ka jingshirom ban lum bad ban kynton, ba un ai ha uta uba pynsngewbha ia U Blei" (Ekle 2 : 2).**

U Eklesiastis u pynkynmaw ia ngi shaphang ka jingjanai ki kam U Blei ha ka jing-iadei bad ka jingthmu ka jong U Blei ban shim noh na ka pyrthei ia ka jingim jong u briew. La u briew u la lah tip lypa ia kata, hynrei pynban um lah satia ban bat ia la ka mynsiem. **Haba u moina** u dei ban mih noh na ka 'ruh', hato ka 'ruh' ka donbor ban bat ia u? "Ym don u briew uba donbor halor ka mynsiem ban bat ia ka mynsiem; lymne uba donbor halor ka sngi ka jingiap" (Ekle 8 : 8).

**Kan long ka jingkyrkhu kaba khraw ia uno uno u briew ne ia kano kano ka briew lada ki la tip ba ki dei ban iap: "Namar kiba im ki tip ba kin iap: hynrei kiba iap kim tip ei ei, lymne kim don nong ei ei shuh; namar ka jingkynmaw ia ki la klet noh. Ka jingieit jong ki kumjuh, kum ka jingshun jong ki bad ka jingbishni jong ki ka la duh noh; lymne kim don bynta ei ei shuh lano lano ruh ha kaei kaei ba juh leh hapoh ka sngi" (Ekle 9. 5 - 6).**

**Ka jingthmu ka jong U Blei ha kaba u mut ban shim noh ia kano kano ka jingim briew ka long kaba janai. Shuwa ba un pynjia ia ka jingjia, u da pyni da ka 'dak' jong ka jingjia**

**kum ka jingiathuhlypa, khnang ban maham ia u briew ba u dei ban sheptieng ia U Blei. Kumta u Eklesiastis u ong : “Nga tip ba kaei kaei baroh ia kaba U Blei u leh, kan neh junom : ym lah ban pynlang ei ei ha ka, lymne shim noh ei ei na ka : bad U Blei u la leh ia ka, ba ki briew kin tieng ha khmat jong U. Kata kaba long ka la lah long lypa; bad kata ka ban sa long ka la long lypa : Bad U Blei u wad pat ia kata kaba la iaid jah noh” (Ekle 3 : 14,15).**

Da ka jing'kren ha ka jingphohsniew bad da ka jingpynpaw ia ka jingithuhpaw, U Blei u pyndonkam ruh ia u briew jong u kum u nongiathuhlypa ban maham ia ki briew ha kiba dei ban maham.

**“Lada u nongiathuhlypa jong U Trai u don hapdeng jong phi, ngan pynpaw ialade ha u ha ka jingithuhpaw, ngan kren ruh ha u ha ka jingphohsniew” (Jingkhein 12 : 6).**

U Blei haba u pynjia ia ka jingjia kaba la dep kren da u Eklesiastis, u ju da pyndonkam ruh da ki briew : **“arngut ne lai ngut ki sakhi” (1 Tim 5 : 19) “Da ka shyntur arngut ne laingut ki sakhi yn pynskhem ia ka ktien baroh” (2 Kor 13 : 1).** Hynrei u lah ruh da lade ban long u ‘Sakhi’ ia kano kano ka kam ba la leh bad pynpaw. Ma u u long u sakhi uba janai uba pynjia ia ka jingjia bad uba sakhi da lade hi. **“U Blei u long u sakhi” (1 Thess 2 : 5).**

U Blei haba u pynjia ia ka 'jingshipa' ha ka ling jongao jongno, u leh ia ka da ka jingthmu ban tyajuh ia ka dohnud jong u briew uba dei ban mad bad shem ia ka ha lade, khnang ban pynbeit ia ka mynsiem jong u sha U Blei. U Dabid u la mad ia kane na ka kti U Blei haba u 'a phla ha ka jingduwai: 'Nga tip ruh, Ah U Blei jong nga, ba me tyajuh ia ka dohnud, bad ba me sngewbha ha ka jingbeit. Ma nga te, da la ka jingbeit ka dohnud nga la ainguh sngewbha ia kine kiei kiei baroh". (Khro 28 : 17).

Da ka jingjia kaba U Blei u pynjia, U Blei u pynkhih ia u briew uba wad ia ka jingstad bneng ba u dei ban buh ia ka jingiathuh ia ka jingjia da ka jingthoh, kumba ong u Dabid ha ka jingia dei bad ka nuksa bad ka templ "ba u la ioh da U Mynsiem" (1 Khro 28 : 12). "La pynsogthuh ia nga ha ha ka jingthoh na ka kti U Trai, ia ki kam baroh jong kane ka nuksa" (1 Khro 28 : 19).

U briew uba dei ban mad ia kane ka jingjia ha ka jingim shimet jong u, um lah ban buh ha ka jingthoh, lynda U Blei u kyntu ia u ban leh kumta. U Blei u ai ia kane ka bor kaba kyrpang tang ha kito kiba la ioh pdiang ia ka jingai U Mynsiem. U Apostol Paul u la dep kyntu jur ia u Timothi ba um dei ban buhr'eh ia kane ka jingai ha kaba batai ia ka jingiathuhlypa hano hano, ba u briew jong U Blei u sngewmon ban leh kumta. "Wat lyndet ia kata ka jingai kaba

**ha me, ia kaba la ai ha me da ka jingithuh lypa" (1 Tim 4 : 14).**

### **KA JINGJIA HAPOH KA SNGI.**

U Blei haba u pynjia ia ka jingjia, u ai da ka jingithuhpaw ha u briew u ban sa iakynduh ia ka. U ai ia ka ha ka jingphohsniew ha ka por ba u dang iohthiah lyngngai, khnang ban ioh pynshemphang ia u ba ka jingjia kan sa jia 'hapoh ka sngi' jong ka jingim briew ba ju kheĩn na ka por kha sha ka por iap, lane kumba ngi sngewthuh ha kawei pat ka jingmut, na 'ka por ba mih kawei ka mynsiem briew' bad sha 'ka por ba ka leit noh kawei ka mynsiem briew.

Ka jingjia 'hapoh ka sngi', ka long ka jingjia keba dei ban jia ha ka 'karta' jong ka jingim u briew' uba hap ban mad ia ka. U Blei u la ju pynpaw lypa ia ka jingjia ka ban sa long ha ka por ba u briew u dang iohthiah. Ka lah ban jia ha ka por ba u iohthiah mynsngi ne mynmiet. "Ha ka jingphohsniew, ha ka jingithuhpaw mynmiet, haba ka jingiohthiah lyngngai ka hap ha ki briew, ha ki jingsamthiah ha jingthiah; hangta u plie ia ki shkor ki briew, bad u shonshap ia ka jingioh hikai jong ki" (Job 33 : 15, 16).

U briew hadien ba u la ioh ia ka jingithuhpaw, u dei ban pynpaw ne iathuh ia ka ha u nongpule ne ha ki nongpule. U Haba-kkuk u nongiathuhlypa u la ioh ia ka jing-

kyntu na U Blei ba um dei ban buhteng ne pynslem bin thoh bad pynshai bha ia ka jingithuhpaw ha u nongpule uba dang dei ban ia phet.

*"Te U Trai u la iathuh ha nga, bad u la ong, To thoh ia kane ka jingithuhpaw, bad to pynshai bha ia ka halor ki lyngkniap, ba uta uba phet u lah ban pule ia ka. Naba kane ka jingithuhpaw ka long pynban ia ka por ba la buh bad ka pynkloi sha kaba kut, bad kan ym lamler : la ka pynslem ruh, to ap ia ka; naba kan poi shisha, kan ym pyntud"* (Hab 2: 2, 3).

Ka jingithuhpaw ka lah ban shim khyn-diat ka por ba kan wan poi wan jia shisha, bad ka donkam ia u nongpule ba un iaishah da kaba iai ap da ka jingngeit. "Hynrei u ba hok un ioh im da la ka jingngeit" (Hab 2: 4).

Hadien ba u nongthoh u la dep thoh bad u nongpule u la dep pule, ka kam ba kynja Blei ka la nangiaid. Ka sah sa tang lano U Nongpynjia bakhraw ba un pynjia ia ka jingjia. Ka shong sa tang ka por ka ban batai bad pyndep ia kiei kiei baroh. U 'nongthoh' bad u 'nongpule' ki donkam ban ia jngi lang ha ka por, kaba la mang bad buh da U Blei, kumba kawei ka kyntien u riewstad ka ong: ("Ym don ei ei kaba long ka jong ngi, hynrei ka por" - "Nothing is ours but time").

Kumno u nongthoh u ioh ban thoh, bad kumno u nongpule u ioh ban pule, ka tong kaba eh ban batui, namar baroh ka dei tang ka bor uba najrong kaba pynlong, pynien bad pyniaid ia kata ka jingmalan jong ka jingjia. Ha ka jingjia kaba kum kane, u Eklesiastis u don tang ban ong ba ka kam U Blei ka long ka bym lah it shuh: "Te nga la khmih ia ka kam U Blei baroh, ba u briew um lah ban shemphang ia ka kam baroh kaba ju leh hapoh ka sugi: namar la u briew u leh shitom katno katno ban wad ia ka, pynban un ym shem ia ka; shishe nalar kane, la u riewstad un mut ban tip ia ka, pynban um lah ban shem ia ka" (Ekle 8 : 17).

Bunsien kum ki briew ngi ju fiewbeit ia ka jingiathuhlypa, kumba ka la jia ia u nongpule u bymngcit wat haba la pyni ha u da u Habakkuk. "Ha khmih, ka myniam jong u ka atmeng, kam long kaba beit hapoh jong u" (Hab 2 : 4). La ki nongrkhie bein ki bun, pynban ka dei ia u nongiohipaw ban iathuhlypa, ia u nongphohsniew ban batui "U nongiathuhlypa uba don ka jingphohsniew, to un iathuh ia ka jingphohsniew, bad uta uba don ka ktien jong nga, to un kren biang biang ia ka ktien jong nga" (Jer 23 : 28).

U briew um lah ban iaid, lynth na ka wah lymda U Blei u pyniaid ia u, U Blei u ia kren shisien da u Ezeiel u nongiathuhlypa ha u Pharo u Syiem Ijypt : "Ka wah ka long ka

long nga hi, bad nga la pynlong ma nga la ka" (Ezek 29 : 9). U Jeremaiah nongiathuhlypa u la kdew ba ka lynti iaid u briew pat kam long ha u hi. "Ah Trai, nga tip ba ka lynti u briew kam long ha u hi; Kam long ha u briew uba iaid ban pynbelt ia la ki jingjam" (Jer 10 : 23).

Ka jingjia kaba sniew hapoh ka sngi ka long ba u nongpule uba la shah maham, um tip ia ka por ba u dei ban leit noh. U briew uba kum uta um don jingiapher na ki dohkha, bad ki sim, ia kaba u Eklesiastis u la dep batai : "Namar u briew ruh um tip la ka por: Kumba ki dohkha kiba la ngat ha ka jar basniew, bad kum ki sim kiba la ngat ha ka jingriam, kumta ruh ia ki khun bynriew la ngat ha ka por basniew, haba ka hap kyndit halor jong ki" (Ekle 9 : 12). Kumjuh ruh u Apostol Paul u la dep maham shuh shuh ia kiba la long khristan hynrei ki bymngait pynban. "Wat pynlip noh ia U Mynsiem. Wat nlewbein ia ki jingiathuhlypa. Da bishar ia kiei kiei baroh; bat skhem ia kata kaba bha" (1 Thess 5 : 19 - 21). U Eklesiastis u pynkynmaw da kaba u maham ia u nongpule.

Ka jingjia kaba kham sniew hapoh ka sngi ka long ba u nongiaphet ha uba la ai bad pynlip ha u ia ka jingithuhpaw, u lah ban hap noh na ka jingalei, da kaba duh jingkyrmen synden namar ba ka jingithuhpaw ka slem



ban wan jia long. U lah ban khaium ne leh bymsalia ia ka. Dei namar kane ka daw ba U Eklesiastis u la ong: "Lah ka jingstad ban ia ka bor: pynban la ibeiñ ia ka jingstad u riewduk, bad ym shym la angap la ki ktien jong u. Ia ki ktien jong u bastad ba la kren ha ka ba jar jar la kham shah shkor ban la ka jingpyrta jong uta uba synshar hapteng ki bableit" (Ekle 9 : 16 - 17).

Kum u 'Nongsharai' uba don ka jing kit khlieh ha la ka iing ka sem bad ka balang, nga sngew ba ka dei ban ai jingmaham ia la ki jong la ki sngap ne kim sngap ruh, tang ba nga la pyndep ia ka kamram na U Trai. Ka la long kumta ka ktien na U Blei ha u Esekiel shaphang ba u dei ban pyndep noh kloi kloi ia kata ka jingkit: "To ai ia ki ka jingmaham na nga. Haba nga ong ba u bymman, Men iap shisha; bad mem ai jingmaham ia u, lane mem kren ban maham ia u bymman na ka lynti bymman jong u, ban pynim ia ka mynsiem jong u: uta hi u riewbymman un iap ha la ka jinglehbymhok; hynrei ia ka snam jong u ngan pan na ka kti jong me. Hynrei lada me maham ia u bymman, te um phai na la ka jingbymman lane na ka lynti bymman jong u, un iap ba la ka jinglehbymhok; hynrei me me la pyllait ia la ka mynsiem. Pat, haba u briew u bahok u phai noh na ia ka hok, bad u leh ia ka jingleh bymhok, bad nga bub ka jingjynthut ha khmat jong u, un iap na ba mem shym ai jingmaham ia u, un iap ha

la ka pop, ia ki kam hok jong u ruh kiba  
 u la leh yn ym kynmaw shuh; hynrei ia ka  
 snam jong u ngan pan na ka kti jong 'me.  
 Hynrei lada me maham ia u briew u bahok,  
 ba uta u bahok un ym leh pop, bad u um  
 leh pop, un im shisha, naba u la pdiang ia  
 ka jingmaham : me ruh me la pyllait ia la ka  
 mynsiem" (Esek 3: 17- 21).

### **KI KULAR BÀ SKHEM JONG U BLEI HAPOH KA SNGI.**

Ka jingjia hapoh ka sngi ha ka jingim  
 jong u bangeit kam lah ban shujia ryngkhat  
 khlem da U Blei u da pyni bad pynpaw lypa  
 ha ka jingithuhpaw. Ka long ka jingjia kaba  
 jia "hapoh ka bueng" (Ekle 2 : 3), bad kaba dei  
 ban jia ruh ha ka 'khyndew'. Ka 'sngi' u 'bnaj,  
 bad ki 'khlur' ki sakhi ia kata ka jingjia.  
 Kaba katno tam lei lei ba U Mynsiem jong  
 U Blei un sakhi ha ka 'dohnd' bad ka  
 'jingiatiplem' jong ki nongpule. Dei halor ka  
 khyndew ba u briew u im, u khiih u ksar,  
 u trei bad u jahthait, ba U Blei u pynlong,  
 ia ka 'drama' jong u. "U Blei, U Blei keiñ  
 U Trai u la kren, bad u la khot ia ka  
 khyndew naduh ka bamih ka sngi haduh ka  
 jingsep jong ka. U Blei jong ngi un wan, bad  
 un ym sangap jar : ka ding kan bam duh ha  
 shuwa jong u, bad ka erlong ka ba jar kan  
 long baroh sawdong ia u. Un khot ia ki  
 huanng stia jrong, bad ia ka khyndew, ba un  
 ion bhar ia la ki briew : To lam lang ha

nga ia ki riewkhuid jong nga; kha kiba la teh jutang bad nga da ka jingkhia" (Salm 50: 1-5).

U Blei um mon ia ki niam ki rukom, hyrei ia ka jingkohnguh ka bashisha: "To ai ha U Blei ia ka jingkhia ka jingainguh; bad to siew ia ki kular jong me ha U Babakhlich tam: bad to khot kyrpad ha nga ha ka sngi ka jingjynjar; ngan pyllait ia me, te men pyndon-burom ia nga" (Salm 50: 14-15).

U Blei u pynlong ia ka 'drama' jong u ha ka khyndew khuang ba kiba lajied jong u kin ioh ia ka jingsuk, namar ki jingai ki ba bun jait: "Kita ruh kiba shong sha ki bakut eh ki sheptieng ia ki dak jong me: ia ki jingmih ka step bad ka premmiet me pynshad kmen. Me wan khmih ia ka khyndew, bad me ai um ia ka, me pynsboh shibun ia ka, ka wah U Blei ka shlei da ka um: me pynmih kew ia ki, haba me la khreh kumta ia ka khyndew. Me pynphong pansngiat ia ka snem da ka jingbha jong me; bad ki lynti jong me ki pynjaw khlein. Ki jaw halor ki jaka phlang ka ri khlaw bad ia ki lum la paupoh da ka jingkmien. Ia ki jaka phlang la kup da ki kynhun; ia ki them ruh la tap lin da u kew; ki iarisa namar bakmen, bad ki rwai ruh" (Salm 65: 8-13).

"Ka khyndew ka long ka jong U Trai, bad ka jingdap jong ka; ka pyrthei bad kiba shong ha ka. Naba u la seng ia ka halor ki duriaw, bad u la pynskhem ia ka halor ki jingshlei" (Salm 24: 1, 2).

**"Ka khyndew baroh kan mane ia me, bad kan rwai ha me; kin rwai ia ka kirteng jong me. Ale, bad to khmih ia ki kam U Blei; u long uba itriem ba la ka jingleh sha u khun bynriew" (Salm 66 : 4, 5).**

**"Ale, bad to sngew, phi baroh kiba sheptieng ia U Blei, te ngan pynbna ia kaba u la leh ia ka mynsiem jong nga" (Salm 66: 16).**

**U Blei un ym kynriah na kaba u la 'thmu'. Un ym iehnoh ia ka 'plan' bad ka jingthmu kaba u la dep ai lypa da ka 'dak'.**

**"Kane ka long ka jingthmu ba la thmu halor ka khyndew baroh : Namar U Trai ki paid u la thmu, te uei u ban pyndam noh ia ka ? Ia ka kti jong u la kner, te uei u ban pynkynran ia ka ?" (Isa 14: 26, 27).**

**Ia ka burom U Blei yn pynpaw bad yn pynkyntiew da ki riwngait jong u kiba shem ia ka jingpyntngen na u, wat hapdeng ka jingjia kaba shipa" "Namar ka jingisynel jong me ka khraw haduh ki bneng, bad ka jingshisha jong me haduh ka suiñ bneng. To long me ba la kyntiew, Ah U Blei, halor ki bneng; ai ba ka burom jong me kan long halor ka khyndew baroh" (Salm 57: 10, 11).**

**U briew uba im ha pyrthei u dei ban laid lynti. Ka jingiaid lynti kam dei kaei kaei ruh, hynei tang ka jingiaid lynti jong ka jingim briew ha pyrthei, kaba lah ban 'kut noh'**

ne kaba lah ban 'sdang thymmai pat<sup>a</sup> ia ka. Kawei ka jingong ba pawnam ka la phawer da kaba kren shaphang kane ka jaitlynti ba ma. "Ka jingim ka long kaba jrong, ka jingiaid lynti durjaw kaba ma sha ki jaka ki bym tip" -"Life is a long, perilous voyage to unknown lands".

Ka jingiaid lynti jong ka jingim briew ha pyrthei ka long thik kum ka jingiaid jong ka wah kaba wad ia la ka jong ka lynti. U briew uba dei ban ia id ia ka jingiaid lynti kaba kum kata u hap ban mad bad ia kynduh ia ka jingshle, kumba batai u Iasalah u nongia-thuhlypa. "Naba kane ka long kum ki um u Noah ha nga" (Isa 54 : 9).

Ym dei u briew uba jied hi da lade ia ka lynti ba u dei ban ia id, la u jied ia ka na 'ryngkew' ne na 'wah'. Kumta ka ktien U Blei ka ong : "Ki jingleit u briew ki long na U Trai; kumno te ba u briew u lah ban sngew-thuh ia la ka lynti"? (Prob 20: 24). "Ka dohnud u briew ka pyrkhath ia ka lynti jong u; hynrel U Trai uba ialam ia ki jingjam jong u" (Prob 16: 9).

U 'nongiaid lynti' uba jied ban ia id ia ka lynti kaba ma na 'wah' um sngewkhuslai bad um sngewsheptieng, namar ba u la dep duwai ha U Blei. Kumta ong biang uwei u riwstad ba ym don ka jingsheptieng kaba lah ban jop ia ka jingshlur lada u banzeit u la dep duwai lypa ha U Blei. "Ka jingshlur ka long

ka jingsheptieng kaba la dep ong ia ki jingduwai jong ka". — "Courage is fear that has said its prayer".

"Jingsh!ur kan mih na jingma,  
Ngin jop, ngin jop la eh"

U Blei u donbor ban pynskhem ia ka jingduwai jong u nongiaid lynti uba shlur bad uba don ka jingngest kaba khlaifi ha ka kular jong u. U Blei u kloï ban iaiaid lang bad u nongiaidlynti uba dohsatar bad uba la aiti lut ialade ha u. Kumta ka ktien U Blei ka la iathuh. "Ia ki jinglaid u briew la pynskhem da U Trai; bad u sngewbha ha ka lynti jong u (Salm 37 ; 29).

U nongiaid lynti uba hap ban iaïd lynti mynsngi, um sheptieng namar ba U Blei u don ryngkat bad u. Ynda u la lait na ka jingma mynsngi, um dei ban klet ban iaroh ia U Blei mynmiet. "Ki jingat phyllung jong me baroh bad ki jingat um jongme ki la shlei halor jong nga. Pynban U Trai un hukum ia la ka jingleh isynei mynsngi, bad mynmiet ka jingrwai jong u kan long bad nga, kata, ka jingduwai la U Blei ka jingim jong nga" (Salm 42.7,8).

Namar ba ka skhem ka jingbat kaba na neng ka jong U Blei, u nongiaidlynti uba la jan iap jyllop um khih wat hapdeng ba un sa duh mynsiem noh.

"Haba me iaïd lyngba ia ki um; nga ngin

long lem bad me; bad lyngba ki wah, kin ym  
tyllep ia me" (Isa 43:2). "Me la ai hukum ban  
pynim ia nga" (Salm 71:3).

"Jingsumar U Blei ka iada,  
Ngan poi ha kut kyreng;  
Ka duriaw hi kan pait, kan pra,  
Ka skhem jingbat naneng".

U Nongiaid lynti uba jngi ban iaksaid  
ia ka 'ban lait im, u don ha tmier ka jingiap  
pynban U Blei um shem klet ia u.

'Jingud, jingiap, ia nga ki ker,  
Ki kshaid jingjynjar ki lynther;  
Te tang shu kyrpad sha I'U Blei,  
U wan ban khring, la jur ka shlei.

"Namar ma nga U Trai U Blei jong me  
ngan bat ia ka kti kamon jong me, da ka  
ba ong ha me, wat sheptieng, nga ngan iarap  
ia me" (Isa 41 : 13).

'Ha ki jingma barieh ne paw,  
U Nongiarap ha ka shipa;  
U Nongsumar ia nga U long,  
U Nongiarap ha ka shipa'

Ka wah kaba wan mih na Sepagi bad ka-  
ba leit tuld sha mihngi ka long ka jingiathub  
khana shaphang ka jingkylla kaba U Blei u  
wallam, ha ka jingiaid lynti jong uba ngelt. Ka  
iarnish ia ka 'histori' jong ka jingim u briew  
jong U Blei kaba adang na sepagi, bad ka

ban iakynduh ia kaba mih ka sngi. U Blei un ym pep ban pyndep ia ka 'plan' jong u na ka bynta u briew uba la jied jong u. "Ka jingthmu jong nga kan jeng, bad ngan leh ia la ka jingsngewbha baroh" (Isa 46 : 10).

Dei ha ka liang ba mih ka sngi ba ka wan mih ka burom jong U Blei. Ka sngi kaba dang mih ka kren ha nga bad ha phi ia ka burom U Blei, kaba khreh ban tyngshaiñ mynta. Kaba kum kata ka burom ka la wan mih-paw ha ka templ na ka liang mihngi ha ka por u Esekiel u nongiathuhlypa. "Hadien kata u la lam ia nga sha ka khyrdop, kata ka khyrdop keñ kaba phai shaphang mihngi: bad ha khmih, ka burom U Blei ki Israel ka la wan na ka lynti mihngi: bad ka ktien jong u ka long kum ka jingsawa shibun ki um : bad ka khyndew ka la tyngshaiñ da ka burom jong u" (Esek 43 : 1-2).

Hapdeng ka jingjylliew jong ka 'wah jing-iap,' U Blei u plie' ia ki 'shkor' jong u. Pilgrim ba la duh jingkyrmen, ba un dang ioh sngew ia ka jingiakren jong ki briew kiba dang im bad kiba ia kren kham pajih iwei na iwei pat; Ka pyrthei jong kiba dangim ka pynkyrmen ia u briew ba duh jingkyrmen, ba ka dang don ka por, ka lad bad ka kabu ia u shakri jong U Blei ba un leh sngewbha ha ka jingbha U Trai ia u "Nga la iap, lymda nga la ngeit ban iohi ia ka jingbha U Trai ha ka ri ki ba im" (Salm 27 : 3).



Ka jingiarap kaba U Blei u phah na jrong kan ym pep ban wan ha u briew jong U Blei uba kwah ban lait na ka jingjynjar: "To phai ma me sha nga, bad to isynei ia nga, namar nga long weibriew bad u bajynjar. Ia ki jingshitom ka dohnud jong nga la pynkhrav: Ah! to pynmih noh ma me ia nga na ki jingshipa jong nga" (Salm 25 ; 16, 17).

. "To pynim ia nga, Ah U Blei; naba ki um ki la wan rung haduh ka mynsiem jong nga. Nga ngam ha ka ktieh ka bajylliew, ha ka bym don ka jaka ieng; nga la wan sha ki um ba jylliew, ha kaba ka jingshlel ka tylllep ia nga" (Salm 69 : 1—2).

"Wat ai ba ka jingshlel um kan tylllep ia nga lymne wat ai ia ka jingjylliew ban nguid ia nga, bad wat ai ia ka thliw ba kan set ia la ka shyntur halor jong nga" (Salm 69:15).

"Ia nga wat lehnoh marwel,  
Kyrshan bad aibor ma Me.  
Tang ha Me nga shaniab lut,  
Na Me wan ka jingiarap;  
Ha la thapñiang ia nga kdup,  
Ka khlieh lyngkhuid jong nga tap".

Ka jingsawa jong ka 'Sur ktien' kaba mih ia ki ryndang briew ka long ka jingsawa kaba J Blei u buh ha ki briew, khnang ba kin ong tang ki 'tyndong sawa' da kiba U Myn-

siem bakhuid un kren. Ka jingkren ki briew kan ym trei kam, lynda U Blei u pynkhih. "Naba kawei ruh ka ktien na U Blei kan ym long khlem ka bor" (Louk 1 : 37).

Lada ki briew kiba u la ai ka ktien ha ki, kim leh ei ei ia u briew uba la jan iap, U Blei u donbor te ban pyndonkam wat da ki maw bad ki dieng. Un pyndonkam da ka 'mariang' ba kan ialap ia ka ktien bakhuid jong u. U Jisu Khrist hi u la dep batai shai ba ym lah ban khang ia ka 'jingsawa ka jingpyrta', lada U Blei u la pynkhih ia u paidbah syn-ran ban leh kumta. "Nga ong ha phi, ba lada kine kin shu sngap jar, ki maw hi kin sa ia kyang buk" (Louk 19 : 40).

Haba iohsngew ia ka jingsawa ka jingpyrta, mano u ban ym lah khlem da sngap bad jubab?

"Suk kita ki briew kiba ithuh ia kata ka jingsawa basngewtynnad : Ki iaiaid, Ah Trai, ha ka jingshai ka khmat jong me. Ha ka kyrteng jong me ki iashad kmen baroh shisngi : bad ha ka hok jong me la pynkyntiew ia ki. Naba me me long ka burom ka bor jong ki" (Salm 89 : 15 - 17).

"Sur sawa jem kum u angel,  
 Pynhiar mynsiem ba jai jai;  
**JINGKYRMEN** : b'la kyntu d'U Blei'  
 Mynsiem jong nga ka syrpa."

"Soft as the voice of an angel,  
 Breathing a lesson unheard;  
 Hope with a gentle persuasion,  
 Whispers her comforting word".

Ka 'jingsawa' jong ka 'jingpyrta' kaba poi  
 ha ka kut lad bad duh jingkyrmen, hato kan  
 ym wan kiew sha ka khet U Blei. "Na ka  
 jingjylliew nga la kyang sha me Ah Trai" (Salm  
 130 : 1). U Blei u ju kloi ban shah shkor ia  
 ka jingkyang jong u 'rangli'. "Une u rangli u  
 la lynhiar, te U Trai u la iohsngew ia u, bad u  
 la pynim ia u na ki jingjynjar jong u baroh"  
 (Salm 34 : 6).

Ka jingsawa jong ka jingpyrta kaba wad  
 jingiarap ka dei ha khmat U Blei ban pyn-  
 mih ia kawei pat ka jingsawa kaba tyrwa  
 ban ai jingiarap. "U Blei u la kren shisien,  
 arsiën nga la iohsngew ia kane; ba ka bor ka  
 dei ka jong U Blei" (Salm 62 : 11).

"Jingkyrmen ! Sawa !  
 Pasiaw mian mian ha nga,  
 Pyndap jingkmén;  
 Hapoh dohnud jong nga".

"Whispering Hope !  
 O ! how welcome thy voice,  
 Making my heart;  
 In its sorrow rejoice".

Ia ka jingiarap dei ban 'pynkren' tang da U Blei ha ki briew kiba kloí ban leh ia ka. Haba U Blei u la kren, ki briew ki dei ban kohnguh. Ka jingpynkhíh ia ka jingiarap ka long tang da U Blei. Ki paralok khristan kin hap ban pyllait ia u briew jong U Blei na ka 'jynjar' bnd ka 'shípa' U Blei u pyndonkam da "ki kynthéi' ban leh ia kane ka kam : "U Trai u ai ia kata ka ktien : Ki kynthéi kiba pynbna ia ki khubor ki la long u paidbah bakhraw" (Salm 68 : 11).

Ka ktien U Blei ka iaroh ia 'ka briew' kaba don ka mynsiem kaba sngewlem ban iarap. "Ia ka briew ka babha, uei uba lah ban shem ?" (Prob 31:10). U Eklesiastis u sngew sih jar eh hapoh la ka mynsiem, haba u iohi ba ka jingstad kam shym don ha ka briew, wat lada U Blei u la ai ha ka.

**"Uwei u briew hapdeng shi bazar nga la shem, hynrei kawei ka kynthei hapdeng kita baroh ngam shym la shem" (Ekle 7 : 28).**

Ka don ka jingud na ka liang ka 'seion' ba ia ka jingialap da ka 'ktien bad ka jingthoh' yn pynduh pyndam noh tang namar bym shym la mih ki nongiarap kiba biang ia u briew jong U Blei. Ka kam ialap, haba kumta kan pulom. Ki khun ka seion ki don ha ka jingpisa mynsiem kaba khraw. Kumjuh u nongialap, u tieng ba ioh U Blei un bishar ia u namar ba ki sap, ki talent ki la shu sep ei tang ha kaba ap ia ki nongiarap.

**"Seion ba swai ka ud, ka lynñiar lang, Ba kan ioh lait ka diengphyna ka khang ; Pynshait ka kam, ka jingleit kan ym slem, Nga tieng ioh iap shuwa ia Me nga shem".**

Lada ka jingiarap kaba dei ban iarap, kam lah ban trei kam ia u briew uba donkam ia ka, ka don ka jingma kaba khraw ba U Blei u lah ban pynphai noh shawei pat. Ka la don kawei ka jingjla shisien kaba la long syriem kumta ha ka por U Mordekai bad ka Esther. Haba U Blei u la plie ia ka jingiarap bneng, ka shong sa tang kumno ki 'atlar' jong u kin leh ia ka kam kabakum kata: U Blei u u la maham da u Mordekai ia 'ka Esther lada kam pyllait ia kijiw, namar ba ka la kren kiar mynshuwa. Kumta u Mordekai u u la byrngem ia ka.

**"Namar lada pha phan sungap ioh jar ha ka ne ka por, te ka jingiarap bad ka jingpyllat kan mih ia ki jiw na kawei pat ka jaka, hynrei pha bad ka Ing u kpa jong pha phin iajot nob: bad ei ba tip lehse pha la wan sha kata ka hima khnang na ka bynta kaba kum kane ka por?" (Esther 4: 14).**

**"Ha pyrthei dap da khuslai,  
Dap ka ud, ummat khlem wai;  
To iarap i'u lok ba swai,  
Katba ki sngi ki nang iaid".**

Hynrei ka don ka jingkmien tam ha Seion haba la mih ki nongiarap. Oh! ka lama ka gospel kan sa kaweh ha neng namar ki nongiarap ki la hajan. Ka kam ialap kan sa nang iaid shaphrang. Ka jingialap da ka 'jingthoh' kan sa mih shaid shi shaid na ka 'kershon' ka jong U Blei. Kumjuh ka jingialap da ka 'ktien' kan sa mih na ka 'Wiang rnong' jong U Blei. Ka jingialap ia ka Gospel kam dei ban sangeh na u briew uba la kyrkhu jong U Blei.

**"To men ialap ia kata ka ktien; to iajminot haba dei por, ha bym dei por de" (2 Tim 4: 2).**

**"Ka jingthoh baroh ka long kaba la pyrsad mynsiem da U Blei, bad kaba myntoi ia ka jinghikai ia ka jingsneng, ia ka jingpynbeit, ia ka jingpynmlien kaba ha ka hok: khnang ba u briew jong U Blei un ioh long jandi, haba la pyndap biang ia u sha ka jingleh ba bha baroh" (2 Tim 3 : 16, 17).**

**"Namar haba leh ia kane, men pyaita ia lade bad ia kita kiba iohsngew ia. me kafi"**  
(1Tim 4 : 16).

**"Hei ki lok ! khymih ka lama,  
Ba kaweh ha neng;  
Ki nongiarap ki la hajan,  
Ngin sa jop kylleng."**

**'Na sepngi sha mihngi' : Ka long ka kot kaba iadei bad ka jinglathubkhana (histori) jong ka jingim u briew uba la don hapdeng ka jingthiah pang hapoh Hospital. Ka kot ka kdew ia ka por thiah pang kaba u la iaid lyngba. Mar lakut ka jinglathuhpaw, u nong-lohipaw u dang don ha jingthiah. Hamar kata ka por ba u la kyndit, u nongpang u lohi maia pynban kum ia ka dur jong 'ka shympriah kti briew baroh sam tylli' kaba ityrkhong bad i sangsot ha ka tap ia ka ngab kadiang jong u, katba ka khijeh jong u pat ka dem halor ka syngkhlieh ha ka jingthiah kaba phai shaphang shathie na ka kamra thiah pang : 'U nongsngew ia ki jingong U Blei u la kren, uba tip ia ka jingtip jong U Bahakhlieh tam, bad uba la lohi ia ka jinglathuhpaw U Balah baroh, uba la hap ha ka jingi rngai, hynrei haba ki dang peit ki khmat jong u' (Jingkhein 24 : 16).**

**"Nga don ka bynta ha byneng,  
Ba ngam pat ju lohi ;  
Hynrei ka kti b'la mong jong Me,  
la nga, te khnang ka ri".**

Ka jingkhraw jong ka jingithuhpaw, ka shong eh ha ka jingialeh bajur kaba u nong-  
iohipaw u dang don 'mynta' namar u khmih  
lynti ba yn sa pyndep ha "ka por ka ban  
dang wan'. Ka jingpyndep ka dei ka jong U  
Blei. Tang U Blei u ban pyndep, ym ki  
briew. Ka don ka jingma kaba shyrkhei lada  
u nongiohipaw, u shu mut ban pyndep da  
lade khlem ka Bor U Blei. U Blei u la dep  
maham lypa ia ki briew kiba mut ban 'pynwan-  
jebor' ne 'pynjiakhnang' ia kata kaba khlem long  
na u. U Blei u ai ia "U Mynsiem ka jing-  
lailuid" ha ki briew ba kin pyntreikam ia  
kaba kynja mynsiem, hynrei un khang noh pat  
ia kaba kynja mynsiem ruh, lada ka long pat  
ba ki briew kin shah ialam bakla bad shah  
knieh kynthet ha u Mynsiem bymman. Ha  
ka ktien U Blei, la dep ai jingmaham lypa  
ia ki kam kiba kum kine: "Te mynta nga  
ong ha phi, "To kynran noh na kine ki briew,  
to iehnoh ia ki: naba lada kane ka jingsylla  
lane kane ka jingleh ka long na ki briew, kan  
dam noh; hynrei lada ka long na U Blei, phim lah  
ban pyrdam noh ia ki; ioh ba yn shem ia phi pyn-  
ban ki nongialeh ia U Blei" (Ki Kam 5: 38, 39).

Ia ka jingithuhpaw kaba long na U Blei  
najrong la dep buh ia ka 'kular' kaba dawa  
na u 'nongiohipaw' ia ka ban iai ap da ka jing-  
ngeit. Ka la long kumta ia u Habakkuk, ha  
ka por ba U Blei u la dep hukum ia u ban  
thoh da kaba pynshai bha ha ki mawlyngkniap  
jong ka 'dohnud' u nongpule. "Naba kane ka



jingithuhpaw ka long pynban ia ka por ba la buh, bad ka pynkloi sha ka bakut, bad kan ym lamler : la ka pynslem ruh, to ap ia ka; naba kan poi shisha kan ym pyntud" (Hab 2 : 3).

Ka jingpyndep ia ka jingithuhpaw kan long tang da U Jisu Khrist u Khun jong U Blei uba um khlem ma u, ym don jingpyndep ia ka jingithuhpaw. Katno ka por kan shim? Lano kan jia? Lano kan wan long? Baroh ia ki jubab ngin shem tang ha U Jisu. "U Jisu u long ka por." U Blei un ym pyndep ia ka jingithuhpaw ka ban kut ha kaba kynja doh, hynrei un pyndep tang ia kata ka ban poi ha kaba kynja mynsiem. U Blei um kwah ruh da lei lei ba ka jingithuhpaw kan sdang na U Mynsiem, bad kan kut ha ka doh. Ka jingithuhpaw kaba long na jrong na U Blei, ka dei ban kut ha ka jingithuhpaw ia ka diengphna. U Blei um kwah ba ngin bah ia ka 'diengphna' kaba dei tang 'ia lade shimet'. Um kwah ruh ba ngin bah ia ka 'diengphna' kaba dei jong ka 'pyrthei'. Hynrei u kwah ia nga bad ia phi ba ngin da mon ban 'bah' ia ka 'diengphna' kaba long ka 'nuksa' jong ka jingshah shitom halor u Lum Kalbari na ka bynta ki pop jong nga bad jong phi.

U Blei un pyndep ia ka kular khuid ha ki riewngeit kiba shisha jong u. Un pyndep namar ba u khun baieit eh jong u, u la dep kohnguh bad leh ia ka mon U Kpa jong u mynba u la kren ia ka "kyntien khaddu." nalar ka diengphna shuwa ba un dkut mynsiem "La pyndep" (Ioan 19:30).

Dei namar kane ka daw ba U Apstol Paul u iai ban ban' pynkynmaw ia ngi kiba ngeit kiba dang khmih ia U Blei ba un pyndep ia ki jingkular, khnang ba ngin ioh pyndonburom ia u. "Namar ki jingkular U Blei katba don, ki long ha u kaba hooid, bad ha u kaba amen ia ka ban pyndonburom ia U Blei da ngi (2 Kor 1 : 20).

"Ka sakhi ruh U ai  
Ba shai ba shisha eh;  
Ba ki jingkular Un pyndep,  
Ha kiba ngeit baroh."

Ka jingpynjia ia ka 'shipa' ka long ka jingthmu kaba na sha lyndet, khnang ba un ioh phrang ia u briew uba la jied jong u. Ki briew ki lah ban rkhe be'n ia u briew uba dei ban mad ia ka. Hynrei bad U Blei pat ka long ka 'dak' jong ka jingsneng kaba don bad ka jingieit jong u. "U Trai u tynjuh ia u bahok" (Salm 11: 5).

Ka jingtynjuh jong U Blei kam long kaba jem. Ka jingtynjuh kaba wan na ki nongshun ba kynja mynsiem ka long kawei. Hynrei ka jingtynjuh kaba kham shyrkhei ka long ba u briew jong U Blei u dei ban mad ia kaba kham palat ban ia ka jingbeh ki nongshun. "Lada me la phet bad kiba phet da ki kjat, bad kita ki la pynthait ia me, kumno te me lah ban ia pyrshang bad ki kulai? bad la me sngewshogaiñ ha ka ri ka basuk, hynrei men leh kumno ha ka jingshlel ka Jordan?" (Jer 12 : 5).

**Ka jingtynjuh U Blei ka long teng teng ruh da ka jingiathuhlypa. U Blei haba u mut ban tynjuh iano iano um ju da iathuhlypa. Hynrei ia kita pat kiba u kham icit kyrpang, u da iathuhlypa khnang ba kin long kiba la pynkhreh lypa.**

**Ka jingpynkhreh lypa ban ia kynduh ia ka jingtynjuh kaba la dep iathuhlypa da U Blei, ka long ka jaiñphong kaba kordor ba uba ngeit un phong lypa. Kumta lada ka jingtynjuh ka wan de ha kano kano ka por, un ioh long kum u Behometh uba lah ban kyrshan ia lade hapdeng ka jingshlei.**

**“Ha khmih, lada ka shlei ka wah, um khyn-ñiuh: u dang shaniah keiñ la ka Jordan ka at jin sha ka shyntur jong u” (Job 40 : 23).**

**‘La at ka Jordan ngan ym tieng,  
Ia nga U Jisu Un sa khring ;  
Ka khlieh Un rah, ngan poi sha iing,  
Ah jingieit, jingieit U Blei’.**

**Bun napdeng jong ngi ki khristan, ngi ju kwah ban lait na ki jingtynjuh. Ngi sheptieng ban iakynduh ia ki jingtynjuh. Hynrei u riewngeit uba shisha te u dei ban shu pyn-dem ialade ha ka jingtynjuh ka jong U Blei da kaba kyrshan bor ha ka jingduwai bajur, khnang ba U Blei baieit eh jong u un ioh wallam ia ka jingbishar ba hok halor jong u, ryngkat bad kata ka jingtynjuh kaba un iaaid lyngba**

ha ka jingim jong u. "Hynrei to ai ba ka jing bishar kan tuid kum ki um, bad ka hok kum ka wah kaba shlei" (Amos 5 : 24).

## KI JINGIALEH BAJUR HAPOH KA SNGI.

Uno uno ù rlewngait uba shisha jong U Trai u hap ban pynshongdor la ka jingithuh paw ba u la ioh kum ka jingbud dien U Blei ia u kyrpang. Ka jingithuhpaw ba la ai da U Blei na jrong ka long kaba dei ban da buh ha ka jingthoh, khnang ban ioh iathuh ha kiwei. U Daniel uba long u briew jong U Blei uba la ioh shibun ki jingpynpaw na U Blei ha ki jingithuhpaw ba phylla, u la pyndep ia kane ka bynta kaba khraw, kumba u la dep kren da kaba phla :- "Ha ka snem kaba nyngkong ka jong U Belshassar u syiem Babilon, U Daniel u la phohsniew bad u la iohi ki jingithuhpaw halor ka jingthiah jong u : ynda kumta, u la thoh ia kata ka jingphohsniew bad u la iathuh ia ka jingkyllum jong kita kiei kiei ruh" (Dan 7 : 1).

U Daniel la u la pyrshang ban batai ia ka jingithuhpaw, pynban u dang sah ha ki jingkhuslai ba pyndum ia ki jingmut jingpyrkhat jong u kat haduh ba u la shu dei ban kan noh marwei ha lade kum ka kam kaba rieh, tad haduh ba un da ioh ka jingpynshai bad ka jingkyntu na U Blei najrong ban leh da kumwei pat : "Kane ka long kaba kut jong kata ka kam. Nga hi U Daniel, ki jingpyrkhat jong

nga ki la pynkhuslai shibun ia nga, bad ka khmat jong nga ka la kylla bak ha nga : hynrei nga la rieñ ia kata ka kam ha la ka dohnud" (Dan 7 : 28).

Uwei 'pa uwei u briew jong U Blei ia uba U Blei u bud dien, u dei ban don hapoh ki jingialeh bajur. Lada U Blei u la kren, uei u ban ym sngap ? Lada U Blei u la pynpaw, uei u ban ym pyrkhat khuslai ? Lada U Blei u la pyni, uei u ban ym iphylla ? Lada U Blei u la pyntip, uei u ban ym sngew shaiong ? Lada U Blei u la pynkhih, uei u ban ym sdang ? Lada U Blei u la kyntu, uei uban ym leh ?

Ki jingialeh bajur hapoh ka sngi kiba uba ngeit jong U Trai u don, ki long ki jingialeh hapoh ka mynsiem kiba khih kum ki 'dew'. Kine ki jingialeh ki long ki 'jingpyntrel' ki jong U Mynsiem Bakhuid kiba pynkynduh ia u klong-snam khnang ban pynlong kam ia ka jingkwah ka mon bakhuid U Kynrad ha ka jingim jong u. Ha kane ka jingpynkhih kaba kynja Blei, ki jingialeh bajur ki wan ha u riewngeit ba u dei ban pyndep bad leh kloï kloï ia ki 'kam kyntang' hapoh ka sngi.

U dei ban dawai jur :— "Ai ban pynieng ia ka jingduwai jong nga kum ka jingiwbihtiang ha khmat jong me ; ia ka bakyntiew ki kti jong nga kum ka jingainguh la jan miet" (Salm 141 : 2).

**U dei ban pan ia ka rai tang na U Blei :—**  
**“To ai ba ka rai jong nga kan wan mih na**  
**khmat jong me” (Salm 17 : 12).**

**U dei ban sheptieng ia U Blei :—** “To  
 pyniasoh lang ia ka dohnud jong nga ia ka  
 ban sheptieng ia ka kyrteng jong me” (Salm  
 86 ; 11). “La u nongpop u leh bymman shi-  
 spah sien, bad pynslem ia la ki sngi jong u,  
 pynban da shisha nga tip ba kan long bha  
 bad kita kiba sheptieng ia U Blei, kiba  
 sheptieng ha khmat jong u” (Ekle 8 : 12).

**U dei ban bret lut ia ka jingshaniah ha**  
**ka jingiarap U Blei :—** “To ai ia ka synjat  
 te, to long u nongbahkhlieh ia nga bad ma-  
 lade” (Job 17 : 3).

**U dei ban leh ia kano kano ka kam ka-**  
**babha khlem jingsheptieng ioh lap ba dier**  
**ka por, haba ka jingkyntu U Mynsiem ka wan**  
**ha u.**

**“Kaei kaei baroh ba ka kti jong me ka**  
**shem ban leh, leh ia kata da la ka bor bah;**  
**namar ym don ka kam, lymne buit, lymne**  
**ka jingtip, lymne ka jingstad, ha ka jingtep,**  
**sha kaba me leit” (Ekle 9 : 10).**

**U dei ban sumar bha ia la ka shyntur**  
**namar ba bun eh ki nongshun :—** “Ah Trai,  
 to buh ka jingap ha khmat ka shyntur jong  
 nga; to sumar ka jingkhang ki rmiang shyntur  
 jong nga” (Salm 141 : 3).

**U dei ban buh riang bad lum thup ia ki khubor ka ktien U Blei ha ka kitab ba kin pule ki briew baroh.**

**"Ah! ban da thoh ia ki ha ka kot "(Job 19 : 23). "Namar kata, u nongthoh baroh uba la ioh hikai ha ka hima ki bneng, u long kum u briew uba u trai ing, uba sei noh na ka jingkynshew jong u ia kiei kiei ruh ki ba thymmai bad barim" (Math 13 : 52).**

**U dei ban iathuh ha pyrshah ba iohsngew bad iohi kiba haing hasem, ki kur ki jait bad ki parabriew baroh.**

**"Namar kata to wat sheptieng ia ki : na ba ym don kaei kaei ruh ba la tap, ia kaba yn ym pynpaw; bad ba la buhrieh, ia ka ban ym pyntip. Ia kaba nga ong ha phi ha kaba dum, to iathuh ha kaba shai : bad ia kaba phi iohsngew da ka shkor, to phin ialap. na-lor Ing" (Math 10 : 26, 27).**

**U dei ban nang ha kaba jied ia ki paralok bashisha.**

**"Me wat buh kyrkieh ia la ki kti hano hano ruh em : lymne wat iakit pop lem bad kiwei briew: to ri ialade u basngur" (1 Tim 5: 22).**

**"To men aiti ha ki briew ia kiba lah tan shaniah, kiba lah ban hikai ia kiwei ruh" (2 Tim 2 : 2).**

**U dei ban ai ka jingpynshai ha ki nongpule haba ka kam kyntang ka poi ha u phulstop.**

**“Te ia kane ngin leh keiñ, lada U Blei un shah” (Heb 6:3).**

**“Naba kumta ka la dei ia phi ban ong, lada mon U Trai, ngin im, bad ngin leh ia kane lane ia kata” (Jak 4 : 15).**

**U dei ban ialeh ban ioh bat skhem halade ia kiei kiei kiba kynja mynsiem.**

**“Hynrei ma me ah, u briew U Blei, to phet iap noh na kine kiei kiei ruh ; bad to beh brai ia ka hok, ia ka jingriewblei, ia ka jingngeit, ia ka jingieit, ia ka jingiaishah, ia ka jingjemnud. To ialeh ia ka jingialeh babbha jong ka jingngeit, to men bat khak ia ka jingim bymjukut, sha kaba la khot ruh ia me, bad me la phla ia kata ka jingphla babbha ha khmat bun ki sakhi.” (1 Tim 6 : 11, 12).**

**U dei ban shim ba ka jingim ka long kum ka jingiathong :-**

**“Hato phim tip ba kita kiba iaphet ha ka jingiaphet thong ki iaphet baroh keiñ, hynrei tang uwei u pdiang ia ka Prais ? To iai iaphet kumta ba phin dup ioh” (1 Kor 9 : 24).**

**“Bad lada uno uno u ialeh ruh ha ki jingialeh thong, yn ym pynphong pansngiat ia u, lynda un ialeh katba dei ka rukom” (2 Tim 2 : 5).**



**U dei ban sngewskhem ha ka jingsumar ukher jong Uba Nalor.**

**“Nga la buh ia U Trai hakhmat jong nga na la ka sngi : ‘namar ba u don ha ka kti samon jong nga, yn ym pynkhih ia nga” (Salm 16 : 8).**

**U dei ban tip ba U Blei un da ia ka kam jong u na ki nongpynsniew : . “Nga tip ba U Trai un da ia ka kam jong u bajyn-ar, bad ia ka hok jong u barangli (Salm 140 : 12).**

**Nalor ki jingialeh bujur, uba ngeit u shah pynshad· pynkynting ha ki jingsheptieng, kiba wan mih ban pynartatien bad pynduh jingkyrmen ia u. Ki jingsheptieng ki mih na ka jingsngew-briew bad jinglongoh kiba don ha ka jingim briew hi. Ka ju leng kumta barabor ia baroh.**

**(i). U ‘Nonglalam’ u ud kthang ioh ba la shu ialap ei ha kito kiba la dei ban leit noh, hynrei ki bymkylla kabamut.**

**“Men pyni ki jingphylla ha kiba, iap ? Kita kiba la iap kin ieng ban iaroh ia me ? Yn pynbna ia ka jingisynei jong me ha ka jingtep ? Lane ia ka jingialineh jong mæ’ha ka jingjot ? Yn ithuh ia ki jingphylla jong me ha ka jingdum ? bad ia ka hok jong me ha ka ri ka jingklet ? (Salm 86:10-12).**

**(ii). ‘Uba ngeit’ u lyngngoh ha ki ‘jingjynjar’ ba la ai naduh ki por ba mynshuwa. U sheptieng ioh ba kin dang tun katba nang mih**

mih ki sngi:- “Nga u bajynjar bad uba lajan iap naduh ba nga dang samla : Katba nga kit ia ki jingpynsheptieng jong me nga lyngngoh. Ka jingbitar ba otshla jong me ka la shlei halor jong nga. Ki jingpynsheptieng jong me ki la ot noh ia nga. Ki la wan baroh sawdong ia nga. “U nongieit bad u loh me la pynjai ha nga bad ia kiba ithuhithaw ia nga sha ka jingdum” (Salm 88 : 15—16).

(iii). U ‘riewngeit’ u ud bym don ki nongiarap bad ba ka jingkit ka khia eh ia u. “Marwei ngam lah ban bah ia kine ki briew, naba ka kham khia eh ia nga. Te lada me leh bad nga kumne, lada nga la shem ka jingisynei hakhmat jong me nga kyrpad, to shu pyniap noh ia nga, ba ngan ym iohi ia ka jynjar (Jingkheñ 11 : 14, 15).

(iv). U ‘Riewduwai’ u sngewduh jingkyrmen ba hapoh ka sngi um ioh jingshai ei ei kat baduh ba u sngew ba u la pynsyrrwa kai ia ki sngi ka jingim jong u.

“Ki sngi jong nga ki kham stet ban ia ka tangthari u nongthain jain, bad ki la lut khlem jingkyrmen shuh” (Job 7; 6).

“Te ki sngi jong nga ki kham stet ban ia u nongphet dak; ki phet iap noh, kim iohi ia ka babha. Ki la leit noh kum ki lieng ki ba stet; kumba ka pukni ka kynrup ia ka jinglute” (Job 9 : 25, 29).

(v). Hapdeng ki jingsheptieng U 'Nongiabeh' u shem ka jingpyntngen' khyndiat na U Blei haba u phai ha ki jingduwai sha u, tang ba lada un long uba beit ka dohnud.

"Nga tip ruh, Ah U Blei jong nga, ba me tynjuh, ia ka dohnud, bad ba me sngew-bha ha ka jingbeit" (1 Khro 29: 17).

"To ai ba ka kti jong me kan long halor uta u briew ka kti kamon jong me, halor uta u khun u briew ia uba me la pynkhlain na ka bynta ialade" (Salm 80 : 17).

(vi). U 'ordained minister' u ioh shuh shuh, ia ka "jingpynshlur" na U Blei namar ba u long uba la pynsleh jong u hi. "Mynta nga tip ba U Trai u pynim ia uba la sleh jong u : un sngew ia u na ka bneng bakhuid jong u da ka bor ba pynim ka kti kamon jong u" (Salm 20 : 6).

"Pynkhlain bad pynshlur bha ialade : namar men pynioh bynta ha une u paidbah .. Tang ba men long u bakhlain bad u bashlur bha, ba me lah ban sumar ia ka hukum ... wat phai noh na ka sha kamon lymne sha kadiang ba men ioh man bha kat sha kaba me leit" (Josh 1: 6, 7).

"Hato ngam shym la hukum ia me? to long uba khlain bad uba shlur bha; wat tieng lymne wat kiuh: namar U Trai U Blei u don ryngkat bad me kat sha kaba me leit" (Josh 1 : 9).

(vii). “Ka jingpule ia ka ktien U Blei ka ai ka ‘jingpynshlur’ ia u ‘Nongialeh’ ba ka thma ba kynja mynsiem ka don man la ka sngi. U nongialeh u dei ban tur shaphrang namar ba la dep ai ha u ia U Mynsiem. “Namar U Blei um shym la ai ha ngi ka mynsiem ka jingsheptieng hynrei ka jong ka bor, bad ka jong ka jingieit, bad ka jingleh adkar” (2 Tim 1 : 7).

(viii). U ‘Nongialam’ u dei ban ‘tynjih’ ia kabakynja bymman bad kaba kynja mynsiem, da kaba leh sumar bha ban ym rai kut ia kano. kano. U donbor ban kyntu ia kiwei ruh; “Ko hep baieit wat ngeit ia ki mynsiem baroh, hynrei to phin tynjih it ia kita ki mynsiem, la ki long ne em na U Blei” (1 Ioan 4 : 2).

(ix). U ‘Nongiaphet’ u ioh ka ‘jingmaham’ na U Blei ba ka don ka ‘jingma’ lada u phai dien na kaba dang dei ban tur shaphrang. Ka ‘kam kyntang’ kaba la sdang ha ka burom, ka dei ban kut ha ka burom.

“Hynrei uta u bahok jong nga un iai im da ka jingngeit, hynrei lada un kynran dadien, ka mynsiem jong nga kam sngewbha shuh ia u. Hynrei ngi ngim long na kita kiba kynran dadien ia ka ban jot noh; hynrei na kita kiba don ka jingngeit ia ka ban pynim ia ka mynsiem” (Heb 10 : 38, 39).

(x). U ‘Riewniam’ u dei hok ban sneng bad pyni ia ki nongbud jong u lada ki sngap ia

u, namar ki long ma ki kiba iaioh bynta na ka jingkmén jong u. kumjuh : “ko parabangeit bakhuid, ki nongioh bynta na ka jing-khot ba kynja bneng” (Heb 3 : 1). “Katba kum ka jingngeit kiba la jied jong U Blei bad ka jingtip ia ka jingshisha ia kaba katba kum ka jingriewblei” (Tit 1 : 1). “Ia ngin ia nangiaid shaduh ka jingpynjanai” (Heb 6 : 1).

(xi). U ‘Ebanjelis’ u kyntu ia ki ‘nongpule’ da kaba kin kynmaw ba U Blei najrong u iohi ia ka dohnud jong ki bad ia ki kam babha ba ki dei ban leh. “Namar ki khmat jong U Trai ki shad kylleng ha ka pyrtthei baroh ban pyngkhlañ ialade bad kita kiba ka dohnud jong ki ka janai ha u” (2 Khro 16 : 9).

(xii). U ‘Nongiohipaw’ u khot ia ki paralok baieit kiba dei ban iakyrshan ia u ha ka jing-duwai : “Hynrei ma phi, to long khlañ, bad wat pynjem ia la ki kti : naba yn ai bainong ia ka kam jong phi” (2 Khro 15 : 4).

(xiii). Ki ‘jingialeh’ hapoh ka mynsiem jong “Uba ngeit” ki long kiba jur. Pynban u sngew-skhem ba U Blei u iai peit sha u, namar ba u la nang ban shaniah lut ha u. “Naba U Trai : U Blei u long ka sngi” (Salm 84 : 11).

(xiv). U ‘Riewngeit’ um duh jingkyrmen namar “U Trai un pyniaid noh ia la ka ktien ha ka khyndew, u da pyndep noh ia ka bad u da pynkut noh kloi ia ka” (Rom 9 : 28).

(xv). Hapoh ka ka rta briew kaba lyngkot, U 'shakri jong U Blei' u dei ban sdang noh ha kaba pyndep kloi kloi ia ka kam ba U Blei u la aiti ha u. Ia ka prokram jong ka jingtrei, U Blei u la dep pynkhreh ba un trei, lada ka long da ka ktien ne da ka jingthoh. "U briew u mih noh ia la ka kam bad ia' ia ka jingtrei haduh la janmiet" (Salm 104 : 23). Ia ka hukum U Blei u la dep ai ha u : "To ñeng bad to trei, bad U Trai un long ryngkat bad Me" (I Khro 22 : 16).

(xvi). U Blei u khot ia u 'Bajeit' jong u ba un trei pyndep hamar ba ka jingim briew ka long kaba lyngkot, "katba ka dang don ka sngi : ka miet ka jia, ynda kumta ym don uba lah ban trei" (Ioan 9 : 4). U Blei u khot ia baroh kiba shakri na ka bynta ka kyrteng U Khrist ba kin trei bad iai trei.

"Trei, ba ka miet kan sa wan,  
 Ha pyrtnei sngi, pyndep ;  
 Katba jingshai ka dang sah,  
 Trei, ba sngi kan sep.  
 Trei, haduh ba sep ka sngi,  
 Jingsep bym lah shai shuh,  
 Trei, katba nang wan ka miet,  
 Bad jingtrei la kut."

(-xvii). U 'Nongtrei' haba u trei, u hap ban shah ia kaba eh kaba shit jong ka sngi. Ka syep kan jaw, ki ummit kin tuid, ka met kan tyrkhong, ka khmat kan thangiong.

Pynban dei hapoh ka por kaba kum kata,  
ba u nongtrei u dei ban pnykut ia la ka  
jingtrei ba U Blei u la aiti ha u.

“Trei, katba dang shai ka sngi,  
Hapoh ka sngi ba eh ;  
Trei, ba ka miet kan sa wan,  
Bad jingtrei la wai”

U dei ban sdang ia ka jingtrei naduh  
dang step, katba ki umjer jingkyrkhu ha u  
phlang ki dangsah. Um dei namar kata ban  
pynlehnohei ia kawei pa kawei ka por ‘step’.

‘Trei katba dangsah umjer,  
Ha pyrthei trei dep’.

U ‘Nongtrei’ u donkam ban ñiewkor ia  
kawei pa kawei ka khyllipmat. Ki ‘khyllipmat’  
ki pynlang ia kawei ka thup bah kaba kharw  
jong ka jingtrei ba tei mot jong u ‘riewshisha’.

“Ai ba man ka khyllipmat,  
Ei ei khyndiat kan buh ;  
Trei ba ka miet kan sa sa wan,  
Bad briew um trei shuh”

U Blei u kwah tang ba u ‘nongtrei’ un  
pyndonburom ia ka kyrteng bakhuid jong u.  
U briew uba trei na ka bynta ka burom U  
Blei, um dei ban pyndonburom ialade.  
U dei ban pynkyntiew tang ia ka burom  
jong U Blei. Ka burom U Blei ka khraw  
ym tang ha ka balang, hynrei ka khraw

wat hapdeng ki bymngait. U Malakhi u nongiathuhlypa u la saham ia ka jingkhraw bor ka kyrteng U Blei : “Naba na kaba mih ka sngi jin haduh ka basep jong ka ka kyrteng jong nga ka long ka bakhrav hapdeng ki Jentil” (Mal 1 : 11).

Namar ba u ‘Nongtrei’ u iohi ia ka jingkhraw ka jingisynei bad ia ka jingshisha jong U Blei, u pyntngen ialade da kaba u iaroh ia ka burom U Blei kaba dap ia ka bneng bad ha ka khyndew : “Namar ka jingisynei jong me ka khraw haduh ki bneng, bad ka jingshisha jong me haduh ka suiñ bneng. To long me ba la kyntiew, Ah U Blei, halor ki bneng; ai ba ka burom jong me kan long halor ka khyndew baroh” (Salm 57 : 10-11).

(xviii). U ‘Riewblei’ u kynmaw ia ki kular khuid U Blei. U pyni ia la ka jingshaniah ha ka ktien U Blei bad u kular ban iaroh ia u. “Me ñiew ia ki jingiaid sakma jongnga ; to thep ia ki ummat jong nga ha ka lywasnieh jong me ; hato kim don ha ka kitab jong me ? ... Nga tip ba U Blei u ha ka liang jong nga, ha U Blei nga la shaniah, ngan ym sheptieng ; u briew u lah leh aiu ia nga ? Ki kular jong me ki halor jong nga, Ah U Blei ; ngan ai ki jingainguh ha me. Naba me la pyllait ia ka mynsiem jong nga na ka jingiap ; me la pyllait ne em ia ki kjat jong nga na kaba kyllon ? ba ngan toh laid ba khmat U Blei ha ka jingshai jong kiba im” (Salm 56 : 8 - 13).



(xix). U 'Pilgrim' u kmen ba ha kawei ka sngi, un sa lait noh na ka 'jynjar' bad ka 'shipa', namar ba U Blei un sa wan ban pyllait ia u. Ka jingkular khuid U Blei kan dang trei kam tad haduh ba un da pyndep janai da kaba pyndon burom ia u. "Un khot kyrpad ia nga, nga ruh ngan phai ktien ia u ; ha ka jynjar ngan long lem bad u : ngan pylla't ia u, bad ngan pyndonburom ia u. Ngan pynhun ia u da kaba slem ka rta, bad ngan pyni ha u ia la ka jingpynini." (Salm 91 : 15 - 16).

(xx). U 'nongpop' u la iohi ia ki kam ki ba phylla kiba U Blei u la leh. La u pyrshang ban buh ryntih ia ki, ym lah kot shuh, namar ba ki la bun palat eh. "Ki long shibun, Ah Trai U Blei jong nga, ki kam kiba phylla kiba me la leh, bad ki jingmut jong me kiba sha ngi : ym lah an buh ryntih ia ki ha me ; lada ngan iathuh tad kren ia ki, ki kham bun ban ia kaba lah ban nïew" (Salm 40 : 5).

(xxi). U Blei u puh samrkhie haba u iohi ia 'U Khun' jong u ba u thmu ia ka ban pyndonburom ia u : "Naba kiba pyndonburom ia nga, ia kita nga ruh ngan pyndonburom, te ia kita kiba nïew beiñ ia nga yn nïewbeiñ kylliang ia ki" (1 Sam 2 : 30).

(xxii). U 'Shipai' jong U Jisu u la pynkhreh lypa ialade ban tur sha ka thma. U la dep kieng ia ka jingkieng atiar. U ap sa tang ia ka kyntien na U kynrad jong u. Um lah ban tur lymda U Trai u ai ktien ia u. U dei tang u 'nongrah atiar' berit jong u.

“Tang kum u nongrah atiar hapdeng ka thma  
 Ki jingriam ba phyrnai nga don ban da ;  
 Nga ap ban sngew ia ka h'kum bau poi,  
 Hangta hi ban jubab 'kynrad nga la kloï”

U Shipai jong U Jisu um donkam ban sheptieng ia ki nongshun. Ka kamram jong u ka long tang ba u dei ban tur sha ka jingialeh **Ka thma ka dei ka jong U Trai.** “Wat sheptieng, lymne wat khaweit namar une u paidbah bakhraw, namar ka thma kam long ka jong phi hynrei ka jong U Blei” (2 Khro. 20 : 15)

(xxiii) ‘U briew jong U Blei’ u dei ban ialeh ia ka thma jong ka jingngeit. Ka jingngeit ka long ka jingai jong U Blei. U donkam ban iaipan na U Blei un pynroi bad pynskhem ia ka jingngeit Blei kaba shisha. Ka jiagngeit ka trei kam bha haba la pynkem ding da ka bor jong U Mynsiem Bakhuid.

“**Khlem tiar lapom tang ka jingngeit,**  
 Bad waitlam U Mynsiem;  
 Kum kynroh ding to ai kin ker,  
 Jingieit U Nongpynim”

(xxiv). U ‘Riewngeit’ jong ka ‘spah snem kaba arphew um don jingiapher na u riewngeit jong ka ‘spahsnem ba nyngkong’. Ka kular U Trai Jisu ka sah haduh mynta. Ka trei kam kumjuh mynta, kumba ka la trei kam mynshuwa : “Shisha, shisha nga ong ha phi, Uta uba ngeit ha nga, ia kita ki jingleh kiba nga leh ma nga, uta ruh un leh ; bad ia kiba

khâm khraw ia kine un leh, namar ngan sa leit noh ma nga sha uta U kpa jong nga (loan 14 : 12).

(xxvi). U Riewngeit u dei u 'Riewialeh'. Ngi lah ban jer kyrteng ia u ruh kum u 'Riewiapom'. Ki nongbud jong u ki dei ban long kiba khlain kum ma u. U donbor ban kren ka ktien pynshlur ia ki nongbud jong u "To long kiba khlain ha U Trai, bad ha ka bor ka jingkhlain jong u "(Eph 6: 10).

"To kynmaw ia kane, bad leh rangbah ialade" (Isa 46 : 8).

(xxv) U Riewshlur jong ka jingduwai u dei ban pynshet ia ka jingkit ba khia ha kiwei ruh. Tang marwei u brieve um lah ban trei ia ka kam. U donkam ia ki nongiarap. "Ki arngut ki kynthei, ki arngut ki angel, ki arngut ki jingthaw baim, ki arngut ki shakri U Blei ki arngut ki synran, ki arngut shiparalok, ki arngut ki jingthaw U Blei—shynrang bad kynthei, ki arngut shilok—U Kpa bad ka kmie."

Arngut arngut kim lah ban lait na ka jingiakit lem ia ka lyngkor U Kynrad, "lah kaba arngut ban ia kaba weibrieve; namar ki don ka nong babha ia ka jingtrei jong ki. Namar lada kin ur, uwei un khyllie ia ia u lok : hynrei kordit ia uta uba marwei haba u ur, bad um don mano mano ban khyllie ia u....Bad lada uno uno u brieve u jop noh ia uta u bamarwei, arngut kin ieng ialeh ia

uta ; bad ia u tyllai uba lai bud yn ym lah  
ban pyndkut shen" (Ekle 4 : 9 - 12).

Ka jingduwai jong 'uweì' u riewngeit ka  
khlaifñ, hynrei ka jingduwai jong ki 'arngut'  
ki riewngeit ka kham khlaifñ. Ki dei ban ia  
pan ia kajuh na U Blei. Ki dei ban ia pan  
ruh tang ha ka kyrteng U Jisu Khrist "Kajuh  
ka jingi, kajuh ka jingsngew, kajuh ka jing-  
mut, kajuh ka jingsliang, kajuh ka jingshem  
kajuh ka jingkwah, kajuh ka jingngeit.

"Kajuh ka bor U Blei,  
Kajuh ka ktien jingim,  
Ka jingaiei, ka jingngeit ruh  
Ha U na mynbarim."

U Jisu Khrist mynba u dang don ha ka  
pyrthei u la dep ai lypa ia ka dak 'jyrngam'  
haba arngut ki paralok ki iaduwai lang :  
"Pat nga ong ha phi, ba lada arngut na  
phi kin ia kut lem ha ka khyndew shaphang  
kaei kaei ruh ia kaba kin iapan, kan long  
ia ki ha U kpa jong nga uba ha bneng. Na  
ba ha kaba don arngut ne laingut kiba la ia  
seng ha ka kyrteng jong nga, hangta nga don  
hapdeng jong ki" (Math 18: 19, 20).

(xxvii) Ka jingpynshai "U nongthoh ia ka  
jingithuhpaw" ha ki 'mawlyngkniap' ka doh-  
nud jong u nongpule, kam ju long kaba lehnoh  
ei hakmat U Blei. Ka long ka jingthoh  
kaba la pynsleh da U Mynsiem jong U Blei.  
Ia ka jingithuhpaw kaba long da ka jingpyn-

paw jong u Mynsiem U Blei la dep shon muhor da ka 'Sati ksiar' ( Jak 2:2 ) jong U Blei hi. U nongthoh u angnud ba ki nongpule kin da 'peiphang' ha la ka mynsiem la jong. U nongthoh u sheptieng ioh ba yn ym don wat tang uwei ruh u ban sngewthuh ia ka jingmaian bneng, namar ba ka pop ka la pynmatlah bad pynkyllut ia ki. La katta ruh U Blei u dang iai ialap ha ki "To sngap ia kane mynta, Ah, u paidlang u babieit bad u bakhlem jingshemphang; uba don ki khmat te um iohi; uba don ki shkor, te um iohsngew" (Jer 5: 21).

Ka jingialap ia ka ktien U Blei ba la pynkhih da ka bor U Mynsiem bakhuid kan ym pep ban treikam. La kam pat treikam mynta hynrei kan sa trei kam hadien. Ha kawei kano ma ka sngi, ba U Blei un sa 'pynpait, da u 'tyrnem bah' ia ki dohnud maw, bad 'khlaw' ia ki 'khmat doh' jong u paidlang babieit. U Blei un ym ai lehnohei ha ka bor u soitan ban pynjot junom ia kito kiba dang mon ban phai, kiba dang long kum ki 'Saihon sahtdem' bad ki 'khah ba la mong'

"Te ha kata ka sngi ki 'bakyllut' kin iohsngew ia ki ktien ka kitab, ki khmat ki 'bamatlah' ruh kin iohi na ka jingkah bad na ka jingdum. Ki 'bajemnud' ruh kin pynroi ia la ka jingkmen ha U Trai bad ki baduk hapdeng ki briew kin iashad kmen ha uta u Bakhuid jong ki Israel" (Isa 29 : 18 - 19).

Ka ktien U Blei kaba la pyrsad mynsiem da U Blei, ka long ka ktien jong u 'Alpha' bad u 'Omega'. Naba U Blei jong ngi u long bymjukut. Ka ktien kaba la mih noh na u ruh ka iaisah bymjukut. Ki shakri U Blei kim long ei ei. Ki long tang ki 'khñlang'. Hynrei ki shu kren bad shu ialap ia ka ktien ka jong U Blei. U Blei u la dep pynskhem ia kane ka jingshisha da kaba ong: "Kumta kan long kata ka ktien kaba mih noh na ka shyntur jong nga : kan ym phai suda ha nga, hynrei kan pyndep ia kata kaba nga sngewbha, kan roi ruh ha kaba nga la phah ia ka" (Isa 55 : 11).

Kawei pa kawei ka jingkular na ka ktien U Blei ka long kaba 'pyndep kam'. Ha sngap ! aiu U Isaiah u nongiathuhlypa u kyntu ia ngi : "To wad phi na ka kitab U Trai, to pule ruh : kawei na kine kan ym jah, kawei kan ym duh la u lok : namar ka shyntur jong nga ka la hukum, bad U Mynsiem jong u u la ialum ia ki" (Isa 34 : 16).

Ka jingthoh kaba la pyrsad mynsiem da U Blei kam don dor ha ki 'nongpule' kiba don ka jingngeit. Kumjuh ruh U nongiaphet un hap ban puson bha ioh ba ka 'jingngeit' ka shu snoh halor kum ka 'um' ha ka 'sla wang'. U khynnah skul uba pule ia ka 'kot pule' ba la hikai ha skul u hap ban minot khnang ba un ioh kiew klas. Kaba katno tam ia u 'nongpule' uba long ruh u 'nongiaphet' ha ka jingim ba kynja mynsiem. La ai ia ka jingthoh ha uba dei ban pule. Hynrei dang donkam ban iai kyntu ia u.

**“Lada phin ym ngeit, da lei lei yn ym pynskhem ia phi” (Isa 7 : 9).**

Dang donkam ruh ban kylli ia u. **“Phi la pdiang ne em ia U Mynsiem Bakhuid mynba phi la ngeit” (Ki kam 19 : 2).**

Dang donkam ruh ban maham ia u: **“Ialade hi to it phi la phi long ne em ha ka” jingngeit; ialade hi to phrang phi. Hato phim ithuh ialade, ba U Jisu Khrist u don ha phi? Iymda phi long kiba la kyntait noh” (2 Kor 13 : 5).**

**‘Na sepngi sha Mihngi’, ka long ka kot kaba u nongthoh u angnud ban “pyntrei kam ia ka jingngeit da ki kam”.**

**“Kata ka jingngeit, lada kam don ki jingleh ka long kaba iap ha lade hi” (Jak 2 : 17). “Kumba ka met khlem ka mynsiem ka long kaba iap, kumta ruh kata ka jingngeit khlem kita ki jingleh ka long kaba iap keiñ” (Jak 2 : 26).**

**‘Na sepngi sha Mihngi’, kam long ka kot Puriskam. Hynrei ha ka la thoh shaphang u Riewwad ia ki ‘jingshisha’ kiba long kum ki ‘nuksa’ ba uno uno u ‘nongialap’ ba shisha u dei ban ‘pynkhreh ialade pyrshah ia uba khlem blei’. Uno uno u shakri ba shisha jong U Trai Jisu u dei ban ‘pynkyndit’ ia ki khristan kiba dang iohthiah lyngngai ha ki pop bad kane ka pyrthei. Oh! kan long ka jingkmek kaba khraw ha bneng lada ki ‘nongpule’ kin**

shem hangno ma hangno ia ka 'jingsngewkyn-duh' kaba khraw ia la ki pop, bad ba kin phai kloi sha U Blei katba ka por ka dang don. U Job haba u iohi ba ki sngi ka jingim jong u ha pyrthei ki long kiba lyngkot, um lah khlem da iasaid jur ha ka jingsngewkutlad sha U Blei: "Ki sngi jong nga kim long kiba khyndiat? namarkata to keiñ noh bad to iehnoh ia nga, ba ngan sngewtngau khyndiat, katba ngam pat leit shata na kaba ngan ym phai pat, sha ka ri ka jingdum bad ka syrngiew ka jingiap" (Job 10 : 20, 21).

Da ki jingiakynduh jong ngi ia ki jingjia kiba 'Pher' bad sngewpher' ha ka jingim, U Blei u ju hikai ia ngi ban wad ia ka khmat jong u khnang ba ngin ioh iashem ia u. Lada ngin ym wad kloi ia U Blei, ngin ym ioh iashem ia u ha ka pyrthei kaba mynta lymne ha kata ka ban sa wan. U shakri bashem jynjar jong U Blei um sngewthait ban wad ia U Blei uba buhrieh ia lade: Mynta te thew ha la ka dohnud bad la ka mynsiem ban wad ia U Trai U Blei jong phi (1 Khro 22 : 19). U Nongrwai shem mynsiem pat u phla :-

"Wad, nga wad ia Me, Ko Kynrad,  
Shane shawei khlem da wai ;  
Srgew ki um jingiam la ryngad,  
Haba jan U ieng U Trai".

U Nongrwai Salm da ka jingjia kaba ia shem ha ka jingim jong u, u ud ia ki jingjia kiba pyrshah, u iasaid, u duwai, bad u



kyrkhu ia U Blei: "Ah to kynmaw katno ka balyngkot ka por jongnga: ia kaba katno ka jinglehnohei me la thaw ia u khun bynrlew baroh" (Salm 89 : 47).

U Nongthoh ia ka jingithuh paw u khmih lynti ha kaba kut, ba ki nongpop baroh ki dei ban ioh ka jingpynkhuid ia la ki pop ha ka wah Kalbari. Khlem da wan ban ioh sait ia lade ha ka snam U khunlangbrot, ngin ym ioh leit sha bneng. Baroh ngi dei ban ioh ia ka jingpynim. Lada ngi dang dei ban im shipor ha pyrthei, ne lada ngi la dei ban iapnoh, kaba donkam eh ia ngi ka long ba ngin dei ban wan sait wansum ha "ka wah Kalbari". Dei namar kane ka daw U Isiah u nongiathuhlypa u lah dep kyntu jur ia ki 'Nongpop' ba kyllut bad ba matlah, : "Wat phi ia U Trai katba dang lah ban shem ia u, to kyrpad ia u katba u dang hajan" (Isa 55 : 6).

**Sah sa tang ka snam U Jisu**

"Ei ban sait ka thoh na nga ?

Sah sa tang ka snam U Jisu,

Ei ia nga ba lah ban shna ?

Sah sa tang ka snam U Jisu.

Ah ! kordor long ka wah,

Ba sait lieh phar ia nga ;

Kawei ym don ba lah,

Sah sa tang ka snam U Jisu.

Ban thoh ia ka jingithuhpaw, lada ka long kaba lyngkot ne kaba jrong, donkam ban da pynshai bha ha ki nongpule, Dei U Blei uba donbor ban pynskhem ia ka jingthoh. Lada ka tam un khate noh, bad lada ka duna un pyndap.

*'Ha khmih, ka 'jingsoi kyrteng jong nga', ai ba U Badonbor baroh un jubab ia nga (Job-31:35).*

## KA JINGJOP HAPOH KA SNGI

U 'Nongialam Khristan' u long u nong-iaphet. U dei ban ia phet katlah katiai ban poi ha ka thong. Ka thong ka long kaba kut jong ka jingiaphet. Haba u la poi ha ka thong, u dei ban ioh pdiang ei ei kum ka bainong na U Trai. Ban ioh poi ha ka thong, un hap ban ialeh ia ka 'thma' kaba 'khluit dang' U dei ban 'sei lut' ia ka bor mynsiem. U dei ban 'pyneh triang' ia lade ban iai ialeh ha ban da wai. U dei ban 'iakhun pyrshah' ia ka jingbymngeit ha ban da 'lyngko pom'. U dei ban 'pda' ia ki 'namdi ng' jong ka 'jingduwai ba jur'. U dei ban 'ngeit tylli' ha ka bor Blei bym juh shah jop. U dei ban ia 'ai reng' ia u soittan haba ka wan ka lad. U dei ban 'kyrshan tyngesh' ban iada ialode khnang ban ym kyllon, U dei ban 'dawa' ia ka jingiarap bneng na u Kapten ka thma uba long U Jisu. U dei ban 'kaweh ia ka lama'. Um dei ban randien.

Ka jingkhlemraiñ halor ka jingkhlemraiñ un ioh lada u phaidien. U Jisu Khrist u la dep ai lypa ka jingmaham ia u : "Ym don u briew, haba u la buh ia la ka kti ha ka jinglur bad u da kyrtiang dien, uba bit ia ka hima U Blei" (Louk 9 : 62).

U dei ban 'put' ia ka 'turoi' haba donkam ban pynialum ia ki nongbud "Ha kano kano ka jaka phi iohsngew ia ka ronsing, ialang hangta ha ngi ; U Blei jong ngi un ialeh na ka bynta jong ngi" (Neh 4 : 20).

U dei ban don ka mynsiem dohsatar bad kaba dohiap. U dei ban bat ia la ka ktien ka burom. U donkam ban ai ka jingpynshlur ia ki paralok baieit jong u kiba kyrshan lem ha ka jingduwai : "Hynrei ma phi, to long khelaiñ bad to wat pynjem ia la ki kti ; naba yn ai bainong ia ka kam jong phi" (2 Khro 15:17).

'Phi kiba khelaiñ to ieng,  
Ki bun ki nongialeh;  
Jingshlur kan mih na jingma,  
Ngin jop, ngin jop la eh".

Haba ka thma ka kham jur, u dei ban shong halor u kulai. Haba ka jingialeh ka ishyrkhei un hap ban kiew bad shong halor ka 'kali' kaba ud bad sawa jam bad kaba mareh stet.

U 'Nongialam Khristan' um dei ban sngew-shngain pat haba u i lypa kumba ka jingjop

ka la thikna sha ka liang jong u, namar ba  
 "U Soitan" u bun eh ki buit bad u kham  
 stad ban ia u. U khot ia ki nongbud ba  
 kim dei ban shaniah shuh ha lade.

'To ieng iashah sh 'U Jisu,  
 To bat ka bor jong U ;  
 Wat nud ban ieng marwei,  
 Ka bor u bried kan duh.

U dei ban pynkyrmen ia ki nongbud, ba  
 lada ki 'shim' ia ka kyrteng jong ka 'snam  
 U Khunlaagbrot' bad pyndonkam ia ka 'bor U  
 Mynsiem bakhuid', u soitan un ym donbor shuh  
 namar ba la dep ai ia ki 'kular' ha ka ktien ba  
 khui, bad ia u 'Soitan' la dep 'khoh snieh im  
 ha Kalbari. "Te U Blei ka jingsuk un pynlwet  
 Jin shen shen kei ia uta u soitan hapoh ki  
 l'jat jongphi ! ka jingaiei ka jong U Jisu Khrist  
 uba U Trai jong ngi to kan long lem bad phi'  
 (Rom 16 ; 20).

La ki nongbud jong u ki ia shong sapra  
 jngai na u, hynrei U Blei un sa 'pyniakynduh'  
 bad 'pyniashem' ia u shakri : "To ia duwai  
 na ka bynta jong ngi, namar ngi ngeit ba ngi  
 don ka j'ngiatiplem babha ; ba ngi da kwah  
 ban im hok ha kiei kiei baroh. Bad khamtam  
 eh nga kyntu ia phi ban leh ia kane, ba yn  
 ioh ai ia nga pat ha phi kham shen" (Heb 13 : -  
 18-19). "Haba nga don shibun kiei kiei ruh  
 ban thoh ha phi, ngam shym la mon ban  
 thoh da ka kot bad ka sia ; hynrei nga kyrmen

ban wan ha phi, bad ban ia kren markhmat  
ba kata ka jingkmén jong phi kan da ioh long,  
ba la dap" (2 Ioan 1 : 12).

U 'Nongialam Khristan' u kyntu jur ia ki  
nongbud ba kin pyn nih shibun ka snam na  
ka bynta ka kyrteng U Jisu Khrist : "Phim  
pat ialeh pyrshah ha ban da mih snam, da  
kaba ia pyneh pyrshah bad ka pop" (Heb 12 : 4).

U soitan u don shibun ki nongbud kiba  
long ki 'Ejen' jong u. Kine ki syntiat barabor  
na ka bynta jong u. Wat la katta ruh, kine  
kin ym lah ieng slem ha ka kyrteng kaba  
donbor jong U Jisu.

U Nongialam Khristan da ka jingjop kaba  
la ai ia u najrong, un lap shibun ki 'koidi'  
kiba jinjarsat namar ka pop ba ki la leh.  
Pynban um ju lehbein ia ki. U kyntu ruh ia  
ki nongbud ba kim dei ban isih ia u nong-  
pop. Kumba don ka jingong : 'Isih ia ka pop :  
hynrei ym ia u nongpop'. U dei ban sngew-  
synei wat ia kito kiba shun bad ieng ialeh  
pyrshah ia u hadien ba ki la rem kumba U  
Jisu Khrist u la dep ialap : "Suk kiba isynei,  
naba yn isynei ia ki" (Math 5 : 7). "Hynrei  
khie leit ma phi to hikai kaei kane, ia ka  
jingisynei nga mon, te ym ia ka jingknia, naba  
ngam shym la wan ban khot ia kiba hok hyn-  
rei ia kiba pop ia ka ban kylla kaba mut"  
(Math 9 : 13).

Haba ka 'thma ba kynja mynsiem' ka khie man ka sngi, bad katba ka thong kam pat poi, u nongialam khristan u hap ban aiti lut ialade da kaba ialeh ha ka 'um' bad ka 'ding', u da khot ia ki nongbud jong u ban tur shaphrang.

"Ngin tur, ngin ym sheptieng, U Syiem  
u shaphrang,

Ka ding bad ka um ngin ym shah ba  
kin khang".

Ha ka 'thma' ba ialeh na ka bynta ka 'pansngiat' ban ioh phong, 'u shipai khristan', u iam bad u ud namar ka 'Diengphna' bad 'jynjar'. Pynban haba u phai sha U Jisu Khrist U Kapten ba donbor tam uba la leit lyngba ia ka jingiap jong ka 'jingshah sahnarphna', u ioh pdiang pynban ia ka bor ban shah.

'Te sawdong, ko jynjar, to ieng ban ialeh,  
Ngan ieng hapteng, ngam tieng, ngam babe;  
Ka mynsiem ka jong nga to shoh katba mon,  
U Trai U la weng ia ka bih katba don.

Ka 'thong' ba 'u shipai khristan' u hap ban iabeh ban poi ka long ka thong kaba shem ia ka 'jubab' ha ki jingduwai jong u. Katba U Blei um pat jubab ia ki jingduwai jong u, ka thong kam poi ha u. Ka 'diengphna jong ka pyrtnei' bad ka 'diengphna jong ka malade' ki long ki 'nongpynwit bah' ia u shi-

pai jong U Blei, ki kah ia ka burom jong ka 'diengphna U Kynrad jong ngi. Ka 'thma jingduwai' kaba don hapoh jong u ka long tang ba U Blei un 'kad' ia ka dohnud jong u, bad ba un 'plie' ia ka pyrda, khnang ba ka diengphna U Kynrad kan paw ha ka jingim jong u.

'Ban ithuh ia Me hi,  
 Ia Me me ruh ban iohi;  
 Jingsuk ka ai!  
 To pynpaw ka diengphna,  
 Ko Nongpynim babha;  
 Shitom kan wai.'

La shim ia ngi ki khristan baroh ba ngi long ki nongiaphet. Ha kane ka pyrthei kaba ngi im snipor, ka don ka 'thong kaba kyrpang' ba ngi ju dei ban iabeh ban poi. Kane ka lah ban kdew ia ka jingiabeh ia ka jingstad, ka jingiabeh ia ka nam, ka jingiabeh ia ka kyrdan, ka jingiabeh ia ka burom, ka jingiabeh ia ka spah, ka jingiabeh ia ka jingbit jingbiang ha ka jingim, ka jingiabeh ia ka jinglailuid, ka jingiabeh ia ka jingmanbha shimet, ka jingiabeh ia ka jingsuk mynslem. Kine ki 'thong' ki iapher na uwei u nongiaphet ha u uwei pat u nongiaphet.

Ka long ruh ka jingshisha ba la ki thong ki iapher kat kum ka rukom briew, pynban ka long kaba donkam ba ngin kynmaw ba ka don tang kawei ka thong kaba ngi iadei lang ban ialeh ban poi, bad kata ka long ka 'jingim bymjukut'. Ka don ka jingma ia ki

khristan ha kine ki por kiba mynta ba ki la kham iabeh ia ki 'jaid thong' rukom pa rukom, da kaba klet noh pat pynban ia ka jing-iabeh kaba khraw tam ban iohpdang ia ka 'jingim bymjukut'.

Kum ki briew haba ngi iaphet ban iabeh ia ka thong ha pyrtnei, khlem pep ngi ju 'angnud' bad 'khumia lyati' ban ioh ia ka 'bai nong'. U Blei ruh u ju siew bairong hok ia ki briew jong u kiba ieit ia u bad shakri ia u. Ki shakri ki jong U Blei kiba im hok iaid hok bad leh hok kim ju duh ia ka bai-long ha pyrtnei na U Blei. Kin ym duh ruh da lei lei ia ka bainong ha bnerg. Ki khristan ba shisha kiba la ju iaphet hok ha pyrtnei, kin 'iolmad' bad 'iohpdiang' ruh ia ki jingkyrkhu ha bunsyrtap ha ka jingim jong ki, kumba U Jau Khrist u la ai ia ka 'jingstad' wad Blei : 'Hynrei phin iawad shuwa ia ka hima U Blei, bad ia ka hok jong u ; te ia kine kici kici baroh yn sa ai lang tam ha phi.' (Math 6 : 33).

"Naba uno uno ruh uba don, ha u yn ai, un ioh kyrhai ruh : te uno uno ruh u bym dan, wat ia kata kaba u don yn shim noh na u" (Math 13:12).

U Blei u la buh ia kawei ka jingjop kaba long kyrpang na ka bynta uba ngeit hapoh ka sngi. Hapoh ka karta jong ka jingim briew, U Blei u kren bad iai pynpaw ha uba ngeit mynsngi bad wat mynmiet. "Kawei pa kawei



ka sngi ka iaibna ka jingken, bad kwei' pa kawei  
 ka miet ka iaipyni ia ka jingtip" (Salm 19 : 2).  
 U Blei um ju ai thiah ai dem ia uba ngeit  
 tad haduh ba uba ngeit un da shem bad ai jaka  
 ia ka 'jingihmu ka jong U Blei' na ka bynta  
 kawei ka nishon kaba kyrpang bad kyntang  
 ba u dei ban leh khlem pynbuhteng bad  
 pynslem. Kumta ka ktien U Blei ruh ka la pyn-  
 skhem ia kane ; "Namar kata, ha uba tip ban  
 ia ka babha bad u hym leh, ha uta keiñ ka  
 long ka pop" (Jakob 4 : 17).

Ka jingken hyndai jong u Stephen  
 Grillet (1773—1855) ka long ka motto kaba  
 pawnm, kaba dang im haduh mynta. Nga kyn-  
 maw ba ha ka taiew ba nyngkong eh jong  
 u bnai banyangkong jong ka snem 1984,  
 mynba nga la leit rung ba kawei ka dukan  
 baje ha Park street ba Calcutta, nga la iohi  
 ia ka jingthoh ba la wah ha pyrshah ki khmat  
 jong nga ia ka motto jong u Stephen Grillet.  
 Katei ka motto ka la buddien ia nga ter shi-  
 ter naduh katei ka sngi haduh mynta. Ngam  
 shym tip satia ba ka dei ka jingong jong u,  
 wat heba nga la kwah tip katta katta. Dang  
 ha kine ki khyndiat, pormynba nga la sdang ban  
 thoh pyndep ia kane ka kot, ba nga la tip  
 ba ka Motto nga la iashem mynshuwa eh  
 ka dei kaba la ong da une u rangbah bakhrw.

*"Ngan iaid lyngba ia kane ka pyrthei  
 tang shisien ... Ia kano kano ka kam  
 ba bha ba nga lah ban leh, ai ba ngan leh*

*mynta ..... namar ngan nym iaid shuh. ia kane ka lynti sa shisien pai*” (“I shall pass through this world but once ... any good thing I can do, let me do it now ... for I shall not pass this way again.”)

Katno ka long kaba sngewthiang ba ngin ioh leh kloi kloi ia kano ka kam babha, namar ba ngim sah slem ha ka pyrthei. Ym don ka jingkmén kaba kham palat ba U Blei un ai bainong ia ngi, haba ngi kloi ban lch bha iano iano. U Blei hi keiñ na baeng un sa siew dor ia kano kano ka kam babha ba ngi leh ia kiwei. Khamtam lada ‘ngi leh ha kaba rieh’. Ka jingai ‘kaba rieh, ka jing-duwai kaba rieh bad kumta ter ter. U Trai jong ngi u la ban jur ia kaba ngi dei ban leh ha kaba rieh, khlem da pynbna pyrthei ei ei,

“Hynrei me, haba me da leh ka jing-ai isynei, wat ai ba ka kti kadiang jong me kan tip aiu ba ka leh ka kti kamon jong me, ba kata ka jingaiisynei jong me kan ioh long ha ka barieh : bad U Kpa jong me uba iohi ha ka barieh un ai nong ha me ha ka bapaw. Haba me duwai ruh ... to leit rung sha la ka pulit, bad haba me la khang ia la ka jingkháng, to kyrpad ia U Kpa jong me uba ha ka barieh, te U Kpa jong me uba iohi ha ka barieh un ai nong ha me ha kaba paw” (Math 6 : 3 -6).

Ka jingialeh ban ioh ia ka jingjop hapoh ka sngi ka shong eh ha ka ‘jingpynkyutang

ialade'. Ka thma mynsiem ka long ka thma ba ngi dei ban iashan ryngkat bad ka 'bör Blei'. Khlem ka jingpynkyntang ialade, ka waitlam U Mynsiem kan ym khh. Khlem da pynkyntang ialade, U Mynsiem bakhuid un ym wan shong dap ha uba ngeit. Ki ktien U Joshwa ki sawa thymmai ha ki shipai U Jisu khrist wat mynta ruh. Shuwa ban 'pyn-tur' ia ka 'synduk ka jutang' ha khmat, ki shipai U Syiem Bneng ki dei ban pynkyn-tang shuwa ialade. "To pynkyntang ialade, namar lashai U Trai un leh ia ki jingphylla hapdeng jong phi" (Josh 3: 5).

(xxviii). Haba u 'lyngdoh' u dei ban tur hapdeng ka thma, u dei ban sumar ioh un klet ban phong ka' Ephod'. Ka Ephod kam dei kaei kaei ruh hynrei tang ka 'barandi' U Trai. U nongialam ha ka thma mynsiem pyrshah ia ka kynhun bah u soitan, u dei ban sneng jur ia ki nongbud jong u ioh ba kin ikwah ia ka spah pyrthei haba ki leit ialehthma. Ka jingshah jop jong ki Israel ha Ai ka long namar ka 'dawiing. U Akhan u la tuh ia ka jinglute. U la shim ia ka basang. Namar kane ki Israel ki la shah jop jahburom. "Te U Joshwa u la kad ia la ki jaiñ, bad u la hap dem la ka khmat ha ka khyndew ha khmat ka synduk U Trai haduh janmiet, ma u bad ki tymmen basan ki Israel (Josh 7: 6).

Mar mar U Blei u la hukum ia U Joshwa ban pynkhuid noh ia ka basang na ka dara.

jong ki khun Israel. Dei ban wad bad kem ia u nongleh palat. Dei ban lynthem maw bad thang ia u da ka ding. "To ieng noh, pynkhuid ia u paidbah, to ong ruh, To pynkhuid ialade hamar kaba lashai : naba kumne ong U Trai U Blei ki Israel : Don kata ka basang hapdeng jong me, ko Israel : mem lah ban jeng ha khmat ki nongshun jong me, ha ban da phin pynmih noh ia kata ka ba sang napdeng jong phi"(Josh 7: 13).

Ka jingshahjop thma jong ki shakri U Blei ka long barabor ka 'dawiing'. Ka dawiing ka long ka pop kaba khraw tam. Ym don kawei pat ka jingijli ba U Blei u isih tam haba u iohi ia ka 'pop shet kylla'. U Jisu khrist hi ruh u la iakynduh ia kane ha u Judas Iskaraiot. Namar kata ia ka dawiing dei ban pynkhuid noh. Kam dei ban sah kum ka 'pyut' kaba pyniw tung. Ki khun Israel ki la shah jop ha ki nongshun namar ka pop u Akhan.

La lip ka maifi u Joshwa bashlur. Hynrei ia ka pop ym ju lah ban set ne buhrieh. U Blei da U Mynsiem Bakhuid u la pynphla ia U Akhan namar ba u la tuh kyntang. "U Trai u la phai noh na ka bashit lep ka jingbitar jong u" (Josh 7: 26), tang hadien ba la dep pyniap duh ia u Akhan bad ia baroh ba u don ha ka 'them akhor'. Sngap laiu ka jingjia ba itriem ka la jia ia u nonglehpopp uba wallam ka jingshahjop ia ki khun Israel ha ka thma hapoh ka sngi ; ba ngi ruh ngin

sngewsheptieng ban leh ia ka pop kaba kum kane.

**“Bad u Joshwa u la ong, Balei me la pynjynjar ia ngi? U Trai un pynjynjar ia me, ha kane ka sngi. Te ki Israel baroh ki la lynthem ia u da ki maw; bad ki la thang ia ki da ka ding, ynda ki la lynthem ia u da ki maw.”**  
(Josh 7 : 25. 26).

**“Ha ka kitab ki thma ki jong U Trai”**  
(Jingkheñ 21 : 14), U Blei u ju pyndonkam ia ki ‘buit ialeh thma’ ba pher ba pher pyrshah ia ki nongshun jong u. U Blei u la pynkhreh ia ka ‘buit’, hynrei ka shong eh ha **‘U briew’** uba u la thung kumno u pyndonkam ia kata ka buit. Ka donkam namar kata ia u briew uba kum uta ba un long uba **‘iamir’** lang bad U Blei, bad ba un shu kohnguh beit katba U Blei u ong bad bthah ia u.

(i). **Ka buit ba U Blei u la ai ia U Joshwa ka long kaba phylla.** Da kata ka buit ki Israel ki la jop ia ka Ai. **“Te U Joshwa bad ki Israel baroh ki la leh kumba ki la shah jop ha khmat jong ki, bad ki la phet na ka lynti ka ri khlaw”** (Josh 8 : 15). Kumta haba ki nong Ai ki la beh ia ki Israel, U Trai u la ong ha U Joshwa, **“Rah ia uta u sum uba ha ka kti jong me shaphang Ai : namar ngan ai ia ka ha ku kti jong me. Te U Joshwa u la rah joit ia uta u sum ba u la don ha la ka kti shaphang kata ka shnong”** (Josh 8 : 18).

(ii). **Ka buit ba U Blei u la ai ia U Aaron bad U Hur ban pyrjop thma da U Moses ruh ka long kawei pat kaba donkam ba ngin pyrthuhbud, khamtam haba u nongialam u donkam ki nongiarap' ha ka khim khait. U briew jong U Blei um lah ban jop thma marwei lynda don ki nongiarap ki ban iakyrshan lem. Ym ju kham khmih lynti koit ia u briew jong U Blei ba un jop lut ia ka thma jong ka jingim tang marwei hi, khlem da don lem ki nongiarap. Ka la jia shisien ka thma kaba shyrkhei kaba la ialeh hapdeng ki khun Israel pyrshah ia ki Amalek ha Rephidim.**

Hadien ba U Moses u la phah ia U Joshua ban ialeh thma ia ki Amelek, U Moses ; U Aaron bad U Hur ki la leit kiew ha khlieh uta u lum. "Te katba U Moses u la dang rah shajrong ia la ki kti, ki lah ki Israel ; te haba u la pynhiar ia la ki kti, ki lah ki Amelek keiñ. Hynrei ki kti U Moses ki la sakhrail ; te ki la shim da u maw, ki la buh noh hapoh jong u, bad u la shong halor jong u : U Aaron de bad U Hur ki la kyrshan ia ki kti jong u, uwei sha kawei ka liang, bad uwei sha kawei pat ; kumta ki kti jong u ki la neh skhem, haduh ban da la sep ka sngi. Te U Joshua u la jop thiaw ia ki Amelek, bad u paidbah jong u da ka syrti waitlam. U Trai u la ong ruh ha U Moses, To thoh ia kane ha ka kitab ban long ka jingpynkynmaw, bad to iathuh ruh ha U Joshua : namar ngan pyndam noh khoit ia ka jingkynmaw ia ki Amelek napoh ka bneng" (Eksa 17 : 11-14).

(iii). Ka bait ba U Blei u la ai ha U Joshua ban hukuh ki lyngdoh ban bai ia ka synduk ka jutang lyngba ka wah Jordan, ha shuwa u paidbah, la iathuh kumne:— “Haba kita kiba bah ia ka synduk ki la poi ha Jordan, bad ba ki pohjat kita ki lyngdoh kiba bah ia ka synduk ki la dei ha ka rymngiang ka um (neng na Jordan ka ju shlei mar baroh ka alom ot), te kita ki um kiba hiar na neng ki la ieng, bad ki la ieng kum ka kynton .... Bad ki lyngdoh kiba bah ia ka synduk ka jutang U Trai ki la ieng skhem ha ryngkew hapteng ka Jordan, bad ki Israel baroh ki la leit sha shiliang na ryngkew, ha ban da u paidbah baroh la leit phar sha shiliang ka Jordan (Josh 3: 15-17)

Hadien ba U Joshua u la buh khadar. ngut ki briew, ban shim khadar tylli ki maw na Jordan ban long ka jingkyumaw, kumjuh ruh hadien kaba pynieng ia khadar tylli kiwei pat ki maw hapteng ka Jordan, u paidbah u ryngkang sha shiliang. “Te haba kita ki lyngdoh kiba bah ia kata ka synduk ka jutang U Trai ki la kiew noh napteng ka Jordan, bad ba ki slajat kita ki lyngdoh ki la kiew sha ryngkew, ki um ka Jordan ki la phat pat sha la ka jaka, bad ki la shlei ia la ki rud baroh, kumba mynshuwa” (Josh 4: 18).

Ka jinghikai ba ngi ioh na ka jingbah ka lyngdoh ia ka synduk ka jutang lyngba ka Jordan ka long ba ha ka jingialehtma ki jong U Trai, ka wah Jordan kaba la shlei

lypa da ka um, kan ieng kum ka kynroh 'shipor' ban ioh ailad ia ka jingjop. Hadien kata ka dei ban hiar biang kumba mynshuwa. "Ka Umbah umsan kaba la long lypa ka jingeh, kan 'kynran shipor' tad haduh ba ki lyngdoh jong U Blei ki la lah pyndep ia la ka kamram ba la hukum da U Blei ia ki".

Ka jingjopthma ka balang ka shong shibun eh ha ka rukom ba ngi sdang ia ka. Ym baroh ka jingialethma ba la ialeh ha ka kyrteng U Jisu Khris ka ban wallam ia ka jingjop. Ki nongialethma la ki stad bad ki khlaif katno katno ruh, kin ym jop ia u soitan bad ki nongbud jong u, lada kim sdang ia ka jingialeh da ka jingngeit. Ka jingjopthma namarkata, ka shong eh ha kaba kumno ngi sdang ia ka. Shisien haba "la bakla na bsdang, kaba ha'ien ruh ka la bakla lut".

Ban ialeh ia ka thma ba kynja mynsiem, ngi dei ban pyndei naba sdang ia ka jingngeit jong ngi sha U Blei. Kane ka jingngeit kaba U Blei u la dep ai lypa ha ki riwngait ka long tang ma ka ka rukom pyniaid thma khreh thma ban sdang ia ka jingialeh. Da kane ka jingngeit ngi hap ban wad ia U Blei, ban kylli na u, bad ban ioh ia ka jingaibor na u. "Hynrei nga, ngan da wad ia U Blei, bad ha U Blei ngan da aiti ia la ka kam : uba leh ia kiei kiei kiba khraw ki bym lah it shuh ; ia kiei kiei kiba phylla bym lah niew" (Job 5 : 8, 9).



U nongthoh sha ki hebru u la dep batai kham bha, ka jingngeit ka long kaei? "Te ka jingngelt ka long kata ka jingsagewskhem ia kita kiei kiei kiba ngi kyrmen, kata ka jing-tynjuh ia kita kiei kiei ki bym iohi" (Heb 11 : 1).

Ka jingngeit ka long ka 'atiar' kaba kordor tam na ki atiar baroh. Ha ka 'jingkieng atiar', la ki don bun jaid ki atiar, pynban dei tang da ka 'jingngeit' ba u 'riewialeh thma' u dei ban 'pynkhreh' nyngkong eh. Ha ki por ka jutang barim, ki briew ki jong U Blei ki la pyn-donkam tang da ka jingngeit. U Blei u la sngew-bha eh ia ki. Kumta u la ai ha ki ia ka jingjop. Kine ki por kiba ngi im mynta ki long ki por jong ka 'jutang ba thymmai'. Ki long ka "la jong U Mynsiem Bakhuid". U Blei u la theh mynta khambun ia ka jingaiei ha ki briew kiba la jied jong u. Lada U Blei u la leh ia ki 'kambah' ha ki por ka jutang barim, kaba katno tam lei lei mynta. Oh! U Blei un kham leh ia ki 'kambah' mynta, namar U Khun baieit eh jong u U Jisu Khrist U nongpynim ka pyrthei u dangim ha neng. Dei tang haba don ka 'jingialeh' bad ka 'jingeh' ba U Blei u leh ia ki kambah. Ha bym don ka 'jingialeh' bad ka 'jingeh' U Blei um ju leh ia ki kambah.

Ngi lah ban ong ruh ha kawei pat ka rukom, ba ynda haba u briew u la poi ba ka 'kut lad', hangta U Blei u leh bad u pyn-paw ia ka 'Bor Blei bym ju shah jop'. U

Blei um julpyni ia la ka jong ka bor, katba u briew u dang shaniah halade. Dei tang yeda haba ngi ta shaniah let ha ka. jingiarap, bad ka bor ka jong U Blei bad ngeit ha ki kular, jong u, ba ngin sa iohi ia ki kambah ki jong U Trai.

U nongrwai Salm namarkata, um shym pytta lehnohei ia kine ki ktien. "Lah kaba ngeit ha U Trai ban ia kaba shaniah ha u Briew, Lah kaba ngeit ha U Trai ban ia kaba shaniah ha ki bakhraw batr." (Salm 118 : 8, 9).

Ki kambah jong U Blei haduh mynta kim pat wai. Kumba ka la long ha ki por kiba mynabarim, ki kambah jong U Blei mynta ki long Sawjald. Kita ki long:—

1. Ki Dak khyllah,
2. Ki jingjia ba itieng.
3. Ki kam ba phylla.
4. Ki khubor ba bha.

Nga khot mynta ialade bad ia phi ba ngin iapyntrai kam noh mardor ia kane ka jingngeit. Ngin rung mynta hapdeng ka jingraleh tang da ka jingngeit. Ngin ym sheptieng ia ki nongshun. U Blei u don ha ka liang jong ngi. U Blei u la pynkhreh lypa ia ka jingjop ban ai, noh ha ngi. Kum u shakri barit jong U Trai, nga don ban pynkynmaw ia phi da ki ktien U Mynsiem U Blei uba la kren da u Jehasid ha u syiem Jehoshaphat hapdeng ka jingiasenglang :

"Phim dankam ban ialeh ha kane ka thma-  
to buh beit ialade, to ieng thik, bad khlai  
ia ka jingpynim U Trai bad phi ko Judah  
bad Jerusalem: Wat shepteng, lymne khawet  
to khie lashai ban ialeh ia ki namar U Trai  
u long lem bad phi" (2 Khro 20: 17).

U Trai Jisu u kwah ban ai ha nga bad  
ha phi ia ka jingngeit bad ba ngin pynrei  
kam ia ka ha ka jingkyntang bad da ka  
jingpynkyntang lut ialade. U kwah ba ngin  
shim ia ka kum ka jingai ba kordor. Kaba  
kum kaei shuh ba ngan batai ia ka jing-  
ngeit. "Ka jingngeit" ka long kaba trei kambah,  
kaba khlaii ka ka jingiap, kaba lah ban pyn-  
kynriah noh ia ki lam, kaba iashem iak ynduh  
ia U Blei ha ka jingieit sha ngi, kaba ia-  
pein ia ka jingiap da ka jingim bad kaba iapein  
ia ka jingim da ka jingiap."

Dei da kane ka jingngeit ba ki briew ki  
jong U Blei ha ki por kiba la leit noh, ki  
la jop noh ia ki thma, "Ki la leh ia ka bok, ki  
la set ia ka shyntar ki sing, ki la pynhp  
ia ka bor ka ding, ki la lait na ka syrti  
waitlam, ha ka jinglot la ai bor ia ki, ki  
la nang ioh bor ha ki jingialeh thma, ki la  
pynphetiap ia ki paitiapom jong ki nongwei,  
ki kynthei ki la iohpdang ia ki balap jong  
ki da ka jingpynmihpat; hyndrei ia kiwei  
la pynshitom eh, ba kim treh pdang ia ka  
jingpyllait; khang ba kin ioh ia ka jingpyn-  
mihpat ba kham lha, hyndrei kiwei pat ki la  
ioh ka jingtyjuh da ki jingkhie bein sa  
bad ki jingsympat, shisha nalor kata, da ki

jingkhum bad ka jingset byndi : la lynthem maw ia ki, la ot arliang da ka kurat ia ki, la pynshoi ia ki, la pyniap ia ki da ki waitlam ; ki la ia id kylleng ha ki snieh langbrot, bad ha ki snieh blang ; kiba kynduh, ia kiba la pynshitom sat, ia kiba la leh beifi (ia kiba ka pyrthei kam bit ban ioh), ki da ia id sakma ha ki ri khlaw bad ki lum, bad ki krem bad ki thliew ka khyndew. Te kine baroh, haba la phla ia ki da ka jingngeit jong ki, kim shym ioh pdiang ia ka ta ka jingkular : ba U Blei u la khreh lypa shaphang jong ngi ia kaei kaei ruh ba kham bha, khnang ba khlem ma ngi yn ym ioh pynjanai ia ki" (Heb 11 : 33 - 40).

Ka long kaba phylla mynta ruh ba ma ngi ruh kum ki shakri U Blei ba ioh pateng ia kane ka jingngeit, ngin pyndonkam neh ia ka ha kaba shakri ia ka kyrteng bakhuid jong U. Oh ! da ka jingngeit ngin ieng, da ka jingngeit ngin tur sha ka jingialeh bad da ka jingngeit ngin jop. "Naba mynta ngi im, lada phi ieng skhem ha U Trai" (Thess 3 : 8).

Kine ki sngi kiba ngi im mynta ki long ki sngi jong ka jingjied. U Blei mynta un jied ia uno uno u briew ne ka briew, kiba un da pyndonkam kham bha ia ki na ka bynta la ka jong ka burom. Ngin ym lah ban trei bad sei soh shibun ba ka jingim bad ka jing-trei jong ngi, lynda U Blei u da jied ia ngi. Hooi, ka jingtyrwa bad ka jingkwah jong-ngi ban trei ia ka kam U Blei ka long da kawei. Hynrei nga ong shai ruh ba haba

U Blei u da jied ka long da kawei pat. U Blei mynta un jied noh tang ia ki briew kiba khuid ka dohnud. U Jisu Khrist hi u la ong : “Suk kiba khuid ha ka dohnud : naba kin iohi ia U Blei” (Math 5 : 8).

U Blei un jied ia ki briew kiba ka dohnud jong ki ka long beit bad U. Ngim lah mynta ban jied ia U Jisu. U Jisu Khrist um dei u ‘Riewtad<sup>o</sup>’. Ngim lah ban pyn-iaryngkat ia U Jisu Khrist bad kiwei pat ki briew ne ki kyrtong ialeh Elekshon. Ngim lah ban pynsyriem ia U Jisu Khrist kum u ‘Nongmihkhmat’ sha kano kano ka dorbar thaw aiñ. U Jisu Khrist u la dep batai ha ki synran kumno u la dep jied ia ki haba u ong : “Phi phim shym la jied ia nga, hyn-rei nga nga la jied ia phi, bad nga la thung ia phi ba phin ioh iai leit bad seisoh, bad ba u soh jong phi un ioh iaineh; ba kaei kaei ruh ba phin pan na uta U Kpa ha ka kyrteng jong nga, un ai ha phi” (Ioan 15:16).

U Blei um ju shah ia ka balang ba kan shah jop ha ki nongshun jong ka. U Jisu Khrist shuwa ba un kiew noh sha bneng, u la dep ai lypa ia ka kular kaba sngewieit bad sngewthiang : “Ha khmih ruh nga nga long ryngkat bad phi ha la ka sngi haduh ka bawai noh ka pyrt<sup>h</sup>ei” (Math 28 : 20). U Blei un ym shah ruh ba ha ka Balang kin don ki nongshetkyl<sup>l</sup>a. U Blei um ju kwah ba ka Balang kaba dei ban nangjop, kan shahjop pynban tang namar ki “nongshun

kiba napoh". Oh! ki "nongshun napoh iing," ki kham' shyrkhei ban ia ki "nongshun' nabar iing". Ka kam U Blei ka dei ban iaid. Ki "sha-ka" jong'ka "kali" kim dei ban, sahkut' ha ka dew ktieh. U Blei un "jynrat noh" ia ki nongshun napoh iing. U Blei um ju "sngew bha ba ia ka kam U Blei yn pynduh, yn pynwit, yn pynkulmar, yn pynthut. Ki briew ki jong u, kiba u la dep jied u la dep thung ba kin ioh iai leit bad seiso, kim dei ban "ud shuh", kim dei ban "iam sngewsih shuh", kim dei ban "leh bynhiaw shuh". U Blei um ju mon ba yn don mano maro ki ban long "diengpynkiang" ia ki briew kiba la sleh kiba dei ban trei dep ia ka kam jong u. "Ban pynbakla ia u briew ha ka kam, U Trai um sngewbha". Kumjuh ruh ngi kynmaw na ki jingiathuhkhana ka Ktien U Blei kumno ba U Blei u don borabor ha ka liang kiba 'la jied jong u. "Um shym la shah ia uho unoban leh sniew ia ki: u la sneng ia ki syiem ruh namar jong ki, U da ong, wat ktah ia kiba 'la sleh jong' nga, bad wat pynsniew ia ki nongiathuhlypa jong' nga" (I Khro 16:21,22). "Naba uta uba ktah ia phi' u ktah' ia ibriew khmat jong u" (Sekh 2:8).

"U Blei ha kine ki spgi u trei na ka rukom kaba phylla bad maian, lyngba ki briew kiba la jied jong u khnang ba un ioh pynpaw ia ka burom bakhrav jong u, ha khmat ka pyrtiei."

Lada ki, briew ka; balang kim tip lei ei shaphang kane, na, jingtrei kaphylla jong (U

Blei, hynrei U Blei un iathuhlypa da ka jing-  
ithuhpaw ne da ka jingphohsniew ha kiwei  
khnang ba kin tip ia ka "jingthmu kaba  
radbah" jong u kaba un leh noh kham kloi.  
Ka la don shisien kaba kum kata ka rukom  
jingleh baphyl'a jong U Blei ha ka por U  
Gideon ia kaba ngan iathuh biang mynta  
kumne :—

"Ki Midian te bad ki Amalek bad ki  
khun mihngi ki la iathiah ter lter ha ka them  
ha ka jingkheifn kum ki puit; bad ki ut jong  
ki ym lah niew shuh, byllien kum u shyiap  
harud duriaw. Te ynda U Gideon u la wan,  
ha ktmih, la don u briew uba iathuh ia la  
ka jingphohsniew ha la u lok, bad u la ong, Ha-  
kkmih, nga la phohsniew kumne. Uwei u kpubaril  
u tyllun sha u paitiapom Midian bad u la  
poi ha kavei ka iingjaiñ, bad u la pakhuh  
ia ka haduh ba ka la ngat, bad u la pynkylion  
khongpong ia ka, ba kata ka Ingjaiñ ka  
jot noh thiaw. U lok jong u te u la iathuh  
bad u la ong, kane kam long ei ei hynrei  
tang ka waitlam. U Gideon u khun u Joash,  
u rangbah na Israel; ha ka kti jong u U  
Blei u la ai noh ia ki Midian bad ia u  
paitiapom baroh" (Nongbi 7 : 12 - 14).

U 'Nongialam' ha ka jingialeh ba kynja  
mysiem um dei ban long uba synrop myn-  
siem bad u bymneh. U donkam ban pynkyr-  
men ia ki nongbud jong u da ka 'nuksa'  
kaba u don halade, da kata ka 'jingkyrmen'  
ba u buh skhem kum ka 'angkor' ba neh den ha  
U Blei. "Namar na ka bynta kane ngi trei

bad ngi ialeh, naba ngi la buh ia la ka jingkyrmen ha U Blei uba im, uba long U Nongpynim ia ki briew baroh, khamtam ia kita kiba ngeit" (1 Tim 4 ; 10).

"Kumba phi iatip kumno ngi la leh ia uwei pa uwei na phi, kum u kpa ia ki khun jong u hi, ngi kyntu ia phi, ngi pynshur ia phi, bad ngi kyrpad ia phi, khnang ba phin laid kumba dei biang ia U Blei, uba khot ia phi sha ka hima bad ka burom jong u" (1 Thess 2:11).

Ka jingkyrmen kam long marwei. Ka jingkyrmen bad ka jingngeit ki ia long shipara ha U Trai. "Namar ba ka jingkyrmen la pynim ia ngi: hynrei ka jingkyrmen ia kaba iohi kam long ka jingkyrmen: namar ia kata ba uno uno ruh u iohi, kumno u kyrmen pat ia kata? Hynrei lada ngi kyrmen ia kata kaba ngim iohi, te da kaba iaishah ngi khmih lynti ia kata" (Rom 8:24 25).

U Blei um ju kwah ban pynsahteng, ban pynsahnud, ban pynsgewbuhkhoh ia kiba ngeit bad shanjah la u. Namar ba ngi la buh lut ia ka jingkyrmen da kaba wad ia ka hok U Blei, un ym pynraiñ buhkhoh. Oh! ha kawei ka sngi, U Blei un sa pynthiang pyntang ia ka jingkyrmen da ka lyn-ti kaba un ialam ia ngi sha ka jingthmu ba hok jong u. Ka ktien U Blei kan pynshisha da ka kam kaba U Blei un trei hapoh ka sngi. "Ka jingkyrmen ba la pyntud ka pynpang ia



**ka dohnud: hynrei haba ka jingkwah ka la  
poi ka long u dieng ka jingim" (Prob 13:12).**

**Ka jingjop kaba U Blei u la pynkhreh  
ban ai, kan ym wan ruh khlem ka jingshah-  
jop. Ka jingshahjop ka long ka "kynja jinghi-  
kai Blei" ba Uba najrong u ai ha u briew,  
khnang ba un ioh it ialade, pynbeit ialadei  
bad pynkhlañ pat ialade. Ym ju don uno uno  
u briew ha ka pyrthei uba shu jop sah.  
Ba u shakri jong U Blei un ioh ka jingjop  
kaba kham donburom, u dei ban shahjop  
ha kaba nyngkong. "Ka jingshahjop ynda ka  
la pynstad pynproh ia u nongialeh, kan pyn  
phai wak ia u hadien sha ka jingjop kaba  
kino kino ki nongialeh pyrshah jong u kim  
ju poi pyri hat. Bun kiba ju ibeiñ bad ñiew-  
beiñ ia u ha kaba nyngkong, kin sa 'sngew-  
lyngngoh' katta katta bad "kyndit" ruh ia ka  
jingroi bad ka jingjop jong u pat hadien.  
"Wat ap thap, ko me u bymman, ia ka  
jaka shong jong uba hok; wat lute ia ka  
jaka shongthait jong u, naba hynñiew sien u  
hap u babok, te u ieng pat: hynrei ia u  
bymman la pynkyllon da ka jingjynjar"  
(Prob 24 : 15,16).**

**"U Trai u kyrshan ia kiba kyllon baroh,  
bad u kyntiew ia kiba la pynpoh baroh" (Salm  
145 : 14).**

**U Jisu Khrist pat u la dep iathuhlypa  
shaphang ka jingpynksan ia ki riewngeit kiba**

dang wan mih hadien, “Hynrei shibun na kiba long shuwa kin long khadduh; bad kiba khadduh kin long shuwa” (Math 19 : 30).

**Ka jingjop hapoh ka sngi ka long ka jingjop jong U Blei hi. U briew um don hok ban shim ia ka burom halade, wat lada u la jop ia ki nongshun jong u; namar ka jingjop kam dei ka jong u, hynrei ka long na U Trai. “Ia u kulai la khreh hamar ka sngi ba ialeh thma: hynrei ka jingjop ka long na U Trai” (Prob 21 : 31).**

U ‘nongpop’ um dei ban klet ban ai ka burom tang sha U Blei baroh ha ka jingduwai ainguh jong u. “Ka jong Me, Ah Trai, long ka jingkhraw, bad ka bor, bad ka burom, bad ka jinglah, bad ka jinglongsyiem... ka jong me long ka hima, Ah Trai, bad la kyn-tiew ia Me kum u khlieh halor baroh.. bad ha ka kti jong me long ka bor bad ka jingskhem, bad ha ka kti jong Me ka long ban pynkhraw, bad ban aibor ha baroh. Mynta namarkata, Ah U Blei jong ngi, ngi nguh ia Me, bad ngi iaroh ia ka kyrteng ba donburom jong Me” (1 Kbro 29 : 11 — 13).

Ha ka jingialehthma bakynja mynsiem jong ngi ki khristan pyrshah ia ka bor u soit, ngi dei ban ialeh tang ha ka ‘kyrteng U Trai,’ bad tang da ka kyrteng U Trai. Ka kyrteng U Trai ka long ka badonbor ban pynjop thma ia u riewngeit. Ki khristan ba-

roh kiba la ioh ia ka jingjop ha ka diengphna U Jisu Khrist, ki dei ban ialeh tang ha ka 'kyrteng Kalbari'.

"Ka kti jong U ka khlaiñ,  
 Ka waitlam ruh la kieng;  
 Ki nongshun la ki shait,  
 Ban peit sha U ki tieng;  
 Ha U ngan rieh, Un da ia nga,  
 Ka buit ka dujok kan ym lah."

Ia ka jingjop hapoh ka sngi la pyntbikna ban ai ha u 'nongialeh' uba ialeh naduh ka mynsiem bad da ka dohnud baroh: "Te kaei kaei baroh kaba phi leh, ha ka ktien lane ha ka jingleh, to leh ia baroh ha ka kyrteng U Jisu uba U Trai, da kaba ainguh ia U Blei uba U Kpa da u" (Kol 3 : 17).

U 'Nongialeh' ha ka thma bakynja mynsiem u donkam ban 'iaishah slem' namar ba ka jingjop ka lah ban kham 'dier'. Ka ktien U Blei ka la dep ai ka jingpynshlur kaba kum kata: "Ha khmih ngi ñlew suk ia kita kiba iaishah: Phi la iohsngew shaphang ka jingiai-shah U Job, bad phi la iohi ia kata ka jingpynkut U Trai, ba U Trai u long uba dap da ka jingisynei, bad uba leh isynei thoiñ" (Jak 3 : 11).

Shuwa ba u 'Nongialeh' un ioh ia ka 'nam' 'nongjop,' un hap ban shah phrang ha ban da biang na U Blei. Ha lyndet jong kane ka 'jingphrang' ka don ka jingthmu barieh

U Blei ia u, kumba ka la jia ia u Job, myn-  
ba u da phla hok ia kata ka jingleh U Blei  
ia u: "Hynrei u ithuh ia ka lynti ba nga  
iaid; ynda u la tynjuh ia nga, ngan mih noh  
kum ka ksiar" (Job 23 : 8 — 10).

U 'Riewngeit' un ym long uba janai lym-  
da la 'phrang' ia u. Ka jingjanai ba u riew-  
ngeit un poi bad kot ha ka jinglong jingim  
ba kynja mynsiem kaba la 'shong dap rynieng',  
ka long tang ynda haba la 'phrang bha' ia  
u kum ka 'ksiar' ha ka 'ding'. Ka long leh-  
hohei ia ngi ban shu long khristan tang ha  
ka nam, khlem da iaid lyngba ka 'jingshah  
phrang' kaba jur. Dei namar kane ka daw  
ba U Jisu Khrist u la ai ka jingmaham ia  
ki khristan jong ka balang ha Laodikaia da  
kaba ong: "Nga pyni buit ha pha ba phan  
thied na nga ia ka ksiar ba la phrang ha ka  
ding, ba phan da ioh manspah; bad ia ki  
jalukup balieh, ba phan ioh kup ialade, bad  
ba kan ym paw kata ka jinglehraiñ ka jing-  
lyngkhuid jong pha; bad ia ka jingsleh khmat  
ban kyllan ia ki khmat jong pha, ba phan  
lohi" (Jingpyn 3 : 18).

"Ba, nga im ka long ba phylla,  
Ha ka lawarding ba thang;  
Te kham phylla ynda tynjuh,  
Mih na jynjar b'la pynphrang."

Ka jingsaindur ia ka jinglong jingim ba  
kynja mynsiem jong u 'Riewlaleh' ka long ym  
shuh tang ha kata 'phrang' hynrei ha kaba

'tylliat' ruh ia u. Lada ka 'lawarding jingtyn-juh' ka long da kawei pat, ka 'kor tylliat' ruh ka long da kumwei pat. Ka 'kor tylliat' jong U Blei ka long kaba ni katta katta. Un 'tylliat' ia ngi hapoh ka 'shalyntem' jong u haduh ba ngin da 'ni' ha ka jinglong jingim ba kynja mynsiem. Ka jingtrei kam jong ka 'kor tylliat' ka kham kordor ban ia ka 'lawarding'. Ka jingthmu bamaian jong U Blei kan trei kam namar ka jingkut jingmut baskhem jong u hi. \*Ngan kham pynkordor ia u briew ban ia ka ksiar ba la pynphrang, ia u briew keifi ban ia ka ksiar banyila ka ophir" (Isa 13 : 12).

U Blei un ai ia ka 'nam' 'nongjop' ha u 'riewialeh' ubi kwah bad angnud ban nang kiew ruh ha ka jinglong jingim ba kynja mynsiem. Un ai ia ka 'nam nongjop' ba un ioh deng ym tang ha pyrthei, hynrei ba un phong ruh ha bneng.

'Ha uba lah ha thyma,  
 Ka nam nongjop yn ai;  
 Ha khet U Syiem ka burom,  
 Un synshar ruh khlem wai'.

Ka "kyrteng U Trai" ka long kaba donbor ha ka thma. Ka don ka bor ban pynher krad ia u nongshun jong ngi. Lada u nongshun u khlaifi katno katno ruh, yn ym lah ieng ha ka kyrteng U Trai. Sngap! kumno u Dabid u la ong ia u Goliath u rangbah iapom ki Philistia.

"Me me wan ha nga da ka waitlam, bad da u sum, bad da ka stieh : nga te nga wan sha Me ha ka kyrteŋg U Trai ki pait, U Blei ki paidiapom ki Isreal keiñ, ia uba me la kren beiñ. Ha kane ka sngi keiñ U Trai un aiti ia me ha ka kti jong nga ..... ba ka pyrthei baroh kan ioh tip ba U Blei u don ha Israel" (1 Salm 17 : 45,46).

U Blei u la dep pynkhreh ban ai ia 'ka jing-jop ha poh ka sngi' tang lyngba u nongbud ba shisha jong u uba U Mynsiem Bakhuid u trei kyrhai bad shong dap ha u. U Blei un pynjrōng ia la ka kti ban kner ban iarap haba u briew uba shynrang mynsiem jong u u la mib. "Hato la pynlyngkot ia ka kti jong nga ba kan ym lah siewspah ? ne ngam don bor ban pyllait ?" (Isa 50 : 2).

U Blei un ym shah ia ka sngi ba kan sep, tad ynda u la jubab ia ka jingduwai ba paitdohnud jong u 'shakri' jong u. U Blei un 'pynkylla' ia ka jingiaid jong ka sngi bad u bnai, namar ba u la shahshkor ia ka jingkhōt kyrpad u 'atlar' jong u. U Blei un 'pynkylla' ia ka 'por' bad ka 'shiteng por' namar ba u la iohsngew ia ka jinglynñiar jong 'uba la sleh' jong u. U Blei un 'pynkylla' ia ka 'lyngwur' bad ka 'jingiaid lynti ki met bneng' namar ba u phuh samrkhie ha u riewngeit ba shisha' jong u. U Blei un ym shah ia ka sngi ba kan sep tad ynda u 'shakri 'baieit' jong u u la pyndep ia ka kam kyntang

ba la aiti ha u, U Blei un ym shah ia ka sngi ba kan sep namar ba ia ka jingjop la pan ha ka 'jinglyuniar' kaba wan sam ha ki tyn-dong shkor jong U Blei hi.

\*Ynda kumta U Joshua u la kren ha kata ka sngi ba U Trai u la aiti noh ia ki Amor ha khmat ki khun Israel, bad u la ong hakmat ki Israel, ko sngi, to phan ieng thik ha Gibeon, ma me ruh, ko bnai, ha ka them Aijalon. Te ka sngi ka la ieng thik, u bnai ruh u la sangeh, ha ban da u paidbah u la pynhiarkput halor ki nongshun. Ym shuh la thoh ia kane ha ka Kitab U Jashar? Kumta ka sngi ka la ieng thik hapdeng ka bneng, bad kam shym la kyrkieh ban sep kumba shi-sngi biang. Bad ym shym don ka sngi kum kata mynshuwa jong ka lane hadien jong ka, ba U Trai u la sngap ia ka ktien kyrpad u briew : naba U Trai u la ialeh na ka bynta ki Israel' (Josh 10 : 12 — 14).

Ka jingjop kaba U Trai u la pynkhreh ban ai hapoh ka sngi ia u 'Riewialeh' jong u ka long tang haba la pynthikna ba u nongshun un sa rem. U 'nongshun' u dei ban rem khnang ba ka jingjop kan wan. U Blei un wanrah ia ka jingjop da ki buit, ki lad bad ki lynti baroh. U Blei dalade hi un sdang ban 'pynkhih' ia ka 'thma' da kaba ai ia ka 'Siknal bneng' ha u nongbud jong u. Ka la jia shisien kumta ba U Blei u la ai ka 'dak' ha u Syiem Dabid mynba u la leit ialehthma

ia' ki' Philistia: "Te haba U Dabid u la kyl-li na U Trai, u la ong ha u, wat leit kiew hynrei leit sawdong na shadien jong ki, bad kyntur sha ki hamar pyrshah kita ki dieng bekaim. Te haba men iohsngew ka jingsawa kum ka jingiaid ha 'ki kljar jcng kita ki dieng bekaim, hangta te men pynkhih ialade namar haba kumta U Trai un leit mih ha shuwa jong me ia ka ban shoh pyniap ia u pait jong ki. Philistia. Bad U Dabid u la leh kumta, kumba U Trai u la hukum ia u; bad u la shoh pyniap ia ki Philistia naduh Geba haduh ka bapoi sha Geser" (2 Sam 5 : 23—25).

Ka jingjop kaba U Trai u la pynkhreh hapoh ka sngi ka long ka bym lah ban pynkylla. Uba dei ban shah ia ka jingrem un ym lait, wat lada u iasoh lok bad uba khlaibor. Wat lada arngut kin iateh lok ban ialeh ha ka thma, pynban U Trai un 'pyllait im' ia uba dei ban 'lait im', bad un pyniap ia uba dei ban 'shah pyniap'. Ka la jia shisien kumta ha ka jingiateh lok hapdeng u syiem Ahab uba long u syiem Israel bad u syiem Jehoshaphat u syiem Judah.

"Bad u syiem Israel u la ong ha U Jehoshaphat. Nga ngan pynpher ialade, bad ngan leit sha ka thma; hynrei men phong ia la ki jong ki jaiñ. Kumta u Syiem Israel u la pynpher ialade; te ki la leit sha ka thma. Te u Syiem syria u la lah hukum ia ki kapten ki kali iapom jong u, u ong, wat ialeh



ia u barit lane ia u bakhraw, hynrei tang ia u Syiem Israel. Te haba ki kapten ki kali iapom ki la iohi ia u Jehoshaphat, ki la ong, u dei u Syiem Israel. Namarkata ki la phai noh ban ialeh ia u hynrei U Jehoshaphat u la pyrta jam, bad U Trai u la iarap ia u; bad U Blei u la pynkhih ia ki ban leit noh na u .. Te uwej u briew u la wiat ia la ka ryrteh kumba pda lymbneng bad u la dei ia u Syiem Israel napdeng ki jingphong nar : Ynda kumta u la ong ha u Kashwan, pynphai ia la ka kti, bad ialam noh ia nga na une u paidbah, namar nga la mynsaw jur. Bad ka thma ka la nangjur ha kata ka sngi, hynrei u syiem Israel u shan ialade ha la ka kali ban ialeh ia ki syria haduh janmiet, bad u la iap hamar basep ka sngi" (2 Khro 18:29-34).

Ka jingjop kaba U Blei u la dep pyn khreh ban ai hapoh ka sngi ka long ka 'jingjop kalbari'. Ha ka jingjop kalbari, "ka burom jong ka diengphna" ka wan tap lut da ka bor bah jong U Mynsiem Bakhuid ha ka jingim jong u bangeit. Ki riewkhuid ba-roh kiba shim ia ka kyrteng U Jisu Khrist, kin ym pep ban jop ia ka thma pyrshah ia U Soitan. "Hynrei ki la jop noh ma ki ia u namar kata ka snam jong uta U khunlang-brot, bad namar kata ka ktien ka jingphla jong ki" (Jingpyn 12 : 11).

"La jop noh phar ia u byseiñ,  
La khongdong jat U Khrist la kheiñ;  
U Jisu 'Khrist U lah."

**Ha ka kyrteŋ U Jisu Khrist, ngin jop ia u Soitan bad ka kynhun bah jong U. Ha ka kyrteŋ U Jisu Khrist ngin jop ia ki jingeh kiba khanglad ia ngi, ngin weng ia ki diengpyngkiang kiba pakhang lynti, ki jingartatien, jingklusai bad jingduh jingkyrmen kin kynriah noh na ngi, ki lyoh iong kiba sdien hakmat kin phet noh ha ngi. Ha ka kyrteŋ U Jisu Khrist ngin iohi ia ka lynti babait kaba ap ia ngi ba ngin dang ia id shi por ha pyrthei ban pyngkut ia la ka jingleit. Ha ka kyrteŋ U Jisu Khrist, ngin pynieng ia "U Maw Ebeneser" harud lynti, theh ia ka umphniang halor jong u bad thoh ia ki dak da kine ki ktien; "Haduh kane U Trai u la iarap ia ngi" (I Sam 7:12).**

**Haleluia ! Iaroh ia U Trai !  
U Jisu u long U Trai !.**

**U 'nongiaphet thong' hadien ba u la ioh ia ka jingjop, u dei ban leit shimti ia ka 'bainong', ba U Blei u la pyngkhreh ban ai ha u. Haba U Blei u la pyngkhreh ban ai ia ka buskit, hato ngin ym leit shimti ia ka ? U Moses ha kaba kut sawphew snem, u iathuhkhana lyngkot ha u paidlang Israel ia ka 'bainong' kaba U Blei un ai hadien ki jingialeh bajur jong kaba jawsyep bad kaba jawssnam. "Hakhmih, U Trai U Blei jong Me u la aiti ia kata ka ri hakmat jong Me : To leit kiew, to shimti ruh ia ka, kumba U Trai U Blei ki kpa jong Me u la ong ha Me ; wat sheptieng, lymne duh jingkyrmen." (Deut 1 : 21).**

U B'ei u ithuh ia ka mynsiem jong u 'nongialeh' Un ym shah da lei lei ba ka sngi kan sep, tad ynda u shakri jong u u la pyn-dep shuwa ia ka 'kamkyntang' ba u la shaniah bad aiti ha u. Ha ka bakut jong ka jingialeh bad ka jingtrei shitom, ka don ka 'bainong.' Ka bainong ha bneng ka long kawei, hynrei ka bainong ha pyrthei iuh ka long da kawei pat. Ha bneng, ka don ka 'pansngiat' jong ka 'jingim bymjukut' ba uba ngeit baroh un ioh phong.

"Te junom duh ka sngi ba rang kan long,  
Pansngiat ioh ba kor ba phyrnai 'n phong;  
La buh shato, U Jisu, sha ia ngi,  
Ka jingsuk jai, Ah ! sha byneng kan mih.

Ha pyrthei pat, ka 'bainong' kaba U Blei u la pynkhreh ban ai ha u nongialeh uba trei shitom, ka long tang ban leh kmen ha U Trai, na ka bynta ki jingkyrkhu ba bun syrtap ba u ai ha ka liang jong kaba kynja doh, hynrei khamtam ha kaba kynja mynsiem. "Ka jingai babha baroh, bad ka jingai ba janai baroh ka long na jrong, kaba wan hiar ba U kpa ki jingsbai, bad uba ym don ka jingkylla shuh, lymne ka syrngiew kaba shat da ka jingkylla" (Jak 1:17).

Katba u bangeit u dang im ha pyrthei, u dei tang ban lehkmen namar ka bainong syrtok kaba wan na U nongai uba bha na-jrong. Kumta ong U Eklesiastis, 'Ngi tip ba ym don ei ei kaba kham bha ia ki, ban ia ka bn lehkmen .... bad pynsngewbha ialade ha ka jingtrei jong u baroh, ka long ka jingai

**U Blei**" (Ekle 3:12,13). Ka "**bainong**" ka wan ha ki briew kiba sheptieng ia U Blei, kiba ieit ia u da ka dohnud baroh, kiba sumar ia ki hukum jong u, bad kiba leh bad kohnguh ia ka **jingkyntu** U Mynsiem ban trei ban iai trei dep. "To trei dep noh ia ka jingpynim jong phi da ka jingtieng bad jingkhynñiuh : namar dei U Blei uba trei hapoh jong phi ia ka ban mon ruh bad ia ka ban trei, namar ka jingsngewbha jong u" (Phil 2:12,13).

Hadien ba u "**Shipai**" jong U Jisu Khrist u la jop ha ka thma, um dei ban klet ha kaba tei ia ka "**duwan**" jong ka "**jingainguh**" hakhmat U Blei. Um dei ban klet da lei lei ba ka "**thma**" ka long ka jong U Trai, bad ka "**jingjop**" ruh ka long ka jong U Trai. Ngi kynmaw na ka jingiathuhkhana kumno ba U Joshua hadien ba u la jop ia U syiem ka Ai, ba u la tei ia ka duwan, ynda la sep ka sngi. "Ynda kumta U Joshua u la tei ka duwan ha U Trai, U Blei ki Israel, ha u lum Ebal .... bad ki la ainguh ha'or jong ka da ki jingainguh thang ha U Trai, ki la kñia ruh ki jingainguh pyniasuk" (Josh-8:29-31).

Haba U Blei u la ai ka jingjop bad u la pyllait ia ngi ua ki suhsat, ki jingiyngjar bad ki jingshipa, ngim dei ban klet ha kaba ainguh ia U Blei. Bunsien kum ki briew, ngi ju kynmaw ia U Blei ha ka por ka jingjynjar, bad ngi klet noh shen pat ia ka jingleh bha jong u tang mar ialait na ka jingjynjar. Ka jingong kawei ka kyntien briew ka long kaba shisha.

“U Blei u la ai bad u la map, hynrei ki briew ki ioh bad-ki klet” (God gave and forgave, but men get and forget).

Ka jingjia ha ka jingim u Jakob mynba u la leit phet ia ka jingiaid lynti kaba shi-tom na Padan Aram sha Bethel, ka long ka jingpynkynmaw kaba donkam ia ngi ruh ki nong-iabeh ba kynja mynsiem. Dei ha ‘Bethel’ ba U Blei u la wanpaw ha u Jakob da kaba kular ban don ryngkat bad u, mynba u la ‘pho’sniew’ ia “ka jingkieng ba la thung ha ka khvndew, kaba ka khlieh jong ka ka da kot haduh ka bneng : bad ha khmih ruh ki angel U Blei ki da iakiew bad iahiar ha ka’ (Jen 28:12).

Hadien nangne U Jakob u la leit poi sha Shekhem bad u la iakynduh tang ka jingshah-jop suda. Ka daw jong ka jingshahjop ka long namar ba u la klet ia ka ‘Bethel’ kaba long ka jaka ha kaba U Blei u la pynpaw shisien ialade ha u. U la klet ia uta u maw ha uba u la pynlong syngkhlieh bad uta u mawbynna ha uba u la theh ka umphniang ha kliar jong u. U la klet ban kynmaw ia ka jinglong kata ka jaka kaba u hi u la ong : “Ah katno kaba shyrkhei kane ka jaka ! Ym don hangne hynrei tang ka ing U Blei hi, bad kane ka long ka khyrdop ka bneng” (Jen 28 : 17). Namar kane ka jingklet, U Blei ha ka por ba u khot ia u Jakob ban mih noh na Shekhem, u la pynkynmaw pat biang ia kata ka jingkyrkhu ba kynja mynsiem, kaba u Jakob uba la sugaw-

thait bad sngewlywait ha Shekhem, u lah ban mad biang' ia ka sa shisien ha Bethel, bad ada un leit shong sah hangta. "Ynda kumta U Blei u la ong ha u Jakob, to mih noh, to leit kiew sha Bethel, bad to shong sah hangta, bad to da thaw ia ka duwan hangta ia uta U Blei uba la paw ha me, mynba me la phet iap na khmat u Iso u hynmen jong Me" (Jen 35 : 1). Kloi lan, u Jakob u la kohnguh kumba U Blei u la hukum ia u.

Ha ka por ba u Jakob u la leit kiew sha Bethel, u la thaw hi ia ka duwan. "Kumta u Jakob u la poi ha ka Lus, kaba ha ka ri Kanaan, kata kaba long ka Bethel, ma u bad kita ki brierw baroh kat kiba la don bad u .. Bad u la tei ia ka duwan hangta, bad u la khot kyrteng ia kata ka jaka EL-BETHEL: namar ba hangta U Blei u la paw ha u, mynba u la phet iap na khmat u hynmen jong u" (Jen 35 : 6,7).

Ka Bethel u Jakob ka dei ban kren ia ka "Bethel jong nga ruh" kum u shakri barit jong u.

Ka Bethel ka long ka jaka shong sah kaba bit eh ia u nongialap. Dei ha 'Bethel' ba u shakri jong U Blei u dei ban ioh ka jingithuhpaw kaba thymmai shaphang ka "Diengphna U Khrist". Ka 'Bethel' ka long ka jaka sangeh jong ka kali iapom jong u, haba u mut ban nang tur bad pyniaid shaphrang ia ka kam ialap. Ka 'Bethel' ka long ka jaka ha kaba ki ummat sngewsih bad ki ummat jingkmn ki latuid lang ban pynmih

ia ka jingknia ainguhthang kaba pdiang hua hakhmat U Blei. Ka 'Bethel' ka long ka jaka na ka kaba la sdang ka jingkyrkhu kaba nyngkong eh. Ka long ruh ka jaka na kaba un sa ai ia ka jingkyrkhu kaba ar. Dei ha 'Bethel' ba ngin shong sah, khnang ba lah ban tei thymmai ia ka longiing longsem bad ka long niam lehuam kaba shisha. Dei ha 'Bethel' ba ngin lum pat sa shisien ia ka "BOR JING-NGEIT" bad ka "BOR MYNSIEM" ban shakri ia U Trai."

Ka jingiaid lynti u Jakob 'Na Padan aram sha Bethel' kan ym lait ban 'urlong' ruh ha ka jingim jong ngi. Hangne ka don 'ka kti U Blei' kaba pyniaid ia ka jingim jong uwei pa uwei uba la jied jong U Blei. Lada ka long kumno kumno ruh, ka 'Bethel ba kynja mynsien' ka dei ban shon jur ia ngi, ba ngi dei ban iohipaw pat ia ka sa shisien bad ban mad pat ia ka jingkular bathiang U Blei ia ngi, ia kaba nga la dep kren shisien ha ka 'Poitri' 'Na Padan Aram sha Bethel' shaphang ialade ruh.

"Ka jingphohsniew ia ka jingkeing,  
 Ka wan paw pat ha nga;  
 HapJeng ka wah, U SIMPYLLIENG,  
 KO ! EL-BETHEL ! —MA PHA !"

Ha kaba wai noh, ka jingim jong uba ngeit bad uba la jied jong U Blei, kan ym duh la ka nong, lada ka long ha ka pyrtbei 'mynta' ne ha kata ka 'ban sa wan'. La ka long ka jingiaid lynti kaba 'sngewsih' bad ha

**'shipa'** kan kut ha ka **'DIENGPNA KAL-BARI'**, ia kaba nga la phawar teng ha ka Poitri shaphang kane ka **'jaid lynti'**: **'Na Padan aran sha Bethel'**.

"Jingiaid lynti khadduh ka sdang,  
Na la ka ling ngan mih;  
H'u lum jingtep ia ki bathiang,  
Syntiew ngan buh, kin mih".

Ka jingim jong kiba la jied jong U Blei, ka dei ban **'sdang'** na ka diengphna bad **'kut ruh'** ha ka diengphna. **'Khlem diengphna, khlem pansngiat'**. Ka jingjop hapoh ka sngi kan wan tang haba u riewngeit u la duwai slem ban **'ud'** bad **'iam'**, da kaba shim ruh ia ki **'kular bathiang, jong ka Ktien U Blei, katba nang duwai bad iaiduwai. Ha kaba khadduh, KA DIENGPNA KAN PAW BAD TAP LUP IA KA LONGRYNIENG JONG U.**

**'Ka jingpynpaw U Blei ia ka 'burom jong ka diengphna' ha ka jingim uba ngeit ka long ban 'dawa pat' na u ia ka 'jingkñia' ha kaba pyndonburom ia ka kyrteng bakhuid jong u. U Blei u dawa ia kane ka 'jaid jing-kohnguh' kaba shisha. "Uta uba ai ka jing-kñia ka jingainguh u pyndonburom ia nga; bad ha uba pynbeit ia la ka jingiaid ngan pyni ia ka jingpynim U Blei" (Salm 50 : 23).**

Ka jingsbah U Khrist ka kren lyngba u nongrwai shemmysiem kumne :—



‘Wat ai, Ah Blei, ngan sngewsarong,  
 Lait tang ha ka jinglap U Trai;  
 Jingpah pyrthei ia nga ba rong,  
 Ha snam jong u Jingkñia ngan ai.

U Blei um ju sngewbha da lei lei ba kito kiba dei ki jong u, kiba u la leh bha eh kyrpang, ba kin klet noh ruh ia ka ‘jingkular’ kaba ki ‘lah khlei’ ha khmat jong u. Dei namar kane ba ka ktien U Blei ka la maham da kaba sneng jur ia ngi. “Haba me smai ia ka jingsmai ha U Blei, wat pyntud ban siew ia ka; namar um don ka jingsngewbha ha ki babieit: siew noh ia kata kaba me smai. Lah ba men ym smai, ban ia kaba men smai bad ban ym siew” (Ekle 5:4,5).

Kumjuh ruh U Blei un da sngewbha eh lada ngin pyndep noh ruh ia kata ka jingleh da ka mon sngewbha hi. Ka ktien U Blei ka ai ka jingkyntu kaba sngewieit ia ngi: “Te mynta to pyndep noh ruh ia kata ka jingleh, ba kat kumba la don kata ka jingsngew la kloi ia ka ban mon sngewbha hi, kumta ruh kan don ka jingpyndep noh na kata kaba phi don. Namar lada don lypa kata ka jingsngew la kloi, la pdiang sngewbha ia ka kat kum kaba u briew u don, ym kat kum kaba um don” (2 Kor 8:11,12).

**“KHAMBHA KA JINGPYNDEP KAEI  
 KAEI IA KA JINGSDANG JONG KA”  
 (EKLE 7:8).**

## KA JINGIALAP HAPOH KA SNGI

Ka jingialap ia ka gospel ka long ka kam iap kam im jong ka balang. Uwei pa uwei u shakri jong U Jisu Khrist u dei ban pyndep hok ia ka jingialap ktien Blei, ha khmat ka sngi ha khmat u bnai, kat kam ka jingaiei ba U Blei u la sam bynta ha u. Namar ba ka jingim briew ka long kaba lyngkot, bad ba ka por ka thmoin eh, u nongialap u dei ban pyndep kloï ia ka, kumba U Blei ruh un sa pan jingkhein na u ha kawei ka sngi. Sngap! aiu ka ktien U Blei ka iai kyntu jur: 'To men ialap ia kata ka ktien, to iai minot haba dei por, ha bym dei por de; to pynkynduh, to sneng, to kyntu da ka jingshahslem baroh bad ka jinghikai. Namar ka por kan jia haba kin ym shah shkor ia ka jinghikai bajanai, hynrei haba ki don ki shkor ba dait, kin pynphai noh ia la ki shkor jong ki na ka jingshisha, bad kin phai khmat sha ki puriskam" (2 Tim 4:2-4).

"Mynstep bet ia la u symbai, bad la janmie wat pynsangeh ia la ka kti: namar mem tip uno u ban manbha, une ne utai, lane kin isbha baroh ar' (Ekle 11:6).

U nongialap u donkam ban 'ri' bad 'sumar' ia ka 'BOR MYNSIEM'. Ka don ka jingma ba na kano kano ka pop ba u nongialap u leh, U Mynsiem Bakhuid u kloï ban iehnoh na ka 'templ' ka met jong u nongialap, lada um

'pynkyntang' bad 'sharai duwai'. U syiem Dabid mynnor u la 'syier' bad 'sheptieng that' ioh tang namar kano ka pop lait ka pop let, un duh noh ia U Mynsiem Bakhuid. Kumta shisien u la duwai da kaba iam kthang : "wat bret noh ia nga na khmat jong me ; bad wat shim noh ia la U Mynsiem Bakhuid na nga" (Salm 5 1:11).

Ryngkat bad kaba 'sumar kyndong' ia ka 'BOR MYNSIEM', u nongialap um dei ban shah ia ki jingpynwit ba kin khang lynti ia u, ha kaba pyniaid shaphrang ia ka kam lalap, kumba nga la phawar shisien ha ka poitri 'Na Padan 'Aram sha Bethel'.

"Ka jingialap ka Gospel nang,  
Pyniaid, pyntur shaphrang;  
Ki jingpynwit wat shah kin khang,  
Sh'wa ba U SLAP un rang".

Ki briew bad ki kynja bynriew baroh ha kiba la pynsngew ei ia ka ktien U Blei, kin sa wan ban dem ha ki kjat U Jisu, namar "ba ha kata ka kyrteng U Jisu ka khohsjew baroh kan ioh dem khrup, ki jong kiba ha ki bneng bad ki jong kiba ha ka khyndew bad ki jong kiba hapoh ka khyndew keifi, bad ba u thylliej baroh un ioh phia shynna ba U Jisu Khrist u long U Trai, ia ka ban pyndonburom ia U Blei uba U kpa" (Phil 2 : 10,11).

Lada ia ka 'jingithuhpaw' la ai hapoh ki 'pud sawdong' kiba skhem, ia ka 'jingialap' ruh dei 'ban pyndep noh klot' hapoh ka

'por' bad ka 'jaka' ba la buh. U Blei u la dep pynkhreh lypa ia ki briew sha ka jingpynim: "Te U Trai u la ong ha U Abram, hadien ba U Lot u la khlad noh na u, To khmied mynta ia la ki khmat, bad to khmih ruh na kata ka jaka ha kaba me don shaphang shatei, bad shaphang shathie, bad shaphang mihngi, bad shaphang sepngi: Naba ia kata ka ri baroh katba me iohi, ngan ai ha me, bad ha u symbai jong me ha la ka rta" (Jen 13 : 14, 15).

"Bad u la lum ia ki na kita. ki ri, na mihngi, bad na sepngi, na shatei bad na shathie" (Salm 107 : 3).

U 'nongialap' um don 'nongsakhi' ban 'sakhi' ia ka jingialap kaba u la pyndep hapoh ka sngi, lait tang U Blei marwei hi. "Namar U Blei u long u nongsakhi jong nga" (Phil 1 : 8). Ki nongpop baroh kiba la iap ha ki pop bad ki jingryngkang, ki dei ban 'kylla kaba mut' katba dang 'pynsngew' bad 'iathuh' ia ka khubor ka jingpynim. "Namar na ka bynta kane khnang la ialap ia ka Gospel ha ki baiap ruh, ba yn ioh bishar ia ki shisha katba kum ki briew ha ka doh, hynrei ba kin ioh im katba kum U Blei ha ka mynsiem" (1 Pet 4 : 6).

Ka kamram u nongialap ka long ban kohnguh ia ka hukum U Jisu Khrist uba la ong: 'Phi la pdiang ei, phin ia aiei' (Math 10 : 8). 'Uba ai' un ym duh ia ka jingkyrkhu kaba

syrtok na U Blei. Kumjuh ruh 'uba pdiang' un ioh jingmyntoi lang. "Uwei pa uwei baroh kat kumba u la pdiang ia ka jingai, kumta keiñ un sam ia kata paralok hi, kum ki Sordar babha ka jingaiei ba bunjaid U Blei" (1 Pet 4 : 10).

Balei te ba ngin ym ai ei ha kiwei ruh haba ngi la iohpdiang na U Blei? Ha ka jingiadei bad kane ka 'jingphylla ba maian Blei', ngan buh ia ka jingthoh ha ka ktien khasi ia ka jingbatai ha ka Dikshoneri Baibl, \*'The New Bible Dictionary'. "Ha ka jingshem mynsiem kaba iadei bad ka 'jingaiei', ia ki kam jong u briew la ai ka jingñiewkor kaba thymmai bad ki kylla long kiba kordor shuh shuh. La pyndep ia ki na ka bynta ka 'KYR-TENG'. Ha ka jingpyndep ia ki ha kane ka bynta, la kyrkhu laisien. Uta uba trei, ia u la kyrkhu ha kata ka jingpdiang ia ka jing-aiei bneng ban pyndep lyngba ki jingtrei shitom na ka bynta ka burom jong U Blei. Kito pat kiba iohpdiang ia ki soh jong ki kam kiba kum kita ba la leh ha ka mynsiem kaba thymmai bad da ka jinglong kaba thymmai, ia ki ruh la kyrkhu; bad ha baroh ia U Blei hi la pyndonburom. Ka kam kaba kum kata la leh 'ha' bad 'na' ka bynta U Trai. Ha kane ka rukom, u briew u kylla long 'u Sordar ki jingmaian U Blei'; bad u shakri jong u paramarjan jong u. Ia ka jingjanai jong ka 'jingngeit' u briew la pyushisha ha

ka bakhadduh da ka jinglong jong ki kam ki jong u. Pynban ha kaba khadduh ka jingpdiang ia u 'Riew trei shitom' kan long tang ka 'jingleh' jong ka 'jingalei kaba kynja bneng'.

Ha ka jingialap ia ka Gospel ka jingpynim, 'u nongialap' u donkam ban maham ia ki briew baroh ba ki dei ban kylla kaba mut.

'To kylla kaba mut; naba ka hima ki bneng ka ia jan' (Math 4 : 17).

'La pyndep ia ka Ia, bad ka hima u Blei ka ia jan: to phin kylla kaba mut, bad to ngeit ruh ia ka Gospel' (Math 1:15).

'Lynda phi kylla kaba mut, phi baroh phin jot noh kumjuh' (Louk 13:3).

Ka jingim briew ka long kaba lyngkot. Namar kata ngi dei ban niewkor katta katta ia ka. Dei ha ka rta jong ka jingim briew kaba lyngkot ba u nongpop u donkam ban 'kamal' bad 'kynshew' ia ka jingim bymjukut. Ia 'ka jingialap hapoh ka sngei', la dep thoh lypa ha ka ktien U Blei: "ka ktien jong uba ong, To pyrta. Uwei te u la ong. Ngan pyrta aiu? ka doh baroh ka long u phlang. bad ka jingitynnad jong ka baroh ka long kum u syntiew ka ryngkew: uta u phlang u iap tyrkhong, uta u syntiew u tlor noh; namar ka jingpyrsad U Trai ka beh halor jong u: da shisha u paidlang u long u phlang. Uta u phlang u iap tyrkhong, uta u syntiew u tlor noh: hyurei ka ktien U Blei jong ngi kan neh" (Isa 40 : 6 - 8).

“K’ei ka jingim jong u bynriew ?  
 Shibit shen, kan kynran noh;  
 K’ei ka jingim ? tang ka syrngiew,  
 Ynda kynran pat ym ioh.

Her, ko Mynsiem, her sha jerong,  
 Lei men iet ia ka pyrthei ?  
 Her noh nangne, wad ia la shnong,  
 Ka shnong khuid jong ki riwblei”.

Sa shisien nga iai ban biang ia ka jing-  
 kordor jong ka jingim. **Ka jingim ka long kaei ?**

Ka jingim ka long ka jingiaidlynti,  
 Ka jingim ka long ka jingiaphet,  
 Ka jingim ka long ka jingialeh,  
 Ka jingim ka long ka jingtrei,  
 Ka jingim ka long ka jingwad,  
 Ka jingim ka long ka jingiabeh,  
 Ka jingim ka long ka jingshah shitom.

Ia ka jingialap ktien Blei, dei ban pyndep  
 noh kloï lan hapoh ka sngi. ‘Ka sngi’ hi kan  
 sakhi’ ia kano ka ‘jingialap’ ba la pyndep da  
 u shakri jong U Blei. Ka ‘sngi’ hi ka ‘pyn-  
 long’ ia ka jingseisoh bad ka ‘sngi’ hi ka  
 ‘pynduh’ ia ka jingseisoh. Ka ‘jingtrei’ bad  
 ka ‘bor’ jong ka sngi ka long ka kam ki  
 shynriahti U Blei najrong.

(i). Ka mynsiem ba kordor jong u briew ka  
 ka ioh ia ka jingshai mynstep bad ka mih  
 kum u phlang ba lung na ka jingtyngshaiā  
 ki kjat sngi. “Uta uba synshar ia ki briew  
 da ka hok, uba synshar ha ka jingsheptiong

ia U Blei, uta un long kum ka jingshai myn-step, haba ka sngi ka dang mih, ka step ka bym don lyoh; mynba u phlang ba dang lung u mih na khyndew, da ka jingtyngshain ba sngur hadien u slap" (2 Sam 23 : 4).

(ii). Ka jaka ha kaba ka mynsiem ba kordor jong u ka im ka iaid, ka trei ka ktah, ka myntoi lang da ka jingkyrkhu U Blei, "da ka jingkordor ka bneng, da ki umjer, bad da kaba jylliew, kaba thiah shapoh, bad da ki soh bakordor jong ka sngi" (Deut 23:13,14).

(iii). Ka dohnud briew ka bym ai jaka ia ka ktien U Blei kan long kum 'kata' ba la ialap bad kren da U Jisu Khrist ha ka phar-shi u nongbet : "Haba u dang bet te, ... ki-wei pat de ki la hap halcr kijaka maw ha ka bym don bun khyndew, kumne kumne ruh ki la mih, naba kam long jylliew ka khyndew : haba ka la ieng ka sngi te, ki la shit tyrkhong eh; bad naba kim don thied, ki la iap ryngkhiang" (Math 13 : 4 - 6).

(iv). Ka sngi ka donbor ban 'shoh pyn-mynsaw' ia u briew uba U Blei u la 'thut hynrei ia u briew uba U Blei u 'ieit', ka sngi kam lah ban pynmynsaw ei ei, kumba U Blei u la dep ai lypa ia ka kular: "Ka sngi kan ym shoh ia me mynsngi, lymne u bnai mynmiet" (Salm 121 : 6). "Te ka jingshit bad ka sngi kin ym shoh ia ki: namar uta uba isynei ia ki un btin ia ki, haj n ki umpoh-liew ruh un ialam ia ki" (Isa 49 : 10).



(v). Ki nongpop kiba la kylla kaba mut bad kiba la pynkhuid ialade, kin ioh lait noh na ka jingpang jingshitom ynda ki la poi ha bneng. "Kin ym thngan shuh, lymne sliang shuh. lymne ka sngi kan ym ioh shoh ha ki, lymne kano kano ka jingshit" (Jingpyn 7 : 16).

(vi). Hadien ka jingrong noh ia ka balang bakhuid, ki briew baroh, ki jaid, ki kynja bynriew bad ki thylliej ki ban dang im ha pyrthei, kin shah ia ka jingpynkordit na U Blei ha kata ka 'kordit bah' ba khraw. "Bad uta uba saw (u angel) u la theh noh ia ka pliang jong u halor ka sngi; te la aibor ha ka ban pynshit tyrha ia ki briew da ka ding. Kumta keiñ la pynshit tyrha ia ki briew da ka jingshit ka bakhrav: te ki la ia kren beñ ia ka kyrteng jong uta U Blei uba don ka bor halor kine ki jingiaphem; te kim shym la kylla kabamut ban ai burom ha u" (Jingpyn 16 : 8, 9).

(vii). U 'nongialap' bad uba 'shah ialap' kumjuh kin hap ban shah pbrang lang ha ka kti U Badonbor baroh. Katba ki dang im ha pyrthei, ki hap ban iaiaid lang. "Hato arngut kin ia iaiaid lang lynda ki iadei jingmut?" (Amos 3 : 3).

Ynda ka jingiap kan wan, kin ym lah shuh ban ia iaiaid lang. Pynban ha bneng, kin sa ia kynduhlang bad ia iaiaidlang hapoh ka 'jingtyngshaiñ' bad ka 'jingphyrnai' jong ka sngi.

"Jngai, jngai sha lyndet jingkhiih eriong,  
 Ba beh ha ngi;  
 Tang jingtyngshaiñ suda hangta long,  
 Phyrnai shai kat ka sngi".

U 'Nongialap' shwa ba un mih ban ialap shabar, u dei ban sdang shwa kaba ialap hapoh la ka jong ka ling. Bun napdeng jong ngi ki nongialap ngi ju sngewtynnad ban leit ialap shabar, katba ha la ka ing pat, ngim ju ialap ha kito kiba dei ban pynsgew ia ka ktien U Blei. Kumno ngin leit ialap sha kiwei, la da ngim ialap shuwa ha la ka ling? Ym donkawei ka jingsuk kaba palat ia ka jingshemphang briew baroh, kaba U Blei u ai ha u briew jong u, hadien ba u la pyndep ia ka jingialap hapoh la ka jong ka ling.

U 'Nongialap' un kham phyrnai ha ka jinglong jingim ba kynja mynsiem, ynda haba la 'phrang' ia ka 'jingngeit' jong u ruh, kaba u dei ban bat skhem halade, namar un hap ban 'lashem' 'lakynduh' ia kiba bun jaid 'ki jingtyngjuh' ha la ka jong ka 'ling'. Ka 'jingngeit' ka dei ban trei kam ha ka 'ling' jong u nongialap hi. Ka 'jingngeit' ka kham khraw ban ia ka 'ksiar' ba ngi deng ha ryndang, bad ha ka met jong ngi. Kumjuh ruh ka 'jingngeit' ba la 'phrang' ha ka 'lawarding jingtyngjuh' kan kham kordor ban ia ka ksiar kaba jot noh. U Apostol Paul u la dep saham lypa shaphang ka jingphrang ia ka jingngeit kaba dei ban paw ha ka jinglong bajanai jong ka.

“La mynta khyndiat por, lada donkam, la pynsngewsih ia phi ruh ha ki ‘babun jaid ki jingtynjuh’ ; khnang ba kata kaba phrang ia ka jinggeit jong phi, kaba kham kordor ia ka ksiar ba la jot nob, la la phrang ruh ia ka da ka ding yn ioh shem ia ka ha ka jingiaroh bad ka burom, bad ka jingpynpaw U Jisu Khrist” (1 Pet 1 : 6, 7).

U ‘Nongialap’ hadien ba u la pyndep ia ka Jingialap, u lah ban ioh ia ka ‘bainong’ kaba da kumwei pat na ‘U nongai’ jong u. Ka ‘bainong’ ka lah ban long kaba um ju khmih lynti mynno mynno ruh. Ha ka jaka ka ‘babha’, u lah ban ioh pynban da ka ‘basniew’. Ka shong baroh ha ‘U Nongai’ u ba ai ha u. Kaba bha tam ia u ka long tang ba un shu duwai da kaba ainguh ha ‘U Nongai’ : **“LONG KA MON JONG ME”**

“Palei ? Ngin pdiang na ka kti U Blei ia ka babha, te ngin ym pdiang ka basniew ?” (Job 3 : 10).

Ka jingai U Blei ka wallam ia ka jingshai hapdeng ka jingdum. U shakri jong U Blei uba ju ‘sngew kahdum’ ha ka jingmut jingpyrkhat ka mynsien bad ka dohnud, un ym ‘kyrngah’ ka ‘khlieh’ ban ‘phai’ la ki ‘khmat’ sha ka ‘jingshai’. “Da shisha ka jingshai ka long kaba thiang, bad ka long kaba sngewbha ia ki khmat ban khmih ia ka sngi” (Ekle 11 : 7)

U Blei um ju sngewlynnad ba ngin ‘set’ ia kano kano ka kam kaba ngi leh ha ka barieh, la ka long ka babha ne ka basniew.

Hooïd, ngi lah ban 'buhrieh' ia ka shipor, hynrei ngin ym lah da lei lei ban 'set slem' ia ka. U Blei kum 'U Nongbishar Bahok' un sa pynmih noh ia ka ha kawei ka sngi. U Jisu Khrist hi u la phawer ia kane ka jingshisha bakhraw, ba ka dei ia ngi ban ai ka jingshai ka jingtip jong ngi ha kiwei, haba u iathuh kunine : -

"U la ong ruh ha ki, ki ju wallam ia ka sharak, ba yn buh hapoh ka shang, lane hapoh ka jingthiah ? Bad ban ym buh ha ka dieng pynieng sharak ? Naba ym don kaei kaei ruh ba la tap, ia kaba yn ym pynpaw ; lymne ym ju don kaei kaei ruh ba la buhrieh, hynrei khnang ba kan wan paw" (Mark 4 : 21, 22).

---

## 8

### **"HALOR KA KALI KABA MAREH STET"**

---

Ka la long ha ka **8.12.1989**. (Sngi thohdieng) ba uga la leit ban pyndep ia ka kam U Blei ha ka balang **Mawlyndep** kaba don sha shiliang ka pung Umiam khwan (Damsait). Namar ba ka **10.12.1989** ka dei ka sngi U Trai ha kaba ngan hap ban pyndep ia ki

Sakrament, nga la dei ban sahmiat naduh sngi thohdieng ha kawei ka iing jong i para-ba ngeit iba shem jynjar ha ka jingim, namar ka jingkhlad shen u lok jong i na ka pyrthei. Ka la long ha ka por mynstep jong ka Sngi saitjain (9.12.1989), shuwa ba ngan khie na kaba thiah ha ka por 6 baje, ba nga la ioh ia ka jingithuhpaw shaphang ialade ha ka jingphohsniew kaba la long hapdeng por san baje (5 a.m) bad san shiteng (5.30 a.m) mynstep, ia kaba ngan iathuh kumne harum :-

“Nga la leit poi ha kawei ka jaka ha sor Shillong sha ki thain Nongthymmai, ba nga la iohi arngut laingut ki briew, kynthei bad shynrang, ki da rah kot jingrwai ban leit jingiaseng sha iingmane Laitumkhrach. Nga la imat ba kata ka sngi ka long ka sngi U Trai, Ka por ba ki leit jingiaseng ka long shiphew baje mynstep. Nga la iohi ba ki ia kiew bad shong ha kawei ka ‘Kali ‘Iaishaka’ kaba i kum ka kali ‘baisikil’, bad ba don u briew uba niah ia kata ka kali. Haba kata ka kali ba shong kita ki briew, ka la sdang ‘khih’ ban iaaid noh, ka la jah noh kynsan kata ka jingiohi jongnga ia kata ka kali. Nga ruh markumta hi, nga la kiew ha kawei ka kali kaba syriem thik ia kata ha kaba ki la shong kiba la nangleit shakhmat.

Nga la shong marwei ha kata ka kali, bad don uwei u briew uba ngam ithuh uba niah ia kata ka kali. Nga iashong mar syndah. Ma u, u shong sha ka liang kamon,

bad ma nga nga shong sha ka liang ka diang  
 U la pynshong ia nga halor ka jin, bad  
 kumta ka la sdang ka jingleit lynti. Kaba  
 phylla kata ka jingleit lynti ka long ba kam  
 shym la long ha ka surok bah ne surok rong,  
 kumba kita kiba la leit sha shuwa jong nga,  
 ki la shong ha ka kali kaba mareh ha ka  
 surok sor. Hynrei nga shu iohi kynsan ba  
 ka kali ka mareh na ka lynti surok khyndew  
 shyiap kaba khun bad kaba sam narud ka  
 rashing jong u riat bah riat san. Ka la long  
 ka lynti kaba jlan katta katta. Shaphang kadiang  
 ka don ka kynroh khyndew baroh shilynter.  
 Shaphang kamon pat ka don ka riat bah riat  
 san ba ishyrkhei bad kaba jylliew baroh shi-  
 lynter, kaba ngam lah ban iohi wat ia ka  
 trai ruh.

Namar ba ka lynti ka long kaba noh pa-  
 dun, nga la syier her baroh shiryenieng haba uta  
 u nongñiah u la pynmareh stet katta katta.  
 Nga la rah mynsiem shiphang namar ba nga  
 iohi ha badei badei ba ki shaka kali ki la  
 mar thmit jong ka riat. Ka jingpynmareh kali  
 uta u nongñiah ka la long kaba sngewshyrkhei.  
 Haba poi ha ki khongdong lei lei; ngam  
 sngewdon mynsiem shuh, namar ba ka kali  
 ka la i kum ban noh shariat. Hynrei uta uba  
 ñiah um i pyrwa ei ei. Nga la mai bad  
 kyrpad da ka ktien bajam ruh um sngap.  
 Nga la ong biang ia u, "Ko Bah! Sngewbha  
 seh wat pynmareh eh", hynrei u sngap la ka  
 sngap. Sa shipor nga la pyrta ba un pynmareh  
 suki, hynrei u leh kum bym patiauw. Haba

nga iohi ba um sngap shuh, nga la shu rai kut ba ngan mat iadep wat lada dei ban iap, namar ba ka kali kam i lah satgeh shuh. U nongñiah ruh ngam imat ba un tieng ia ka jingiap.

Katba ka kali ka la nang mareh stet, nga la phai la ka met bad bat ia u, hynrei u leh kum bym salia pynban. Ha kaba khaduh, nga shu iohi ba kata ka surok khyndew ka kut kynsan noh. Mar iakut kata ka lynti kali, kata ka jingleit lynti ka la shu kut kynsan. Uta u nongñiah ruh u la shu jah noh bad ngam iohi shuh ia u.

Ynda la kut kata ka jingithuhpaw, nga ruh mar kumta hi nga la kyndit noh na kaba iohthiah, bad nga la sngewphylla eh katta katta ia ka jingleit lynti halor 'ka kali kaba mareh stet'. Nga la pyrshang katba lah ban pynshong nongrim ia kane ka jingithuhpaw, shaphang iaei ka mut bad ka thew, hynrei ngam shym ioh jingshai ei ei; Tang kawei kaba ai jingtngen ia nga ka long ba hadieh ba nga la duwai bad wad bha ha ka jingiasyllok bad U Blei, ba uta u briew uba ñiah ia ka kali, uba ngam ithuh satia ia ka dur jong u, nga ngeit ba u dei u angel la ne U Jisu uba buhrieh ialade. U long u nongñiah uba stet, dohiap, bad bastad. Ka rukom pynmareh stet jong u ia ka kali ka long kumba iabeh ia ka por ban lap ei ei, ka bym i lap lieng, kaba kyrkieh ban ioh pyndep noh ia ka jingthmu barieh jong u. Lada pyniaid suki ia ka kali ruh ym i long.

Katba nangiaid ki sngi, ka la nang wan  
 ka jingsngewthuh ha lade, kaba nga tip tang  
 ma nga hi shimet ba ka jingithubpaw ka  
 la wan ha nga hamar ki sngi bad ki por ba  
 nga dang khreh bad kut jingmut skhem ha  
 ki jingduwai ban thoh pyndep ia ka kot ka  
 ba nga la jer kyrteng ia ka ; 'NA SEPNGI  
 SHA MIHNGI'. Hapdeng ki jingeh bad ki  
 jingialeh ba jur hapoh ka mynsiem lajong,  
 ka wan lap barabor ka jingsngewskhem bad  
 ka jingsngewthikna ba U Jisu Khrist u don  
 ryngkat bad nga bad ba nga dei ban thoh pyn-  
 dep ia ka kot ryngkat bad ka jingiarap jong  
 ka bor jong u.

'Lem bad U, lem bad U,  
 Jingsngewtieng la duh ;  
 Ryngkat bad U Jisu ngam ju shep-  
 tieng shuh'.

'NABA KAEI KAEI BAROH IA KABA  
 LA KHA NA U BLEI KA JOP NOH THIAW  
 IA KA PYRTHEI ; TE KANE KA JINGJOP  
 KABA LA JOP NOH THIAW IA KATA KA  
 PYRTHEI, KA JINGNGEIT JONG NGI KEIN'.  
 (I IOAN 5 : 4)

---



## 9

## KA JINGDUWAI LA JANMIET

---

Ka jingim jong uwei pa uwei u 'Riewngeit' bad u 'Riewialeh' ka long ka jingim jong ka 'jingduwai'. Lada u la 'sdang' ia ka sngi ha ka por dangstep da ka jingduwai, ka 'jingjop' ba u la ioh hapoh ka sngi, ka long ka jingjop ba un ioh ainguh pat ha U Blei da ka 'jingduwai'.

Ka jingduwai la janmiet ka long ka jingduwai kaba mih na ka mynsiem jong ka jingsngewnguh eh ia U Blei uba la don ryngkat, bad kyrshan bor ia u hapoh ka sngi ba eh. Ka jingduwai la janmiet ka long ka jingduwai jong ka jingknia ainguh thang kaba pdiang hun ha khmat U Blei. Ka jingduwai la janmiet ka long ka jingduwai ha ka 'por' ba la kham noh ka sngi. Ka long ka por ha kaba u 'nongjop' u dei ban dem khohsiew ha khmat U Blei, hamar ba ka sngi ka sep artad. Ka jingduwai la janmiet ka long ka jingduwai 'iakhlad', namar ba ia ka 'nam nongjop' la ai ha u 'riewialeh', bad ba un sa lait noh na ka 'jinjar' bad 'shipa' kiba u la mad la biang hapoh ka sngi ba eh. U 'Riewduwai' u ioh ia kane ka 'nuksa' tang na ka rukom leh ba U Trai Jisu u ju duwai mynba u dang don ha ka pyrthei, kumba la iathuh ha ka ktien U Blei:-

"Te haba ka la kham noh ka sngi, ki la iawan ha u ki synran jong u, ki da ong, kane ka long ka jaka kynjah, ka por ruh ka la kham palat; to pyllait noh ia ki paitbah, ba kin leit sha ki shnong ban thied jingbam ia lade" (Math 14 : 15) .

"Te haba u la pyllait noh ia ki paitbah, u la kiew sha u lum weibriew ban duwai; bad haba ka la janmiet ruh, u la don hangta weibriew" (Math 14 : 23) .

Shuwa ba ka sngi kan sep, ka donkam ia u briew jong. U Blei ba un duwai da kaba 'kyang' ha ka jingkmén bad ka jingshleí ka jingphuhmut phuhmat kumne :-

Ah Trai ! Me la pynshitom sat ia nga, hynrei Mem shem la aiti noh ia nga ia ka ban iap.

To' plie ha nga ia ki khyrdop ka hok. Ngán rung shapoh jong ki, ngan ainguh ia Me Trai !

Kane ka long kaba Me Trai ! Me la pynlong. Ngán shad kmén bad ngan sngewkmén ha Me.

Nga ainguh ia Me, naba Me la shah shkor ia nga, bad ba Me la wan long ka jingpynim ia nga.

Me long U Blei jong nga. Ngán pynkhraw ia Me.

Wat ai Ah Blei ! ba ngan sngewsarong ha ka jingjop namar kam long ka jong nga hynrei ka jong Me.

Haba Me la wallam ia ka jingjop Ah Trai ! to ai ba Me Men man khraw, hynrei ba nga ngan man rit.

Ah Trai ! Nga sngewkmen eh ba Me pynkaweh ia ka lama ka Gospel ha ka miej ka jong nga.

Haba ka sngi kan sa sep noh, to pynkyn-tiew ia ka diengphna ha ka dohnud jong nga.

Ah Trai ! nga la iohi ba kita kiba lur ia ka jingbymhok, bad kiba bet ia ka jingshitom, ki ot ia kata.

Me la wallam ktien ha nga ha ka barieh, bad ka shkor jong nga ka la pdiang pasiaw na ka.

Ha ki jingmut kiba na ki jingithupaw mynmiet, haba ka jingiohthiah lyngai ka hap ha ki briew, haba ka jingsheptieng ka la jia ia nga ; bad ka jingithupaw kaba la pyn-paw kaba la pynkhih ia ki shyieng jong nga, Me la wan ban iarap ia nga.

Naduh mynstep haduh janmiet, Me la pynlwet jin ia ki nongshun jong Me. Ki jot noh junom bym don ruh ba suidñiew ia kata.

Ko Kynrad ! Me la pyniohsngew ha ki tyndong shkor jong nga ia ka jingrwai u pait-

lang ba Me la siewspah ba u rwai da ka  
jingkmen bad da ka jingtem kum ha kaba  
jrong tam jong ka iingbah iingsan bad kaba  
armala.

‘U Jisu Khrist Un synshar lut,  
Ka pyrthei bah na kut sha kut ;  
Ka Hima jong U kan nang pur,  
Katba dang sah, ka sngi bad khlur’

Ah ! Trai namar ba Me la pynlong nong-  
jop ia nga, ngan siew ia la ka jingkular da  
kaba pyndep ha Me hakhmat u paitbah jong  
ka jingiaseng.

Ai bor Ah Blei ! ba ngan iathuh ia ki  
jingleh baphylla jong Me ia nga ha ka pyrthei.

Ah ! Blei to pyllait suk noh ia ka myn-  
siem jong nga ha ka lynti jong ka jingsuk  
bad Me.

To kynmaw ia ka ktien ha la u shakri,  
namar ba Me la pynkyrmen ia nga.

To pynphai, noh ia ka jahburom jong nga  
kaba nga sheptieng ; naba ki jingbishar jong  
Me ki long ki babha.

Haba ka sngi ka la sep, to ai ba ka  
burom jong ka diengphna U Khrist kan tyng-  
shaiñ lep ha ka jingim jong nga.

To pynpra noh da ka jingpynpra kaba  
jur ia ka kynroh pdeng ka jingpyniakhlad,

ba u riewngeit jong Me un iohi ia ki kam baphylla jong Me.

To ai ba ngan ichi kyndiang ia u lum bakhuid jong Me ha ka khyllipmat shuwa ba ka sngi kan sep noh.

Namar ba ngam shym la phai bakla sha kamon ne sha kadiang, kumta Mem shym la pynraiñbohkhoh satia ia nga.

Haba nga la lah tip lypa ba ka sngi kan sep, ngan ym khuslai ei ei lada ka jingdum jong ka miet kan wan.

Wat ai ba ngan sheptieng bad peit ha ka sngi kaba la khreh mynta ban sep noh.

Ka long ka burom ia nga ba ngan khmih ia ka 'sepngi' kaba la wan urlong da ka jingiathuhlypa jong Me.

Hato ka 'sepngi' kam mut kaba ieng ha u lum jingtep?

To ai ba ka lynti jingim jong ka thma ba kynja mynsiem jong nga kan kut noh shi wat ha ka por ba ka sngi kan sep artad.

Nga iohi Ah Trai ! ba ka lama ka Gospel ka kaweh mynta hamar ba ka sngi ka khreh ban sep.

Nga sngewthuh shai mynta Ah Trai ! ba uwei pa uwei u Pilgrim uba shisha jong Me u dei ban jaw ummat ha ka khyllipmat ba ka sngi ka sep.

Ha kane ka janmiet, to ai ba ngan ym.  
klet ia ka jingpynim jong Me ia ka mynsiem  
jong nga.

Ka la dei ka por ia Me ko Trai! ban  
trei naba ki la pyndam noh ia ka aiñ jong Me.

Ki wah um ki tuid na ki khmat jong-  
nga, namar ba kim sumar ia ka aiñ jong Me.

Nga la sakma noh kum ka langbrot ka  
ba la jah noh, to wad ia la u shakri; naba  
ngam ju klet ia ki hukum jong Me.

Ki khmat jong nga ki khmih sha Me ko  
Trai! U Blei jong nga haduh ba Men da  
isynei ia nga.

Nga shad kmen ha ka ktien jong Me,  
kum uba shem ia ka jinglute shibun.

Ka jingshitrhem jong nga ka la bam duh  
ia nga, namar ba ki nongialeh ia nga ki la  
klet noh ia ki ktien jong Me.

To kyrshan ia nga katba kum ka ktien  
jong Me, ba ngan ioh im; bad wat ai ba  
ngan lehraiñ ia ka jingkyrmen jong nga.

Lymda ka aiñ jong Me ka la long ka  
jingsngewbha jong nga, nga la lah iap noh  
hangta ha ka jingjynjar jong nga.

Ngan ym klet ia ki hukum jong Me lano  
lano; naba da ki Me la pynim ia nga.

Mynba ym pat pynshitom ia nga, nga la  
ju sakma; hynrei mynta nga sumar ia ka ktien  
jong Me.

Haba ka sngi ka la jan sep, to map noh  
Ah Blei ! ia ki pop baroh jong ka jingim ka-  
ba la leit noh jong nga.

Ka babha ia nga ba la pynshitom ia nga;  
ba ngan dup nang ia ki aiñ jong Me.

Mynta nga tip shisha Ah Trai ! ba ka  
long lehnohei ia u briew ban im ha pyrthei,  
lymda u pdiang ia u khun baieit jong Me  
kum U Nongpynim jong U.

Ka jingjynjar bad ka jingsngewpisa ki la  
ngat ha nga; pynban ki hukum jong Me ki  
long ka jingsngewbha jong nga.

U Trai u ha ka liang jong nga; ngan ym  
sheptieng : u briew u lah ban leh aiñ ia nga ?

U Trai u ha ka liang jong nga hapteng  
kita kiba iarap ia nga : namarkata ngan iohi  
ia la ka mon halor kiba shun ia nga.

Ha ka kirteng U Trai ngan ot noh ia  
ki nongshun jong Me, Ki la ker sawdong ia  
nga kum ki ngap. Ki la lip noh kum ka  
ding ki dieng shynraiñ : namar ha ka kyr-  
teng U Trai ngan ot noh ia ki.

La pynkyntiew ia ka kti kamon jong Me  
Ah Trai : ka kti kamon jong Me ka, trei  
donbor.

Lymda Me la long ko Trai ! ha ka liang  
jong nga, hangta ki um ki la tyllap ia nga

ka um bah ka la shlei halor ka mynsiem jong nga : hangta keiñ ki um kiba sarong ki la shlei halor ka mynsiem jong nga.

To phai noh, ko mynsiem jong nga, sha la ka bajahtait, naba U Trai u la leh bha ia pha. Naba Me la pyllait ia ka mynsiem jong nga na ka jingiap, ia ki khmat jong nga na ki ummat, bad ia ki kjat jong nga na kaba tyrsiang.

Ko kynrad baieit jong nga, nga la ju iohsngew ia ki artylli ki kular kiba thiang na mynbarim, kiba ong. "Don kaei kaei ruh ia kaba um lah U Trai? U Nongbishar ka pyrthei baroh kawei un ym leh hok mo?

Shisha Ah Blei! to ai ba ki kular jong Me kin wan jia ba men pyndep ha ka jingim jong nga ruh; kumba ka ktien jong Me ka ong, kita kiba bet ha ki jingjaw ummat kin ioh ot ha ka jingkmén. La u nang leit la ka jingleit u da iam, haba u rah lem ia u symbai; un ioh wan phai pat ha ka jingkmén, u da wallam lem ia la ki song kba.

Ngan ai aiu pat ha Me ko Trai, namar ki jinglehbha jong Me baroh ia nga? Ngan shim keiñ ia ka khuri ka jingpynim, bad ngan khot kyrpad ia ka kyrteng U Trai.

Ha kaba pynkut noh ia ka jingduwai la janmiet jong nga, wat ai Ah! U Blei, ba ngan klet ban 'bam' ia u 'kpu' bad 'dih' ia ka 'khu-



ri' ha kaba kynmaw ia ka jingiap U Jisu uba U Trai jong nga.

Haba ka sngi kan sep noh ha kane ka janmiet Ah Blei! ring ia nga sha trai ka **'DIENGPHNA KALBARI'**.

## 10

### **"LA PYNLYNGKOT NOH IA KA POR"** (*I KOR 7 : 29*).

Ha ka jingiadei bad kane ka kot 'Na sepngi sha Mihngi'; nga la sngewdei ban wal-lam ruh khyndiat hangne ia ka khubor ka ktien U Blei ba la kren da u Apostol Paul u shakri jong U Blei : 'La pynlyngkot noh ia ka por.'

Shwa ba ngin sngewthuh ia ka kyntien baroh kawei, ka long kaba donkam ruh ba ngin tip ; Ka mut aiu ka por ? Ka ktien 'por' ka long kaba iar, kaba jylliew bad kaba maian. Ka shem jingeh shibun ban batai ia ka jing-mut jong ka ktien 'Por' tang ha ka shilain ailaia. Ka por ka lah ban mut tang 'shihyllipmat' ne ka lah ban thew ia ka 'bymjukut'. Ka 'kynian' jong ka ka lah ban long kaba 'lyngkot' ne kaba 'jrong'

Ka por ka dei ka jong U Blei bad ka hap ba ki kti jong u. U briew um shym la 'thaw' ne 'shna' ia ka por, hynrei U Blei keiñ u la pynlong ia ka por. Namar ba U Blei um don jingsdang ne jingkut, kumta dei tang U Blei uba tip ia ka por, bad uba pyniaid ruh ia ka. Kaba phylla ka long ba ha ka ktien U Blei, ym shym la thoh mynno ka sdang ka por. Ka kyntien kaba nyngkong eh ha ka Baibl ka long: "Ha kaba mynnyngkong U Blei u la thaw ia ka bueng bad ia ka khyndew" (Jen 1:1).

Ka por ka sah hajuh bad ka neh kumjuh bad kam ju kylla, hynrei ka jingim briew ka dap tang da ki jingkylla. U briew la u stad katno katno ruh um lah ban pynkylla ia ka por. Um lah ban pynjrang ne pynlyngkot ia ka por. Ki jingjia kiba jia ha ka pyrthei bad ha ka jingim briew ki kylla na kawei ka por sha kawei ka por, pynban ka por ka sah kumjuh. Ma ngi baroh kum ki jingthaw ba kardor eh jong U Blei, ngi 'iajngi lang' ha kane ka por kaba U Blei u la pyniaid na kawei ka khep sha kawei ka khep, na kawei ka pateng sha kawei ka pateng.

U Blei jong ngi ki khristan u long U Blei jong ka por. Dei ma u uba bat ia ka por uba synshar ha ka bad uba pyniaid ia ka. Baroh na ngi kiba ring mynsiem ha sla jong kane ka khyndew ngi shah bad hap hapoh ka jingpyniaid. jong u. U nongrwai Salm u

iathuh ia ngi ba ka por ka long syriem  
**'Kum ka wah kaba shlei'**. Kumta u nongrwai  
 shem mynsiem u rwai :—

**Ka por ba kum ka wah bashlei,**  
**Ki khun ka kit noh hi ;**  
**Ki her b'la klet kum jingphohsniew,**  
**Ba jah tang mih ka srgi.**

Kumba ka wah ka ju shlei miar da ka  
 jingtuid kaba palat jong ka um, kumta ruh  
 ka **'por'** ka ju **'wan tur kyrthep'** kum ka  
**'umbah umsan'** ha ka jingim jong ki briew.  
 Pynban u riewngeit uba shisha bad uba ju  
 duwai bad sharai, um lah khlem da **'khan'**  
 bad **'duriap bha'** ia ka **"jingtuid jong ka"** ka-  
 ba **"sdang na ka wah duid"**. Un hap ban wad  
 ia ka **'jingstad Blei'** da kaba sdang na ka  
 wah duid. Kumta ka ktien U Blei ka la dep  
 pynshisha ia kane da kaba ong : **"ka pukri**  
**ka jingstad ka long kum i wah batuid"** (Prob  
 15 : 4).

La ju pynsyriem ia ka **'por jingtynjuh'** U  
 Blei ia ngi ki riewngeit bad ka **'jingshlei jong**  
**ka wah Jordan'**. Ha ka por ba jur slap, ka  
 wah Jordan ka ju shlei bad tap ia ki jaka  
 rep bad pynduh ia ka thung ka tep. Ym don  
 ei ei ka ban pynkhuslai ia ki nongrep bad  
 ki nongshongshnong kiba im harud ka wah  
 Jordan, lait noh tang ha ka por shlei um.  
 Ka ktien U Blei ka iathuh ba ka **"Jordan**  
**ka ju shlei miar baroh ka aiom ot"** (Josh 3 : 15).

Ha ka jingshisha, ka long pat ka jingphylla kaba maian ruh ba U Blei u don ruh la ka jong ka jingthmu ba kyrpang haba u pynjia ia ka jingshlei um. Ka 'jingshlei um' kam ju jia baroh shisnem, hynrei ka jia tang ha ka por bad ka samoi ba la buh. Ka jingthmu ba kynja mynsiem jong U Blei ka long ba ka 'jingshlei um' ka wan ryngkat bad ka jingpynkhrehlypa jong "U Trai ka jingot" ban pynim ia ki mynsiem kiba kordor sha ka jingpynim jong u. Namarkata ka jingthmu barieh jong U Blei ha ka 'por shlei um' ka long ym ban pynjot satia hynrei ban pynim pynban.

Ka jingpynkhreh U Blei ha kaba kum kata ka por kaba u la mang lypa ka long ban pynmih ia ki 'nongtrei ba shisha' na ka bynta ka 'aiom ot' jong u. Shuwa ba U Blei un seng thymmai ia ka 'plan' ha kaba pynkhreh ia ki nongtrei sha ka kam jong u, u dei ban pyaduh pyndam pynkut bad pynwai noh ia kata kaba la man rim bad kaba la nangduh bor noh. Dei namar kane ka daw ba U Jisu Khrist hi u la pasiaw shisien ha ki synran jong u: "Ha khmih nga ong ha phi, To khmied ia la ki khmat, to jngoh ia ki lyngkha; naba ki la byrlieh lypa ia ka aiom ot!" (Ioan 4 : 35). "Ka jingot kaba bun shisha, hynrei ki nongtrei ki khyndiat : namarkata to kyrpad ia U Trai ka jingot ba un phah noh ia ki nongtrei sha ka jingot jong u" (Math 9 : 37, 38).

La ka 'por shlei um' ka don la ka jong ka jingthmu barieh ha ka jingmut U Blei, hynrei pynban ngim lah ban len ia ka jingshisha ba ka 'por shlei um' hi ka long ka por kaba ma bad sheptieng shibun eh. Ka wah Jordan haba ka tuid jem jai jai kam lei lei, hynrei haba ka shlei, ka long ka jingma kaba khraw. Ka jingshlei jong ka Jordan ka long ka por jingtynjuh ba mehding U Blei ia ki riewngeit. Kane ka por ba la buh da U Blei ka lah ban wan ha kano kano ka khyllipmat. Kan poi ka por ha kano ma ka sngi jong ka jingim jong ngi ba ngin iakyn-duh ia ki jingjynjar, ki jingkhuslai, ka jingiam, ka jingsngewsih, ka lanot bad ka shipa. Ka long ka por ha kaba ka Jordan ka shlei ha ka jingim jong ngi: Haba kaba kum kano ka por ka wan, ka mynsiem ka pang, ki ummat ki jaw, ki khmat ki lip bad ka dohnud ka pait. Ki jaid jingtynjuh ki lah ban wan kawei hadien kawei. Ka lah ban long ruh ba lada ngi la iakynduh mynta ia kawei ka jingtynjuh kaba khraw, lashai ngi lah ban ia kyn-duh sa ia kawei pat kaba kham khraw.

U Blei u la buh ia ka por bad ka samoi kaba biang ba ka wah Jordan ka dei ban shlei. Ym don mano mano ba lah ban khang ia ka jingshlei jong ka Jordan. Hynrei kaba phylla ban tip ka long ba wat hapdeng kane ka jingshlei, U Jisu Khrist u khun jong U Blei u la dep ai lypa ka kular skhem : "Ha khmih ruh nga nga long ryngkat bad phi ha la ka sngi, haduh ka ba wai noh ka pyrthei" (Math 28 : 20).

Ha ka Kitab Jenesis, la iathuh ia ngi ba ka jingkhein por jong U Blei' ka la wan long tang hadien ba u la dep pynlong ia ka bneng bad ka khyndew, ka jingshai, ka jingpyniar ia ka suiñbneng, ka jingpynkhlad ia ka ryngkew na ka um. Ha kaba u buh ia ka jingkheĩñ por, u buh ruh ka jingpyniakhlad hapdeng ka sngi bad ka miet da kaba pynlong artad ia sngi, u bnai bad ki khlur. Kumta ka jingkhein por jong U Blei ka la sdang na kato kaba u la kren dalade hi : "U Blei u la ong ruh, To long, ki jingshai ha ka sahit bneng ban pyniakhlad hapdeng ka sngi bad ka miet, bad to ai ba kin long ia ki dak, bad ia ka aiom bad ia ki sngi bad ia ki snem de" (Jen 1 : 14). Dei na kane ka jingkhein por jong U Blei ba ha ka jingim kaba lyngkot jong ngi ki briew, ngi ju khein ia ka por, ki minit ne ki khyllipmat, ki kynta, ki sngi, ki taiew, ki bnai bad ki snem.

Ha kane ka lynnong, kaba nga don ban buh jingbatai kaba kham bniah ka long 'ka jing-iadei ka por bad ka karta ka jingim u briew' ha kane ka pyrthei shong basa. Kam don jingmut ia ngi ba ngin batai ka mut aiu ka por? lymda ngi pyndei ia ka por bad ka jingim jong ngi hangne ha pyrthei. Kumta lada ngi lah ban pynlong ia kane kum ka jinghikai, ngin sa sngewthuh ia ka jingkordor jong ka por bad ki jingmut kiba kynthup ha ka por. Ka jingkylli ka donkam ia nga bad ia phi ba ngin pyrkhath lang'ka long : **KAEI KA POR?** Ia ka jingbatai lah ban ai ha ki jidgmutharum kumne :—

**Ka Por ka lah ban mut :—**

1. Ka jingneh slem kaba thikna.
2. Ka khyllipmat ha kaba kiei kiei kiba phylla ki jia.
3. Ka aiom.
4. Ka kynian jong ka jingshim ia ki minit ne ki khyllipmat bad ki kynta.
5. Ka kynta jong ka jingiap.
6. Ka por kaba lyngkot kaba pyndep ia ka jingiaphet thong.
7. Ka jingiaid jong ka por kaba kyrpang ha kaba ki jingjia kiba kyrpang, kum ka jingpule, ka jingiaidlynti, kaba leit jingleit, kaba thiahpang, ka jingtreikam.
8. Ki karta ba pher ha ka jingimbriew kum ka por ka jinglong khunlung khynnah, ka jinglong samla, ka jinglong rangbah, ka jinglong tymmen.
9. Ka por kaba iadei bad ka jingpyndep ia kawei ka kam kaba kyrpang.
10. Ka por ba u samla u dang shong ha ling u kpa bad ka kmie.
11. Ka por ba u briew u shongkurim bad seng ia ka longiing longsem.
12. Ka por ba u briew u shongthait ha ka jinglong tymmen ban leit noh na ka pyrthei.
13. Ki arphewsaw kynta kiba kynthup ia

ka por mynstep, ka por mynsngi, ka por  
janmiet bad ka por mynmiet.

14. Ki saw aiom jong ka snem kum ka por  
pyrem, ka por lyiur, ka por synrai, ka  
por tlang.

15. Ka por kaba u briew u iakynduh ia ki  
artylli ki jingjia : ka jingsngewsih bad ka  
jingsngewbha, ka iam bad ka kmen.

16. Ka por ha kaba ngim ju iakynduh ia  
ki jingtynjuh.

17. Ka por ha kaba ki wan ki jingtynjuh.

U Blei um shym la pynlong suda ia ka  
por. Ka por kaba U Blei u la pynlong ka ia-  
dei khamtam eh bad ka jingpynim ia ka myn-  
siem. Dei hangne ba ngi sngewthuh keiñ ia  
ka jingthmu kaba khraw jong u da kaba u  
la phah khnang ia la u khun baieit eh jong u  
U Jisu K'rist ban shah ia ka jingiap halor  
ka diengphna na ka bynta ki pop jong ngi.  
Namar ba U Blei u la thaw kyrpang ia u  
briew ha ka dur ka jong u hi, u la pynkhreh  
ia ka jingthmu kaba janai ban pynim ia u  
briew na ka jingiap bymjukut. U Jisu Khrist  
hi u la ialap da la ka jong ka rmiang shyn-  
tur : "Naba U Blei u la ieit katta katta ia ka pyr-  
thei, katba u la aiti noh ia la u khun ba la kha-  
marwei, uba uei uei ruh uba ngeit ha u, un ym  
jot shuh. hynei un ioh ka jingim bymjukut"  
(Ioan 4 : 16)



Kawei ka jinghylla ba nei shea ha ba jingiadei ka por ka jong U Blei bad nei ki nongpop ka long, ba la ki jingkylla ki wan jia ha ka pyrtnei bad ha ka jingim u briew, pynban don tang uwei u bymjukylla bad uta u long U Jisu Khrist u bymjukylla ha ka jagiecit ia ngi ki nongpop ki baiot barem. Kunta ka ktien U Blei ka ong, ba U Jisu Khrist um ju kylla ha ki kular jong u ia nei "U Jisu Khrist u long-juh mynhynnin, bad nynta, bad sha bynjakut" (Heb 13 : 6).

Ka por ka dei tang ha ki kti U Blei. U briew um lah ben tip ei ei. Ia la ka por 'Wat U Jisu Khrist u khun jong U Blei u la phla, ba U Blei, la u la ailut ia ka bor ha u, hynrei um shym la ai ha u ka bor ban tip ia ka por jong ka jingwanpat sha kane ka pyrtnei. Ia ka por ka jingwanpat jong U Trai jong ngi, U Kpa joag u uba ha bneng um shym la iathuh wat ha la u khun ba la kha marwei jong u. U Jisu Khrist hi u ladep ong : "Hynrei shaphang kata ka sngi bad kata ka por ruh, ym don ba tip, lymne ki angel ki bneng, hynrei tang U Kpa jong nga hi" (Math 24 : 36).

Ha ka jingiadei bad ka por ka jong U Blei, ngim ju dei ban klet ba U Blei u kynmaw ia ngi barabor. U kynmaw ia ngi ba ngi long ka khyndew. La ngi la leh pop pyrtshah ia u, hynrei um shym khang ia la ka jagkhang ba un iohtheh halor jong ngi ia ka jingisnei, ka jingaiei bad ka jingmap ei. U nongrwai Salm u iathuh ha ngi ba ia ka burom U Blei la

pynkhraw ha ki kam jong u, bad ha ka jingieit jong u ia u briew. "Haba nga pyrkhat ia ki bneng jong me, ka kam ki shynriahti jong me, u bnaí bad ki khlur kiba me la buh : U briew u long aiu, ba me kynmaw ia u? bad u khun u briew ba me wan khmih ia u? (Salm 8 : 3, 4).

U Blei u kwah tang ba ngin kynmaw ba ka por ba u la buh ia ngi ba ngin im ha kane ka 'pyrthei shong basa' ka long kaba lyngkot. U kwah ba ngin kheñ kordor ia kawei pa kawei khang ba ngin nang ia ka jingkylla kabamut, da kaba ichnoh noh ia ki jinglongbarim bad ki jingmlen basniew, bad pdiang ia U Mynsiern Bakhuid ba un iatrei hapoh ka jingim jong ngi. Namar ba ka por ka long kum ka wah bashlei, ngi dei ban 'kyndit bynriew' da kaba 'kyllakaba mut', haba ngi iohi ba kiwei ki la nang leit noh na kane ka pyrthei. U Blei u la buh ia ka sngi jingbishar ha kaba baroh ngin ieng ha kawei ka sngi ha khmat ka khet bishar jong u, kumba u nongthoh sha ki hebru u la maham : "La buh ha ki briew ban iap tang shisien bad hadien kane ka wan ka jingbishar" (Heb 9 : 25).

Ym don kawei pat ka jingsngewbha ba U Blei u ioh na ngi, lait tang haba u iohi ba ngi kamai ia ka jingimbymjukut, bad da kaba ngi pyndonkam bha ia ka por. Ka por ka long kaba kordor katta katta. Shisien haba ka la iaíd lait na ngi, ngin ym lah ban ioh shuh ia ka, wat la ngi iam bad kyangkthang. Ka por kaba la leit kam ju wan phai shuh. Kaba sab

bad kaba donkam eh ia ngi ka long tang ban siewspah ia ka, katba ngi iohei ka lad bad ka kabu. Ka ktien U Blei ka la maham jur ia ngi; "To khmih bha te kumno phi iaid, ym kum ki bymstad, hynrei kum ki bastad; da, ka basiewspah ia ka por, naba kine ki sngi ki long ki basniew" (Eph 5 : 15,16).

Ha ka por jong U Blei, ka dei ban don ka 'Jingpynpaw' bad ka 'Jingpyndep'. Kane ka kdew khamtam eh ia ka jingim u briew ia uba U Blei u thmu ban leh ei ei. Ha ka 'Jingpynpaw' u 'pyni' da ki 'dak,' bad ha ka 'Jingpyndep' pat u 'pynlongkam' da ki 'jingjia'. Ka jingim bad ka jingiap u briew ha kane ka pyrthei kam dei kaba shu 'jia ryngkhat' ne kaba shu long shu man namar ka 'nusib'. Hynrei ka long bad ka jia namar ba U Blei u la dep thmu lypa najrong. Kumta u Eklesiastis u nongiathuhkhana u ong, "Don ka aiom ia kiei kiei baroh, bad ka por ia ka jingthmu baroh hapoh ka bneng" (Ekle 3 : 1).

Ha ka jingiadei bad ka 'Jingpynpaw', ka ktien U Blei ka ong, "Ngan theh buk ia la U Mynsiem halor ka doh baroh, bad ki khun shynrang bad ki khun kynthel jong phi kin iathuhlypa, ki tymmen jong phi kin phohsniew ki jingphohsniew, ki samla jong phi kin iohei ia ki jingithuhpaw, bad halor ki shakri shynrang bad halor ki shakri kynthel ngan theh buk ia la U Mynsiem ha kita ki sngi. Bad ngan pyni ki jingphyila ha ki bneng bad ha ka khyndew" (Joel 2 : 28-30).

Ha ka jingiadei bad ka 'jingpyndep,' U Blei hi u la dep kular naduh ki por myn-barim. "Namar kata, bakhmih, ngan leh pat ia ka kam phylla hapteng uae u paidlang, ka kam phylla keiñ bad ka dak khyllah" (Isa 29 : 14).

"Ka jingthmu jong nga kan ieng, bad ngan leh ia la ka jingsngewbha baroh .... Nga la kren, te ngan pyndep ia ka ; nga la thmu, ngan leh ruh ia kata" (Isa 46 : 10-11).

Kawei ka jingphylla kaba ngi shem ha ka 'jingpynpaw' bad ka jingpyndep' ka long ba ka jingpynpaw kaba la ai da U Blei la kham slem, ka dei ban wan urlong pat hadien da ka jingpynjia ia ka jingjia. Kaba la dep pynpaw lypa da ka 'dak' kan ym lah jah lano lano. U Blei u donbor ban wallam biang da ka jingpynjia pat. U Blei u long u 'nongwad' uba janai. U Blei u donbor ban khura ia kaba la slem. Un wallam ia kaba la dep pynpaw mynshua da ka jinglongkhuid bad ka jingthmu bahok : "kata kaba long ka lah long lypa ; bad kata ka ban sa long ka la long lypa bad U Blei u wad pat ia kata kaba la iaid jah noh" (Ekle 3 : 15). Kumno U Blei u lah ban leh ia kane ? Ia ka jubab la dep ai lypa ha ka ktien bakhraw jong u kumba u nongrwai Salm u phla : "ka bor ka dei ka jong U Blei" (Salm 62 : 11).

U Blei u pyniaid ia ki samoi bad ki por ha ka jingim jong ngi kat kum ka jingthmu ka

mon bakhuid jong u. U pynkylla ia ki sngi, ki bnai, ki aiom bad ki snem ka jingim u briew da kaba peit thuh ia ka 'dohnud' jong uwei pa kawei. U pyntyllun ia ka shalyntem jong ka jingmut barieh jong u ha ka histori jong ka jingim kiba la jied jong u. Kumta u Eklesia-stis u ong : **"Don ka aiom ia kiei kiei baroh, bad ka por ia ka jingthmu baroh haroh ka breng.. ka por ban iam, bad ka por ban rkhie, ka por ban sngewsih, bad ka por ban shad .. ka por ban ia piam ; bad ka por ban ym ia piam ; ka por ban wad, bad ka por ban jah noh ; ka por ban ri, bad ka por ban bred noh, ka por ban kad, bad ka por ban suh ; ka por ban sngap jar, bad ka por ban kren ; ka por ban ieit, bad ka por ban isih ; ka por ban ialethma, bad ka por ban iasuk"** (Ekle 3 : 4-8).

Ka bynta kaba kongsan kum ka khubor ha kane ka lynnong ka long ka **jingpynlyngkot** U Blei ia ka por. Ka Por ka hap ha ki kti U Blei. Dei tang ma u ruh uba donbor ban pynlyngkot, noh ia ka. Ha ka jingshisha U Blei u lah dep leh lypa ia kane. U Apostol Paul u iathuh ia ngi da kine ki ktien : **"ko parabangeit ba la pynlyngkot noh ia ka Por"** (1 Kor 7 : 29). U Blei ym tang ba u lah ban pynlyngkot, **hynrei u la pynlyngkot ia ka Per**. Ka jingkren u Apostol Paul ka don la ka jong ka khubor ha ka jingiadei bad ka jingim u briew ha kane ka pyrthei. Ka Per ka sah ka juh bad kumjuh. Hynrei kiei kiei ki jingjia kiba wan kylla stet ha ka jingim briew

ki wallam ia ka jingkyllapor kaba pher bak ly-bak na kaba mynshuwa. Ym don mano mano ba lah ban shemphang bad sngewthuh ia kane baroh namar ba ka long ka jingmaian Blei. Hynrei kaba donkam eh ia u briew shimet ka long ba haba u iohi ia ki jingkylla stet jong ki jingjia, u donkam ban kheĩn ia la ka por lajong. Hangne ngi ioh ia ka jingmut ba shisha ba ka por ka jingim u briew ka shad sawdong tang lyngba ki 'jingjia kiba shong pher' kiba wan jia ha ka jingim jong u. Ki jingjia kiba kylla stet katta katta ki i kumba ki pynkylla ne pynlyngkot ia ka Por.

Ka jingmut ba shisha jong ka jingkheĩn por u briew ka iahap tang bad ka por ka ku'rtā joag u. Kumta haba ngi iakren shaphang ka jingim u briew kaba lyngkot, ngim lah ruh khlem da iakren shaphang ka 'jingpynlyngkot ia ka Por' kaba wan long tang da ka jingkylla stet jong kiei kiei kiba jia ha ka ku'rtā kaba lyngkot. Lada 'U Blei u la lah pynlyngkot ia ka por', ngim dei ban sngewphylla ei ei namar u la lah dep leh lypa ia kane da kata ka aiñ kaba u la thaw hi ma u. Ha ka testament barim ka aiñ Blei ka ong: "Naba shihajar snem ha khmat jeng me ki long kum mynhynnin haba ka la leit noh, bad kum ka jingap kylliāng mynmiet" (Salm 9): 4). Ha ka testament bathymmai pat, ka aiñ U Btei ka ong: "Hynrei ia kane kawei wat klet, ko hep baleit, ba kawei ka sngi ka long bad U Trai kum shihajar snem, bad shihajar snem kum kawei ka sngi" (2 Pet 3: 8).

U Blei u long uba lah ban pynjrung ia ka Por kumba u long ruh uba lah ban pynlyngkot. Lada U Blei u pynjrung ia ka por ka bha shibun, hynrei kaba sngewsheptieng bad sngewshyrkhei ka long ba U Blei u pynlyngkot ia ka Por. Haba U Blei u pynlyngkot ia ka por, kiei kiei ki kylla khongpong bad ki kylla pyrdet. Ki jingkhimh lynti bad ki jingkyrmen jong ngi ki phai da khongpong. Ngikwah lynti ia ka babha, ka wan pynban da kaba sniew. Ngila khmih lynti ba kaba sniew kan leh bor ia ngi, pynban da ka jingleh ba phylla U Blei, u pynmih ia ka jingbha. Namarkata ngim dei ban buh ia ka jingkyrmen bad ka jingsngewshngaiñ ha kata kaba ngi don ngi long mynta, namar ka jingjia kaba tang ha ka shikhyllipmat ka wan ban pynkylla lut ia kiei kiei. U Blei um iakheiñ bad kiei kiei ki jong kane ka pyrthei, hynrei tang bad ka mynsiem u briew, kumba U Jisu Khrist u lah dep ialap. "Naba u briew un myntoi aiu, lada un ioh ia ka pyrthei baroh, bad un duh noh ia la ka mynsiem, lane u briew un iapli daei ia la ka mynsiem" (Math 16 : 26).

Dei namar kane ka daw ba ka ktien U Blei ka ban jur ia ngi ba ngim dei ban ñiewkor eh ia kane ka pyrthei bad kiei kiei ki jong ka : "Namar ka dur jong kane ka pyrthei ka iaijah noh" (Ikor 7 : 31). "Phi wat ieit ia ka pyrthei, lymne ia kita kiei kiei ruh ki-ba ha kata ka pyrthei. Lada uno uno ruh u ieit ia ka pyrthei, kata ka jingieit u Kpa kam don shuh ha u" (Ioan 2 : 15).

U Blei kum u nongbishar bahok u pyn-  
iaid da ka jingbha ia ka jingim kiba la jied  
jong u. U lah ban tynjuh ia ki, hynrei un  
ym iehnoh ia ki. U lah ban pyniaryngkat ia  
ka jingsngewsih da ka jingkmen. U Blei u la  
dep buh lypa ia ki por kiba kum kita. Ka  
jinglehniw bundien ka ioh lait na ka jing-  
pynshitom hynrei ka jingpynrem kaba rieh ka  
ap ia u bymriewblei. Kumta ha ka ktien U  
Blei lah dep buh lypa ia kine ki artylli ki  
jingkylly: "Balei ba u badonbor baroh um shym  
la buh ia ki por? bad balei ba kita kiba ithuh  
ia u kin iohi ia ki sngi jong u? (Job 24: 1).

U Blei u la lah dep pynlyngkot ia ka por. Ka  
nuksa kaba u la leh ka long ka jingpynlyng-  
kot ia ka karta briew. Ha ka por jong ki  
kthaw tymmen naduh u Adam haduh u Noah,  
ka karta briew ka la long kaba jrong. U briew  
uba la im slem eh ha kata ka por u long u  
Methuselah. "Te ki sngi baroh jong u Methu-  
selah ki la long khyndai spah bad hynriew  
phew khyndas snem" (Jen 5: 27). Hynrei na-  
mar ka jingbymdan ka pyrthei, U Blei u la  
bitar eh ia u briew bad u la rai ban pynlyng-  
kot noh ia ka karta jong u. "Te U Trai u  
la ong, U Mynsiem jong nga un ym ialah bad  
u briew janom, namat ba u hi u long ka doh:  
la Kumta ruh ki sngi jong u kin long shispah  
atphew snem" (Jen 6: 3). Katba nangmih ki  
por bad ki ia, ka karta briew ka la nang  
kham lyngkot. U Moses haba u la iohi ba  
kiba buh buh ki briew ki la iap ha ri khlaw  
na ka jingpynshitom ka pop jong ki, u la



iam haba u la shem ba kiba iap kim shym dei kiba la tymmen, namar ym don kiba ia kot sha ka karta tymmen. Kumta u la hikai ia ki khun Israel ba kin duwai kumne :—

“Ngi pynleit ia ki snem jong ngi kum ka jingiathuhkhanakai. Ki sngi ki snem jong ngi ki long hynñiew ptew snem, lane namar ba khlañ eh phraphew snem : pynban ka jingsarong jong ki ka long tang ka jingshitom bad ka jingsngewsih : naba ka la duh shen shen, bad ngi her noh... To hikai ia ngi ban ñiew ia ki sngi jong ngi, kumta ba ngi pynioh ha ngi ia ka dohnud ka jingstad” (Salm 90 : 9-12).

“La pynlyngkot noh ia ka por”, Ka lah ban mut :—

(i). La pyndep noh ia ki kam ki jam baroh hapoh ka por kaba U Blei u la buh.

(ii). La pynwai noh ia ka jutang barim, khnang ban ioh rung sha ka jutang bathymmai.

(iii). La pynshisha noh da ki jingleh kat kum kafa ka jingngeit kaba ki shakri jong U Blei ki kyrmen hapoh ka por kaba lyngkot.

(iv). La pynkut noh ia ka jingiathuhkhana kaba rim khnang ban sdang pat ia ka jingia-thuhkhana kaba thymmai.

(v). La khang noh ia kiei kiei kiba rim ki bymsngewtynnad khnang ban plie pat ia kiei kiei kiba khraw jong ka lawei badonburob bad baphyrnai.

(vi). La pynlyngkot noh ia ka por namar.  
ba U Blei u kwah ban pynim ia ki mynsiem  
ki briew jong u.

(vii). La pynlyngkot noh ia ka por khnang  
ba Un ioh pynjrang ia u tyllai ka jingaiei  
ha ki shakri baicit eh jong u.

**KA JINGPYNLYNGKOT IA KA POR  
KA LONG TANG KA JINGLEH U PLEI  
NAJRONG.**

(i). 'IA KI SNGI KA JINGLONG SAM-  
LA JONG U ME LA PYNLYNGKOT' (SALM  
89 : 45).

(ii). 'AH TO KYNMAW KATNO KABA  
LYNGKOT KA POR JONG NGU' (SALM  
89 : 47).

**Ka jingkylli mynta ka long:—**

Jia aju haba U Blei u pynlyngkot noh  
ia ka por ?

Ka ktien U Blei ka ai ia ngi ka jubab  
ba don kiei kiei kiba mih haba U Blei u  
pynlyngkot noh ia ka por.

"Ba kita kiba don ki tnga kin ioh long  
kum ki bym don shuh;

Bad kita kiba iam, kum ki bym iam shuh ;

Bad kita kiba kmen, kum ki bym kmen  
shuh;

**Bad kita kiba thied kum ki bym don shuh ;  
Bad kita kiba pyndonkam ia kane ka pyrthei,  
kum ki bym pyndonkam eh ia ka'' (1 Kor 7:29 31).**

**Ka por ka iaïd sted bad ka por kam ju  
ap iano iano. Ka por ka mareh sted. Ka jing-  
kyrkhu ba khraw tam ba ki khristan ki duh  
borabor ka long namar ba ki pynsyrwa kai  
ia ka por. Ngi pyntud ia ka por ban duwai.  
Ngi pynsahteng ia ka por ban pule ia ka ktien  
U Blei. Ngi pynlynñiar ia ka por it ialade bad  
pynbeit ia la ka jingim. Ngi leh bym suid-  
ñiew ha kaba iasuk bad U Blei. Ngim wad  
jaka ban pynkhuid bad pynjanai ialade. Ngim  
shim ia ka lad ban pynkhreh ha kaba iashem  
bad U Blei ha kano kano ka por.**

**Bun napdeng jong ngi ngim ju nang ban  
ñiewkor ia ka por. Hapdeng ka jingbun jong  
ki kam kiba ngi dei ban leh bad pyndep  
hapoh ka kynñan jong ka por ba U Blei u la  
buh ia ngi, ngim ju dei ban klet ban leh artylli  
kiei kiei -**

**(1). Ngi dei ban san ha ka jinglong jingim ba  
kynja mynsjem : Katba ka ka'rta ka nang beh  
sha khmat, ngim dei ban ran shadien, hynrei  
ngi dei ban tur shakhmat.**

**(2). Ngi dei ban trei dep ia ka kam U Blei :  
Ngim dei ban khmih lynti ban iohphong pan-  
sngiat syntiew. Ngim dei ban pynsahteng ia ka  
kam kaba ngi lah ban pyndep mar mar ia ka,  
namar ngim ai jingkhein ha ki briew, hynrei  
ha U Blei.**

## KA SNGI KA LA NOH

---

Ka Sngi ka don la ka jong ka por mih jong ka. Ka Sngi ka don ruh la ka jong ka por sep jong ka. Ka aiñ kaba U Blei u la thaw bad buh kyrpang ia ka sngi ka long ba hadien ba ka la mih bad kiew shajrong, ka dei ban leit phai sha la ka jaka sep. Ka sngi ka dei ban pyndep ia la ka jingiaid lynti jong ka kat kumba U Blei u lah buh kyrpang. Hadien ba ka la mih ka dei ruh ban sep. Bunsien kum ki briew ngi ju kham kynmaw ia ka Sngi tang ha ka por mih bad ha ka por sep. Haba ngi la khie thiah dang step, ngi ju kwah ba kan mih noh kloï ka sngi. Haba ka la kiew shajrong, ngi klet noh ia ka namar ka jingbun ki kam ba ngi hap pyndep. Nangta ynda haba ngi la jan pyndep ia ki kam baroh la janmiet, ngi kynmaw pat ia ka por sep. Ngikwah ba kan sep noh namar ba ngi la thait na ki kam ki jam ba ngi la trei baroh shisngi. U briew um don satia ka bor met da kaba un shu trei sah. Wat kat ka sngi ruh ka don la ka por mih. Hadien ba ka la tawiar katto katne, ka leit phai noh sha ka jaka sep jong ka.

Ka Jingmih bad jingsep jong ka Sngi ka long tang ka jingleh U Blei. Dei U Blei keiñ uba kheiñ ia kiei kiei baroh hapoh ka sngi.

Naduh ka por ba ka sngi ka mih bad haduh ka por sep, U Blei u pyni ia la ka jingkhraw ha ka khyndew. Kumta u nongrwai Salm u iathuh ia ngi ba hapoh ka por mih bad ka por sep, U Blei u pyntrei ia ka kam jong u ym tang ha ka jingim briew, hynrei ruh ha ki jingthung jingtep, ki mrad ki mreng, ki sim, ki dohkha bad ki khfiang baroh kiba ha ka khyndew. "U Blei, U Blei keiñ, U Trai u la kren, bad u la khot ia ka khyndew naduh ka bamih ka sngi naduh ka jingsep jong ka" (Salm 50 : 1).

Katba ka Sngi kam pat sep, u briew u dei ban ialeh katba lah ban pyndep ia ki kam ki jam baroh. Ngì pyndep ia ki kam ki jam baroh haba dang don ka sngi. Ka miet kam don jingmut ia u briew uba kwah ban leh bad pyndep ia ki kam haba dang shai ka sngi. Ngì ju khot ruh ia ka por sepsngi, "ka por jan-miet". Ha ka jingiathuhkhana jong ki saw gospel, ngi kynmaw kumno ba U Jisu Khrist u ju sngewtynnad ban trei bad ialap hapoh ba dang don ka sngi. Ynda la sep ka sngi pat, u ju kham pynleit ia ka por jong u ha ka jingduwai. Ka kambah kaba khraw kaba U Jisu Khrist u la leh shuwa ba kan sep ka sngi, ka long ka jingbsa ia ki san hajar ki paid-bah da ki san tylli ki kpu bad artylli ki dohkha. Ka la long kumta ka jingbatai ia ka por bad ka jaka ha kaba la jia kane ka kambah : "Haba ka la noh eh ian ka sngi, te ki synran jong u ki la wan ha u, bad ki ong, kane

ka long ka jaka kynjah bad ka la noh eh ian"  
(Mark 6 : 35).

Dei hamar ka por basep ka sngi ba U Jisu Khrist ruh u la pynkhiah ia kiba bun ki bapang da ki bunjaid ki jingpang. "Te haba la sep ka sngi, baroh kat kiba don kiba pang da ki bunjaid ki jingpang, ki la wallam ia ki ha u, te u la buh ia la ki kti halor uwei pa uwei na ki, bad u la pynkhiah ia ki" (Louk 4 : 40).

Ka por sepsngi ka dei ka por jong ki kambah U Trai. Ma ngi ruh kum ki nongpop bathait bad khia ka jingkit, ngi donkam ban ioh ka jing-pynkoit na U Trai Jisu ia ki jingpang jong ka doh bad ka mynsiem. Shuwa ba ka sngi kan sep, ngi dei ban khot kyrpad kloi kloi ia U Jisu ba un pynkhiah na ki jingpang ki la bat slem ia ka met bad ka mynsiem kham-tam eh. Ha ka kot jingrwai jong ka Balang Presbyterian jong ngi, ka jingrwai "Janmiet ha ban sa sep ka sngi" ba la buh da u Rev. G A. Jones, u mishoneri barim jong ngi ka don ban kyrsiew ia ngi mynta ruh :—

Janmiet ha ban sa sep ka sngi,  
Ki nongpang ki ialang kynhun;  
La don bun jait ka eh ka shon,  
Ki baroh ki la shem jinghun.

Sa shisien, Trai kum mynbarim,  
Ma ngi ruh ngi kner la ki kti;  
La ngim ioh tba ka met jong Me,  
Ngi tip ba Me Me don bad ngi.

Ko Nongpynim ba ieit iarap,  
 Ka sngewsih bad ka pang ka shon;  
 Ki don ki bym ju ieit ia Me,  
 Kiba phaidien na Me ki don.

Hynrei, ngi baroh, Trai, ngi thrang,  
 Ka jingjahthait bad ka jingjop;  
 Dei kita ba ieit thoin ia Me,  
 Kiba sngewkhia ia la ki pop.

Me la shah pynshoi kum ma ngi,  
 Ko khun U Blei ba ju sngewlem :  
 To jeng ha syndah la ki briew,  
 Haba ka lawarding ka rhem.

Ka bor ka kti jong Me ka sah,  
 Ka jingshahjop Mem ithuh hi;  
 Ko Nongpynkhiah sha Me ngi kyang,  
 To isynei bad sngew ia ngi.

**Ka por janmiet ka long ka por ba ka sngi ka noh ban sep. "Ka sngi ka la noh" : ka don ki khubor kiba kyrpang ha kane ka kot. Ka lyn-nong ka wallam ha ki jingmut jingpyrkhat jong ngi ia kaei kaba U Blei u la dep lypa. Ka "khubor ksiar" ba ka ktien U Blei ka kren ha ki jingmut kiba rieh ka thew shaphang ka jingleit noh ka mynsiem briew na kane ka pyrthei shongbasa. Ym lah ban buh da kawei pat ka jingmut nalor kane. Ju don uno uno u briew uba lah ban khang ia ka ka jingleit noh jong kawei ka mynsiem briew ? U Blei u la dep buhlypa ba ka dei ban jia.**

“Ym don u briew uba donbor halor ka mynsiem ban bat ia ka mynsiem lymne uba donbor halor ka sngi ka jingiap” (Ek’e 8 : 8). Kumta ong shuh kawei ka kyntien briew—“Kata kaba la dep leh yn ym lah ban ym pynleh” (“That which is done cannot be undone”). “U Blei um long u briew ba un lamler, lymne u khun u briew ba un kylla kabamut : ia kaba u la ong, un ym leh ? Lane ia kaba u la kren, un ym pyn-dep noh ? (Jingkhein 23 : 19).

Ka por ha kaba ka sngi ka noh, ka long ka por iakhlad. Ka long kaba kynjah, kaba tmang kaba sngew marwei khlem nongiarap. Ka long ka por jong ka jingjaw ki ummat. Ka long ka por ha kaba uba shah iehnoh marwei um lah khlem da rwai shaphang ialade, haba u iohi ba ka jingleit pilgrim jong ka mynsiem ba lywait ha pyrthei ka la kut.

“To shong bad nga, Ah Trai, ka sngi la noh,  
Ka jan ka miet, jingdum ka tap baroh;  
Ki nongiarap ki duh, kyrshan kim lah,  
Ah Me ka bor nongtlot, to shong bad nga.

Ah ba lada U Blei un iarap ia nga bad ia phi ba da kaba pule ia kane ka kot, ngin peit it ialade bad shlm jinghikai khnang ba ngi ruh ngin nang ban pynkhreh ialade, namar shisien ka sngi ngin hap ban rwai biang ia kane ka jingrwai : “Ah Trai to shong bad nga.”

“Ka la jan sep ka sngi jingim jong nga,  
Ki jingsngewbha pyrthei nang jah nang jah ;  
Ki kylla tlor ki iap, ym don ba sah,  
Ah me U bym jukylla, shong bad nga.”



Ka jingim jong ngi ha kane ka pyrtnei kan kut ha kawei ka sngi ha ka jingong "ka sngi ka la noh". Ka pyrtnei sngi bad ki jing-sngewbha ngin sa iehnoh. Hynrei kaba donkam eh ia ngi ka long ba haba ngi dang dei ban iaid lynti sa shipor ha kane ka pyrtnei, ngin hap ban khot ia U Jisu ba un wan sahmiat ha ka iing kaba ngi shong.

Lynda ngi khot lypa ia U Jisu Khrist ba un wan sahmiat ha ka Ing jong ngi, kumno ngin leh haba ka sngi kan sep? Ka la long shisha kumta ba ki arngut ki synran hamar ka shiteng lynti, katba kiba dang leit ha ka lynti sha Emmaus, kim shym la ithuh satia ia ka dur jong U Jisu Khrist uba la mihpat na kiba iap bad uba la leit lem bad ki. Kim shym la poi kynmaw ba u dei U Jisu uba la iaid ryngkat bad ki. Kumta ka jingiathuhkhana ka ong, "Ki la poi te hajan kata ka nongrit sha kaba ki leit: u te u la leh ialade kum u ban sa leit kham jngai. Te ki la kyrpad ia u, ki da ong, To sah bad ngi: naba ka long janmiat, bad ka sngi ka la noh. Te u la leit hapoh ia ka ban sah lem bad ki" (Louk 24: 28 - 29).

U Jisu, um dei tang ban shu wan kai mynsngi, hynrei u dei ruh ban da sah miat ha iing jong nga bad jong phi. 'Ka sngi ka la noh,' ka dei ban lam ia ki jingmut jingpyrkhat jong ngi ruh sha 'ka Ing ha Bethania' kumba nga la dep phawer shisien ha ka poitri ha kaba kut jong ka kot.

"Ka khubor ia ngi long,  
 Ing Bethania ka ai,  
 Kum hangta keiñ Jisu Un shong;  
 Ingtep ba suk janai.  
 Ko Jisu ! ba sngewrit !  
 Ha Ing jong nga sahmiat;  
 Ia khawai lem bad nga shong sah,  
 Shaduh ki 'yrta bah".

'KA SNGI KA LA NOH' : Ka kdew shaphang ka jingjia kaba la dep jia, kaba nang jia bad ka ban iai jia. Ka jingleit noh ka mynsiem na pyrthei ka dei ka jingleh U Blei hi. La dep pynpaw ia ka bad ka dei ban jia long. "Waw uei u ban im haba U Blei u leh ia kane" ? (Jingkheñ 24 : 23).

Kaba donkam ia ngi ka long ba kum kiba ngeit ngi dei ban pynlong ia ka jingkañia ainguhthang da kaba pyndem ialade ha ka mon bakhuid U Blei. U Abraham u la kohnguh ia kata ka jingpyniaid U Blei ia u, kumba u la ngeit ha U Blei ba un long u nongiohpateng ia ki jingkyrkhu "Bad u la ngeit ha U Trai ; bad u la ñiew ia kata ia ka ban long ka hox ia u" (Jen 15 : 6). U Blei u la kular ban don ryngkat bad u Abraham da kaba u pynskhem ia kata da ka dak shynna, bad ka jingipaw. Nyngkong U Abraham u la ong, "Ah Trai JEHOBAH, nato da kaba kumno te ngan loh tip ba ngan lohpateng ia ka ? Bad U Trai u la ong ha u. To shim ia nga ka masi lud kawei kaba laisnem ka rta, bad ia ka blang kaba laisnem ka rta,

bad u langbrot uba laisnem ka'rta, bad ia ka lyngdkhur kawei, bad i khun paro ruh iwei. Kumta keiñ u la shim sha u ia kine baroh bad u la phiah arliang ia ki.....bad haba ki khlieng ki la iawan hiar halor kita ki met iap, U Atram u la beh noh ia ki. Bad haba ka sngi kan sa sep noh, la shoh samthiah eh ia U Abram; bad, ha khmih, ka jingsngewkiuh bad ka jingdum ka bakhraw ka la ngat ha u" (Jen 15 : 8 - 12).

"Ka la jia ruh ba haba la sep ka sngi, bad ba ka la dum tliw tliw, ha khmih ka lawar bamih tдем, bad ka sharak ba mehing ka khii hapdeng kita ki dkhot" (Jen 15 : 17).

'Ka sngi ka la noh' : Ka pynkynmaw ruh ia ngi ki nongpule shaphang ka jingiathuhkhana kaba la dep jia ha ka jingim u Abraham, kaba long kum ka 'komentari' ia ngi ruh. "Bad ka Sara ka la iap noh ha Kirjath-arba; kaba long ka Hebron ha ka ri Kanaan : bad u Abraham u lawan leh sngewsih namar ka Sara, bad ban iam namar jong ka" (Jen 23 : 2). Ym tang katta u la pyndep ia la ka kamram da kaba lehurom ia ka met iap jong ka, u da wad ia ka jaka tep ia ka da kaba thied ia ka lyngkha bad ia ka krem Makhpelah na ki khun U Heth : "Nga long u nongwei bad u nongwanhap hapdeng jong phi : to ai duh ha nga ia ka jaka tep hapdeng jong phi, khnang ba ngan joh tep ia la kaba iap ha khmat jong nga" (Jen 23 : 4).

Ki khun u Heth ki la ai sngewbha ia ka, hynrei u Abraham u sngewdei ban da 'siewdor' ia ka. "Bad u Ephron u la iathuh ha u Abraham, u da ong ha u, Ko kynrad, to sngew ia nga : kaba sawspah shikel ha ka rupa; kata ka long aiu eh hapsedng jong nga bad me ? To tep noh namar kata ia ka baiap jong me. (Jen 23 : 14, 15).

"Bad ynda kumta U Abraham u la tep noh ia ka Sara ka tnga jong u ha kata ka krem jong ka lyngkha ka Makhpelah (Jen 23 : 19).

'Ka por noh ka sngi' ka long ka por kabakut jong ka jingim briew. Ka long ka por ba kiba ieit ba thoin jong ngi ki leit noh na kane ka pyrthei shong basa. Ka long ka por kaba pynjaw ummat ia u 'pilgrim' uba dangsah ha pyrthei. Kumta ong ka jingrwai Presbyterian jong ngi :—

**Ka jingleit noh ki lok**

**Ki lok jong nga ki nang leit noh,  
Shuwa jong nga wei pa wei ;  
Ki da iehnoh ia nga marwei,  
Kum u pilgrim ha pyrthei.**

**Ynda ngi la ju iaaid ryingkat,  
Ha ka ri jingjynjar bah ;  
Sngewsih ba ngi dei ban khlad noh,  
Ba jan poi sha ling i pa.**

**'Ka por noh ka sngi' ka long ka por kaba ngi donkam ban iashem ia U Blei. Kiba**

dang dei ban leit noh, bad kiba dang dei  
 ban sah ha pyrthei. Baroh ar ki donkam ia  
 ka bor U Mynsiem bakhuid ban pynim pyn-  
 shait. Uba la iap bad uba dang im ki don-  
 kam ban ioh ia ka jingpyntngen na U Myn-  
 siem bakhuid, kumba ma ngi ki presbyterian  
 ngi dang rwai haduh mynta ha ka jingkyrmen  
 ban iohpdang ia ka bor kaba kum kata.

### **'Ka Bor U Mynsiem Bakhuid'**

**Ko Iyer byneng ia mynta beh,**  
**Ba ka sngi kan sa noh ;**  
**Namar ka kyrteng jong Me theh,**  
**Mynsiem, jingshait ngin ioh.**

**Ah bor byneng bym ju shah jop,**  
**Pynpaw ia uba iap ;**  
**Ka jor ka snam i'u briew b'la ngop,**  
**Sha ka jingjot ban sa hap.**

**'Ka por noh ka sngi" ka long ka por jong**  
**ka jingaiei ba kynja bneng. Ka long ka por**  
**bad ka ia jong U Mynsiem bakhuid ha ka-**  
**ba ngi kum ka balang ngi donkam ia U**  
**Mynsiem bakhuid ba un iatrei kyrhai hapdeng**  
**jong ngi shuwa ba kan wan ka miet. Ka long**  
**ka por ha kaba ka pyrthei ruh ka dei ban**  
**iohmad ia ka jingtrei jong u.**

“Ko Nongpynim Pyrthei,  
 To phah Mynsiem ban trei ;  
 La noh ka sngi :  
 To theh ka jingaiei,  
 Pynkloi to ai kan shlei ;  
 Ha baroh ka pyrthei,  
 Pynim ia nga”.

‘Ka por noh ka sngi’ ka long ka por ha  
 kaba ki riewngeit kiba la pynkhreh lypa ia la  
 ka mynsiem ban her noh sha ka ri ka jingsuk  
 ki/sngewtynnad ban ong : “Kham lah...ka sngi  
 ka jingiap ban ia ka sngi kha” (Ekle 7 : 1).  
 Ka long ka por ha kaba ki riewkhuid jong  
 U Trai Jisu ki ioh jahthait ha ka shadem  
 jong u. “Suk kita ki nongiap kiba iap ha U  
 Trai naduh mynta shisha, ong U Mynsiem, ha  
 kin ioh shongthait noh na ki jingtrei minot  
 jong ki naba kita ki jingleh jong ki ka iabud  
 ryngkat bad ki” (Jingpyn 14 : 13). Ka long ka  
 por ha kaba u nongrwai salm u kren sha-  
 phang ka por ka jingiap ki riewkhuid. “Ka  
 bakordor ha khmat U Trai long ka jingiap ki  
 riewkhuid jong u” (Salm 118 : 15).

‘Ka por noh ka sngi,’ ka long ka por ha  
 kaba ngi dei ban buh ia ki baieit jong ngi ha  
 pch ka ‘synduk’ bad pynhiar ia ka ruh ha trai  
 ka jingtep, ban tep ha ka khyndew bad sieh  
 ia ka diengphna halor ka jingtep kaba don  
 ka jingthoh : R. I. P. (Rest In Peace - To thiah ha  
 ka jingsuk). Ka por noh ka sngi ka long ka  
 por ha kaba ngi ieng ha ka jingtep, ban ‘khu-  
 blei’ ia ka mynsiem kaba la leit noh, kum-

ba nga la dep buh ia ki kyntien ha ka jingrwai  
 'Haba tep ia kiba iap'—kaba don ha ka kot  
 jingrwai jong ka balang Presbyterian jong ngi.

'Khublei ka sngi la sep,  
 Ngi ieng h'u lum jingtep;  
 Namar diengphna ngin ym iakhlad,  
 Ha ka step jingmihpat.'

'Ka por noh ka sngi,' ka long ka por ha  
 kaba ka 'buroin jong ka diengphna' ka wan  
 'suit rong ksiar' ha u 'nongsngap' bad u nong-  
 iohi' ia ka 'JINGKIENG KSIAR' kaba phyl-  
 la bad kaba taplup ia ka longrynieng jong u.

'Ka shkor ba sngew, ka khmat ba i,  
 Dohnud ba sngewrit ai;  
 Tyngshaiñ nangto najrong ha ngi,  
 Jingbha kan man kyrhai.

## 12

### KA MIET KA WAN

---

Hadien ba ka sngi ka la sep, ka poi sa ka por  
 miet. Ka miet ka dei ban bud ia ka sepngi. Ka  
 'Sepngi' bad ka 'miet' kim iaingai. Ki iadon  
 mar ha syndah. Kum ki khristan kiba ju  
 pule ia ka Ktien U Blei, ngim dei ban klet  
 ba baroh na ngi ngi dei ban iakynduh ia  
 ka miet. Namar ba kane ka kot ka iadei bad  
 'ka jingim jong ka mynsiem briew' kaba 'la leit

noh' na ka pyrthei, kumta ka long kaba don-  
kam ba ngin iakren ruh khyndiat shaphang ka  
'miet' jong ka jingimbriew kaba dang sah ha  
pyrthei. Kiba mad ia ka jingduh ka bakhraw  
ha ka longiing longsem na ka jingleit noh ki  
baieit bathoiñ, ki ju iakynduh ia kaba kum  
kata ka miet ha ka jingim jong ki. Lada ngin  
pyrshang ban kylli na ki parabangeit kiba la  
mad ia kane ka jingjia, ngin ym lah khlem  
da ong ha ki ia ki ktien jong u Isaiah u  
nongiathuhlypa : 'Ko Nongap, kumno shaphang  
ka miet ? Ko Nongap, kumno shaphang ka miet ?  
U nongap u la ong, ka step ka wan, bad ka miet  
ruh : Lada phin kylli, to kylli phi, ale" (Isa  
21 : 11, 12).

Ka 'miet' jong ka jingim kiba dang im, ka  
long ka miet jong jingdum mynsiem, jingsha-  
iong jingmut bad jingduhbor. Ka buh ia ka  
mysiem kaba dang im ha pyrthei ha ka jing-  
longmraw ba kynja mynsiem. Ka long ka miet  
jong ka jingtynjuh khraw. Hynrei u riwngait  
pat uba ju shaniah skhem bad iaikhot kyr-  
pad ia ka kyrteng U Trai, um ju pyndkut  
ia ka jingiadei jong u bad U Blei, bad u iai  
duwai pynban—

'Katba nga iaid lyngba,  
Jingtynjuh khraw bad ma;  
Ialam ia nga,  
Ka miet ba dum pynshai,  
To ñiad ummat khuslai,  
Na Me, Ah Trai, wat ai  
Ngan iaid sakma.'



Ha u 'pilgrim' bad 'nongiaidwir' ia uba U Blei u 'ieit' bad u ithuh' ia ka dohnud jong u, u ju wan ban pynpaw ialade ha u wat ha ka por miet da kaba u kular ban wan pyllait bad iarap ia u. Ka 'miet ba shisha' ka dei ban jia long syriem kum ha kata ka rukom ia id lynti u Jakob ha ka por ba u dang leit sha Padan Aram, mynba u la phet iap na u Iso u hynmen jong u. "Bad u lap ba poi ha kata kawci 'ka jaka' bad u la sahmiel hangta, naba la sep ka sngi, bad u la shim na ki maw jong kata ka jaka ia ka ban pynlong ia la ka syngkhlieh bad u la iohthiah ha kata ka jaka" (Jen 28 : 11).

Ka 'miet ba shisha' ka dei kata ka por ha kaba ngi da sahmiel bad thiah ha ka syngkhlieh. Ka la jia shisien kum ia ia nga ruh ha ka por ba nga dang leit thiah pang ha Khasi Jaintia Presbyterian Synod Hospital ha u snem 1987 naduh 22 tarik u June haduh 24 tarik u August. Ha kajuha ka kamra (No 26) ha ka taiew ba nyngkong eh jong ka jingthiah pang nga la ioh ia ka jingithuhpaw ha ka jingphohsniew, ia kaba nga la dep iathuh bad pynbra ruh ha ka kot kaba nga la dep thoh bad pynmih hadien ka jingthiah pang kaba kyr-teng : 'Ka jaka Jrong ha Ramah'. Shaphang ka jingithuhpaw jong nga kaba la long ha ka jingphohsniew, ngan iathuh biang kumne :—

"Ha kawei na ki miet jong ka taiew ka banyngkong jong ka jingthiah pang, la jia ka jingjia kaba phylla hadien ka shiteng syn-nia ha ka por shibaje (l. a m) mynstep. Ha

katei ka miet nga la don ha ka jingiohthiah  
 lyngngai bad nga la iohipaw ha ka rukom  
 jingphohsniew ba la wan arngut ki Rangbah  
 briew kiba wan ieng ha syndah ka jingthiah  
 jong nga shaphang liang kadiang. Uwei uba  
 khambeh bad bhabriew u ieng ha pyr-  
 shah ka khmat jong nga. Ka jingriam  
 jong u ka long da ki jaiñ kiba lieh. U  
 deng u panpoh uba itynnad. Hamar pdeng  
 u panpoh u don ka kynja jingshai kaba phyrai  
 thaba syriem kum ka jingtbeh dieng (Torch  
 light). Uwei pat uba kham rit ka ryning  
 bad uba i donburom u ieng harum jong u,  
 khyndiat mar syndah hi jong ka jingthiah.  
 Katba une uwei uba ieng ha pyrshah jong  
 nga u peit shlip ia nga da ka khmat kaba  
 i ieit bad i sngewbha, u da pynthaba ia ki  
 khmat jong nga da kata ka jingshai kaba  
 mih na u panpoh jong u, uta uwei pat  
 uba ieng harum, nga iohsngew ba u khylliap  
 jaiñ bad buh halor ka jingthiah jong nga.  
 Katba u nangkhylliap jaiñ artat, nga iohsngew  
 ba ki kti jong u ki dei ha ki lbong bad ki  
 kjat jong nga. Kane ka jingieng ki briew arngut  
 ha syndah jong nga ka la long slem, lehse  
 duna ia ka shikyntien kwai ei ei. Hadien  
 nangta ki la shu jah noh jar. Nga ruh mar  
 kumta nga la kyndit napdeng kata ka jing-  
 iohthiah, bad nga la sngewphylla kumno la  
 wan rung briew hapoh ka kamra, haba nga  
 la dep khang huk ia ka jingkhong. La pynlyng-  
 ngoh eh ia nga, namar haba nga la khie ban peit  
 ia u huk, la dep khang bha ia ka jingkhong.

Na kane ka jingithulipaw kaba la long ha ka jingphohsniew, nga sngewthuh shai ba ngam long marwei namar U Blei ha uba nga la shaniah bad aiti lut ialade u long lem bad nga. U Blei u la phah ia ki angel hapoh ka kamra thiahpang ban wan jngoh ia nga. Ka rukom leh jong kine ki angel ia nga ka don la ka khubor kaba kyrpang, kaba kren bad ktah jur ia nga shimet marwei.

Ki angel ki dei ki shakri jong U Blei bad ka jingshakri (ministry) jong ki kam pat kut hadien mynta. Kumba ka la long naduh ki por kiba mynhyndai, kumta ruh ki angel ki dang long haduh nynta. Ki long ki nongiarap ba hajan eh jong ngi, khamtam haba ngi sngewkynjah, sngewtmang, sngewsheptieng, sngewartatien, sngewduh jingkyrmen bad sngew-sih khuslai.

Ka ktien U Blei ka la batai shaphang ka jingshakri jong ki angel kumne : "Hato kita baroh kim long ki mynsiem ba shakri, ia kiba la phah noh ia ka ban shakri na ka bynta kita ki ban sa ioh ia ka jingpynim" (Heb 1 : 14).

Ka miet ka wan ryngkat bad ka jingialeh batur ha kaba U Blei u kren ha uba 'shah tynjuh' syriem kum kata ba la ong da U Jakob, haba u la bthah ia ki shakri ioh ba U Iso un kylli ia u da ka ba ong "Me dei u jongno? bad shaei men leit? bad ki jongno kine ha shuwa jong me? (Jen 32:17).

Ka miet ka wan ha ka jingim jong uba

ngeit ha kaba u dei ban wad ia ka mon bakhuid U Blei ha ka Peniel ba kynja mynsiem khnang ba un iohbor bad nangjop. Ka la long shisien kumta ha ka jingim jong U Jakob. "Bad ia U Jakob la ichnoh marwei, bad uwei u briew u la iaieh bad u haduh ban da shai byrngut. Te ynda u la iohi ba um lah jop ia u Jakob, u la ktah ia u tlongmat shyieng ka skhep jong u. Kumta la kheñ khylliah u tlong ka mat shyieng ka skhep ka jong u Jakob, da kiba u ialeh bad u. Bad uta u la ong, To pyllait nob ia nga, naba kan sa shai byrngut. Hynrei u la iathuh, Ngan ym pyllait ia me, lynda me da kyrkhu keñ ia nga. U ruh u la ong hau Jakob, kaei ka kyrteŋg jong me? Bad U Jakob u la iathuh, U Jakob. U Angel pat u la ong, Yn ym khot shuh ia ka kyrteŋg jong me, U Jakob, hynrei U Israhel: naba kum u syiem me la ioh bor bad U Blei bad ki briew, te me la jop ruh".... Bad U Jakob u la kylli ia u, bad u la ong, to iathuh, nga kyrpad ia me, ia ka kyrteŋg jong me. U te u la ong, Balei ba me kylli ia kane shaphang ka kyrteŋg jong nga? Bad hangta hi u la kyrkhu ia u. Bad u Jakob u la khot kyrteŋg ia kata ka jaka Peneil: naba nga la iohi ia U Blei markhmat, bad ia ka mvnsiem jong nga la pyllait im putet" (Jen 32 : 24 - 32) .

U Blei u la dep pynkhreh lypa ia ka :Prokram' jong ka 'miet' ha ka jingim uba ngeit. Ka miet kan ym wan lynda uba ngeit u dei

ban iakynduh shuwa ia ka sepngi. Pynban ha kum kata ka jingdum jong ka miet, uba ngeit u iohi ia ka jingshai. Kumta kawei ka proberb ka ong, (Hadien ka sepngi, ka don ka jingshai— (After sunset, there is light).

Namar ba ka sepngi ka dei ban wan da ka jingiathuhlypa, ka miet ruh ka wan da ka prokram ba la pynkhreh da U Blei na jrong. Kane ka miet kan iaid shikylla ban pyndep ia la ka jong ka por jong ka. La ka miet ka i slem ban jah, hynrei kan sa kut noh. U Blei um ju shah ba ka miet kan sah slem ha ka jingim uba ngeit. Dei tang haba ngi shong hajan U Jisu Khrist ba ngin ym sngewthuh ia ka jingwan jong ka miet. U nongrwai shem mynsiem u iathuh ia ngi ba ngi dei ban 'iaishah' da kaba 'ap', ia 'ka miet' ba ka kan wai noh.

'Hangne nga kwah ban iai ap,  
Ap ba kan wai ka miet ;  
Ap ba kan mih ka jingshai,  
Na seion lum baieit'.

U Riewngeit um lah ban iai ap marwei la u shong ha syndah U Jisu. U donkam ia ki paralok baieit eh jong u kiba mad bad ioh bynta na kijuh ki jingsngewmynsiem bad jingphla shem mynsiem jong u. U khot ia ki paralok ba kin iakyrshan lem ha ki jingduwai jong ki na ka bynta jong u, katba u dang iaid lyngba ka 'jingap miet kaba nyngkong', 'ka jingap miet kaba ar', 'ka jingap miet kaba lai', bad 'ka jingap miet kaba saw'.

**"Naba kumta to phin ia pyntngen paralok,  
bad to phin nang iatei paralok, kumba phi  
leh ruh" (1 Thess 5 : 11).**

**'Ap, haduh ba jingdum kan wai,  
Ap, jingpynkhih dew la jia ;  
Kyrmen ; la sngi phyrnai lashai,  
Hadiep u lap praw la phai.**

**'Wait, till the darkness is over,  
Wait till the tempest is done ;  
Hope for the sunshine tomorrow,  
After the shower is gone'.**

**La ka miet ka long kaba dum, hynrei U  
Blei u lah ban pyntip ei ei wat napdeng ka  
jingdum. Dei ha ka por miet ba U Blei u  
kren. "Kawei pa kawei ka miet ka iaipyni ia  
ka jingtip". Ym don ka jingkren lymne ka ktien,  
ia ka jingsawa jong ki ym lah ban iohsngew  
kein" (Salm 19 : 2, 3). Ha ka jingdum jong ka  
miet U Blei u kren tang ha ka tyndong shkor  
jong ki briew ki jong u ha kiba u la pyn-  
kyrmen ia ka sngi phyrnai.**

**Dei ha ka por miet ba U Blei u pynkyn-  
maw ia u riewngeit shaphang ka jingkyrmen  
jong ka kti kamon, bad ka jingbyslarkam  
shuh jong ka kti kadiang : "Ka dohnud u  
riewstad ka don sha ka kti kamon jong u :  
hynrei ka dohnud u babieit sha kadiang jong**

u" (Ekle 10 : 2). Namarkata u Nongthoh u khot ia ki nongpule ba kin pynshongdor bha ha ki jingduwai jong ki ioh ba kin klet noh ia u 'khlur ba khih phyrnai' hapdeng ka jingdum jong ka miet : "Ah Trai, to pyrkhat ia ka jingpuson jong nga" (Salm 5 : 1).

'Lada sdang kem iongrciñ ka miet,  
La jingkyrmen ka i jing i ;  
Kam sah jingdum shuh jong ka miet,  
Tyngshaiñ U khlur baphyrnai ?

'If in the dusk of the twilight,  
Dim be the region a far ;  
Will not the deepening darkness,  
Brighten the glimmering star ?

U Riewngeit uba ju iakynduh ia ki syrngiew iong jong ka miet, um ju khuslai shuh haba ka 'miet ba shisha' ka wan lap ha ka jingim jong u. U riewngeit uba la mlien ban shong ha ka jingdum, um don jingsheptieng ban iaid lyngba ka 'miet ba shisha' ha ka jingim jong u. Kumta u lah ban 'pynkyrmen' ha kito kiba iaioh bynta ryngkat bad u ruh na ka jingkyrmen kaba im hñ U Blei. '

"Te U Blei u jong kata ka jingkyrmen, to un pyndap ia phi da ka jingsuk baroh ha kaba ngeit, khnang ba phin ioh nangroi kyrhai ha kata ka jingkyrmen, da ka bor U Mynsiem bakhuid' (Rom 15 : 13).

“Haba ka miet kan tap ia ngi,  
 Balei ki dohnud kin swai ?  
 La dum synñia ka lap ia ngi,  
 Ap, namar ka la jan shai”.

‘Then, when the night is upon us,  
 Why should the hearts sink away ;  
 When the dark midnight is over,  
 Watch for the breaking of day’.

Haba ka miet ka wan, ka wan rah ryngkat  
 bad ka jingsngew lyngngoh ha u brierw uba  
 iohi ia ka jingdum jong ka. Lada ka miet  
 ka long kaba jrong lei lei kum ha ka por  
 tlang, ka nang kham pynlyngngoh shuh shuh.  
 Pynban U Blei um ju sngewtynnad ban buh sah  
 ia u riewngeit jong u ha ka jingdum. Ka  
 miet ka lah ban long kaba jrong, hynrei  
 ka jingapmiet ka lah ban long kaba khadduh.  
 Kumta u nongrwai shem mynsiem u ong :-

“Shi hajar snem ha khmat jong Me,  
 Ki long kum shisngi hi ;  
 Kum jingapmiet ba khadduh eh,  
 Ha bym pat mih sngi”.

Haba ka miet kan wan, ka wallam ha  
 ki jingmut jingpyrkhat u shakri U Blei ia ka  
 jingkular ba thiang U Blei, khnang ba un ioh  
 pyrkhat shaphang ka jingisynei jong u, kaba  
 u la pyndep ha ka jingim jong u. “Tó wat



sheptieng me, namar nga long U Blei bad me ; wat sngew ma namar nga long U Blei jong me : ngan pynshaitbor ia me : hooid, ngan iarap ia me ; hooid, ngan kyrshan ia me da ka kti kamon ka hok jong nga ... Namar ma nga U Trai U Blei jong me ngan bat ia ka kti kamon jong me da kaba ong ha me, wat sheptieng, nga ngan iarap ia me" (Isa 41 : 10 - 13).

Ha ka jingdum jong ka miet, U Blei u pynkynmaw ha uba ngeit ia kata kaba rich kaba U Blei u la dep pyntrei lyngba u shakri jong u, ia ka jingiadei bad ka jingpyndep ia ka jingithuhpaw da ka jingjia, bad ba dei ban iathuh paitbah ruh ia ka, khlem da bat shuh tang halade bad ki paralok baieit eh jong u. Shipor u lah ban ong ha ki paralok syriem kum kata ba la leh da U Jisu ha ki synran ha u lum ka jingkylladur : "Wat iathuh hano hano ruh ia kata ka jingithuhpaw" (Math-17 : 9).

Hadien pat u dei ban kohnguh ia kata ba la hukum da U Trai hi, syriem kum kata ba la leh da U Jisu ia u briew uba shongksuid ha u maw jingtep ki nong Kadara : "Khie leit phai sha la iing, to iathuh ruh ia kiba katno kiei kiei ruh ba U Blei u la leh ia me. Te u la leit nob ; u da ialap ia kata ka shnong baroh kawei ia kiba katno kiei kiei ba U Jisu u la leh ia u" (Louk 8 : 39).

**Ka miet ka wan ban ai khubor ha u nongthoh ba ka jingieit ka balang ia U Khrist ka long kajuh ka jingieit ba la pyntrei da ka jingiateh kular jong ka snam ka diengphna U Khrist ha ki riewngeit kiba ka jingieit ka jur katta katta ban shakri ia U Blei bad han bah ia ka diengphna. Ka balang kaba la mad ia ka jingieit U Khrist kam lah khlem da siew kylliang pat ia ka jingieit sha u. "To buh ia nga kum ka shap halor ka dohnud jong me, kum ka shap halor ka ksangti jong me : namar ka jingieit ka long kaba khlaia kat ka jingiap ; ka jingbishni ka long kaba runar. kum ka jingtep ; ki jingba jong ka ki long ki jingba ka ding, ka thylliej ding hi ka jong. U Trai keia. Bun ki um kim lah ban pynlip ia ka jingieit, lymne ki jingshlej kim lah ban pyniap jylop ia ka : Lada u briew un da ai ia ka spah ka Ing jong u baroh na ka bynta ka jingieit yn da niew bein khoit ia u" (Ka Jingrwai U Solomon 8 : 6, 7).**

**La ka miet ka la dep iaid shibun ha ka jingim uba ngeit, pynban u 'riewngeit' bad u 'riewialeh' jong U Trai u dang iohsngew ia ka ktien U Blei ba ai jinghun bad jingntgen ia u. "Ngan sa pyndap biang ia ka jingkhein ki sngi jong me" (Ekso 23 : 26).**

**Haba ka miet ka wan mih na ka sepsngi, ka dei ban wallam ia ka jingshondur kamera kaba na jrong ha ka dur jong u bnai uba la pyllun bha. Ym baroh ki miet ha ka jing-**

im u briew kiba mih bnai. Don ki por ha kiba u bnai u dang lung. Don ki por ha kiba u bnai u la shiteng. Hynrei don ruh ka por ha kaba u bnai u la pyllun bha. Ka jingim jong uba ngeit kam don jingmut ei ei khlem da iohi ia u bnai uba la pyllun bha ha ka por ba ka miet ka tap lup da ka jingdum suda. Ka miet ka wan rah ryngkat bad ka jingjialong jong ka por 'pyllun bnai' (Prob 7 : 20).

Kaba donkam ia u shakri jong U Blei ka long ba un duwai da kaba aiti pat ialade bad ia ki sngi ki por kiba sah jong ka jingim jong u ha U Blei.

“Ki aiom jong nga ki ha ka kti jong me”  
(Salm 31 : 15).

“Men pyni ha nga ia ka lynti ka jingim :-  
hakhmat jong me ka jingdap ka jingkmen  
ka don ; ha ka kti kamon jong me ki don  
ki jingsngewbha junom junom” (Salm 16 : 11).

“Tad ynda poi kata ka sngi,  
Haba kan khot jingtep ;  
To ai ngin mih ha burom hi,  
Ha ka sngi bym ju sep”.

---

## 13

## KA STEP RUH KA WAN

Ka miet kaba uba ngeit u la dep iaïd lyngba, kam ju kut kynsan. Shuwa ba ka miet kan kut, ka dei ban pyni ia ka jing-kynjat shai jong ka step kaba donburom, da kaba shondur ha ka suiñbneng ia ka burom khadduh jong ki khlur kiba sdien ha bneng, "haba ki khlur mynstep ki la rwai lang" (Job-38 : 7). Ka miet kam ju iaïd lait na uba ngeit khlem da pynleh ia u nongiohipaw ban kylli ha U Blei, "Hangno U Blei u Nongthaw jong nga, uba ai ki jingrwai myn-miet" (Job 3 : 10).

Ynda uba ngeit u la dep iaïd lyngba ia ka jingdum kaba la tbeh da ka jingshai bneng, u donkam ban kynmaw ia U Blei uba la wallam donburom ia u sha ka jing-phalang jong ka step phyrnai, "bad uba la dep ai ruh ia ka kular ha u : Bad ka jingim jong me kan kham phyrnai ban ia kaba shiteng sngi ; lada don ka jingdum ruh, kan long kum kaba mynstep keiñ" (Job 11 : 17).

Ka step ka wan ryngkat bad ka jingkyr-siew thiah jong Uba Donbor baroh. Namar ba U Blei u peit baroh shimiet, bad um ju khap ki khmat. U iohi na bneng ia ka jinglui lui jong u wei pa u wei 'uba khuid ka dohnud'

bad uba ap kyrmen ia ka jingiarap jong U  
ba Donbor baroh. "Uta uba sumar ia me un  
ym samthiah lymne iohthiah" (Salm 121 : 3,4).

Ka jingiohthiah basuk ba U Blei u ai ha u  
riewngeit ha ka miet, hato kam dei ka bainong  
jingkyrkhu ba un mad lypa na ka bynta ka step  
kaba bud ? "Bad men long u baskhem, namar  
ba don ka jingkyrmen ; bad men it baroh  
sawdong ia me, te men iohthiah ha kaba  
suk skhem. Men iohthiah ruh, bad ym don u  
ban pynsheptieng ia me" (Job 11 : 18,19).

Uwei ha pa uwei u riewngeit uba U Blei  
u sngewbha ban tynjuh ia u, dei ban nang  
ban pdiang donburom ia ka jingwan jong  
ka step phyrnai ryngkat bad ka 'jingmih'  
jong ka 'sngi'. Ka jingialap ktien Blei kaba  
u lah ban pyndep wat ha ka por khie thiah  
ka long ban kyrsiew ia la ki khun ki kti  
bad kiba ha iing ha sem kiba dang iohthiah  
lyngngai ha ka jingkynoi jong ka pop bad  
u soitan : U Blei uba sumar ia ka jingim u  
shakri jong u, u pyrsad da U Mynsiem jong  
u kumno ban kyrsiew thiah ia kito kiba dang  
iohthiah bad ba la shah teh shah khum ha  
u hymman : "To khie joit me uba iohthiah,  
bad to mih na ki baiap, te U Khrist un pyn-  
shai ha me" (Ephe 5 : 14)

Ka por mynstep ka wan ryngkat bad ka  
jingkyrsiew thiah na Uba donbor baroh ba  
un iashem nyngkong ia U Blei da kaba

dem khohsiew ha ka jingduwai, ban iai ap pat khnang bin iohpdiang ia ka 'Umphāiang thymmai.' "Mynstep ngan pynbeit ia la ka jingduwai ha me, bad ngan ap khmih" (Salm 5 : 3), 'Mar iaduwai mar ia jubab'. "Hyurei ia ka reng jong nga me la pynkyntiew kum ka jong u kynda : la pynsleh ia nga da ka umphāiang thymmai" (Salm 92 : 10).

"Me ia sleh ia ka khlieh jong nga da ka umphniang ; ka khuri jong nga ka shlei" (Salm 28 : 5).

Ka step ka wan rah ia ka 'mon' u nong-iatur iapom ban 'iw' bad 'kjit' ia ki 'umjer' ka 'jinglong samla' kaba mih na U Trai jong u. Ka step ka iadei bad ka 'jinglong samla' ha ka met bad ka mynsiem. La ai ia kane ka jaid jinglong samla da ka jingpdiang ia ka kular ka ktien U Biei kaba ong : "Ki brielw jong me ki aiti sngewbha ia lade ha ka sngi ka bor jong me ; ha ki jingitynnad ka jingkhuid' na ka kpoh ka step phyrngap, me don ka umjer la ka jinglong samla" (Salm 110 : 3).

Haba ka step ka wan, u riewngeit u dei ban phut noh ia ki 'sner kiba la tymmen' khnang ba ki 'sner lung' jong 'u Pukni kin mih ban san kloj kloj ha ka jingim jong u, da ka jingbsa jong ka umjer bneng. U donkam ban pynkhreh ialade nadong shadong da kaba un deng ia "ki thapāiang jong ka jingpynthymmai bor", namar sa tang shibit ka sngi ka la jan mih : "Kita kiba ap khmih ia

**U Trai kin pynthymmai bor ; kin her shajrong da ki thapñiang kum ki pukni ; kin mareh bad kin ym sngewthait ; kin iaid, bad kin ym sngewlywait” (Isa 40 : 31).**

Hadien ba u la dep deng ia ki thapñiang ka jingpynthymmai bor, u donkam ban khreh ialade ban siang ia la ki thapñiang ban her sha pyrshah bamih ka sngi. Ka ju don ka por ha kaba U Blei da ka bor najrong u ju pyniaid ia ka jingim kiba la jied jong u ‘ar kylla’. Hadien ba u briew ba kyrpang jong u u la iohi ia ka sepngi, U Blei u wallam pat ia u biang sha bamih ka sngi, syriem kum haba ka sngi ka la sep bad jah shipor ha ka jingdum jong ka miet, ka wan mih biang sha mihngi. Kumta ka ju don ka jingjia ha kaba u briew ynda u la iashem ia ka sepngi ha ka Ing ka sem la jong, U Blei pat da ka jingisynei bad jingpyniaid ba phylla jong u, kaba uno uno u briew ne kano kano ka briew kim lah ban shemphang lut ; u wallam biang ia u briew sha kaba mih ka sngi. Haba kane ka jingiaid lynti kaba sa shikylla ka wan jia ha ka jingim u briew, ka ‘khie biang’ ka ‘jinglong samla ha ka mynsiem’, lyngba ka jingieit ba aiti lut jong u lem bad ka jingpynshaitbor kaba da U Mynsiem bakhuid ha ‘u briew uba shapoh’. Hangne um don jingiapher na ka jingleh ki ‘pukni’. La ju iathuh ba ki pukni ynda ki la dap lut ki sner ha met baroh kawei, ki ju phut noh ia la ki sner, khnang ba kin mih noh

da ki sner lung. Kumta la ju ong ba ki pukni kim ju tip ia ka jinglong tymmen. Shuh shuh kaba sugewthiang ban tip ka long ba shuwa ba kan mih ka sngi ha ka por mynstep, ki pukni kiba thiah ha ki dieng hapoh sangam, ki ju wan mih noh shajrong ban peit ia ka sngi ba ka mih. Katba ka sngi kam pat mih, kim ju nang ban her. Shuwa ba ka sngi kan mih phngong, ki sdang ban 'kynthih' bad 'kyrthlap' ia la ki 'thapniang'. Hamar ba ka sngi ka la paw artad, hangta ki siang ia la ki thapniang ban her sha ka jingleit lynti kaba ki la thmu.

Ka step ka jong U Blei ka wan ban ai jingkyrmen ia 'uba hok' bad 'uba rangli'. "Nga tip ba U Trai un da ia ka kam jong u ba jynjar, bad ia ka hok jong u barangli" (Salm 140 : 12). Ka step ka jong U Blei ka wan ban plied noh ia ka pyrda kaba la tap baroh shimiet ha ka jingdum. Katba ka step kam pat wan, ka 'ingmaian bneng' ba la pynpaw ka dang long ha ka jingbuhrieh. Hynrei ynda ka step ka la wan, u "pyntip ha ngi ia ka jingmaian ka mon jong u, katba kum ka jingsgewthha jong u ia kaba u la lah thmu lypa" Eph 1 : 9).

Ka jingmut ba shisha jong ka 'step' ka shorg eh ha ka 'kambah' kaba U Blei u lah dep leh lypa ha ka jingim jong ngi ki shakri jong u. Ka kambah kaba U Blei u leh ha ka por mynstep ka long kaba la don lypa



ha ka jingiap bad ka jingmihpat U Trai jong  
 ngi U Jisu Khrist. Ha ka step jingmihpat  
 jong U Trai jong ngi, kita ki kynthai lai ngut  
 "te dangstep eh ha ka sngi nyngkong .ong ka  
 taiew, ki la iawan sha kata ka jingtep ha-  
 mar ka bamih ka sngi Ki la iakren pa-  
 ralok hi te. Uei u ban pyntyllun noh ia u maw  
 ia ngi na ka jingkhong ka jingtep? Te haba  
 ki la jngoh, ki la iohi ba la lah pyntyllun  
 noh ia uta u maw; naba u la long u ba-  
 khraw eh" (Mark 16 : 2-4).

Lada ngi ngeit ia U Jisu uba la iap ha-  
 lor ka diengphna na ka bynta ki pop jong  
 ngi, ngi dei ban ngeit ruh ia 'ka jingtep ka-  
 ba thylli.'

U Blei u lah dep leh lypa ia ki kambah.  
 U lah dep jubab lypa ia ki jingduwai. Hlooid,  
 u lah dep pdiang lypa ruh ia ki kam jong  
 ngi. U kysiew ia u shakri jong u ha ka por  
 mynstep, u ong :— "To khie me, bam la u  
 kpu da ka ba kmen, bad dih la ka waiñ da  
 ka dohnud ba sngewkmen; namar U Blei u  
 la pdiang lypa ia ki kam jong me. To ki jaiñ  
 jong me kin long lieh borabor; bad ka khlieh  
 jong me to kan ym duh jingsleh" (Ekle 9 : 7, 8).

## 14

***“NAMAR KATA PHI TO PYNDON BUROM  
IA U TRAI HA MIHNGI” (ISA 24:15).***

---

Ha u nongthoh, ka liang ‘sepngi’ ka kdew ia ka jingkut jong ka ‘jingkyrkhu kaba nyngkong’ Kane ka sepngi kam ju pep ban pyngkie ia ka jingim briew ha ka Jordan bah. Pynban U Blei da ka jingpyniaid bastad bad badonbor jong u, u wallam ia uba ngeit sha ka liang ‘mihngi’ khnang ban pynmad ha u pat ia ka ‘jingkyrkhu kaba ar’.

Ka jingim u riewngeit ha kane ka pyrthei ka long ka ‘jingiaid pilgrim’. Bunsien u briew um ju sngewthuh ia ka ‘jingthmu’ kaba maian bad baphylla jong U Blei. Ngi shu shim ia ka ‘jingtynjuh’ ba U Blei u ai ha ngi tang kum ka kynja jingsneng ia ngi. Hynrei ngi klet pat ban sngewthuh ba U Blei u long u bym niew shilliangkhmat. Kumta ong ka ktien U Blei. “Hynrei U Blei U long uba lah ban shaniah, u ban ym shah ba yn tynjuh ia phi tam ia kata ia kaba phi lah, hynrei ryngkat bad kata ka jingtynjuh un thaw ruh bad ia ka lad ban lait, khnang ba phi lah ban shah ia ka” (1 Kor 10 : 13). U Blei ym tang ba u lah dep pyngkhreh lypa ia ka jingtynjuh, hynrei u la dep pyngkhreh ruh ia ka lad ban lait. Ym don ka jingkmen kaba kham khraw palat ia kane, ba U Blei

u wan ban jngoh ia ngi ha ka por mynstep da ka sngi kaba dang mih. Hadien ba ngi la dep iaid lyngba ka miet ba iong ba kah dum, U Blei u wallam ia ngi sha ka liang ba mih ka sngi. Kam biang ia u riewngeit tang ba un shu iohi ia ka sngi ba ka mih, hynrei u dei ruh ban da leit iakynduh ia ka ha mihngi. Ngim dei ban klet ba ka burom U Blei ka don ym tang ha ka liang sepngi, hynrei ka don ruh ha ka liang mihngi. Namar ba ki 'pud sawdong' ka pyrthei baroh ki long ki jong u, kumta ruh ka burom jong u ki don ha baroh sawdong ka pyrthei. Hangno hangno ha kaba ki don ki khun U Blei, hangta ruh ka burom U Blei ka don hangta. "Bad u jong me u long kum ka dewmet ka khyndew, bad men sa pait saphrang noh sha sepngi, bad sha mihngi, bad shatei, bad shathie : bad ka ha me yn long ba la kyrkhu ia ki jaidbynriew baroh ka pyrthei bad ha u symbai jong-me" (Jen 28 : 14).

Ka burom U Blei ka don ym tang ha ka ri mihngi, hynrei ka wan iaid wan mih ruh na ka liang mihngi. U Esekial u nongiathuh-lypa, u la phla shisien shaphang kane ka jingmaian ka burom kaba don shaphang mihngi. "Hadien kata u la lam ia nga sha ka khyrdop, keiñ kaba phai 'shaphang mihngi' bad ha khmih, ka burom U Blei ki Israel ka la wan na ka lynti mihngi : bad ka ktien jong u ka ka long kum ka jingsawa shibun ki um : bad khyndew ka la tyngshaiñ da ka burom jong u" (Esek 43 : 1, 2).

Ka ri mihngi ka lah don lypa ki riewstad. Ka burom jong' ka ri mihngi ka long ka bym kai. "Haba la kha ia U Jisu ha Bethlehem Judia, mynba U Herod u long Syiem, ha khmih, la wan ki riewstad na mihngi sha Jerusalem, ki da ong, hangno uba la dang kha shen U Syiem ki Jiw? naba ngi la iohi ia u khlur jong u ha ka ri mihngi, bad ngi la iawan ban mane ia u" (Math 1: 1, 2).

Namar ba ka pyrtthei ka long kaba pyllun, ka lynti mihngi ka dei ban iashem ia ka lynti sepngi, kumjuh ruh ka lynti sepngi ka dei ban wan iakynduh ia ka lynti mihngi. Ka jingiaid lynti sha mihngi, ka dei ka jingiaid lynti jong uba ngeit ba U Blei u la dep pynkhreh lypa. Ngin ym lah ban shu leit lynti lynda U Blei najrong u la pynbiang pynbeit lypa. Ka la jia shisien kumta ba U Blei u la ong ia u Jakob. "Bad ha khmih, ma nga nga don lem bad me, bad ngan ri bha ia me hangno hangno ruh kat shaba me leit, bad ngan ialam biang ia me sha kane ka ri; naba ngan ym iehnoh ia me, tad ynda nga la lah pyndep ia kaba nga la ong ha me" (Jen 28: 15).

"Te u Jakob u la nang leit la ka jingleit bad u la leit poi sha ka ri ki khun ka 'ri mihngi'. Bad u la khmih, te hakhmih kawei ka pukri ha ka lyngkha, bad ha khmih, la don lai ki kynhun langbrot kiba dem hajan jong ka; naba na kata ka pukri ki la ju ai um ia kita ki kynhun langbrot: bad la don u

**maw bakhraw ha ka shyntur kata ka pukri (Jen 29. 1, 2).**

**“Katba u dang kren bad ki, ka Rakhel ruh ka la wan bad ki langbrot u kpa jong ka : naba ka la ju sharai ia ki. Ka la jia ruh, haba u Jakob u la iohi ia ka Rakhel ka khun u Laban u hymen ka kmie jong u, bad ia ki langbrot u Laban u hymen ka kmie jong u, ba u Jakob u la shur hajan, bad u la pyntyllun noh ia uta u maw na ka shyntur ka pukri, bad u la ai um ruh de ia ka kynhun langbrot jong u Laban u hymen ka kmie jong u. Bad u Jakob u la doh ia ka Rakhel, bad u la kyang, bad u la iam de. Bad u Jakob u la iathuh ha ka Rakhel ba u long u para u kpa jong ka, bad ba u long u khun ka Rebekka : ka te ka la phet soit ia ka ban iathuh ha la u kpa. Ka la jia ruh, haba U Laban U la bna shaphang U Jakob u khun ka para jong u, ba u la phet soit ban tan ia u, bad u la kdup ia u, bad u la doh ia u, bad u la ialam ia u sha iing. Bad u Jakob u iathuhkhana ha u Laban ia kine kiei kiei baroh. Te u Laban u la ong ha u, shisha me long ka shyieng, bad ka doh jong nga. Te u la shong bad u shi bnai (Jen 29 : 9-14).**

**Ka jingpyndonburom ia U Blei ha mihngi ka mih na ka jingiohpdiang ia ‘U Mynsiem ka jinglailuid’. Ia ka jinglailuid U Mynsiem la ai da U Blei hi. Haba don U Mynsiem, hangta don ka jinglailuid. Kum-**

ta ong ka ktien U Blei : "Namar kata myn-  
ta, ym don ka jingpyaren ia kita kiba ha U  
Khrist Jisu, ki bym iaid katba kum ka doh,  
hynrei katba kum U Mynsiem" (Rom 8:2).  
"Hynrei lada uno uno ruh um don U Myn-  
siem U Khrist, uta kein um long u jong u"  
(Rom 8 : 9).

Dei ha mihngi ruh ba ngin pyndonburom ia  
U Blei. Ka bor ka jong U Blei ka don ha  
mihngi. Uno uno u shakri jong U Blei uba  
kohnguh ia ka jingkren jong U Blei u dei  
ban phai sha mihngi da kaba wad ia ka bor  
ka jong U Blei. Ka la jia shisien kumta ba  
u Elisha u nongiathuhlypa jong U Trai shu-  
wa ba un iap, u la hukum ia u Joash u  
syiem Israel, ban siat ia ki khnam shaphang  
mihngi, khang ban ioh ia ka jingjop halor  
ki Syria. "Te U Elisha u la ong ha u, To  
shim ka ryntieh bad ki khnam :- bad u la shim  
ha u ka ryntieh bad ki khnam. Te u la ong  
ha u Syiem Israel, To buh ia la ka kti ha  
ka ryntieh : te u la buh ia la ka kti. Bad U  
Elisha u la buh ia la ki kti halor ki kti u  
Syiem. U la ong ruh, To plie ia ka jingkhong  
it kaba shaphang mihngi bad u la plie ia ka.  
Ynda kumta U Elisha u la ong, To siat, te  
u la siat. U ong te, u khnam ka jingjop U  
Trai, u khnam ka jingjop halor ka Syria keñ.  
Naba men pom ia ki Syria ha Aphek, ha ban da  
me la pynduh noh ia ki". (2 Syiem 13 : 15-17).

'Ka ryntieh' bad 'u khnam' ki long ki  
jong U Trai, syriem kumba ka 'kot sada' bad

u 'khulom' ki long ki jong U Trai. Uwei pa uwei u 'riews'hlur jong U Trai' un pyndonkam ia ki tang da ka 'jingiathuhlypa jong U Trai'. Tang ha ka 'kyrteng U Trai' ngin siat ia 'U kbnam jong ka jingjop'. Ka jingjop ka long ka jong U Trai. Haba U Trai u ia ai ha ngi ka jingjop, ka dei sa tang ba ngin pyndonburom ia u. Ka jingpyndonburom jong ngi ka long ha ki met bad ha ki mynsiem jong ngi. Ngin pyndonburom ia u bad ka burom baroh ka dei ban leit tang sha u. U Blei u dang kylli ia ngi ki shakri : hangno ka burom ka shong bad da kumno ngin pyndonburom ia u. ? "Hato phim tip ba kata ka met jong phi ka long ka lingshong U Mynsiem Bakhuid uba hapoh jong phi, ia uba phi la ioh na U Blei, bad ba phim long la ki jong hi ? Namar la thied noh ia phi da ka dor bah : te namarkata, to pyndonburom ia U Blei ha ka met, bad ha ka mynsiem jong phi, kiba long ki jong U Blei" (1 Kor 6 : 19, 20).

Ha ka 'sepngi' jong ka jingim jong ngi, ki ummat ki dei ban jaw. Ha ka 'mihngi' jong ka jingim jong ngi pat U Blei u niad noh ia ki ummat jong ngi.

"Ka ong ha nga, to leh sngewbha,  
 To niad la ki ummat;  
 To shaniah skhem ruh to wat tieng,  
 Me ba ju khuslai sat".

---

## KA JINGPYNKUT

Ka jingithuhpaw kaba U Blei u la ai ha u nongthoh ha ka jingphohsniew ha ka 23 tarik u Naitung, 1937 kam don jingmut lynda la buh riang ia ki jingbatai ha ka rukom kaba shai. Namar ba ka jingithuhpaw ka kren ia kaei ka ban dang long dang jia, kan long ka jingkmn shikatdei ha ka jingshai ba kynja mynsiem, ba kane ka kot kan ym pynsah ia u nongthoh bad ki nongpule ha ka jingdum, hynrei kan ioh ia ka jingpyndep kaba long ra U Blei bad ym na u soitan.

Ia kaba 'nga la thoh la thoh' (Ioan 19: 22), bad ym lah ban pynkylla ne pyndam. Ym don kawei pat kaba kham pynkmen ia ka mynsiem u 'Riewtrei shitom' bad kata ka long ba un i hsgew ia kajuh ka kyntien na U Mynsiem U Blei ia kaba la kren da U Jisu Khrist hi haba u ong. 'Hynrei ia ki jingthoh donkam ba yn pyndep' (Mark 14 : 49).

U Blei u long u sakhi ia u nongthoh katba u dang thoh. U Blei u lah ban pynmih bun ki sakhi ha kane ka por katba ki nongpule ruh ki dangpule ia ka. Hynrei ka sakhi kaba shai tyngkrein kaba U Blei u lah dep buh lypa ka long kane ka kot baroh kawei, kaba u nongthoh um lah ban thoh ha ka jingstad briew, lynda U Blei u pyrsad da U Mynsiem ha u.



Ka kot ka long ka sakhi ia ka jing-ithuhpaw bad ka jingjia, hooid ia ka jing-pyndep ruh. Kaba tei ia ka duwan jingknia ryngkat bad kaba pynlong ia kawei ka Kitab ki long 'ki sakbi' kiba U Blei u ju pdiang hun, kumba U Laban u la kren da kaba khuid mynsiem ha u Jakob.

"To khmih, U Blei u long u sakhi hapteng jong nga bad jong me. U Laban u la ong ruh ha u Jakob, Hakhmih ia kane ka kynton, bad hakhmih ia une u mawbynna, ia kiba nga la pynieng hapteng jong nga bad jong me. Kan long ka sakhi kane ka kynton, bad un long u sakhi ne u mawbynna ruh de, ba ma nga ngan ym laid palat ia kane ka kynton maw sha me, bad ba ma me ruh men ym laid palat ia kane ka kynton maw bad ia une u mawbynna sha nga, ia ka ban pynsniew keiñ" (Jen 31 : 50-52).

U nongthoh u dang don shibun kiei kiei ban thoh ha ka jingiadei bad kane ka Kot. Pynban kam don jingmyntoi ei ei ban thoh, namar ka ktien U Blei hi ka long ka kitab kaba kham khraw na ki kitab baroh. Kaba donkam ia u nongthoh bad u nongpule ka long ban shah sbkor ia ka jingsneng, kumba u Eklesiastis u nangiathuhkhana u la dep maham lypa :—

"Bad nalar kane putet : Ko khun, to shah ia ka jingsneng : ban thaw shibun ki Kitab ym don ka bakut ; bad kaba pule shibun ka pynthait ia ka doh. Kane ka long ka jingkyllum ; ia baroh la iohsnegew : sheptieng ia U Blei, bad

sumar ia ki hukum jong u ; namar kane baroh ka long ka kamram u briew. Namar U Blei un wallam ia ka kam baroh ha ka jingbishar, bad ia kiei kiei baroh ba la buhrieh, la ka long kaba bha lane kaba sniew" (Ekle 12 : 12-14).

"Namar nga tip tang katto katne, bad ngi iathuhlypa ruh tang katto katne ; hynrei ynda kata kaba janai kan poi, ynda kumta yn pyndam noh ia kata kaba tang katto katne" (1 Kor 13 : 9. 10).

"Hynrei yn ym don ka jingkahdum ia kata kaba la don ha ka jingpisa" (Isa 9 : 1).

"Katba kum ka jingngeit jong phi kan long ha phi" (Math 9 : 29).


"Ia ka jingithuhpaw la pynpaw,  
Ia ka jingithuhpaw la thoh ;  
Ha ki lyngkniapmaw la pynshai,  
Ba uta uba phet u lah ban pule.  
Ka jingithuhpaw ha ka jingphohsniew,  
Ka thew ia ka por ba la buh ;  
Imat ka pynkloi sha ka bakut,  
Kan ym lamler la ka pynslem ruh ;  
U nongiohipaw bad u nongpule ki  
donkam ban ap.

Naba kan poi shisha, kan ym pyntud.

"Ki jingbatai kim dei ki jong U Blei mo ?  
(Jen 40 : 8).

"To sngap, bad to tip ba nga jong U Blei ma nga" (Salm 46 : 10).

"Namar ba Blei un sa pynkloi ban leh ia kata" (Jen 41 : 2).





**"Shuwa** ba ka jait bynriew Khasi-Pnar kan jah noh na sla jong kane ka pyrthei,

**Shuwa** ba ka longbriew manbriew, ka long-iing longsem, ka longkur longjaid bad ka longkha longman u Khasi Pnar kin dam noh ha ka ri jong ka jingklet,

**Shuwa** ba u Trai jong ngi un wan ban shaw noh ia ka Balang bakhuid,

**Shuwa** ba kan kut noh ka jingialap ia ka Khubor babha jong ka jingpynim,

**Shuwa** ba kan wan ka kordit bah.

**Shuwa** ba kan wai noh ka pyrthei,

**Shuwa** ba kan poi ka jingbishar ba khadduh,

**Nga dei** ban trei dep ia ka jingialap ia ka Gospel da ki jingthoh hapdeng ia ka jait bad ka kynja la jong."

Pastor  
Langstarley Dkhar